

АБДУЛЛА ОРИПОВ

ТАНЛАНГАН АСАРЛАР

Faafur Fulom nomidagi Adabiyot va san'yat nashriyoti
Toshkent — 2000





**ТАНЛАНГАН
АСАРЛАР**

ТҮРТ ЖИЛДЛИК

**БИРИНЧИ
ЖИЛД**

Шеърлар ва достонлар

Фафур Фулом номидаги Адабиёт ва санъат нашриёти
Тошкент — 2000



Ўз2
О-68

Таҳрир ҳайъати:

О.Шарафиддинов, М. Кўшжонов, Э. Воҳидов, Х. Султонов,
Р. Ш. Шоғуломов, М. Юсуф, К. Норматов

Тўплаб нашрга тайёрловчи ва сўнгсўз муаллифи
Дониёр Бегимқулов

О 4702620202-69
М 352(04)-2000 режага қўшимча, 2000

ISBN 5-635-01920-X

© Абдулла Орипов,
Faфур Fулом номидаги
Адабиёт ва санъат нашриёти, 2000 й.

КҮРГАН-БИЛГАНЛАРИМ

Менинг туғилиб ўсан, болалигим ўтган жойлар Қарши (қадимги Насаф) шаҳридан беш-үн чақирим шимолроқ томондаги Кўнғиртов этакларидир. Кўнғиртов дегани у ерда дов-даражат йўқлиги, кўринишининг кулранг-кўнғир тусда бўлганлигидандир. Кўнғиртовда ягона шўр сувли булоқ бор, уни Кўтирубоқ дейдилар. Чунки, унинг шўр, тузлик сувидан одамлар турли дардларига шифо топиб юрадилар. Геолог дўстларимизнинг айтишларига қараганда у ниҳоятда эски тоғнинг қолдиги, чўкиртаклари экан. Бу тоғнинг нариги томони Самарқанд, бериги томони Бухорои шарифга юз тутиб турибди. Боболаримизнинг айтишича, қайси бир замонларда Навоий бобомиз Самарқанддан Бухорога ана шу Кўнғиртовни ошиб ўтган эмишлар. Албатта, бу гаплар халқнинг хотирасида ўқтинг-ўқтинг чақнаб турадиган хаёл учқунлари бўлиши мумкин.

Қишлоғимизнинг номини Некўз дейдилар. Унинг маъносини мен яхши билмайман. Ҳар ҳолда у қадими ўзбек уруғарининг бир шохобчаси бўлиши мумкин. Дарвоҳе, Амир Темур бобомизнинг оналарини Некўзбегим ҳам деганлар.

Ота тарафдан катта боболарим Норбой бобо, Боймурод бобо, Убайдулло боболар бўлишган.

Ундан кейин менинг отам Ориф бобо. Она тарафимдан бобомни Эрдона карвон деганлар. У киши чамамда, қандайдир карвончилик билан машғул бўлган.

Қишлоғимизда сув ниҳоятда тақчил эди. Қашқадарёдан тортиб келинган иккита ариқ бўлиб, бирини Хомариқ (Хонариқ ҳам бўлиши мумкин), иккincinnisinи Фаданг дейишган. Фаданг арабча сўз, маъноси ёйнинг ўқини билдиради. Гўё Қашқадарё эгик камон бўлса, Фаданг ундан отилган ўқ каби. Лекин бу ариқларга сув жуда қийинчилик билан чиқар, шу сабаб одамлар ариқни тинимсиз чуқурлаштиргани-чуқурлаштирган эди. Бу жараённи ҳайров дер эдилар. Сув етарли жойда албатта у-бу нарсалар экиларди, тоғнинг этаклари лалмикор ерларда эса асосан буғдой, арпа этиштириларди. Аёнким, бу поёнсиз қирадирларда чорва кўп эди. Туя, йилқи, кўй дегандай. Кудукларнинг суви батамом шўр, ичишга яроқсиз. Лекин уни негадир мол-ҳол ичиб юраверарди. Айниқса, баҳор пайтларида бу ер-

ларга ёғин кўп тушар, Қўнғиртов этаклари минг хил ўт-ўлан, чучмомаю қизгаaldoқлар билан, қуёntüпигу исмалоқ билан, каррагу ҳазориисфанд билан, қўзигуллар билан қопланар, атроф-теварак жаннатий бир манзара касб этарди. Сел сувлари тўпла-ниб қолган кичик-кичик кўлларни “қоқ” дейишарди. Унинг тоза сувини одамлар ташиб ичишар, бола-бақра чучмомаю ис-малоқ, замбуурug териб, Қўнғиртов этакларида кунларини кеч қиласар эди. Бу ерларга баҳорда турна тушарди. Турналар ўт-ги-ёхларни териб сб, қўй-қўзиларнинг орасида бемалол, беҳадик юраверишарди. Шунингдек, Қўнғиртовда у пайтлари кийик кўп эди. У кийикларнинг зоти, кейин билишимча, хонгули экан. Улар ҳозир Бухоро атрофидағи қўриқхонада сақланиб қолган. Емиши бор эди шекиллик, бўри, тулки, шақол ҳам кўп эди бу жойларда. Кейинчалик, атроф-теваракни одамлар ишғол қилиб олишгач, ёввойи ҳайвонлар ўз-ўзидан йўқолдилар. Турналар, лайлаклар келмай қўйди. Кийикни эса ҳазрати Инсоннинг ўзи еб битирганига ўзим гувоҳман.

Отам раҳматлик колхозда раис бўлиб ишлар,райкомнинг котиблари қишлоғимизга тез-тез ташриф буюришиб, усти очиқ газик машиналарда кўпинча тунда кийик овига чиқишаради. Кийик жонивор кечаси қоронғида машина ёруғига рўпара келганда кўзи қамашиб жойида таққа тўхтаб қоларди. Ана ўшанда уни отиб олсаям бўлади, тутиб олсаям бўлади. Эсимда, бир сафар ўша котиблардан бири овга чиқиб, ўн иккита кийикни отиб, машинага босиб келишган эди. Улардан биттасини уйда қовуриб ейишди. Кийикнинг гўшти қизғиш бўлиб, фоятда иссиқликдир.

Ўшанда онам раҳматлик ҳалиги овчи котибларни ўзича ўкиниб-ўкиниб қарғагани ҳамон ёдимда. “Нафсингга ўт тушур, кийик есанг биттасини е, ўн иккитасини ўлдириб нима қиласан?”, дерди онам. Улар қолган кийикларни машинага босиб, шаҳарга кетишарди.

Ўша Қўнғиртовда бизнинг болалик йилларимиз ўтган. Баҳор келганда ҳавони ўт-ўланнинг ёқимли хушбўй ҳиди қоплар, шаррос ёмғир қуйганда биз тоғ чўққиси унгуридаги кичик-кичик горларга бекиниб олардик. Ўша юксакликдан шимол тарафдаги ям-яшил бепоён кенгликларни томоша қиласар эдим, тўйиб-тўйиб нафас олар эдим. Айниқса, бу жойларда жануб кечалари, юлдузли осмон ниҳоятда гўзал бўлар эди. Тим қора осмонда қўл чўзсанг етгудек улкан-улкан новвотранг юлдузлар чараклаб туради. Ҳаётимда бундай гўзал манзараларни кейин учрата олмадим.

Кишлоғимизда кудуқ суви ичишга яроқсизлигини айтиб ўтдим. Биз чучук сувни тўрт чақирим наридаги Эшонқудуқ деган қишлоқдан ташиб келар эдик. Эшакка тўртта кўзани кажава қилиб ортиб олардик. Кўзалар бир-бирига тўқишиб синиб кетмаслиги учун алоҳида ёғоч қолилларда жойлаб қўйиларди.

Бу қолипларнинг яна бир яхши томони шуки, кўзанинг дастаси синиб мўндиға айланиб қолганда ҳам уни қолипга жойлаб, бемалол ишлатавериш мумкин. Бир кунда икки маҳал сувга чиқардик, айниқса саратон кунлари Эшонқудуққа қатнаш жуда зерикарли бўларди. Юрагим сиқилиб кетганидан бир нималарни минғир-минғир тўқиб, ўзимни овутгардим, шекиллик.

Энди гапни берироқдан бошласак, бу дунёning воқеа ва ҳодисалари хотирамда тўрт-беш ёшларимдан бошлаб қолган. Урушдан қайтмаганларнинг азалари-ю, қайттан майиб-мажруҳ қишлоқдошларимнинг қўлтиқтаёқни тўқиллатиб юрганлари эсимда. Очарчилик, одамларнинг кунжара еганларини кўп кўрганман. Балки вақти-соати етиб, мен бу кечинмаларимни батафсил ёзарман. Чунки ҳозир мана шу саҳифаларга сифмайдиган ранг-баранг хотираларим жуда кўп.

Биз оилада тўрт ўғил, тўрт қиз ўсганмиз. Акаларим Бухоро, Тошкент олий ўқув юргларида тил-адабиёт факультетларида ўқишаради. Табиийки, улар кўтариб юрган китобларнинг аксарияти бадиий адабиёт намуналари эди. Менинг аллақачон саводим чиқсан, китобларни шариллатиб ўқий олардим. Мен бугунги кунда foятда ажабланиб шуларни эслайман. Негадир болалигимда хотирам ниҳоятда кучли эди. Бир ўқиганим эсимда қолаверар эди. Радио, телевидение ёхуд бошқа томошалар бўлмаганидан кейин эрмагим китоб эди-да. Дуч келган нарсанни ўқиб, дуч келган нарсани ёдлаб олардим. Бу китоблар орасида халқ достонлари ҳам, Навоий бобомизу Пушкиндан таржималар ҳам,Faфур Фулом, Ҳамид Олимжон шеърияти ва яна бошқа кўп рўмону қиссалар бўларди. Дарвоқе, қиши кунларида тўйларга қўшни туманлардан номдор бахшилар келиб, тонг отгунча достон айтишарди. Биз болалар бахшини тинглай-tingлай бир-биримизга биқинишиб ухлаб ҳам қолар эдик. Янглиш масам, ўшандада Умур шоир деган бахшининг достонларини кўп эшитганман.

Бир қўшнимиз foят покомон Камолхон эшон деган киши бўларди. Раҳматликнинг онасини Биби момо дердилар. Билмадим, улар балки Каттақўрғон ёқлардан келиб қолишган. Биби момо ўта даражада саводхон буви эдилар. Онам раҳматлика эргашиб, уларнинг суҳбатига қатнашиб қолардим. Биби момонинг катталиги сандалдек келадиган китоби бор эди. Китобни Навоий-китоб дердилар. Биби момо Фарҳоду Ширин, Лайлию Мажнунларни чунонам қироат билан ўқирдики, маъносини кўпам тушунмасам ҳам қироатдан маза қилардим.

Энди биринчи шеърлар ёза бошлаганимга нима туртки бўлганини аниқ билмайман. Ҳар ҳолда сўзларни қоғиялашга ишқибоз бўлиб қолганим эсимда. Балки зерикканимдан, балки завқим тошиб, ниманидир ёзгим келаверарди. Фикр эса йўқ. Ёзмасликнинг ҳам иложи йўқ. Шунинг учун она, ота, мактаб,

бригадир Нодир каби гапларни ўзимча шеърга солиб айлантириб юрардим. Ундан ташқари, яна бир қизиқ деталь. Мендан катта акам, ҳозир у қишлоқ хўжалиги соҳасида профессор, шеър ёзиб, муттасил болалар газетасига жўнатиб турарди. Газетадан келган жавоб хатини акамга билдирамай ўқирдим. Хатда жумладан бундай гаплар ёзилган бўларди: “Абдураззоқжон, шеърингизнинг мавзуи яхши, лекин қофия-туроқлари чатоқ ва ҳоказо”. Кейин мен қофия-туроқни ўрганиш учун роса китоб титардим. Акам бўлса, унга келган жавобни ўқиганимдан бехабар, мен қайта елимлаб кўйган конвертни очиб ўқир, “нима ёзибди” деб сўрасам, жаҳл билан “ишинг бўлмасин” деб хатни бурда-бурда қилиб йиртиб ташлар ё бўлмаса ёқиб юборарди.

У маҳаллардаги менинг шеърларим мавзу тарафдан ҳам, шаклий жиҳатдан ҳам, албатта, тақлид эди. Ўқиган шеърларимда ҳамма шоир асосан Сталин, Москва, Кремль ҳақида ёзишарди. Мен ҳам “ё бисмилло” деб ўшаларни куйлай бошлаганман. Бир куни хонадонимизга район раҳбарлари меҳмон бўлиб келишди-ю, чамамда мусалласхўрлик ҳам қилишди. Уларнинг баъзилари менинг шеър ёзиб юрганимдан хабардор экан шекилли, дафъатан чақириб, менга “шеър ўқи” деб қолишиб. Мен “Кремль деворлари” деган шеъримни тантанали равишда ўқидим. Яқинда юз ёшни қоралаб қазо қилган Ҳамроқул ота Мамедов эди шекилли (ўшандадарайижроқўм раиси), кайфияти баландмикан, дадиллиги қўзиб, “Ўғлим, ўзинг Кремлни кўрганмисан?” — деб қолди. Мен “йўқ” дедим. У киши “бўлмаса кўрмаган нарсангни бундан кейин ёзмай!” — деб қолди. Ўшандада еган дашномим менга ҳозиргача дарс бўлиб келаётир.

Мактабни олтин медель билан битирдим. Акаларим турли шаҳарларга ўқишига кетиб қолгани учун отам мени қўйиб юборгиси келмади. Бу орада Зарафшондан Эски Ангор канали қазилиб, қишлоғимизга бир дарё сув оқиб келган, одамлар катта қувонч билан боф-роғлар яратишга киришиб кетишган эди. Бизнинг бофимизда эллик тупдан ортиқ сархил олма навлари, узуму анжир ва бошқа мевали дараҳтлар гуркираб ўсиб, мўлмўл ҳосил бериб ётарди. Отам белкурагу кетмонни кўтариб, бофни парвариш қилар, мен отамга доимий ёрдамчи эдим. Хуллас, 1958 йил Тошкент Давлат университети филология факультетининг журналистика бўлимига келиб қолдим.

Шеърларим аввал туман, вилоят газеталарида босилиб турган бўлса-да, биринчи марта республика болалар газетасида “Кушча” деган шеърим босилиб чиқкан. Мен шеърим чиққан кун бу газетани “Тўқимачилар саройи” кинотеатрининг “Қизил бурчаги” да кўриб қолганман. Бу орада қанчадан-қанча шеърларим, тўпламларим чоп этилди. Бироқ, илк шеърим босилиб чиққан ўша дақиқалар, унинг қувончи сира-сира эсимдан чиқмайди. Балки бу ҳам адабиётдаги биринчи муҳаббат нашъасидир.

Университетда адабий жараён фоятда қизғин эди. Адабиётимизда из қолдирған ва қолдираётган күпдан-күп ижодкорлар ўша йиллари дорилғунуннинг турли курсларида таҳсил олишарди. Барчанинг номини санаб ўтиришм шарт эмасдир. Улар ўзлари ёзган таржимаи ҳолларидан билиб оларсиз.

Факультетимизда адабиёт тұғарғы муттасил фаолият күрсатарди. Озод Шарафиддинов, Матёкуб Қўшжонов каби устозларимиз биз билан соатлаб машғулот олиб борарадилар. Айниқса, Озод Шарафиддинов жуда дадил эди. Москвада бирор асарни қоралаб қолишиша, ўша асарни дарҳол ўқиб-ўрганиб, ўзимизча баҳосини берардик. Масалан, бадном қилингандар Борис Пастернак ҳақида “у ёмон шоир эмас”, деган хуносага келганимиз.

Шеърларим матбуотда тез-тез босила бошлади. Озод аканинг “Оқ йўли” билан “Шарқ юлдузи”да шеърларим чиқди. Ёзувчиликар уюшмасидаги мушоиралардан бирида “Муножотни тинглаб”, “Бургут” деган шеърларимни ўқидим, ўша куни Абдула Қаҳҳор назарига тушдим. Миртемир домла атрофида кўп шогирдлари қатори сабоқ олдим. Шайхзодадек донишманд устозга эргашиб, у киши шеър ўқиган минбардан мен ҳам шеър ўқидим. Эсимда, Эски шаҳардаги ҳозирги “Турон” кутубхонасида ўқиган шеърларимни тингловчилар жуда илиқ кутиб олдилар. Учрашувдан қайтаётганимизда Шайхзода домла билагимдан тутиб, “Шоир, сизга битта гапим бор. Эҳтиёт бўлгайсиз, ишқилиб қарсаклардан талтайиб кетмасангиз бўлгани”, деган. Бу гаплар ҳам менинг қулоғимга қўроғиндан қўйилиб қолди.

Бу орада китобларим кетма-кет нашр қилинди. Устоз Fafur Fулом қатнашган давраларда шеърларини ўз оғизларидан неча-неча бора эшилдим. Бир сафар Fafur aka елкамга қоқиб, “Кеча телевизорда шеър ўқиган бола сенмисан. Ёзавер, ўғлим” деганларини ҳеч қачон унутмайман. Ва ниҳоят, бир куни мени Ойбек домла йўқлаётганини айтиб қолишиди. Бу улуг зот беморроқ бўлганлари сабабданми ёки салобатлари фоят буюклигиданми, хонадонларига ҳар қандай қаламқаш юрак ютиб боролмас, баҳайбат чўққига боққандай домлани узоқроқдан томоша қилиб юрардик. Ойбек домла билан учрашувларимни ҳамда кечирган ҳаяжонларимни қофозга туширсан бир рисола бўлар. Домлага “Арманистон” деган шеъримни ўқиб берганимда “ингичка, ингичка”, деб қўйганларини эслайман. Бу хитоб шеърингизда нозик қочиримлар бор дегани бўлса керак, деб ўйлайман. Ойбек домла кейинги сафар чорлаганларида қўлимга Ўзбекистон Ёзувчилар уюшмасига аъзоликка тавсия қофозини тутқаздилар. Иккинчи тавсия Миртемир домладан келди. Шу йўсинда уюшмага Комил Яшин раисликларида аъзо бўлиб кирдим.

Сўнг турли матбуот идораларида хизмат қилдим, катта-кичик мукофотларга, ҳалқ шоири унвонига сазовор бўлдим. Мус-

тақијлил үйларимизнинг буюк инъоми Ўзбекистон Қаҳрамони унвонига ҳам лойиқ топишиди. Мустақил Ўзбекистоннинг биринчи Давлат мадҳияси матнини ёзишга мушарраф бўлдим. Асосий иш фаолиятим ижод ва ижодий соҳага тегишли хизматлар билан ўтаётир.

* * *

Энди очигини айтганда, камтарингина бир ижодимиз борлиги учунгина юқоридаги таржимаи ҳолимизга эҳтиёж сезилипти. Демак, энди асосий гап ижод атрофида бўлмоғи лозим. Энг аввал шуни уқтириб айтмоғим лозимки менинг деярли ҳар бир шеърим ҳаётдаги маълум бир воқеа, ҳодиса билан боғлик, жўнроқ қилиб айтганда, ҳар бирининг турткиси бор. Масалан, “Аёл” деган шеърим урущдан қайтмаган амакиларимнинг беваларига бағищланган. Мен уларнинг изтиробларини кўриб, кузатиб улғайганман. Ёхуд “Ўзбекистон” қасидасининг ёзилиши-чи? Бунинг ёзилишига нима туртки бўлган, дейилиши мумкин. Гап шундаки, Ватанинг бутун Совет Иттифоқи, деб уқтириб турилган бир пайтда, менга Ўзбекистон нима бўлди экан, деган савол юрагимнинг тубида пайдо бўлиб, ҳойнаҳой, “Ватаним — Ўзбекистон” деб шеър ёзган бўлсам, тилимизнинг ҳар қадамда ерга урилаётганини кўриб “Она тилимга” номли шеърни ёзганман. Ишхонамиз ёнида бир сассиқ ҳовуз бўлиб, унда уч-тўртта тилла балиқ оғзини каппа-кашпа очганча ўлар ҳолда кун ўтказарди. Бошқа шоирлар қатори ўша балиқларнинг ҳолига ачиниб, мен ҳам “Тилла балиқча” деган шеър ёзив, балога қолганман. Эмишки, сассиқ ҳовуз деганда совет тузумини назарда тутганман. Демакким, ҳақиқатан ҳам бир гап бор эканки, арқон уларнинг кўзига илон бўлиб кўринибди.

Ҳозир ўтган йиллар бутун нуқсонлари билан кўзга ташлашиб, танқидга учраб турган бир даврда ўтган замондан жабр кўрган “қаҳрамонлар” ҳам оз эмас. Баъзан ўша замонларда қамалган оддий киссанув ҳам ўзини замондан ноҳақ жабр кўрган зот, деб эълон қилишни хуш кўради. Лекин собиқ мафкурадан, собиқ сиёsatдан ҳақиқатан озор чекканлар кўпчилиқдир ва уларнинг тарихлари ҳаммамизга маълум. Ҳар ҳолда ўша тазиқлардан 60-йилларда адабиётга кириб келган ёшлар ҳам бебаҳра қолмаганмиз. Мен бу гапларни зинҳор-базинҳор ўзимни жафо чеккан шўрлик шоир сифатида кўрсатиш учун айтмаётиман. Ўша йиллари менинг ёш идрокимни икки-уч савол қаттиқ қийнарди. Биринчиси, нега менинг ҳалқим иккинчи сорт, иккинчиси, нега менинг тилим беобрў, нега менинг Ватаним мавҳум, нега табиат ато этган ҳис-туйғуларни ҳам ошкора изҳор қилиш мумкин эмас, масалан, яқин қариндошинг ўлса марсия ёзиш мумкин эмас, муҳаббатинг баҳтсиз бўлса, надо-

мат чекиш гуноҳ ва ҳоказолар. Энди ўйласам, ҳамма ҳалқлар катта бир йилқи уюри сингари битта қамчининг ишорасига бўйсуниб яшар экан. Нафақат моддий, балки маънавий боқимандалик ҳам худди шу уюрчиликнинг оқибати бўлиб, унинг таъсиридан ҳанузгача кўпчилик қутулолган эмас. Ўша йиллари ёзилган талай шеърлар худди икки томчи сувдек бир-бирига ўхшашлигининг сабаби шунда. Мен бу ўринда бошимдан ўтган турли майдада-чуйда тазийиқларни эслаб ўтирамайман. Лекин бир гапни айтмасам бўлмас. Менинг ижодимда ёлғизлик, маҳзунлик туйғулари кўп учрайди, дея дакки беришган ва бунинг сабабини турлича шарҳлашган ҳам. Аслида эса менинг табиатим ўзи шунақароқ бўлса керак. Иккincinnидан, мени қийнаган саволларга жавоб тополмай ўртангандирман, учинчидан, шу ҳасад деган балонинг ҳужумига жуда эрта дуч келдим. Буларнинг барчаси сатрларимда қандайдир шаклда акс этган бўлса, ажаб эмас. Чунончи, ҳажвий руҳдаги шеърлар ҳам қандайдир сунъий равишда яратилган эмас. Кўп қатори мени ҳам лақиллатган, алдаган одамларнинг сон-саноғи йўқ. Ҳалигидай аччикроқ шеърларнинг ёзилишига, албатта, ўшалар сабаб бўлган.

Мен таржимачилик билан ҳам шуғулландим. Ушбу машғулотимнинг энг асосийси Дантенинг “Илоҳий комедия”си деб биламан. Ҳозирча унинг “Дўзах” қисми таржима қилиниб, нашр этилди. Бу асар таржимасига кўл уришимга раҳматли Шароф Рашидов сабабчи бўлганлар. Атрофимизда турли қора ёрликлар айланиб қолганда Шароф ака бизни ўзларича муҳофаза қилдилар шекиlli ёки ижодни бутунлай ташлаб кетмасин, деган хаёлга бордиларми, “Комедия”ни таржима қилишни менга топширдилар. Таржима жараёни мен учун энг улуф мактаб бўлди. Агар қоғоз устида энг кўп тер тўккан бўлсан, ўша таржима устида тўкканман. Она тилимизнинг нақадар бой эканлигига имон келтирган бўлсан, ўша таржима жараёнида имон келтирганман. Азбаройи таржима асл нусхадан кам бўлмаслиги учун тилимиз бойлигидан имкон борича тўлиқ фойдаланиш учун изландим, тил хазинамиздан сўзлар ахтардим. Бунга нечоғлиқ эришганман, бу бошқа мавзу, бироқ ишондимки, бизнинг тилимиз ҳеч бир муболагасиз жаҳондаги энг гўзал ва энг бадавлат тиллардан биридир. Ўрни келганда ёш шоир укаларимга бир гапни айтиб ўтай, зинҳор битта шеърни бир ўтиришда ёздим деб мақтаниб юрманг, шеър, яъни сўз айрим унли ва ундошлирига қадар тинимсиз сайқал топғандагина ва айни чоқда биринчи ёзилишдаги руҳий қуввати ва сехрини йўқотмаган тақдирдагина мукаммал асарга айланиши мумкин. Албатта, мен бу камолотга эришганман, демоқчи эмасман. Лекин мумтоз адабиётимизни ўқиб-ўрганиб, Данте сингари шоирларни таржима қилиб, шу холосага келганман. Мен ҳозир тажрибамни эмас, балки орзу-армонларимни айтиётирман.

Аввалги мафкура, айниқса Сталин ҳаётлиги даврида шоирлар шахс сифатида ўз юрагини очолган эмас эди. Кейинги даврдаги муҳит шарофати билан бизнинг авлод шоирлари юракдаги дардларини аста-секин оча бошладилар, бу дардлар халқнинг умумий дардига, халқнинг пинҳона кайфиятига бир қадар мос тушди ва ўқувчилар неча ўн йиллардан бўён эшитилмаган оҳангларга қулоқ тута бошлади. Аста-секинлик билан ёлғонни ёзишга умуман эҳтиёж қолмади. Айниқса, Ўзбекистон мустақиллигидан кейин кўпчилигимиз беҳудага лайлак ҳайдаб юрганимиз маълум бўлиб қолди.

Дунёда мавзу шу қадар кўп эканки, уни танлаб олишда муаллиф гоҳо шошиб қолиши мумкин. Масалан, халқимизнинг шонли тарихини ҳали юз-икки юз йилда ёзиб адо қилиш қийин. Лекин ёзувчининг оддий тарихнавис, йилномачидан фарқи бор. У кўпроқ ўз муйян фояларига мос келувчи мавзуларни излайди. Шу маънода, асрлар бўйи камситилган, ҳақоратланган Амир Темур бобомизнинг образи менинг учун халқнинг обрў-эътиборини, қадрини белгиловчи образ бўлиб кўринди. “Соҳибқирон” асаримни ўтмишга боқиб, бугун учун ёзганман.

Узоқ йиллик ижодий тажрибамдан хуроса шулки, ижодкор истеъодининг даражасидан қатни назар, иложи борича ўзини ёлғон-яшиқдан олиб қочсин. Иложи борича, катта ва кичик ҳақиқатларни бир-биридан фарқлай олсин. Яъни, ҳар доим ҳам ўзининг шахсий кечинмаларини бутун бир халқнинг кечинмалари, деб эълон қилишдан ўзини тийсин. Аксинча, халқ дардини ўзининг шахсияти фильтридан ўтказа билсин. Ўзининг шахсий дардини халқники деб эмас, балки халқнинг дардини ўзиники деб билсин.

Менинг инсон ва ижодкор сифатида баҳтим — Ўзбекистонимнинг Мустақиллигини кўрдим ва небаҳтким, озод Ватанимга баҳоли қудрат хизмат қилиб юрибман.

2000 йил 23 январь

ШЕРЛАР

УЧҚУН

Гоҳо хаёл дарёсида жим
Ўтказаман тунларни бедор.
Баъзан ғализ жумла устида
Соатлаб бош қотирганим бор.

Шалоладек бўлса шеърларим,
Ёғду сочса мисли алангага.
Сидқидил-ла қобил ўғилдек
Хизмат қилса элга, Ватанга.

Ҳали бунга кўп гап бор, ҳали
Фикрларим тарқоқ, туйғусиз...
Ҳали қанча тунларни яна
Ўтказишим керак уйқусиз...

Ачинмайман, сизга, ўйларим,
Ачинмайман, сизга, узун тун.
Ачинмайман, чунки оташга —
Оқ йўл берар одатда учқун!

1957

ҚУШЧА

Гоҳ бутоққа, гоҳ гулга қўнап,
Тиним билмас сайроқи қушча.
Нечун баҳор сени ром этган,
Қайда эдинг баҳор келгунча?

Кел, яшайлик ҳамиша бирга,
Бизда баҳор, гуллар барчаси.
Билсанг мен ҳам чаман ўлкамнинг
Шўх ва қувноқ, шод ўғилчаси.

1958

ЮЛДУЗЛАР

Апрель осмонига тикиб кўзингни,
Қандай соз, тунларни кузатиб қолсанг.
Кўк сари хаёллар элтса ўзингни,
Қандай соз, юлдузлар ичра йўқолсанг.
Юлдузлар ичида юлдуссан ўзинг,
Завқингни қитиқлар ширин туйгулар.
Милт-милт ёнаётган жажжи дил сўзинг
Юлдузлар чамани ичра шўх бўйлар...
Ипак из қолдириб учар кувноқлар,
Бир-бирин кувлашиб, чақишар чақин.
Осмон гўзалларин кумуш ётоқлар
Кўйнига чорлайди, субҳидам яқин...
Дейман: осмонларнинг ҳилоли бўлсам,
Хулкар ва Зухроси бўлгим келади.
Шу гўзал ўлкамда камолга тўлсам,
Порлоқ юлдузлардай кулгим келади.
Юлдузлар, о бўшлиқ, мусаффо чирой!
Сен илҳом гулида кумуш шабнамдай.
Учарман сиз билан бир кун пайдар-пай,
Осмон гумбазида баҳсга тушгандай.

1958

ТОГЛАР

Эҳ, сиз тоглар, нақадар кўркам!
Сизга берар илк нурин қуёш.
Пар булутлар, марварид қорлар
Юксак чўққи узра қўйган бош.

Шўх шалола тошар ҳайқириб,
Кўксингизга бахш этиб чирой.
Қояларга бош урап сапчиб,
Сувлар тўлиб оққан тошқин сой.

Сиздан кўзин узолмай ҳар кеч
Қуёш қўяр ёстиғига бош.
Соф ҳавода олишиб ором
Ухлар сокин ҳар чўққи, ҳар тош...

Фақатгина у шўх шалола
Дараларга солади шовқин.
Ой сузади кўм-кўк самода,
Ўқигандек ҳуснингга таҳсин...

Эҳ, сиз тоглар, дилрабо тоглар,
Ёш қалбимни мафтун этгансиз.
Ёшлиқ, бахтни куйлагин, дея,
Ижодимга илҳом тутгансиз.

1958

ЧҮПОН

Изларингни қучиб шалола
Қояларга тамғанг солади.
Пешвоз чиқиб сенга гул, лола
Яна келгин, дея қолади.
Савлат түкиб, кўриқчисимон
Боботоғинг туарар ёнингда.
Сени севиб, қаршилаган тонг
Нур тўшайди истиқболингта.
Шўхликларга тўлгил, ўйнагил,
Яира, завқлан худди қўзичоқ.
Сарғаймасин сен севган чаман,
Қуримасин сен ичган булоқ.
Най чалишиб бирга сен билан
Қалбга илҳом солгим келади.
Шодликларга тўлиб бир умр
Хузурингда қолгим келади.

1958

КАПАЛАК ВА МЕН

Капалакнинг учишин узоқ
Кузатдим ҳам юрдим ортидан.
Қаршимизда фунчалар порлок,
Милтири шудринг чаман сатҳидан.

Аллақайда кезиб тинимсиз
Йифдик роса завқ атирларин.
Сўнгра баҳам кўрдик иккимиз,
Менга тегди шу сатрларим.

1958

ҚЎШИГИМ КАБИ

Еллар, мени койимангиз, гар —
Сиз-ла бирга уча олмасман.
Боғлар атрин пуркаб, сарбасар,
Тоғлар кўксин куча олмасман.

Еллар! Куйга тўлиб учинг-чи?
Учинг, диллар ошиги каби!
Гулзорларни тинмай қучинг-чи,
Менинг учқур қўшигим каби!

1958

КЕЛИНГИЗ, ДЎСТЛАРИМ

Тоғлар қўйнидадир менинг қишлоғим
Чўққилари оша кўринар олам.
Шундадир донг ёйган сўлим боғларим
Шундадир шеъримнинг илҳомлари ҳам.
Хув ана, меҳнатим сингтан гўзал боғ,
Тоғларимни безар боғларнинг ўзи...
Тингламоқ бўлсангиз ҳар шому саҳар
Тўргай ашуласин, булбулнинг сўзин, —
Келингиз, дўстларим, келинг биз томон,
Сизга, дер боғларим асалин, болин.
Ёшлиқ қўшигини куйлайлик шодон,
Нақароти этиб тонгнинг саломин.

1958

БАҲОР

Баҳор келди гул сепин ёйиб,
Тенгсиз чирой қасб этди ўлка.
Гул баҳорнинг нурли жилvasи
Сўнгсиз севинч бахш этди қалба.
Қир, адирда кўк майса-гилам,
Бутоқларда жилмаяр куртак.
Яна келди эркатой кўклам
Ёшлиқдай шўх, нурдай югурак.
Тошдан тошга тўш уриб шошар —
Қаёққадир зилол шалола.
Қандай гўзал баҳор туҳфаси!
Адирларда қирмизи — лола.
Гул баҳорнинг мафтуни бўлиб
Сахий қуёш сочар заррин нур.
Баҳор! Дилни ром этди ўзга,
Жилвасида ёшлиқ ҳам фуур.
Баҳор, баҳор, о гўзал баҳор!
Ёшлиқ каби дилга яқинсан.
Юрагимга шеър бўлиб кирган —
Шодлик, илҳом, завққа тўкинсан.

1959

* * *

Тонгни ҳам осмонга тик боқиб кутдим,
Кузатдим бирма-бир юлдузларни ҳам.
Хаёл дарёсида ўзни йўқотдим
Бошимдан коинот зар сочгани дам...

Юлдузлар! Беркинманг тонг туманига,
Кетманг кўзларимни ёшлаб кетгунча.
Якка суҳбатдошим, кетмагин Зухрам,
Кетма, сенга айттан шеърим битгунча.

1960

* * *

Умр дуч қиларкан кимга бир-бирни
Таҳлил этмоқ даркор аввал тақдирни.
Паҳлавон эмасман, кўкни ер, ерни —
Осмон айламоқни кутмагил мендан.

Ҳар пари руҳсорга бермадим хаёл,
Сен ҳам, эй дилбарим, шуни билиб ол:
Ҳусндор эмасман, кўрганларни лол,
Ҳайрон айламоқни кутмагил мендан.

Баъзан кечиарлар ёш бўлса нодон,
Аммо умр бўйи мен дейман шодон,
Бойликни севмасман, яъни тиллодан
Ҳамён айламоқни кутмагил мендан.

1960

СОФДИЛ

Сокин туннинг сайрига
Таклиф этдим, қайтмадинг.
Қайтмадинг о, ўзгани
Севишиңгни айтмадинг.
Сен кетдинг-у, қалбингнинг
Изи қолди ёдимда,
Сутдай ойдин кечанинг
Ўзи қолди ёнимда...

1960

* * *

Ҳали олдиндадир гўзал кунларим,
Ҳали лаб тегмаган қулгулар олдда.
Вазнга тушмаган қўшиқлар олдда,
Ҳеч нима эмасдир бу кўрганларим.
Ҳаммаси олдинда, ғам ҳам, алам ҳам,
Айрилиқ ҳам, қанотлари зил...
Саксон ёшли бобо, сен ҳам дунёning
Ҳаммасини кўрдим, демагил.
Асло ундей дема,
Ўн гулимдан бири ҳам
Очилмаган деб тургил ҳар вақт.
Ҳаммасини кўрдим,
Тўйдим деган кунинг, билсанг,
Яшамоққа қолмайди ҳожат.

1960

СЕВГИСИЗ ОДАМ

Кулоқ солинг менга, яхши қиз, бир оз
Дилимни очмоқчи бўляпман Сизга.
Тунов кун бир дўстим мени даб-дуруст
Айлади севгисизликда.

Бехабар эмишман муҳаббатдан мен,
Қалбимда ишқ эмас, бор эмиш илон.
Исбот: қизлар билан юрмас эмишман,
Сирлашмас эмишман ҳар кимлар билан.
...Етмасмиди ўзи қалбдаги тўлқин,
Кул босган оташни қўзғадинг нечун?
Севги керакмиди сенга, дўстгинам?..
Севаман тинч оқшом, юлдузли тунни,
Севаман сайраса кушлар бетартиб.
Севаман оромни, суронни, лекин
Мен уни севардим булардан ортиқ.
Хуруж айлаганди бедаво фироқ.
Аччиқ алам ичра ёнсам тутоқиб,
Ўлимни жонимдан севаман, бироқ
Мен уни севардим ўлимдан ортиқ.
Аммо ҳаёт оқар ўз билишича...
Ўзганинг юраги сенга бўйсунмас.
Севсангу, севсангу севилмасанг гар
Бундан қайгулироқ қайфу топилмас.
Нима керак менга ишқ-муҳаббатни
Яна ўзга қиздан талаб айламак!
Муносибдир бугун ишқсиз хилватни
Менинг номим билан балки бойламак.
Яхши қиз, хаёлга толдингиз нечун?
Нечун кўз ёшингиз томди йўлимга?
Севгисиз одамга ачинмоқ нечун,
Кўзёш йўл тополмас менинг дилимга.
Хайр энди, чиқай,
Ойдин кўчадан
Эшитилса агар бир ёлғиз қадам,
Ажабланманг асти, у сизга таниш
Севгисиз одам...

·1960

СУВ ПАРИСИ

Ул санамки сув яқосинда паридек ўлтуур.

Отойи

Бир баҳор туни эди, йил фаслида оддий боб,
Ўшал баҳор тунини куйла дединг умрбод.
У баҳор туни эди, дарёнинг қирғоғида
Ёнар эдим интизор бир гўзалнинг доғида.
Бешик-бешик тўлқинлар той-той бўлиб чопарди,
Кумуш ёлли қоялар соясини ёпарди.
Дарё ширин висолни айлар эди ҳикоят,
Жилваси ой нурида у қиз каби шўх ғоят.
Нигоҳимни аллалаб, тебранишиб учарди,
Бешик-бешик тўлқинлар хаёл каби кўчарди.
Кўзларимда пастлади ўшал тунда осмон
Тўлқин аро тўлғониб, қиз бўлганда намоён.
У тун бешик тўлқинлар, асов-асов чопдилар,
Харсанг узра ястанган пари қизни топдилар.
У сеҳрли сув қизи! Ой нурида оппоқ қор,
Тирилдими қаршимда афсоналар ё қатор.
Бешик-бешик тўлқинлар атрофимда тўлғонди,
Борлиқ юзи қопқора кокилига чўлғонди.
Кўз олдимда не ҳол бу? Одаммисан ё пари?!

Юлдузмисан, учдингми масканингдан сарсари.
О, сув қизи, сув қизи, кимсан, айла иноят,
Кокилингта чўлғонмиш қайси мудхиш ҳикоят.
Малакмисан ё Таврид афсонавий гўзали,
Қайси ҳарам юлдузи, қайси юрак ғазали.
Сен кимлар хаёлида юрмоқдасан сарсари
Хиёнаткор бир гўзал руҳимисан ё, пари.
Не истайсан, сув қизи, балки бўлай халоскор,
Мен кутаман бу жойда севиклимни интизор.
Бешик-бешик тўлқинлар той-той бўлиб чопарди,
Рашк этиб, ой шуъласин оёқларин ёпарди.
Тўлқинлар қуршовида дарё билан пайваста
У тим қаро кокилига тароқ урди у аста.
Имо этди қошига ва чорлади узоққа
Мендан йироқ ёт гўша — соҳил, яшил чорбоқ

Қўй, пари қиз, майли, кетгин, одаммисан ё пари
Сени ёринг кутмоқда, бор, дайдима тунлари.
Кўрасанми, париваш, тўлқин ўпар қирғоғин,
Кўзларимга тушмасин хиёнаткор нигоҳинг.
Гўзалликка зор бўлсанг, майли кетма йироқقا.
Севиклигим келганда ўзинг чиққин қирғоқقا.
Бешик-бешик тўлқинлар той-той бўлиб чопдилар,
Асов, ёлдор қирғоқ-ла нигоҳимни ёпдилар...
Фойиб бўлди сув қизи, учди янгроқ қаҳқаҳа.
Таниш эди овози, таниш эди у, ҳа, ҳа!
Бир баҳор туни эди, дарёнинг қирғоғида
Ёнар эдим интизор сен гўзалининг доғида.
О, шўх гўзал, сен у тун шўхликларга тўлмадинг,
Тўлғонмадинг ёнимда, сен ўшал тун келмадинг.
Тонг юлдузи кулганда ётоғингта йўл олдим,
О, уйқусиз кўзларда не сирларни кўролдим...
Йўқ, уйқусиз кўзлардан сўз очмадим мен у тоб,
Ўшал баҳор тунини куйла, дединг умрбод!

1960



* * *

Кулма, кулма,
Нега куласан
Хижолат чекканинг ҳолига.
Нега қўй тегиздинг
Камбағалнинг
Ўғрилардан қолган молига.

1960

* * *

Тонгни ҳам осмонга жим боқиб кутдим,
Кузатдим бирма-бир юлдузларни ҳам.
Хаёл дарёсида ўзни йўқотдим
Бошимдан коинот зар сочгани дам...

Юлдузлар! Беркинманг тонг туманига,
Кетманг кўзларимни ёшлаб кетгунча.
Ёлғиз сұхбатдошим, кетмагин, Зухрам
Кетма, сенга айтган шеърим битгунча.

1960

СЕНДАН ЙИРОҚДА

Сенинг эзгу хаёлинг билан
Тонг ёришди, қуёш ҳам ботди.
Ва менинг бу севги асири
Юрагимда ҳислар тugoқди.
Қайда сенинг латиф қиёфанг?!
Ишонмадим шеър хаёлига.
Наҳот тушсам сендан йироқда
Пинҳон ёнган ошиқ ҳолига...

1961

* * *

Шовуллади тун бўйи шамол,
Қалдироқлар кўчди ларзакор.
Шивирладинг ёнимда хушҳол:
“Яна келди, дўстгинам, баҳор”.

Шовуллади тун бўйи шамол,
Қорликларда ўчди изимиз.
Шивирладинг ёнимда хушҳол:
“Мангу бирмиз, дўстим, иккимиз”.

1961

“НОМАЪЛУМ ҚИЗ” СУРАТИГА

Сен чиндан ҳам гўзалсан
Лабларинг ол, қирмизи...
Сочларингта сунбул банд,
Кўзларинг тонг юлдузи.
Сен чиндан ҳам гўзалсан,
Хузурингта келдим бот.
Ёлбораман, туш пастта,
Ёлбораман, паризод...

1961

КУЗ ХАЁЛЛАРИ

1

Қорайғанда узоқ тоғларнинг қори,
Боғларга чўкканда оқшомги туман,
Совуқ куз елидан жунжикиб, нари –
Очиқ айвон остин этганда маскан,
Дўстгинам, хаёлан қучаман сени,
Хазон даврасида кутаман сени.

2

Бунда бари гўзал: тим қора оқшом,
Юлдузлар боқади тунд ва ёвойи.
Қамишзор, шовуллаб тургувчи сой ҳам
Совуқ ва ёқимли: шундоқ анвойи,
Уларга боқаман, тўнаман баъзан,
Ширин бир хаёлга чўмаман баъзан.

3

Нимани хоҳлайман? Истагим нима?
Чангалзор шовқинин тинглаб турман.
Япроқлар бандида кезган жимгина
Маъюс ва безовта кузни кўраман.
Унинг қўшиғида, унинг оҳида
Сезаман одамзод қалбин гоҳида.

4

Унга бари бирдай ҳаёт ва ўлим,
Гўёки кекса чол сўнгини ўйлар.
Ва секин силкитиб каҳрабо қўлин
Кўрганин-билганин бирма-бир сўйлар.
Бир ҳикмат ўқийман хазонларда мен:
“Яшагин-у, бироқ япроқ бўлма сен”.

Мангу яшилликнинг маскани қайда,
 Қайдадир хазонни билмаган баҳор?
 Нечун у ҳовлиқиб оққувчи сойда
 Чавандоз умрнинг қайтмас сеҳри бор?!
 Нечун уйғонади қайтадан баҳор,
 Нечун инсон умри бўлмаган такрор?..

Мени саволларга кўмар дафъатан,
 Хазоннинг тақдири, сўнгги шовқини.
 Кўзимга кўринар умрим қайтадан,
 Гарчанд сурмақдаман баҳор шавқини,
 Гарчанд йигит ёшим яшнаб турса ҳам,
 Кексалик қисматин ўйлайман шу дам.

Шу дам туйғуларга тўлади кўнглим,
 Титраб тараштайман қаламим учин.
 Тонг ҳам ёришади, эй менинг умрим,
 Бунчалар тезликда чопасан нечун?
 Хазонлар шошади, шошаман мен ҳам,
 Дўстим, ҳузуримга шошиб кел сен ҳам!

1962



ДАРБАНД ДАРЕСИ

Яшил тўлқинларинг айқирса чунон
Фазаб тангрисининг худди ўзисан.
Гоҳо сен ширин бир оромга макон,
Гоҳо қайнаб тошган булоқ кўзисан.

Юракда сен ижод ҳиссини чертдинг,
Тўлқинлар гулдури, гирдоб ҳавоси.
Хотирамга ажид ўйлар киритдинг,
Эй илҳом дарёси, илҳом дарёси...

Арчазорлар кўркин дилга кўчирдим
Сенинг хушҳаволи соҳилларингда.
Чўпон, баҳшиларнинг базмида бўлдим,
Тўймадим ҳикоя, нақлларидан...

Яшил чиройингни соғинганимда,
Тўйиб кўрмоқ учун қайтарман яна,
Соғинган қалбимни тўлқинларингда
Аллалатмоқ учун қайтарман яна,
Эй Дарбанд дарёси, илҳом дарёси...

1962

ҚҮЛ

Йигит кучга тұлди, етилди,
Билакларин тұлдирди мускул.
Чамасида билак кучининг
Қаршисида осон ҳар мушкул.
У истаса метин тошларни
Совуради тупроқ, кул каби.
Аммо ёрнинг юзида у қүл
Сийпаланар майин гул каби.

1962

ОДАМЛАР

— Эй, йўловчи, бўла қол қўноқ,
Уйда борин кўрамиз баҳам.
Тагин ўзинг биласан, бироқ,
Қош қорайди, йироқдир йўл ҳам.
Йўлчи қолар овулда, мезбон
Келтиради топган-тутганни.
Отамлашар сўнгра икковлон
Ёдга олиб ўтган-кетганни.
Хорғин йўлчи мудрар ичиб чой,
Чўзилади мезбон ҳам аста.
Тонгда йўлчи товуш қилас. — Ҳой,
Мен кетдим. — Қол! — Раҳмат.
Шу бас-да!
Ажралишар, улар ҳаттоқи
Исмларин сўрашмаслар ҳам.
Улар қайта учрашар балки,
Балки қайта учрашмаслар ҳам...

1963

ЭСЛАШ

Ҳар тонг қаршилардим сени шу йўлда,
Билмам, қайларгадир шошиб ўтардинг.
Илк баҳор селидай тошиб ўтардинг,
Нигоҳсиз кимсага, на ўнгу сўлга.
Мен дердим, бу қизнинг қайда гўшаси,
Йўлларида унинг кимдир зормикан?
О, у севгисидан баҳтиёрмикан
Ва ё манзилида хазон тўшаги?
Энди йўлларимиз тушди кўп йироқ,
Босилди қалбдаги ўшал тўфонлар.
Қайдасан, қалбимни тирнаган сўроқ,
Қайдасан, илҳом баҳш айлаган онлар?
Қайдасан, мен сени унутгим келмас,
Умр йўлларимнинг totли дамлари?
Бунда ўтган бир йил, қайғу ҳам ҳавас,
Ёниш, ўртанишлар, хаёллар бари...

1963

* * *

Деразангни қоплар оқшом зулмати,
Изин қора айлаб ботади ой ҳам.
Нечун мени фақат шу зулмат пайти
Кучиб ардоқлайсан, нозик фариштам?
Самовий кўзларинг сачратиб учкун,
Нечун тикилади фақат ўшанда?
О, наҳот шу кўзлар ётдир мен учун
Кундуз машъаласи порлаб турганда.
Теппамдан тун каби қуюлади соч,
Қора тун ёнади оташ юзларда.
Нечун ўзгаларга нур сочган қуёш
Бизнинг орамизда бўлади парда?
Нечун иккимизни қолдириб ёлғиз,
Коинот тубида қуёш чекар оҳ?
Жавоб бер, қошингда чўкмақдаман тиз,
Жавоб бер, макрингдан мени қил огоҳ.

1963

* * *

Ўйлардимки, номингни сенинг
Тақрор этмас энди тилларим.
Кўп бўлмишки, кўмсаб васлингни
Йўлларингда оқмас унларим,
Мен бепарво яйраб аршимда
Сен учун ҳам юрардим шодон.
Нечун пайдо бўлдинг қаршимда,
Яна кабоб бўлсинми бу жон.
Яна қўшиқ айтайми интраб,
Яна андуҳ бўлсинми ишум?!
Истамайман, фамимни тинглаб,
Дўстларимнинг маъюс бўлишин...
Хайр энди, хайр дилрабо,
Майли куйлай номингни айтиб,
Катта йўлга чиққанман, аммо,
Ул сўқмоққа бормасман қайтиб,
Хайр энди, хайр, дилрабо.

1963

ҚАЛАМ

Эркалангиз қаламни олиб,
Ўпиб қўйинг уни мулойим.
Шўрлик ўзи яланғоч қолиб,
Кийинтирас эгасин доим.

1963

* * *

Жажжи гўдак, сен туғилдинг, сен учун
Ким беланчак ясаб турар шу дамда.
Кимдир сенга учқур тулпор эгарлар,
Кимдир сенга ҳасса йўнар шу дамда.

1963

* * *

Бахт кутмасман ўзгадан зинҳор,
Бировга бахт беролмасман ҳам,
Сен бахтимсан, демагил, дилдор,
Бахт беролмас одамга одам.

Кўряпсанми, гавжум бутоқдан
Чирт узилиб тушди бир япроқ.
Барглар йигласа-да фироқдан,
Кутқаролмас дўстини бироқ.

1963

ПУШКИН

Шовуллайди, зангор дарахтзор тунда,
Япроқлар учида ой нури зарҳал.
Осмон ва боғларнинг туғаш сафида
Кўринар таниш ҳайкал.

Ажиг бир ўхшашлик, о, буюк шоир...
У — сен, шеъриятнинг дилрабо қадди,
Мангу яшиликтининг туғма улфати —
У — сен!

Тегрангда даврасин курмишdir илҳом,
Ажиг бир макон бу: — Шоир ва Илҳом!
Ажиг бир макон бу, тингла, эй гений,
Табиатнинг мангу ёш қўшиқчиси

Сенмасмидинг ахир, безаган уни...
Тилсиз табиатнинг тил уқувчиси!
Сенмасмидинг ахир, дардли ўйларин
Сўққабош чинор-ла баҳам кўрган жон
Ва сўлим Тригорское боғларин ўпган
Озодликка чанқоқ, куйчи қаҳрамон!
Кузни севардинг-ку, ажиг тафовут:
Тегрангда шивирлар маъсума баҳор.
Япроқлар ўзлигин этибди унут,
Сакрашар, шовуллар, куйлайди бедор.
Кузни севардинг-ку, ҳолбуки, баҳор...
Кузни севардинг-ку, дердинг-ку ўзинг:
“Недир топар ундан ўжар хаёллар”.

Йўқ, йўқ, дардли шоир, порлоқ юлдузни
Айт-чи, ким ғамли деб айта оларкан,
Боқғувчи кўзда ғам бўлмаса агар!
Сил бўлган гўзалга ўхшармиди куз,
Қалбингда баҳордан ғам бўлмаса гар,
О, буюк шоир!..
Сўйла-чи, сен кимга бергандинг озор,
Сен учун баҳорни қора этдилар.

Хор-зорларга ачинмоққа чақирган
Эзгу юрагингни пора этдилар.
Сўйла-чи, сен кимга бергандинг озор...
Тожу тахт қусури, қону адоват,
Фийбату кин, ғараз бижғиб сасиган —
Замонга абадий лаънатлар бўлсин!
Эзгулик куйчисин ўққа тутган у
Олифта Дантеснинг қиёфасида!..
Сен қуладинг, шоир ўзга йўл йўқди,
Каддингни тиклашга истаб бир замон:
“Бош устимда күшлар, сайрасин, дўстим,
Мангалик чиройда яшнаб беармон...”
Баҳорни васият этдинг ул замон...
Қонун каби пучдир ўлимнинг кучи
Ўзидан юксакроқ одамлар учун.
Қаҳқаҳа ур, шоир, тирик нафасинг!
Ўлганлар устидан қаҳ-қаҳ ур, бу кун.
Ўчгандир зулматнинг заққумли саси
Ва ул жаллод замон биттан абадий.
Қаҳқаҳа ур, шоир!..
Шовуллайди тинсиз дарахтзор тунда,
Планетарийнинг зангор гумбази зарҳал.
Шовулла, дарахтзор, ой ёлқинида
Товланган ҳайкал —
Буюқ одам эди, баҳодир қалбли,
Қўшиқчинг эди у, эй тирик олам!
Шовқин сол, шовқинлар сол, мажнун дарахтим,
Шовуллайвер тинсиз, дарахтзоргинам!
Бир вақтлар у қўшиқ куйларди сенга,
Энди-чи, навбати — тинглайди сендан...

1963



ОНАМГА ХАТ

Қайтгим келди, онам, ёнингга,
Юрагимда исмисиз дардлар.
Совуқ хонам, соат чиқ-чиқи,
Ташқарида хазонрез боғлар,
Ёмғирнинг жим хониш қилиши...
Бариси ҳам нечундир бу дам
Туширмоқда сени ёдимга...
Қайтгим келди, онам, ёнингга.
Юрагимни очиб гапирсан,
Кам-кам бўлар менда бундай ҳол.
Шодмон юрсан, менинг ёдимга
Сен тушмайсан ростдан, онажон.
Ногаҳоний бундай ҳолда-чи,
Шундай кўргим келади сени.
Айтсан сенга бор гапларимни,
Орзуларим, ҳасратларимни
Йифлаб, кулиб айтгим келар, ҳа,
Одамларнинг қадру қимматин
Англамаймиз бирга бўлганда.
Аммо ногоҳ узоққа тушсак,
Ё танҳолик ҳасратин чексак,
Баъзан шундоқ,
Одам зотининг
Тирноғига зор бўламиз, ҳа!
Тушунмайман бул ҳақиқатни,
Сен-ку, ахир онасан, она...
Онам, ранжимагил хатимдан,
Мен ростини ёздим, шод дамим
Сен тушмайсан асло эсимга.
Аммо ҳаёт ўзи, биламан,
Солар сени ёдимга бот-бот.
Яъни, бошимизни доим ҳам
Она бўлиб силамас ҳаёт.

1963

СЕН БАҲОРНИ СОҒИНМАДИНГМИ

Уйғонгувчи боғларни кездим,
Топай дедим қирдан изингни.
Ёноғингдан ранг олган дедим —
Лолазорга бурдим юзимни,
Учратмадим аммо ўзингни,
— Сен баҳорни соғинмадингми?

Узоқларда залворли тоғлар
Хаёлимни келдилар босиб.
Кечди қанча интизор чоғлар,
Васлинг менга бўлмади насиб,
Сенсиз мен ҳам, баҳор ҳам фарид,
— Сен баҳорни соғинмадингми?

Ўнгирларда сакрайди оху,
Наъматакда саъва миттижон.
Қорликлардан сипқарилган сув,
Дараларда уради жавлон.
Нигоҳимдан фақат сен пинҳон,
— Сен баҳорни соғинмадингми?

Мана, бугун наврўзи олам,
Дўстларимга гуллар тутарман.
Қайлардасан, севгили эркам...
Қўлимда гул, сени кутарман,
Умрим бўйи чорлаб ўтарман,
— Сен баҳорни соғинмадингми?

1963

* * *

Мен қувонар бўлсам — сен сабаб,
Ўйга толар бўлсам — сен сабаб.
Мен ўлишни истамасман, йўқ,
Ногоҳ ўлар бўлсам — сен сабаб.

1963

БУЛОҚ

Қутлуг бир саҳарда кўз очди булоқ,
Йўл солди дарёлар сари адашиб.
Унга раҳм этмоқчи одамлар шу чоқ
Тоғу тошлар аро яқин йўл очиб.
Одамлар, тегмангиз, майли тошсин у,
Майлига, тоғни ҳам кўрсин йўлида.
Кўйинг, ўз йўлини ўзи топсин у,
Завқланолсин у ҳам кураш сўнгида.

1963

ГИЁҲ

Улуғвор бир қудрат билан
Чайқалади чўнг денгиз.
Қанча оғир харсанг тошлар
Тубда унга чўккан тиз.
Аммо мўъжаз, нозик гиёҳ
Ўша тубсиз ўлкада.
Кўкка ўсар, ҳа, денгизни
Кўтарганча елкада!

1963

* * *

Жўнар бўлдим мен бундан дилтанг,
Йўлларимга қараб қолдинг сен,
Сочгинангни тараб қолдинг сен,
О, биламан, баджаҳл отанг,
Остонангта йўлатмас мени,
Ишонмайди сен севган ёрга.
Узоқларга жўнатмас сени,
Кетар бўлсак иккимиз бирга.
Билагузук тақибди отанг
Қўлгинангни боғлаб бир йўла.
Билагузук, баңдинг узилсин,
Ёр кўлини қисгандан кўра.
Сен дедингки: “Бўлсайдим юлдуз,
Осмонлардан боқсан-да сизга,
Тушишга йўл топардим, эсиз,
Отам оқ йўл берсайди бизга...”
Тўхта, етар, бир кун отангнинг
Ҳузурига қайтиб келармиз.
Кечир, — дермиз, етмаса, агар,
Учта бўлиб узр сўрармиз.
Бизни ҳеч ким айб этмас, дўстим,
Фамгин бўлмас биздан хотира.
Севгисидан баҳт толғанларнинг
Бўлганми ҳеч номлари қора?..

1963

КУРСДОШЛАРИМГА

Тақдир тўплармикан сизларни яна,
Кўзимдан сачраган томчи ёшларим...
Жудолик кутмоқда бизни ҳам, мана,
Тенгқур жўраларим, эй курсдошларим.
Ким қайга шошилар... Не кутар бизни?
Ва қайта тўпланиш бўларми? Қачон?!
Яшнаган базмлар қолди-ку бари,
Қолди тотув беш йил ўтмишда бу он.
Қандай эсланаркан бу йиллар, дўстлар,
Ёки унут бўлар кимга эҳтимол...
Барибир даврамиз тарқалар энди,
Ҳар ён сочилармиз тариқлар мисол.
Ҳар ён сочилармиз, аммо шу зайли
Англармиз дўстликнинг қадрини илк бор.
Дўстларим, дўстларим, қайда бўлмайлик
Муқаддас дўстликка тушмасин губор.
Бизни туташтирган нозик ҳисларнинг
Барчаси ҳар қайда сақлансан омон.
Дўстларим, дўстларим, қайда бўлмайлик
Пок бўлсин қалбимиз, пок бўлсин виждон.
Ўргатмоқ эмас-ку ўзгага ақл,
Тилак тиілар бу дам дўстларга дўстлар;
Дўстларим, не учун дунёга келдик,
О, агар ниятлар унут бўлса, гар —
Бугунги ақлга сал губор тушса,
Ортиқ мағур этса шон-шуҳрат кимни,
Кимнинг орзу эттан куни келганда
Ҳасад чулғар бўлса ўзга бир кимни.,
Кимдан оналари рози бўлмаса,
Гар рози бўлмаса кимданки Ватан,
Қайта учрашмайлик у ҳолда рости,
Майлига, келмасин ундей бадбаҳт дам.
Дўстларим, дўстларим, келинг жипсроқ,
Гуркирасин дўстлик номи-ла қасам...
Бор бўлсин яхшилик, соф юрак, ақл,
Бизга илм берган Дорилфунун ҳам!

1963 йил, июнь

ШУНДАЙ ЯШАР ОДАТДА ОДАМ

Йўқ керакмас, қўйинг, керакмас,
Менга ором истаманг, дўстлар.
Хилват соз деб қистаманг, дўстлар,
Қўйинг, бундай ором керакмас.
Ногаҳонда хаёлга ботсам,
Ё ухласам, уйғотинг дарров,
Номим тутиб, сўз қотинг дарров.
Беҳудага бир ёққа борсам,
Қўлларимдан ушлаб ўшал дам
Курашларнинг сафига қўшинг,
Кур, ярат денг,
Ҳайқир денг, жўш денг,
Шундай яшар одатда одам.

1964

МИЛТИРАЙДИ МИТТИ ЮЛДУЗ

Кўк гумабазин бир четида
Бўшлиқларга уриб бош,
Милтирайди митти юлдуз,
Танҳоликдан тўкиб ёш.
Атрофида на бир юлдуз
На булут бор, на туман.
Юлдузларга термулиб у
Титраб тураг шамсимон.
Эҳ, бечора, яшаш нечун,
Порламасанг, кулмасанг.
Ўз тўдангдан нега учдинг,
Қайтиш йўлин билмасанг?!

1964

БУРГУТ

Ёш бургут учмоқда кўкда шиддаткор
Кумуш буулутларнинг тўзғитиб парин.
Учмоқда, қалбида мағурр ишонч бор,
Қақшаган қоялар, чўққилар сари
Учмоқда! Қаерга? Чўққига! Нечун?
Бургутнинг шиддатин уйғотган нима?
Бўронли даргоҳда не кутар уни,
Қудратли қанотин қўзғатган нима?
Ўйноқи шамоллар ила басма-бас
Ана, кўнди бургут энг юксак жойга!
Чўққи узра турди-ю бирпас
Яна бўрон мисол қўзғалди. Қайга?
Ахир, не бўларди берсанг, табиат,
Шу буюк шиддатга яраша мақсад!

1964

МЕН НЕЧУН СЕВАМАН ЎЗБЕКИСТОННИ

Мен нечун севаман Ўзбекистонни
Тупроғин кўзимга айлаб тўтиё.
Нечун Ватан дея еру осмонни,
Муқаддас атайман, атайман танҳо.
Аслида дунёда танҳо нима бор,
Пахта ўсмайдими ўзга элда ё?
Ёки қўёшлими севгимга сабаб?
Ахир қўёшли-ку бутун Осиё.
Мен нечун севаман Ўзбекистонни?
Боғларин жаннат деб кўз-кўз этаман,
Нечун ардоқларкан тупроғини мен
Ўпаман: “Тупроғинг бебаҳо, Ватан...”
Аслида тупроқни одил табиат
Тақсим айлаган-ку ер юзига тенг.
Нечун бу тупроқ деб йиғладӣ Фурқат,
О, Қашғар тупроғи, қашшоқмидинг сен?!
Хўш, нечун севасан Ўзбекистонни,
Сабабини айтгин десалар менга,
Шоирона гўзал сўзлардан олдин
Мен таъзим қиласман она халқимга:
Халқим, тарих ҳукми сени агарда
Мангу музликларга элтган бўлсайди,
Қорликларни макон этган бўлсайдинг,
Мехрим бермасмидим ўша музларга?
Ватанлар,
Ватанлар,
Майли, гулласин,
Боғ унсин мангулик музда ҳам, аммо
Юртим, сени фақат бойликларинг-чун
Севган фарзанд бўлса кечирма асло!

1964

АЛЬБОМГА

Ўз қалбини дағн әтди шунда.

Байрон.

Юзлаб шоир ётган қабристон аро
Кўммоқдаман мен ҳам қалбимни.
Юзлаб мозор ичра адашмай асло
Топа олгин менинг қабримни.
Мана, гулга чўмиб ётибди Байрон,
Фахрланиб лордлиги учун.
Сен мени унутиб қўймагин аммо
Гуноҳим — ҳаваскор, мўртлигим учун...
Рейн бўйларидан Гейне ҳам шунда,
Гўзал Лорелея тинглар сирини.
Бир қўли инқилоб ноғорасида,
Амалия томон чўзган бирини.
Юзлаб шоир ётар бунда, бари ҳам
Жанглар майдонида жангдан сўзлаган.
Нечун сенга келганда, альбом,
Ҳар ким ўз дардини айтиб бўзлаган?!
Буюк жангчилар ҳам варафинг очиб,
Аламлар шарҳидан ўтмади асло.
Альбом, альбом, жанглар даъватига сен
Наҳот беролмасдинг бир акси садо?!
Юзлаб шоир ётган шу альбом ичра
Мен ҳам қалбим учун қабр қазаман.
Ҳали из тушмаган оппоқ вараққа
Мен ҳам ўз дардимни ёзаман.
Аммо кеча кўрган тушимни эмас,
Хур Ватан сўзини ёзаман, ўртоқ!
Зотан, юрт ҳурлиги ўзи мен учун
Барча шахсий ишдан кўра шахсийроқ!
Ким менга афтини бужмайтди шу зум,
Ким менга панадан эълон қилди жанг?!
Гар шу асрда ҳам.хур Ватан ишин
Ўз ишимдир, дея қабул этмасанг.
Тан олмасанг агар миллионлар дардин,
Уни альбомингга ёзмасанг агар,

Майлига, кўзларинг кўр бўла қолсин,
Майли, қулоқларинг бўлиб қолсин кар.
Кўзларингни очгин, қара дунёга,
Дўстим, ҳақиқатни ҳис эт бир замон.
Сен учун, мен учун жангда мардона
Миллион-миллион одам тўккан эди қон.
Тарих бизлар учун жангта кирганда
Нима керак яшаш ўргимчак мисол.
Озодлик, йўлингга ғов бўлганларга
Найзадай санчил-у, тезроқ бўла қол...
Хуррият шундайин эзгу сўздирким,
Унинг замирида энг олий қисмат...
Унда мен ахтарган энг порлоқ Инсон,
Унда мен истаган синмас ҳақиқат!
Хур Ватан сўзини ёздим альбомга,
Сен унга боқмагин бир эрмаксимон.
Қалбим буюрмаса, бирор сўзни ҳам
Ёзмасман ҳеч қайда, ҳеч вақт, ҳеч қачон!

1964



“МУНОЖОТ”НИ ТИНГЛАБ...

Қани, айт, мақсадинг нимадир сенинг,
Нега тилкалайсан бағримни, оҳанг,
Нечун керак бўлди сенга кўз ёшим,
Нечун керак, рубоб, сенга шунча ғам.
Эшилиб, тўлғаниб ингранади куй,
Қайлардан туғилмиш бу оху фарёд.
Ким у йифлаётган? Навоиймикин
Ва ё май куйчиси Хайёммикин, дод!
Етар, эй чолғувчи, бас қил созингни,
Бас, етар, кўксимга урмагил ханжар.
Наҳотки дунёда шунча ғам бордир!
Агар шу муножот рост бўлса агар,
Агар алдамаса шу совуқ симлар,
Гар шул эшитганим бўлмаса рӯё,
Сен бешик эмассан, дорсан, табиат,
Сен она эмассан, жаллодсан, дунё!..
Эшилиб, тўлғаниб ингранади куй,
Асрлар ғамини сўйлар муножот.
Куи шундай бўлса, ғамнинг ўзига
Қандай чидай олган экан одамзод!

1964

* * *

Бола эдим,
Менинг озроқ
Бўлар эди ваҳима “дардим”.
Гулдираса ногоҳ момақалдироқ
Онамнинг бағрига яширинардим.
Бовлиқ эшар эдим бир кун пичанда,
Ҳамла қилиб қолди чинқироқ илон.
Серкесак шудгорга қочдим ўшанда,
Онамнинг бағрига шошганимсимон,
Ўша йиллар эди, қишлоқ кўчасида
Қувлаганди мени бир ит қутуриб.
Ўшанда осилиб чинор шохчасига
Қутурган итдан ҳам қолдим қутулиб.
Майли, дейман бугун бўрон турса ҳам,
Майли, даҳшатларга тўлса ҳам дунё.
Балки фазоларнинг кўйнида бир дам
Бекина олурман улардан, аммо
Гар гуноҳ ортиурсанг ўзингта оғир,
Виждон азобида қоврилсанг бот-бот.
Ҳайҳот! Кимга бориб дод дейсан, ахир,
Қайга бекинасан ўзингдан, ҳайҳот!

1964



АСРИМИЗ ОДАМИ

Менинг кўз ўнгимда жонланар тарих,
Фамлардан тўқилган шу кўхна олам.
Асрлар бирма-бир ўтар ва ахир
Юксалар қаршимда энг бахтли одам.
Юксалар-у, шу дам чопар, уринар,
Талпинар қайгадир билмасдан тиним.
Бахтининг ёнида фами кўринар,
Фами кўринади бахтида унинг.
Билагида гарчанд етарли кучи,
Бойлик эргашса-да гарчанд ортидан,
Унинг чехрасида ташвиш бор, нечун?
Нечун у айрилмиш ҳаловатидан?
Гоҳ бемор бошида жарроҳ бўлиб у
“Тақдири азал”га кўрсатса кучин.
Гоҳо бир довюрак сайёҳ бўлиб у
Совуқ Арктикага уради тўшин.
Дам оғир хаёлга бўлур занжирбанд,
Дам кўшиқ тўқиди у ёна-ёна.
Интилар юлдузлар туманига дам,
Дам ойнинг ёнида бўлар парвона.
У нима истайди? Шону шавкатми?
Юлдузлардан баланд, кундан пурзиё.
У нима истайди? Тенгсиз қудратми,
Оёфи остида ётсинми дунё?!
У нима истайди? Балки истаги
Унинг теграсида айлансин олам?
О, дўстим, саволнинг йўқдир кераги,
У истайди бунинг ҳаммасини ҳам!
Одамлар ўтдилар бир вақт, бир замон,
Ўтдилар энг оддий бахтдан ҳам йироқ.
Ягона орзузи эди парча нон,
Энг буюк армони — озод яшамоқ!
Одамлар ўтдилар бир вақт, бир замон,
Ҳа, яшаб ўтдилар, энди-чи, мана:
Ўзи банди бўлган олам устидан
Ҳоким бўлмоқни у истар ягона!

1964

БУЛУТ

Тиниқ күл бағридан парча оқ булут
Сузиб чиқди бир вақт мовий осмонга.
Шамол қанотида йўл олди хушнуд
Ошёнидан узоқ-узоқ томонга...
Қайларга шошарди?! Билмас эди у
Ошиб ўтди чўллар, тоғлардан йироқ
Ва бир кун кезишлар жонга тегди-ю,
Қайтмоқ бўлди шунда ортига, бироқ,
Бироқ... йўл бермади шамоллар ҳайдаб,
Йиғлаб битди булут, сел бўлди кўз ёш.
Сўнг ирмоқ бўлди-ю, билмайди, қайда...
Маконин ахтариб олиб кетди бош.

1964

ЎЗБЕКИСТОНДА КУЗ

Юргил, далаларга кетайлик, дўстим,
Диққинафас уйда ётмоқ пайтимас.
Олтин Ўзбекистон тупроғи бу кун
Бир пари фаслнинг оғушида масти.
Шабнам шовуллайди боғлар қўйнида,
Салқин туман ичра бўзарар тонглар.
Қуёшнинг эринчоқ ёғдуларида
Нафис ялтирайди барги хазонлар.
Ҳар ёнда тўкинлик...
Куздан нишона...
Ҳар ёнда гўзаллик ёймиш дафтарин.
Сонсиз эгатларга сочилимиш, ана,
Менинг шодликларим, эзгу дардларим, —
Менинг она халқим...
Эй қадим, ҳалол,
Ризқи она ерга сепилган халқим,
Ушоқ чигитни ҳам этмай деб увол,
Миллион эгатларга эгилган халқим!
Бир нафас бошингни кўтаргин-у, бок
Ер юзида ажиб виқор ва нуфуз.
Сенинг ўзинг каби ўйчан ва қувноқ
Хушфеъл бўлиб келмиш тупроғингта куз.
Улуг Алишернинг соч оқин кўриб,
Оғир хаёлларга чўмган бу фасл,
Қайрағоч ёнида ғамгин ўтириб,
Чолларга ҳассалар йўнган бу фасл,
Азалий кўркини қиласди кўз-кўз...
Наҳотки шунча тез айланар дунё?!
Бахтли кексаликни ёдга солар куз.
Сокин хилватларга чорлайди, аммо,
Дўстгинам, пайтимас, айлаб сайрибоғ,
Хилватда ўй суриш ярашмас бутун.
Заҳматкаш ўзбекнинг ҳосили қандоқ?!

Кузнинг фалсафаси шудир биз учун.
Улуғ меҳнат кезар шан далаларда,
Ҳар ёнда ҳоким бир ташвишли илҳом.
Қуёш бота бошлар ... гавжум қирларга
Қорая-қорая тўшалар оқшом.
Эҳ, кузги оқшомлар...
Дилимда менинг
Теран туйғуларим қўзғалар жўшиб.
Қўзғалар-у, шу дам қалбимдан секин
Тўкила бошлайди ойдин бир қўшиқ.

1964



* * *

Йўлим бошлар,
Кетарман бир кун
Сендан йироқ, ўзга томонга.
Уй ёнидан ўтаркан, секин
Кўз ташларсан бўм-бўш маконга.
Балки у кун курсида якка
Турган бўлар ўзга бир одам.
Балки у ҳам ётиб тўшакка,
Хаёл сурар эҳтимол у дам.
Балки уни ўхшатиб менга,
Чақиравсан номимни айтиб.
Ишонмассан балки кўзингга,
Балки сўнгра боқмассан қайтиб.
Ёрилмаган ярадай севги
Унда бизни қийнамас тўлиб.
Кўчаларда, ёр эмас, энди
Тўқнашамиз бегона бўлиб;
Наҳот биздан қолмас ҳатто мунг,
Наҳот бўлмас бирор хотирот?
Ишонмайман, муҳаббатдан сўнг
Бегоналик бошланса наҳот?!

1964

* * *

Сен Пушкиннинг севган малаги,
Сен Гёте орзу этган қиз.
Сен Байроннинг ўтли юраги,
Сен Гейнени ёндирган юлдуз.
Алишернинг Гулисисан сен,
Сен Лутфийнинг сўлим ғазали.
Булбулисан Ҳофиз гулшанин
Ва Хайёмнинг ширин асали,
Толеимда нозланиб турган
Эй сен, менинг эрка гўзалим!

1964

* * *

Юлдузлар ўтига бардош берурман,
Фазолар тафтига қилурман тоқат.
Ёнингга соғ-омон қайтиб келурман,
Оташ нигоҳингда ёнгали фақат.
Тўлқинлар қутурсин майли, беомон,
Менинг қисматимни кўмолмагай у.
Барibir ёнингга қайтаман омон,
Мовий кўзлариніга чўмгали мангур.

1964

* * *

У қўшиқ куйлади ёр шаънига маст,
Шўхчан шеърлар айтди севги номидан.
Ҳаммани кулдирди, қиз эса фақат
Бепарво жилмайиб ўтди ёнидан.

У қўшиқ куйлади ёр шаънига маст,
Йифлаб, фарёд чекди севги номидан.
Ҳаммани йиглатди, қиз эса фақат
Бепарво жилмайиб ўтди ёнидан.

У қўшиқ куйлади ёр шаънига маст,
На кулди, на қатра тўқди ёшини.
У куйлади мағур, қиз бўлса шу вақт
Хузурига келди эгиб бошини.

1964

* * *

(“Соя” дарраматик достонидан)

Уни кўрсам, қора қуюн қоплар дилимни,
Шунда кимдир йигит номим масхара этар.
Аlam билан мен қолгандай тишлаб тилимни
Феруза ёт,
Феруза ёт?!

Даҳшат нақадар!

Кўз олдимда турибсан-ку, Ферузам, шу зум
Қайси бир куч ололаркан сени қўлимдан!
Токи танда жоним борким, очиқдир кўзим,
Қайси бир куч ажратолар толе гулимдан.

О, агар сен-чи?

Мамнун бўлиб боқсанг-чи сен ўшал тақдирга?!
Унда, наҳот, тенг этсанг-а эр номимни қора бир ерга?!
Нега гавҳар бўлмадинг сен ва ё чақмоқ тош,
Қўлларимга туғиб юрсам кечаш-ю кундуз.
Нега севгим айламаган сени бир гултоҷ?!
Бошгинамга қўйиб юрсам кечаю кундуз.
Нега бир тош бўлмагансан, сени авайлаб,
Тил остимга солиб юрсам жонимга жойлаб,
Нега бир тош бўлмагансан?!

1964

КУЗ МАНЗАРАСИ

Кечки кузак кирмоқда, нина сочар изғирин,
Деҳқон ҳам ташлаб кетди қадрдон дала-қирин.

Ҳувиллаб қолди, мана, гавжум боғлар, боғчалар,
Яшил элларга томон учиб кетди күшчалар.

Кетди қирдан турна ҳам, бўшаб қолди табиат,
Ўлик мезонлар кезар совуқ далада фақат.

Қаҳрабо кўз ёш тўкиб туарар фақат дарахтлар,
Не қилсин, учай деса, уларда йўқ қанотлар...

1964

* * *

Гоҳо ер меҳрини ўйларкан,
Эсга тушар дорнинг сиёғи;
Ажаб ҳикмат, одам ўларкан
Узилганда... ердан оёғи.

1964

* * *

Куй, дўстим, тилларанг шаробдан менга,
Куйгин, шонли улфат кўрсатсин қучин.
Ичай, отагинам дэҳқон ҳаққига,
Жавдар хирмонининг соғлиги учун!
Ортиқ ҳеч бир нима менга керакмас,
Бошимда нур сочиб турса бас офтоб.
Ўша заҳматкашим омон бўлса бас,
Куйилиб турса бас fazal ва шароб.

1964

* * *

(*Манзара*)

Булут тошди,
Водий осмонини
Қоплаб олди хира кўланка.
Ел овора,
Намхуш ҳазонни
Учиролмай боғдан йўлакка.
Новдалари бирдан қотгандай
Кўринади сукутда толзор.
Гўё ниманидир кутгандай
Булутлар ҳам ювош, беозор...

1964

* * *

- Нега мени севмадинг?
- Кўзгинанг юлдуз учун.
- Нега мени демадинг?
- Қошгинанг қундуз учун.

Юлдузи йўққа боқай,
Юлдузим талош бўлур.
Кундузи йўққа боқай,
Кундузим талош бўлур...

.....
.....

1964

ЮЗМА-ЮЗ

I

Келингиз, дўстларим, келинг, бир нафас
Сўзлашиб олайлик очиқ, юзма-юз.
У йироқ истиқбол мавзумиздир, бас,
Демакким, истиқбол борасида сўз.
Келингиз, дўстларим, келинг, бир нафас
Шу кўҳна дафтарни очайлик яна.
Эриш тумолмасин ташбиҳларим, бас,
Хозир дабдурустдан дейманки: ана, —
Мамонтлар тўдаси чиқди ўрмондан,
Шимол кўчкенидай ваҳший ва сармаст
Ва лекин ваҳшийроқ тўда ҳар ёндан
Бостириб келдилар гурас ва гурас.
Яна тўқнаш келди инсон ва ҳайвон,
Яна ҳаёт учун жанг кетди узок.
Яна голиб келди ваҳший оломон,
Яна шўрлик мамонт енгили, бироқ
Ўша кун бузилди азалий удум,
Уни инсон ўзи бузиб ташлади.
Кундузги ошкора ўғрилардай у
Ўлжасин уй-уйга торта бошлади.
Бизнинг бошимизни боғлаган зулмат,
Нотиқлар тутақиб сўккан зулм, қон,
Дунёдаги неки ёмонлик, кулфат,
Барчаси бошланган эди ўша он...
Йўқ, ҳавас қилмайман маймунга ҳечам,
Иштонсиз аждодни қўмсамоқ нега?
Аммо ўлжасини талашган одам
Йўлдан адашгандай кўринар менга.
Мен бир тажрибасиз, фўр йигит, нечун
Адашдинг деяпман дунёга, ҳайҳот.
Абдулла, ханжарни ўзингга ургин,
Сен ўзинг адашмай ўсдингми, наҳот?!
Ҳа, ёшлиқда мен ҳам бир оз адашдим,
Қотил бўлганим йўқ, аммо ҳар қалай...

Дунё ҳам бир вақтлар мамонт талашиб,
Адашиб кетганди йўлидан мендай.
У шўрлик илк бора ўрмонга қочди,
Қулдорнинг калтаги қонатди бурнин,
Спартак бўлиб сўнг ҳаққин талашибди,
Зевс сиймосида ахтарди ўрнин.
Мангу экзотика — Римни у қурди,
Бироқ тиёлмади кўзда ёшини:
Юрагига Цезарь найзасин урди,
Чингизхон чўқмори ёрди бошини.
Асрлар шундайин тентиб ўтдилар,
Ер узра хукмрон фам бўлди фақат!
Кимларки яхшилик донин экдилар —
Ёмон деб ном олди ўзи оқибат!
Наҳотки дунёда ҳақсизлик мангу,
Наҳотки одамзод қилингандир оқ?!
Наҳот ўша Фрейд ҳақ бўлса, ёху,
Наҳот қотил бўлса ўсиб чақалоқ?!

Одамлар бир замон энг буюк маъни —
Ёшлик софлигига қўйғанлар сарҳад.
Ёшлик софлигига ким қайтмас, қани,
Адашган йўлидан ким қайтса, шу мард!
Ер юзида кечган зулмату ваҳшат
Чекинар-ку охир чириб ва қариб.
Фақат У истиқбол — ул эзгу ният
Инсонга софлигин берар қайтариб.
...Ўжар мухолифлар, сал пастга тушинг,
Оғирроқ бўлинг сал, сиз ҳам, жўралар.
Эй, нозик ўқувчим, учмасин ҳушинг,
Буюк мақсад сари етса мисралар.
Фарёд солманг тағин, қизил гап, дея,
Элга фарзанд инсон элнинг гапин дер.
Сизга бир жуфт савол айлайин ҳадя:
Мавзуда нима айб, фализ бўлса шеър?
Осон қутуламиз мавзудан баъзан,
Хаспўшлаб ўтамиз, урра-урралаб.
Сўнгра дод соламиз: — Фалону пистон,
Қулоқча ёқмайди деймиз — ўша гап.
Ҳолбуки, ўзимиз ахтарган баҳтлар,
Бўғзимизда турган ҳар эзгу армон —
Барчаси бир сўзда жамланди, агар
Ёқмаса топингиз бошқа бирор ном!

Ха, мен истиқболни куйлайман, балли,
Унда халқ йўлига туташар йўлим.
Бироқ урраларни севмайман ҳали,
Урра демоқликка қисиқдир тилим!
Баъзи одамларни кўрсатиб ҳали
Қийиндир соф инсон, дея атамоқ.
Гарчи инсон зоти бўлолмас пари,
Бироқ ҳали бордир шайтонга ўртоқ.
Қора булат ёғмай кетса-да магар,
Тиник кўзгуларга тўшаб ўтар нам.
Ҳали осмонларда булатлар учраси,
Ҳали найзалар бор, баъзан менга ҳам
Шундайин тиканлар санчилар гоҳо...
Шунда ҳамдард бўлар ширин меҳнатим.
Дўстлар даврасидан кетаман ҳатто,
Олис юлдузларга кўчар хилқатим.
...Юлдузлар, юлдузлар, сиз менинг учун
Софлик ва маъсумлик бўлиб ёндингиз.
Борим шудир, дея жовдираб секин
Оқ кўнгил фарзандим бўлиб қолдингиз.
Йўқ! Йўқ! Мен сизларга термулиб бедор
Фалак сафарини ўйлаганим йўқ.
Юлдузлар, мен сизга боқсанда хумор,
Қалбимда ер ишқи бўлади тўлиқ.
Юлдузлар, билмайсиз менинг ҳалқимни,
Бундайин заҳматкаш ер юзида кам.
Елда тиним бордир, унда йўқ тиним,
Шундай ишпаратстир у мунисгинам.
Мен уни ўйлайман тун-кечаларда,
Она ҳалқим, дейман, меҳрим оқар жим.
Кўзимга баъзида кўринса жанда
Кўнглим тўлиб кетар, инграйман, ҳалқим...
Ҳалқим, мозий ўтди, tolе кўрмадинг,
Пиширдинг ўзингта бенасиб таом.
Кийгиздинг бирорвга, ўзинг киймадинг,
Юлдузни кашф этиб ном олдинг — авом!
Ўтганга ачинмоқ одатим йўқдир,
Бехуда мотамлар теккандир жонга
Ва лекин тош отмай иложим йўқдир
Фурқатни бадарға этган замонга.
Мени кечирингиз, оддий одамлар,
Сизни эсга солар ҳар машъум тақдир.

Орангизда ўтди қанча фурқатлар,
Безгакка чалинди қанча Алишер!
Ер юзида кезган зулмату ваҳшат
Чекинар-ку ахир, пок бўлар дунё!
Фақат У истиқбол — ул эзгу ният
Халқимга баҳтини айлар ҳадя.

II

Мезонлар учмоқда, ҳаво билтурдан...
Яна ҳисларимга кел, деб ёлбордим.
Хазонлар тўкилди, мен ҳам қалбимдан
Бадбин ўйларимни қувлаб юбордим.
Ажойиб фасл бу: ўйчан, баркамол —
Қиздай маъюсгина туради куйлаб.
Мен кузни севаман, кезаркан хушқол
Олтин Ўзбекистон тупроғи бўйлаб.
Бўғзимга ҳисларим тиқилар яна,
Танҳо тентирайман, билмайман, нечун.
Куйлагим келади, тунлар жимгина,
Гулгун шафақларнинг соғлиги учун.
Кумушранг йўлларда от суреб юрсам,
Шимирам шабнамдан, куйласам сармаст.
Сўнгсиз водийларга термулиб турсам,
Бепарво оҳуда қўзғазам ҳавас.
Аммо кечалар мен кессан-да бедор,
Охулар қўйнимга кирса-да қиздек,
Менинг нигоҳимни тортади такрор,
Миллион эгатларга сочилган ўзбек.
Гарчанд пахтазорга боқаман мен ҳам
Ва лекин дилимда ташвиш бор менинг.
Майлига, шўх қўшиқ янграсин тилда,
Рангпар сингилгинам, ўйлайман сени.
Кузги райҳондайин маъюс ўсдинг сен,
Табиат бермади билагингга куч.
Ўзингдай одамга қаллиқ тушдинг сен,
На соғлиқ, на ёрдан ялчимадинг ҳеч.
Мен сени ўйласам, синглим — рангпарим,
Гоҳо тўлғонаман сўзсиз, ҳасратда.
Сен унда тер тўксанг, синглим, жигарим,
Мен нечун юраман ахир ишратда?!

Йўқ, рангпар бўлмасин ҳеч ким ҳам, йўқ, йўқ!
Сингиллар полвондай юрсинлар бардам.
Ва лекин табиат бермайди хукуқ
Полвон деб уларни унутмоққа ҳам...
Сенинг қаторингда она ҳалқ бордир:
Сен каби меҳнаткаш, сен каби суюк.
Унинг ташвишини унутмоқ ордир,
Уни унуганлар — тўнкадир, куюк.
Сингилга — ҳалқимга боқсам доимо
Улув келажакни айладим орзу.
Дедим: Истиқболдан баҳт топар дунё.
Дедилар: гўдагим, тўғри йўлинг шу.
Қўлимдан тутди-ю, шу улув имон,
Менинг ҳам кўнглимда жўшди тилагим,
Аммо баъзиларга дуч келсам бир он
Аччиқ изтиробга тўлар юрагим.
Рост-да, бирорларни этади шайдо,
Ўз айби турганда ўзга бир чирой.
Кулгу аримасин лаблардан, аммо —
Тақдир эркалатди бизни ҳар қалай...
Сокин кечаларда келар ёдимга
Қанчалаб жувонмарг йигит қисмати.
Дейман, қани ёнса авлод қонида
Ўша оталарнинг буюк шиддати.
Худбин тенгдошимга қарайман ғамгин,
Қўлмак давра кўрсам эзилар кўнглим.
Ҳалқим, келажагинг ўшалармикин,
Ҳалқим, шундайларга қолмасин кунинг.
Мен ўзим нимаман? Аслида, балким
Энг нўноқ одамдан нўноқман, фақат,
Фақат бир нарсани яширмас қалбим:
Менинг юрагимда бордир Муҳаббат!
Сени, она ҳалқим, севаман жондан,
Сенинг ташвишингни ташвишим дейман.
Нима қилолардим? Фойдам кам гарчанд,
Бироқ мен ўзимча ғамингни ейман.
Дилдан қувонаман, қирларда пода —
Яғрини ялтираб юрганин кўрсам.
Дилдан қувонаман, тошлоқ ерларда
Буғдойзор шовиллаб турганин кўрсам.
Суониб кетаман мактаб боладай,

Сонсиз мўриларда кўраркан тутун.
Ана, таниш уйда доғ бўлмоқда мой,
Шивирлайман: — Синглим, насибанг бутун!
Куйлаб замондошнинг қадду камолин
Эркиннинг шўх сози таратса жаранг,
Дейман, У истиқбол — ул муnis толе
Халқимга шўх қўшиқ бермоқда, қаранг.
Тўю тўйхонани кўрсам, ҳамма вақт
Улуг замонага айтдим шукrona.
Аммо инсон умри тўй эмас ҳар вақт,
Олддадир ҳали энг гўзal замона.
Истайман, қора ранг қолмаса жиндай,
Истайман, ботмаса шу рангин қуёш.
Аканинг сингилга ачинганидай
Инсон инсон учун тўка олса ёш.
Она халқ бахти деб ҳар вақт, ҳар қачон,
Истайман, бир сафда турса одамлар.
Сокин кечаларда қалбни ногаҳон
Куршаб олганида шундай оҳанглар —
Сизга талпинаман, одамлар, яна,
Үтмиш муҳаббатга талпингандай жон.
Аммо баъзи маҳал қоламан якка
Севгиси рад бўлган ёш Вертерсимон.
Йўқол, эй бехуда мағрурлик ҳисси,
Йўқол, эй бехуда самовий дамлар.
Ўзимни сизлардан ажратсан, сўзсиз
Таважжух этмангиз дейман, одамлар!
Дўстларим, мен сизга талпинган дамда
Қалбимда бўлади ёлғиз бир раъйим:
Хиёнат бўлмаса дейман ҳеч кимда,
Дўстларнинг имони бут бўлса доим.
Дейдилар: дунёни кураш айлар бир,
Инсон жанг-жадалда бўлар жуфту тоқ.
Ахир қон оқиши шартмикан, ахир,
Бу кураш қайси бир жангдан осонроқ?!
Деймизки, оламни буғдойзор боссин,
Ер юзида фақат янграсин кулги.
Ахир, буғдойзорнинг ўзи унмаским,
Дилдан кула билиш осон эмас-ку.
Ҳа, буюк жанг бу ҳам, қошида хомуш —
Не ўжар одамлар бош эгмоқда жим.

Шу метин сафларни ким бузолур, хўш,
Шу эзгу курашдан четда туарар ким?!
Қани, ҳей дўстларим, тинглангиз сўзим,
Бир сўзким, оддийдир, ҳақиқатсимон.
Дейманки: Истиқбол — тарихнинг ўзи, —
Келмоқда кимга дўст, кимга беомон.
Ҳайқиряпман ҳозир... Баъзида лекин
Заиф шамолларга бўйсунар созим.
Юрагим, юрагим, миттисан-ку, сен,
Ҳайқириш аслида сенгами лозим.
Биламан, ортимдан кимдир ўқрайиб,
Қараб ўтирибди худди шу замон.
Қани, ҳей, бу йўлдан бўлмасин тойиш,
Қани, ҳей, Истиқбол, янгра беомон!
Майлига созимни севмас давралар,
Ошиқлар сатримдан чекмаслар фарёд.
Менинг хаёлимни ҳозир етаклар
Фақат Истиқболни эслатган ҳаёт.
Ана, йўл четида борар қурилиш,
Фишт терувчи йигит дорбоздай юар.
Отга қамчи урар керосинфуруш,
Бир кампир энгашиб кўча супуар.
Ана у таниш жой — анҳор қирғоғи,
Пивога кўп хумор талаба дўстим,
Мен сенинг исмингни билмайман, соқий,
Буюр мен учун ҳам майли бир жуфтин.
Уларга боқаман, қалбимда ўқтин
Бир хушнуд ҳиссиёт кўтарар елкан.
Ўзгаларнинг ғами йиғлатса, нечун,
Нечун иқболлари қувнатмас экан?!
Ахир инсоф билан ўйласанг-ку, рост,
Ўшалардир бугун соҳиби замон.
Ҳеч кимнинг ҳеч кимдан тили қисиқмас,
Чегарадир фақат инсоф ва виждон.

* * *

Қани, ҳей, дўстларим, ташланг бир қадам
Шу эзгу Истиқбол ҳимоясига.
Мен сизни кутаман, ушбу шеърим ҳам
Ўшанди етади ниҳоясига!

1964

* * *

Кел, ёруғ эт, сенсиз бу хона
Зулмат тұла қоронғи қафас.
Сенсиз дунё үзи ә... нима
Хувиллаган вайронна-ку, бас,
Кел, ёруғ эт, сенсиз бу хона.

Қизифи йүқ менга яшашнинг
Бу хилватда дүстүр ёронсиз.
Ёргудайин қалбимни ғашлик.
Ёрил, юрак, дүстүр ёронсиз
Кимга қизифи бор яшашнинг...

Эшигимдан ўтган йўловчи
Кетма, кетма, киргил уйимга...
Ҳамдам бўлгил фикрим-ўйимга
Келгил, майли, душман бўлсанг-да...
О, танҳолик қурсин, кел, одам,
Майли, ким бўлсанг...

1964

АЙРИЛИҚ ҚЎШИФИ

Асло айрилиқни куйламас эдим,
Умрим ўтса дердим хушнуд, баҳтиёр.
Фақат висолингни куйласам дердим,
Не қилиб кўйдинг сен, бевафо дилдор.
Не қилиб кўйдинг сен?! Алвидо демак
Наҳот, шунча осон севган кўнгилга?!
Хайр дейман мен ҳам ва лек ноилож,
Сенинг хотирангни сақлаб мангута.
Хайр, — дейман мунгли... аммо биламан:
Қалбимдан ширин куй куйларман яна.
Дўстларим севгисин шан давраларда,
Шўхчан висолларин куйларман яна.
Шунда, эй хотирот, заҳар тилингни,
Ширин дамларимга қўшмагин фақат.
Бемаҳал уйғониб, йўқолган ишқим,
Шодумон қалбимни букмагин фақат.
Заҳар қўшма фақат қўшиқларимга,
Мен ширин қўшиқлар айтмоқ истайман.
Кулгу ила мен ҳам шўх давралардан,
Тотли хаёл ила қайтмоқ истайман...

1964



ҚАСАМ ДАРА

Қасам дара гувиллайди масть,
Гувиллайди туби йўқ макон.
Кўқдан унга кўринар фақат
Митти юлдуз ва парча осмон.
Атрофидан қоқ қоя тошлар
Журъат билан термулади лол.
Бир кўрай деб зина тараашлаб
Қояларга тирмашар ҳилол.
Бунда на қуш, на бир жонивор
Ва на шамол кўрсатар қора.
Афсоналар сўйлайди такрор
Менинг чанқоқ дилимга дара:
— Ана, овчи, оху қувади,
Учадилар тошлар аро тик.
Қочқин оху тоқقا қўнади,
Сўнг дарага сакрайди шўрлик!
Қасам дара — даралар шери
Ўлжа кутиб увларкан пастда,
— Ҳайт, — дейди-ю (о, сен, ов меҳри)
Ташланади овчи ҳам пастга.
Ботирини сақлайди омон
Тасодифга тўла бу дунё.
Овчи овин айлар саранжом,
Овулига чоғланар, аммо,
Аммо бирдан қотади караҳт...
Асир этмиш уни бу макон.
Атрофида тошлар-у, фақат
Тепасида юлдуз ва осмон.
Алвонларин ёйиб уфқقا
Чиққунича зар кокил қуёш,
Шўрлик овчи интилар кўкка,
Сўнг иложсиз тўкар юм-юм ёш.
Ботирини ахтариб шу зум
Келар ёри, овулдошлари.

— Айтинг, ота, не қилмоқ юзим?! —
Кекса чолга юзланар бари.
— Болаларим, ов меҳри уни
Туширибди дарага осон,
Аёл меҳри, ёр меҳри, кўринг,
Олиб чиқар жардан бегумон.
Шунда,
Ёвқур бир йигит дадил
Бажо айлар чолнинг шиорин:
Дара узра кўтариб адл
Қучоқлади овчининг ёрин.
Фарёд солар овчи хотини,
Йигит эса кучар яхшироқ.
Овчи, ҳайҳот, қутурап ёниб,
Қафасдаги шердан ваҳшийроқ.
Гүё чўкар даранинг маҳри,
Гүё тошлар кетар орадан:
— Ҳайт, — дейди-ю (о, сен, ёр меҳри!)
Овчи чиқиб кетар дарадан.
Қасам дара гувиллайди маст,
Гувиллайди туби йўқ макон.
Кўкка боқиб у кўру карахт
Афсоналар сўйлайди ҳамон.
Қасам дара, кездим маҳрингда
Киприқдаги ёшдай омонат.
Қасам дара, сенинг бағрингта
Қасам ичган тушармиш фақат.
Ҳайрат билан сенга бокурман,
Ҳали қасам ичмаганим рост.
На овчиман ва на ботирман,
Кезиб юрган ошиқман, холос.
Пайти келса, севгим, сен учун
Ёр олдида ичурман қасам.
Фазоларни айланиб бутун
Денгизларга кўярман қадам.
Амр этса гар ўша дилбарим
Ташланаман дарага шу зум.
Бир илтимос фақат, дўстларим,
Қайтишида чиқаман ўзим!

* * *

Қани, най бер менга, дўстгинам,
Бергил, майли, рубоб бўлса ҳам.
Бер, бир нафас бўшатиб олай
Тўлиб кетган юрагимни ман.
Қаламимнинг кучи етмади
Ҳисларимни буткул тўкмоққа.
Дўстим, тингла, япроқчаларнинг
Шивирлаши эшитилмоқда...
Гўзал, сокин оқшом чўкмоқда,
Тебранади елда чироқлар.
Дараҳтзор ҳам сокин солланар...
Қандай маъсум, эрка бу чоқлар...
Қандай ширин дамлар... менинг ҳам
Юрагимда бир ҳис тошмоқда,
Юрагим ҳам дараҳтзор каби
Ниманидир олқишиламоқда.
Кўзларимга бу ёруғ олам
Кўринмоқда бирам суюмли.
Қани, най бер менга, дўстгинам,
Тўкай тўлиб кетган қўнглимни.

1964

* * *

*Умид билан суқилган таёқ
Бир кун берар меваю япроқ.*

Гёте

Учкур хаёл соҳиби йигит
Яшар эди хилват қишлоқда.
Уни бир кун етаклаб умид:
“Хайр, — деди она даргоҳга. —
Олим бўлиб қайтай, қишлоғим...
Кечир, қолиб кетсам агарда”.
Уни ёш ва бўронли қалби
Олиб кетди олис шаҳарга.

Одамлар-чи, баъзи одамлар
Қишлоқ аро тарқатдилар гап:
“Хой, фалончи, эшилдингми, а,
Хув фалончи дайди бўлмиш заб,
Таги паст-да, курт бор бошида,
Тортди фалон қариндошига...”

Йиллар ўтди... Барг ёзди ахир
Умид билан суқилган таёқ.
Шараф сенга, сабот ва ақл,
Шараф сенга, меҳнат ва идрок!
Олим бўлиб қайтди у, балли,
Чўлларига сув чиқаргали...

Одамлар-чи, энди, одамлар
Бир-биридан сўрар суюнчи:
“Хой, биродар, эшилдингми, а,
Олим бўлмиш ўша фалончи.
Ёшлиқда ҳам оқил эди, ҳа,
Тортган эди бизга, ҳа, бизга...”

1964

ГЕОЛОГ ҲАБИБ АБДУЛЛАЕВ ҚАБРИ ЁНИДА

Айт, нелар изладинг ернинг остидан,
Куқунни қўзингга айлаб тўтиё.
Темир панжаралар қабринг пастида,
Сенинг излаганинг ўшамиди ё?!
Нима ахтаргандинг ернинг остидан,
Тошлар меҳварига ёзганмидинг байт.
Қабринг тепасида мармар обида,
Сенинг ахтарганинг ўшамиди, айт!
Нечун сен жимжитсан, эй улуғ инсон,
Жавоб ё сен учун бир жабрими.
Нима ахтаргандинг, эй нури жаҳон,
Ёки ахтарганинг шу қабрими?!

1964

ИСТАКЛАРИМ

Янги йил ҳам келаётир,
Дўстларим, бугун
Янги-янги баҳт тилаймиз бир-биримизга.
Янги зафар, янги омад, янги байт учун
Янги-янги аҳд тилаймиз бир-биримизга.
Ҳамма нарса янги-янги бўлсин, майлига,
Қутлуг бўлсин гўдакларнинг янги қадами.
Ўша янги қадам билан ўссин, майлига,
Шу умидбахш асримизнинг янги одами.
Ҳамма нарса янги бўлсин, дўстларим, фақат
Чехрамиздан аrimасин ҳаётнинг ранги.
Ҳамма нарса янги бўлсин, дўстларим, фақат
Фам бўлмасин, эски ғамлар бўлмасин янги!

1964

* * *

Уйғон, қуёш ўйнар юзингда,
Бугунги тонг шунчалаар гүзал.
Ловуллайди шафақлар ял-ял,
Нечун хаёл қотмиш кўзингда.
Кипригингда ёш олмос-олмос,
Нечун чўмдинг уйқуга қайта?
— Олтин ёшлигимни кўрдим мен,
— Қайда?
— Тушимда...

1965

ОНА ТИЛИМГА

Минг йилларким, булбул қаломи
Ўзгармайди, яхлит ҳамиша.
Аммо шўрлик тўтининг ҳоли
Ўзгаларга тақлид ҳамиша.

Она тилим, сен борсан, шаксиз
Булбул куйин шеърга соламан.
Сен йўқолган кунинг, шубҳасиз,
Мен ҳам тўти бўлиб қоламан...

1965

ДОРБОЗ

Булутларга ёндош,
Осмон остида
Киприкдаги ёшдай турибди дорбоз.
Қиличнинг дамидай арқон устида
Кўзларини юмид юрибди дорбоз.
Одамлар, одамлар, уни олқишиланг;
Қаранг, у нақадар эигчил ва ўктам.
Биз-чи, эҳ... баъзи бир кўзи очиқлар
Эплаб юролмаймиз катта йўлда ҳам.

1965

ТИЛЛА БАЛИҚЧА

Тухумдан чиқди-ю, келтириб уни
Шу лойқа ҳовузга томон отдилар.
Ташландиқ ушоқ еб ўтади куни,
Хору хас, хазонлар устин ёпдилар.
Дунёда кўргани шу тор ҳовузча
Ва гавжум толларнинг аччиқ хазони.
Менга алам қилас, тилла балиқча
Бир кўлмак ҳовуз деб билар дунёни!

1965

ҲАЙВОНОТ БОҒИДА

Баъзан кўп ажибдир дунёning иши,
Ким ҳам бу савдони ўйлаб кўрибди:
Ҳайвонот боғида бир телба киши
Маймунни масхара қилиб турибди.

1965

БУЛБУЛ

Рахматжонга

Сен — булбулсан, булбулларни маст қила қол, булбулим,
Менинг учун сайрашингни бас қила қол, булбулим.

Шому саҳар тиним билмай шарҳ айладинг дилингни,
Қани, айт-чи, булбулгинам, ким тушунди тилингни?

Бирор сени нола деди, бирор деди оҳ-фифон,
Булбул тилин булбул билар, мен билмасман, булбулжон.

Англарми деб беҳудага роз сўйлама, қушим, ҳай,
Сен — булбулсан, булбулгинам, сени булбул тушунгай.

1965

ТЕМИР ОДАМ

Бир ҳайкал турибди,
У — Робот эмиш,
Темирдан ясалган, одам тимсоли.
Илмда энг сўнгти кашфиёт эмиш,
Ақлли зот эмиш, қусурдан холи.
Шахмат ҳам ўйнармиш,
Ер ҳам қазармиш.
Росмана ювармиш юзу қўлини.
Ҳадису ҳисобдан адашмас эмиш,
Ҳаттоқи санармиш Сомон йўлини.
Ёнида халойиқ ҳайратда турар:
— Карапиз, нақадар ақлли, мумтоз!
Хулласки, оламда кашфиёт дерлар,
Кашфиёт эмас бу, кечириңг, устоз.
Тилсимни билмайман, аммо анчайин
Одатим тарк этиб, кўкрак кераман!
Мен сизга темирнинг худди шундайин
Ажиб бир нусхасин топиб бераман.
У ҳам ишлай билар, унинг қошида
Сизнинг темирингиз ожиз бир буюм.
У ҳам санай билар, унинг бошида
Алжабр усули уюм ва уюм.
Балки у донодир беқиёс, якка,
Балки йўқ унинг-чун бирор муаммо;
Балки у ҳеч қандай темир-терсакка
Аъло вужудини эгмайди, аммо,
Устоз, қалби йўқдир унинг ҳам, ҳайҳот,
На нафрат, на ишқни таnlайди у ҳам.
Унинг ҳам кўзида чақнамас ҳаёт,
Мунис боқишлиарни англамас у ҳам.
У ҳам тўлғанолмас,
 инграмас,
 кулмас,
Йиғлаган гўдакни юпатолмас ул.

У ҳам юлдузларнинг ҳидини билмас,
Бағрини тирнамас сўлаётган гул.
Кимсанинг меҳридан, балки, о, балки
Сизнинг темирингиз бўлар миннатдор.
Азиз дўст, меҳрни билмас бу ҳали,
Дўст кутиб йўлларга чиқмас интизор.
Дунё-ю одамлар тақдири зарра
Ташвишга солмагай, йўқ зўру зори.
Ташвишга солади на қўшиқ ва на
Менинг юрагимда нималар бори.
Бу-чи, йиғлай олмас, айланган тошга!
Кимдир у?

Кимдир у? Балки у менман?!
Балки у сиздирсиз?

Балки у бошқа...
Ҳаётнинг поёнсиз уммони ичра
Бор шундай ғариблар — темирлар ҳиссиз.
Ва лекин ўзларин темирмас сира,
Муҳтарам инсон, деб атарлар, эсиз...
Шундайлар бўлмаса, азалдан тупроқ
Яшнарди тағин ҳам іўзалу мумтоз.
Темир одам ясаб юргунча, кўпроқ
“Жонли темир”ларни ўйлангиз, устоз.

1965



УЙҚУ

Одамлар ухлайди ўн йил, ўн беш йил¹,
Сезмасдан, севмасдан, ҳиссиз ва мудроқ.
Баъзида, очиқ гап, ўртанса кўнгил
Ухлагим келади менинг ҳам узоқ.
Майлига, дўстларим унутсин секин,
Умид ҳам узсинлар алвидо айта.
Майлига, олис йил ухлайн, лекин
Энг кутлуғ саҳарда кўз очсан қайта.
Балки ер юзида қолмас эди ғам,
Бундан ҳам ёруғроқ бўларди дунё.
Фақат табассумда яшинарди олам,
Сержилд китобларда ёзгандай гүё.
Ёмон туш кўрмасдик саҳарлаб қалқиб,
Бош эгиб қайтмасдик уйимизга кеч.
Дунёда ёвузлар қолмасди балки,
Разиллар, пасткашлар бўлмас эди ҳеч.
Балки тинчланарди нотинч асrimiz —
Кўксидан қон силқдан ярадор оху.
Унинг дардларини этяпсизми ҳис,
Қандай аср ўзи, биродарлар, бу?!
Урушу фалокат, низою таъқиб
Тинмайди, тинмайди, тинмайди сира.
Қани, ким шодланар асрга боқиб?
Қани, ким атайди уни бокира?!

Асрим, ўша олис ой қорасини
Санаб бўлгунингча бир зум толмадинг.
Бироқ одамзоднинг дил ярасини
Санаб етолмадинг, йўқ, етолмадинг.
Асрим, самоларда ёқолдинг чироқ,
Юлдуз қилиб отдинг фазога ўзни.

¹Летаргия уйқуси назарда тутилади.

Кўзгата олмадинг ўрнидан бироқ
Аскар елкасида турган юлдузни.
Асрим, изга солдинг уммонлар кучин,
Яратмак истадинг сўнмас бир чирой,
Бироқ гулзорингни топтамоқ учун
Қайдадир разилга бериб қўйдинг жой.
Митти фарзанд бўлиб, бир дилбанд бўлиб,
Асрим, сени баҳтда кўрмоқ истайман.
Ва лекин баъзида уйқуга чўмиб
Сендан кўзларимни юммоқ истайман.
Аммо борми имкон бундай уйқуга,
Курашга яралган жафокаш инсон.
Ҳар қандай кураш ҳам ҳаётдир унга,
Ҳар қандай уйқу ҳам — ўлим ҳар қачон!

1965



ОТЕЛЛО

Аброр Ҳидоятов хотирасига багишлайман

Чифатой¹ кўчасин сўл томонида —
Ўтсангиз муқаддас хилхона тараф,
Саноқсиз қабрлар фаладонида
Ётибди Отелло — у буюк араб.
Мен баъзан шу йўлдан уйга қайтаман
Сайр этиб ҳовлиқма сойнинг қошини.
Отелло шаънига салом айтаман,
Зиёрат қиласман мозорбошини.
Арабий кулонкир — Фарбнинг хўжаси,
Майлига, гапимга қиласма эътиroz.
Мен-ку бир ўзбекнинг саркаш жўжаси,
Уйқашга ўхшайди исмимиз бир оз.
Бир замон Оллодан сенинг волиданг
Тиланиб олибди, мен-чи, садақа.
Савдомиз бир экан, номлар ҳамоҳанг
Ва лекин ўхшамас қалблар, шунаقا...
Мен орзу қиласдим сендай севишни —
Қўлимда ханжару қонимда олов.
Уддалай билмадим лекин бу ишни,
“Телбадай севарди” дейёлмас бирор.
Истардим сендаги рашкни ҳам, илло,
Булбулга дард қайда гул йўқса агар.
Ҳам бунинг устига, билсанг, Отелло,
Қизларнинг қўлида у қонли ханжар.
Сендаги нафратни хоҳлардим асти,
Разиллар кўзига боқолсам хунхор.
Чунки ҳалигача, Отелло, рости,
Ягони ўқитиб кўйгувчилар бор.
Ортиқча нафрат ҳам керакмас, аммо
Лақаб ҳам тақмасман кимса отига,
Чунки бу асрда, азиз Отелло,
Ҳурмат кўп буюқдир инсон зотига...
Баъзан кўз ўнгимга тизилиб келар
Севигига гадолар айқаш ва уйқаш.

¹Ҳозирги Форобий кўчаси шеър ёзилган пайтда шундай аталган.

Гадо деб атама сен бизни дерлар,
Дейдилар, дунёда Отелло яккаш.
Шунда сен келасан кўзингни ёшлаб:
— Қайда ишқ, қайда рашқ, қайдадир улар?!
Шу шўрлик заминни кетмангиз ташлаб,
Муқаддас туйфулар, олий туйфулар.
Бизнинг руҳимизга ҳокимдир баъзан
Қаноат аталмиш ожиз бир сезги.
Отелло, Отелло, сенинг ишқингдан
Ҳайратта тушишнинг ўзи бир севги...
Йўқ, тақлид қилмасман сенга росмана,
Ҳар кимнинг ҳаётда бор ўзга ўрни.
Ролингни ўйнаса, рашк қилиб, мана,
Қабрга тиқибсан буюк актёрни.

1965



АЁЛ

Йигитлар мактубин битганда қондан,
Келинлар фироқдан чекканда ёху,
Унинг ҳам паноҳи қайтмади жангдан,
Үн тўққиз ёшида бева қолди у.

Севгидан етиму умрдан ярим,
Куриган кўксидаги ёлғиз беланчак.
Абадий фироқни, ҳайҳот, дўстларим,
Абадий висол деб билди келинчак.

Қақраган лабларда оловли нафас,
Кечалар кечмишин айлади кўмир.
Паришон соchlари ёр кўкси эмас,
Муздайин болишда қолди бир умр.

Йиллар ҳам ўтдилар, ҳамон у ёлғиз,
Мунгайиб термулар ботгувчи кунга.
Эй номард табиат, борми сенда ҳис,
Қайтадан баҳт берсанг бўлмасми унга?!

Наҳот ишқ қисмати бунча бераҳм,
Бунчалар буюксан вафо шеваси.
Сенгадир ҳурматим, сенга шарафим,
Қаҳрамон жангчининг содиқ беваси.

Сиз-чи эй, садоқат сатридан нолиб,
Надомат комида қолганлар, айтинг.
Ўзини минг битта бозордан олиб,
Минг битта бозорга солганлар, айтинг.

Шу чўлпон қўзларнинг буюк ҳурмати,
Шу ақиқ лабларнинг рост сўзи дея,
Сўйланг-чи, вафонинг надир қиммати,
Сиз ҳам кутганмисиз бирор сония?!

Баъзида тирноқлар безаги учун
Саҳардан шомгача қилурсиз тоқат.
Бироқ ёрингизни куттали нечун
Топилмас тирноқча сабру қаноат.

Назокат пайтимас, яқинроқ келинг,
Буюк зот қошида айлангиз салом.
Шу содиқ бевага саждалар қилинг,
Шу содиқ бевага айланг эҳтиром.

Ҳатто зеб-зийнатни юлқиб зиёда,
Ҳайкал ҳам қўйингиз бамисли хаёл.
Шундайлар бўлмаса агар дунёда,
Бу қадар муҳтарам бўлмасди аёл.

1965

ЭТГАЛИ

Тўлғаниб гул очилар боғларни гулзор этгали,
Боғ сари дилдор чиқар ошиқларин зор этгали.

Боғ сари чиқмас эди, чиқди бу кун у қасд ила:
Йўлида муштоқларин ё йўғу ё бор этгали.

Ногаҳоний саҳни боғдан ҳайқириб чиқди Хофиз,
Ул деди, ёйди пари кокилларин дор этгали.

Ёлбориб гуллар деди: — Кирма бу боқقا, эй йигит,
Бунга кирганлар кирурлар сочини қор этгали.

Не ажаб, майдон топилса мен учун ҳам деб эдим,
Ўзга бир дилдор билан арузда бозор этгали.

1965

ТУН

Ташқаридა ёмғир шивирлайди жим,
Кўрингай на чироқ ва на бир зиё.
Гўё деразамни чертар аллаким,
Босиб кела бошлар қандайдир рўё.
Ўзимни тўшакка отаман шу он,
Ўраниб оламан ваҳима ичра.
Қоронги йўлакда шитирлар хазон,
Кимдир деразамдан кетмайди сира.
Чироқни ёқаман бетоқат бориб,
Гўё ваҳималар бўлади абас.
Ёмғир ялтирайди нурда оқариб,
Тасалли чулгайди дилни бир нафас.
Липиллаб сўнади чироқ ҳам охир,
Қайдадир шовуллаб эгилади тол,
Кимдир ташқарида энтикар оғир,
Бирдан деразамни қоплайди хаёл.
Кимсан, эй, тунлари мени пойлаган,
Макрига бойлаган ёвуз дарбадар.
Кимсан, эй, руҳимни мағлуб айлаган,
Мағрур юрагимга ташлаган назар.
Ёлвора бошлайман кимгадир ёниб,
Бир зум иродамни этаман бекор.
Бир зум ўзлигимдан қоламан тониб,
Бир зум ожизликка бўламан иқор.
Гуноҳкор бандадай титраб-қалтираб
Кимдандир сўрайман сўнгти ҳимоя.
Шамол ҳам увиллар нимадир тилаб,
Бирдан кела бошлар у машъум соя.
Тўлғониб кетади ногоҳ юрагим,
Нимани истайсан, сўйла, эй дайди!
Секин фудурлайди шунда аллаким:
— Наҳотки менга ҳеч раҳминг келмайди.
Ёмғир ҳам савалар мени беомон,
Шамол ҳам ҳолимдан кулгани-кулган.
Бошпана бер менга, мен — ваҳимаман,
Ботирлар қалбидан қувфинди бўлган.

1965

ҲАЁТ ИШҚИ

Ҳазил

Сўлим чойхонада давра қуришиб,
 Тенги-тўши билан яйрашар чоллар.
 Эгилаб -букилиб, бахтим борми, деб
 Гутурт қутисини ташлашар чоллар.
 Ҳолбуки, ортдадир энди бу дунё...
 Манглайда борини кўрган бу чоллар.
 Яна қандай бахтни кутар, ажабо,
 Ҳар бири тўқсонга кирган бу чоллар.

1965

* * *

Ўтинаман,
 Йироқлардан мен
 Ҳузурингга соғиниб елсам,
 Толеимга кулиб чиққин сен,
 Кувончингни яширма ҳеч ҳам.

Узоқларга отлансан яна,
 Сафар тўнин кийсан эрта-кеч,
 Ўтинаман, эркам, ўшанда
 Дариф тутма кўз ёшингни ҳеч!

1965

АРМОН

Усмон Носирга

Жажжи бола тинмасдан сира
Акасига ёлворар ёниб:
— Жон акажон, кўрсат биргина,
Жон акажон, бир кўрай қониб.
Акасининг қўймас қўлидан,
Ўртанади ёшгина жони.
Ниманидир олиб қўйнидан
Кўрсатади сўнг акажони.
Гўдак яна ўтмайин фурсат,
Акасига тикади қўзин:
— Жон акажон, яна бир кўрсат,
Кўзим билан кўрайин ўзим.
Тинчитмайди уни бир нафас,
Осилади “жон” деб бўйнига.
Акажони кўрсатиб бирпас,
Яширади сўнг бор қўйнига.
Нимайди у? Маъсум туйгунинг
Оромига сололган ғаво?
Не бўлса ҳам болакай унинг
Дийдорига тўймади асло.
Нимайди у? Балки бир безак —
Армон қилиб юрган нечалар.
Не бўлса ҳам ўшани гўдак
Тушларида кўрди кечалар.
Нимайди у? Балки бир тугун,
Ё оддий тош, ёки оддий гул.
Не бўлса ҳам ёш инсон учун
Ўша дамда ноёб эди ул.

1965

* * *

Оилада туғилса гўдак
Унга суюб қўярлар исм.
Гар боғланса иккита юрак,
Дўстлик дейиш бўлгандир расм.
Волидалар гўдаги учун
Бешик олиб, тортадилар ош.
Худди шундай, дўстлар ҳам у кун
Бир-биридан айлади маош.
Инсон яшар, пайти ҳам келар
Тўхтаб қолар умр — югурик.
Лекин, дўстлар, айтинг, не бўлар
Дўст-дўстидан айрилса тирик?
Тобут ўтар сўнгти қўприкни,
Қаро ерга уни қўярлар.
Дўстлар, айтинг, сўнган дўстликни
Қайга олиб бориб кўмарлар?
Марҳумларга очишиб аза
Либосларни кўкка бўярлар.
Дўстлар, айтинг, дўстлик сўнгандан
Қандай йиғлаб, қандай киярлар?
Азалилар кўрса ёмон туш,
Мозор узра сукут этарлар.
Тирик туриб қайта келсанг дуч,
Унда, ахир, қайга кетарлар?
Ҳайҳот, илк бор ингради кўнглим,
Бир баргдайин титрадим, толдим.
Мен дўстимдан айрилдим бугун,
Тирик туриб, айрилиб қолдим.
Ёзармидим йиғлоқи байтни,
Чекармидим мен ахир нола,
Дўстлар, агар бошланмасайди
Икки қалбдан буюк оила.
Ёзармидим йиғлоқи байтни,

Титрагидим кўзда ёш билан,
Дўстлар, агар бошланмасайди
Тоғ қулаши икки тош билан.
Дўстлар, айтинг, дил ёнмагандан
Чекаргидим шунчалар оҳ-зор.
Агар, агар... Ҳеч бўлмагандан
Топилсайди кўмгали мозор.

1965



УЛГАЙИШ

(Ҳазил)

Бебош эдим бир вақтлар мен ҳам,
Бўшамасди ўйиндан қўлим.
Кўп насиҳат қиласарди отам:
— Бир озгина оғир бўл, ўғлим.
Катта бўлиб қолдинг ҳар қалай,
Тутиб олгин ўзингни энди.
Йиллар ўтди, санқидим талай,
Тутиб олдим ўзимни энди.
Энди шўхлик қаёқда дейсиз,
Юришларим сипо ва ўйчан.
Суронларга боқаман фарқсиз,
Бир маҳаллар чопардим шўхчан.
Минг ўйлайман сўзлар сўзимни,
Оқибатни кўрар кўзларим.
Авайлайман доим ўзимни,
Ёш эмасман ахир, дўстларим.
Керак бўлиб қолар бир куни,
Ҳеч кимсани ёмон демасман.
Кўрқоқ деманг, дўстларим, мени,
Энди ахир гўдак эмасман...
Энди дилда ҳокимдир тоқат,
Хурматни ҳам ўргандим, мана:
Мен онамни сен дердим бир вақт,
Энди бўлса Сиз дейман, она...
Етакламас энди туйфулар,
Турмушимда қатъий қоида.
Бир вақт мени бола дердилар,
Энди бўлса хурмат жойида.
Ишлар шундоқ юришса, қаранг,
Арбоб бўлиб қолгум эрта-кеч.
Тутиб олдим ўзимни аранг,
Энди қўйиб юбормасман ҳеч.

1965

МУҲАББАТ

Ҳаёт мендан аямади неъматларини,
Не истасам берди доим, ҳеч бир тонмайман.
Фақатгина бир ғам ўртар юракларимни,
Мен муҳаббат тақдиримдан мақтанолмайман.
Болаликдан ўтиб мен ҳам, бўй етиб секин,
Гоҳо пинҳон, гоҳо асов дарёдай тошиб,
Бир ёш йигит севганчалик севдиму, лекин
Бошқалардай толе менга бўлмади насиб.
Кўнгил шишам бир сўз билан қолганда дарз еб,
Қаламимдан илк мартаба тўкилди ғамлар.
Сен бўлмасанг дунё ўзи менга надир, деб
Ичдим ҳатто талай-талай шеърий қасамлар.
Ўтар экан ҳамма нарса, йўқ экан турғун,
Ҳатто севги неларгадир бўларкан таслим.
Бугун ҳаёт нималиги, севги йўриғи —
Бари маълум, ҳаммасига етади ақлим.
Юрагимда севги изи топилмас асло,
На бир афсус, на бир алам чиққайдир ундан.
Шоир сатрин такрорлайман секин, бепарво:
“Қайтмас энди, умид қилма кетган тўлқиндан...”
Сокингина бўлиб қолган юрагим шундоқ,
Ўтирмайман у кунларни сўқиб, қоралаб.
Энди менга бари бирдир, дейману шу чоқ
Ўзга оташ ахтараман ҳаёт оралаб.
Ёлғиз туриб юлдузларга боқаман гоҳи,
Ё ўзимча туш кўришнинг сирин ўйлайман.
Кайфиятим кўтарганда, тушса нигоҳим,
Тўғри келган ҳар нарсани шеър деб куйлайман.
Баъзан узоқ қишлоқдаги кекса онамга
Юбораман маъниси йўқ, пала-партиш хат.
Ҳамма нарса гоҳо эрмак туюлар менга,
Ҳамма нарса гоҳо осон кўринар фақат.
Баъзан эса ўз-ўзидан кетаман тўлиб,

Титрайман ҳам оҳангларни тинглаб жимгина,
Ўртоқларим ўраб олар юпатмоқ бўлиб:
— Айтгин, ахир, нима сенга етишмас, нима?!
Йўқ, йўқ, ҳаёт аямади неъматин мендан,
Тўрт мучам соғ, дўстларим бор ҳавас қилгулик.
Нолигайман на келажак, на ўтмишимдан,
Иродам бор — келса агар бирор кўргулик.
Фақатгина бир куч бордир, фақат утина
Зор йиғлатар, қилолмайман мен унга тоқат.
Ҳаётимда чақнамайсан фақат сенгина,
Толеимда сен бўлмадинг, бахтли муҳаббат.
Кимга шошай, кимни қўмсаб, кимга сифинай,
Фариштам, деб оқ ювибу оқ тарай кимни?
Кимни Лайлум, Шириним деб, бахтим деб атай,
Ҳаётим, деб чўққиларга кўтарай кимни?!
Йўқ, йўқ, ўтган муҳаббатни қўмсамайман ҳеч,
Нима керак кулни титиш, бўлмаса учкун!
Наҳот қайта севолмасам! Наҳот энди кеч!
Наҳот энди кўнгил узсам севгидан бутун??
О, қалбимга сен ҳам ошно бўлсайдинг, севгим,
Айрилиқмас, висол куйлаб қолсайдим ғамда.
Ҳар қандайин аянчни ҳам улуғлар эдим,
Мен ўзимни бахтли дердим ҳар қандай дамда.
Йиғласам-да кулар эдим мағур ва осон,
Севгим билан зарб берардим ҳар қандай ғамга.
Яна қайта севарманми? О, гар севолсам,
Майли, ҳаёт, бор-йўғингни ташла елкамга.
Ромеодай ўлимга ҳам тайёрман у кез,
Қотиллик ҳам қилай, майли, Отелло монанд.
Фақат сен кел, юрагимда армон бўлган ҳис,
Сенсиз ҳаёт пуч бир нарса, эрмак, омонат...

1965



* * *

Кўпдан кутган эдим орзиқиб, мана,
Булутлар тарқалди тўкишиб кўз ёш.
Хаёлим осмондай ёришди яна,
Ёруғ кунларимдай порлади қуёш.
Шошқин дарёларнинг зангордир лаби,
Шамоллар ўйнайди йироқ-йироқда.
Юргил, сайд этайлик, юргил, малагим,
Дунё ташвишлари қолсин узоқда.
Кўряпсанми, қандай яшармиш олам,
Бепарво гўдақдай жилмаяди жим.
Гўдагим, бу чирой қайтмайди ҳечам,
Қайтмагани каби менинг ёшлигим.
Бугун бош устингда яшнаган япроқ
Шовуллаб тўкилар эрта пойингга.
Бу учқур йўловчи солмайди қулоқ
Сенинг илтимосинг, сенинг раъйингта.
Хазонли августнинг бирор оқшоми
Уни кўёарсанми тушингда такрор?!
Майлига, ўзгадир кузнинг илҳоми,
Бугун-чи кўз ташла: атрофда баҳор!
Қани, кўлгинангни бергил жимгина,
Шу маъсум йўлчига қўяйлик ихлос.
Шоирлар алдайди бизни, жонгинам,
Баҳор доим эмас, уч ойдир, холос...

1965

ЧОЛ ВА “КОММУНИЗМ” ҚИССАСИ

Шаҳарнинг серҳашам кўчаси бўйлаб
Қайгадир мункиллаб кетар эди чол.
Кексалиқда, ахир, миянг бўш турмас,
Ҳар қадамда чулғар янги бир хаёл.
Чолнинг тасаввури мана бир зумда
Куриб қўйди гўзал коммунизмни:
“Мана ширин кулча сенга ва менга,
Бу эса — эмизак, юпат қизингни,
Ким нима истайди, қани, марҳамат,
Умум дастурхонда барчаси тайёр.
Мана, меҳмон кутар чол — йигит ёшда,
Ёнида келинчак — кампири ҳам бор...”
Ва бошқа ҳоказо хаёллар шундок
Чолни ўз қаърига тортди-ю кетди.
Шундай қилиб, чолимиз Коммуна қурди,
Ёшарди ва унда меҳмон ҳам кутди.
Аммо падарлаънат носнинг хумори
Парчалаб юборди хаёлни бирдан.
Ғўлдираб қолди чол: “Хой, ота гўри,
Чекилмасанг бало бормиди шу дам,
Шундай бир хаёлга завол бўлдинг-а”.
Ғазабга тўлган чол сўкишнинг барин,
Саксон йилдан буён асраганларин
Роса қалаштириб қўйди бир зумда.
Аlam қилмайдими, бир отим нос деб
Қайтиб келсанг ахир коммунизмдан!
Бўлингган хаёл ҳам кўчган фишт мисол
Қайта тушмас экан ўз қолипига.
Қанча ўй сурмасин, етолмади чол
Хаёл қалавасин қочган ипига.
“Коммунани энди қуриб эдим-а,
Ростдан айб ўтдими менинг ўзимдан?”
Хаёл-ку қайтмади, чолнинг ҳам аммо
Қайтгиси келмади коммунизмдан.

Белини йигитдай тутди-ю, чолнинг
Хира кўзларида порлади зафар:
“Отимни бошқатдан қўйганим бўлсин
Ўша Коммунани қурмасам агар!”
Дўконларга кириб харид қилди чол
Бир талай кулча-ю ҳамда эмизак.
Сўнгра кимларгадир узатди: “Ма, ол,
Нон сенга, бу эса қизингта эрмак”.
Бундан нарёфини, азиз ўқувчим,
Мен ҳам кўрганим йўқ, эшиздим фақат;
Тунов куни чолимиз берибди элга,
Умум дастурхондан умум зиёфат!

1965



* * *

— Хайр энди...

Қалбимда бир видо қолди,
Хайр энди, сен кетдинг, бегуноҳ оху.
Бугун сен қайдасан? Қайларда қолдинг?!
Бугун бош устингда кимнинг паноҳи?!
Сени кеч топғандим, эрта йўқотдим,
Қарғагин, лойиқман сенинг қаҳрингта.
Ўзгалар қалбida қадр уйғотдим,
Бироқ етолмадим ўзим қадрингга.
О, инсон қисмати, бунчалар чигал,
Бунчалар хилма-хил фоже ва аза.
Қисматим, ўзимман гуноҳкор бу гал,
Наҳот, гуноҳкорга қўшиқдир жазо?!
— Хайр энди...

Қалбимда бир видо қолди,
Хайр энди, сен кетдинг, бегуноҳ оху.
Бугун сен қайдасан? Қайларда қолдинг?!
Сен бугун кимларнинг масъум ҳамроҳи?!
Қайси бир одамнинг баҳтига ёрсан,
Очилдими сенга толе дарчаси?!
Бугун сен кимларнинг меҳрига зорсан
Менинг юрагимнинг мажруҳ парчаси.

1965

ҚОНЛИ КҮЙЛАК

Бер, онажон, бер отамнинг
Кўйлагини қўлимга.
Бергил, майли, чиқсин яна
У муқаддас йўлига.
Бер, кўйлакни байроқ этиб
Қадам қўяй қуёшга.
Тонгда балқиб, қони билан
Кўринсин қари-ёшга.
Майли, бир зум тирик олам
Бўлиб қолсин ҳайронлар.
Қонли кўйлак порламоқда,
Боқингиз, эй инсонлар.
“Боқинг, уруш даҳшатидан
Огоҳ бўлинг, яхшилар.
Бўлмасин-чун кўйлаклар қон
Сергак бўлинг, яхшилар”.
Қонли кўйлак коинотни
Чорлаб турсин шундайин.
Бер, онажон, жанг гувоҳин
Мен қуёшга қадайин.
Бизнинг узоқ авлодлар ҳам
Келганида дунёга,
Кўргай, мангу тинчлик учун
Нелар кечган дунёда!

1965

ХЎРОЗҚАНД

Жажжи ўғилчасин етаклаб олиб,
Ота шошар эди қайгадир тонгда.
Кимдир қархисидан чиқди жар солиб:
— Хўрозқанд сотаман, қолма армонда.

Дада этагига ёпишди гўдак:
— Хўrozқанд олиб бер, дада, дадажон...
Майли, Умригаям бераман қиттак,
Қандфуруш тиржайди: — Обберинг, арzon.

Ота чўнтағига қўл чўзди секин,
Сўнгра бошқасига, сўнг бошқасига.
Ҳаммасин бирма-бир титди-ю, лекин
Ўғлига энгашди: -Юр, бошқасига...

Дада этагини қўймасди бола,
Митти кўзларига тизилган маржон.
Энг сўнгти умиди чиқарди нола:
— Ўелингиз бўлардим, дадажон...

Дадажони эса туарди бирдак,
Худди ниманидир йўқоттансимон.
... Қайдан билсин бола, қайдан билсин гўдак,
Баъзан оталар ҳам бўлар паришон.

1965

ГАЗЕТА СОТУВЧИ

Одамлар қайнайди гавжум кўчада,
Ҳар ким югурди қайгадир доим.
Фақат чорраҳада — тахта уйчада
Газета сотувчи ўтирас қоим.
— Қани, хўш биродар, нима гап яна?
Яна қовоқ солик, тушиб кетган лаб?
Газетани имлаб тўнғиллар: — Мана,
Кубанинг устида яна ҳар хил гап.
Дунёнинг туриши чап ёнбош бугун,
БМТ Вьетнамга қилибди фириб.
Худди ўз уйини сув босгандай, сўнг —
Ҳиндистон селидан кетар гапириб.
Дейлик, кунлар ўтиб келганида гал,
Унда учратасиз очиқ чехрани:
Врач эмасмисиз?
— Нимайди?
— Ошнам,
Маошинг ошибди, қўлни бер, қани...
Шу рангин оламга тахта уйчадан
Туну кун термулар кутгандай дийдор.
Одамлар бепарво ўтар кўчадан,
У-чи, ўшаларни ўйладиди бедор.

1965

ХУШ КЕЛИБСАН, ЯНГИ ЙИЛ

Яна келдинг ҳадяга тўлиб,
Кутмоқдайдик сени интизор.
Қадамингдан миннатдор бўлиб
Зарра-зарра тўкилади қор.
Хафамасмиз бобо йилдан ҳам,
Қувонтирди у бизни қанча:
Конфетини кўришдик баҳам
Ва кўшиқлар ўргандик анча.
Ниҳол ўсди, қурилди қаср,
Фазоларга қилдик сафарлар.
Ўша йили туғилди ахир
Бизнинг қанча ўринбосарлар.
Сени асло унугмагай дил,
Хайр энди, хайр, йил бобо.
Симобдайин типирлар кўнгил,
Янги йилга энди марҳабо,
Энди уни қутлаб зиёда
Манзилига жадал элтамиз.
Кирмоқ учун кечки кинога
Ўн олтига тезроқ етамиз.
Йўл оламиз мактабга қатор
Бу йил энди биринчи карра.
Мактаб йўли, дўстлар, фазокор
Парвозидан кам эмас зарра.
Боғчаларга эмаклаб оз-оз
Яна келар янги қисмимиз.
Улғаяди ёшимиз бир оз,
Ўзгармайди аммо исмимиз.

1965

АВЛОДЛАРГА МАКТУБ

Йўқ, яшай билмасман асримдан нари,
Даъво ҳам қилмасман мангулик изга.
Балки бир кимсанинг унут дафтари
Ногаҳон етказар бу шеърни сизга.
У замон менсиз ҳам билурсиз аён
Бизнинг асримизнинг буюк офатин.
Балки туш кўргандай қолурсиз ҳайрон,
Эшитиб Тошкентнинг сабру тоқатин.
Китобдан санани излаб у нафас
Балки юрагингиз энтикиб урар.
Лекин қаршингизда фожиа эмас,
Хушнуд одамларнинг сурати турар.
Тагида — сарғайган сатрлар аро
Кимнингдир сўзлари жаранглар мағрур:
“Бундай жасоратни кўрмаган дунё,
Чунки у советлар Тошкенти эрур”.
Шу замон кўзингиз олдида бирдан
Помпея тарихи қолур бир чақа.
Дерсиз, ё Тошкентда ҳеч гап бўлмаган,
Ё эса боболар сирли, шунаقا.
Бизнинг руҳимизни олис юлдуздай
Хаёл осмонида илғарсиз аранг.
Зилзила туюлар мавҳум бир сўздай,
Ўйларсиз, боболар қўрқманти, қаранг.
Дўстлар, буюк эди чиндан фожиа,
Асаблар тупроққа чўйкан эди тиз.
Ва лекин ўйламанг сирлисиз дея,
Бизлар сирли эмас, оддий эдик биз.
Бу чексиз оламнинг ичу тошида
Нима бор? Илғарми одамзод кўзи?
Ким кўкрак керарди дунё қошида,
Уни яратмаган бўлса гар ўзи.
Одамзод хаёли етмаган фалак
Гар инсон бошида айлантиrsa тош,

Илож йўқ инсонга бардошдан бўлак,
Жасорат аталмас иложсиз бардош.
Дўстларим, ҳайратда қолмангиз фақат,
Сирлилик бизларнинг шеърларга мосдир,
Дунё қаршисида ожиз жасорат
Инсон боласига ҳамиша хосдир.
Ботирни тан олмас сўқир фожиа,
Чарчаш ҳам мардликка келтиргмагай шак.
Боболар меҳнатда ҳоргандир дея,
Азиз набиралар, ўйларсиз бешак.
Сержилд китобларни вараклаб яна
Раҳмдил қалбингиз энтикиб урар.
Лекин қаршингизда тағин мардона
Паҳлавон кимсанинг сурати туар.
Тагида — сарфайган сатрлар аро
Бизнинг услубимиз жаранглар мағрур:
“Бундай меҳнаткашни кўрмаган дунё,
Чунки у советлар фарзанди эрур”.
Шу замон кўзингиз олдида бирдан
Кичик чумолича қолгуси Фарҳод.
Оддий жуссангизга кўз ташлаб зимдан,
Азиз набиралар, солурсиз фарёд.
Ўйларсиз, Алломиш давридан бүён
Паҳлавон ўтмаган булар сингари.
Ўйларсиз, мунча тез қарибди инсон.
Наҳот биз шуларнинг набиралари.
Йўқ, полвон эмасдик бизлар ҳам асло,
Жуссамиз оддий деб чекмасдик андуҳ.
Бир кун айтибидирки Навоий бобо:
“Доим ўзга бўлур суврат ила руҳ”.
Дўстларим, ҳайратда қолмангиз фақат,
Девқарашибизларнинг суратга мосдир.
Дунё яралгандан бүён шу меҳнат
Инсон боласига ҳамиша хосдир.
Сизга фалокатдан берганда хабар
Дўстлик борасида ёзурлар албат.
Ёзурлар: “...биз бўлдик тенгсиз биродар,
Бу хислат бизларга хос эрур фақат”,
Шу замон кўзингиз олдида беҳол
Рум, Ромул номусдан солиб қолур дод.
Ўйларсиз, бундайин дўстликни алҳол
Кўрмаган экан-да қадим одамзод.

Дўстлик-ку инсоннинг азалий касби,
Дунёдай қадимдир оддий бир салом.
Агар дўстликни ҳам билмаса асли
Кимга керак ахир, инсон деган ном!
Дўстларим, ҳайратда қолмангиз фақат,
Паҳлавон асрга лоф уриш мосдир.
Инсон боласига меҳр ила шафқат
Ҳаммага хос эди, бизга ҳам хосдир.
Дўстлар, буюк эди чиндан фожиа,
Чиндан оғир эди машъум асорат.
Лекин ўйламангиз бадбинсиз дея,
Бизда ҳам бор эди меҳнат, жасорат.
Биз ҳам измимизни бергандик бутун
Дўстликнинг муқаддас қоидасига.
Чин дилдан раҳматлар айтurmиз бутун
Саховатли эллар оиласига.
Аммо қолмай дейман шеър гуноҳига,
То виждон қошида чўкмагайман тиз.
Дўстлар, жасоратни гоҳи-гоҳида
Бир оз кўпиртириб ёзар эдик биз.
Баъзан ўзимизга меҳримиз жўшиб,
Бир четда қоларди замину замон.
Ўзи ҳам билмаган хислатин ўқиб
Уялиб юрарди шўрлик қаҳрамон.
Етар, майда-чуйда гина энди бас,
Кўкда юрибди-ку қуёш музaffer.
Авлодлар, сиз мени тингланг бир нафас,
Сизга бир сехрдан берурман хабар.
Юз йилда қайтибди бундай фалокат,
Юз йил-ку, тарихда — қошнинг ораси.
Азиз набиралар, унутманг фақат,
Ҳар бир фожианинг бордир чораси.
Тупроқ қўзғалмасдан ўрнидан баттар,
Солмасидан аввал даҳшат, қатағон, —
Ер ости тинч турсин десангиз агар,
Сизлар ер устида сўйламанг ёлғон!

1966

* * *

Хат ёзмадим,
Хабар қилмадим,
Боролмадим, солиб галга гал.
Қандай экан онам, билмадим,
Йўлларимга тургандир маҳтал.
Хат ёзарми ўғлим, деб, зора
У-ку мени турибди кутиб.
Мен-чи, ношуд, бўлиб овора
Авлодларга ёзаман мактуб.

1966

ОНАМ ВАФОТИГА

Маконда ломаконсан, энди қайдан излагайдурман,
Фигоним кимга айтиб, кимга сендан сўзлагайдурман.
Бировлар мотамида оху фарёд айлаган эрдим,
Сенинг-чун, эй, фарибим, ич-ичимдан бўзлагайдурман.

1966

КЕТГАНЛАР ЁДИ БУ

Туш кўрдим,
Тушимда бир денгиз эмиш,
Тўлқинлар салчирмиш мовий осмонга.
Манзил йироқ эмиш,
Уфқ сўнгсиз эмиш,
Бир кема борармиш ўша томонга.
Унинг саҳнасида жами дўст-ёрон,
Умрлик дўстларни кўрган эмишман.
Жаннат хаёлидай даврада шодон
Мен ҳам қаҳ-қаҳ уриб турган эмишман.
Кема бир соҳилга етгани маҳал
Мени йўл азоби қўймиш толдириб.
Кема жўнаб кетмиш йўлида жадал,
Кема жўнаб кетмиш мени қолдириб.
Мен унинг ортидан югурдим гирён,
Ногоҳ айрилиқдан кўзларим ёшлаб.
Нега сен қоронғу ёқларга томон
Менинг дўстларимни кетдинг деб бошлаб.
Танҳо ётар эдим бўм-бўш қирғоқда,
Теппамда юлдузлар чекар эди оҳ.
Кема кўздан фойиб бўлгани чоғда
Аччиқ йиғладиму уйғондим ногоҳ.
Бу бир туш-ку, ахир, шунчаки рӯё,
Тасалли берардим дилга шу замон.
Бу бир туш-ку, ахир, бошқа-ку дунё,
Лекин туш дердиму йиғлардим ҳамон.
Аlam қилмас менга кемадан қолмоқ,
Уйку-ку, сўнгига бориб етганди.
Мен-ку, бир манзилга тушгандим, бироқ
Кема дўстларимни олиб кетганди...

1966

ОНАЖОН

Онам Турди Эрдона Карвон қизи хотирасига

I

Неча кунки йўқ оромим
Келолмайман ҳушимга.
Онаジョンим кечалари
Кириб чиқар тушимга.
Қўлларида оқ елпуғич
Ой нурида ялтирас.
Онаジョンим имлаб мени
Қошларига чақирав.
Келтираслар гоҳо бешик
Қўзларида ҳаяжон.
Ётар пайтинг бўлди-ку дер,
Кела қол, дер, болажон.
Қайларгадир югураман,
Фигонимдан чиқар дуд.
Йиғлама, деб қўлларимга
Тутқазарлар сўнг тобут.
Тонгда руҳсиз кўз очаман,
Қовурилар танда жон.
Онаジョンим, бундай қилма,
Бундай қилма, онаジョン.
Ахир ўзинг дер эдинг-ку,
Силаб ўқсук бошимни:
— Энди сенга берсин умр,
Сенга берсин ёшимни.
Афсус, ўзинг эрта кетдинг,
Эрта кетдинг оламдан.
Укаларим бағрим эзар,
Ажрадик деб онамдан.
Бевақт ҳазон бўлмай ҳар ким
Яшаб ўтсин дунёда.
Онаジョンим, ҳар ким ошин
Ошаб ўтсин дунёда.
Гарчи фано ҳар кимсага
Азалий бир қисматдир.

Лекин, она, тириклик ҳам
Билсанг, ярим ҳикматдир.
Тушларимда, майли, бошим
Силаб тургин, онажон.
Қолганларга энди умр
Тилаб тургин, онажон.

II

У кун четда оҳ чекардим
Фуссаларнинг дастидан.
Сен отамга пул берибсан
Ёстифингнинг остидан.
Айтибсанки, онасизлик
Келмасин ҳеч ўйига.
Сарф қилингиз, менга эмас,
Абдулланинг тўйига.
О, ўғлингта сен шафқатни
Билардинг-ку, онажон.
Бундан кўра бағрим ўйсанг
Бўларди-ку, онажон.
Заррагина раҳм этгали
Сабринг менга йўқмиди?
Онажоним, бундан ўзга
Жабринг менга йўқмиди?
Йўқмиди ҳеч ўзга гапинг, —
Нола қилиб сўйласанг.
Наҳот, ахир сўнгги дам ҳам
Фарзандингни ўйласанг.
Ахир орзу қочиб кетмас,
Битказар-ку тириклар.
Онажоним, бир кунини
Ўтказар-ку тириклар.
Унутилар фуссалар ҳам,
Орзулар ҳам чўзар бўй.
Онажоним, балки бир кун
Айттанингдай бўлар тўй.
Балки сенинг қабринг узра
Кўкарганда гул, чечак,
Остонамга қадам қўяр,
Сен истаган келинчак.

Кимдир унинг йўлларига
Балки гул ҳам сочади.
Балки мунис опажоним
Кел, деб, қучоқ очади.
Балки дўстлар даврасида
Камим бўлмас ҳеч қачон.
Лекин сени ўша дамда
Қайдан топай, онажон.

III

Эсимдадир, титрар эдим —
Фамгин, болиш пастида.
Китобимни кўрдим ногоҳ
Бошгинангнинг остида.
Тошдай қотдим ўшал они
Бор тоқатдан айрилиб.
— Шоир ўғлим, — дединг менга
Секингина қайрилиб.
Онажоним, сўнг бор менга
Нафас қилдинг у замон.
Шоир бўлгин, дея балки
Ҳавас қилдинг у замон.
Онажоним, балки мен ҳам
Бир кун шавққа тўларман.
Балки мен ҳам айтганингдай
Бир кун шоир бўларман.
Куйлай десам ҳурматингни
Ушбу кунда тилим лол.
Балки фақат шу сабабли
Шоир бўлсам эҳтимол.
Балки сарсон-аросатда
Қолиб кетмас бу таним,
Камолимни кўтар балким,
Юртим, она Ватаним.
Пайти келиб тўлар бир кун
Паймона ҳам беомон.
Кузатарлар мени ҳам сўнг
Сенга томон, сен томон.
Балки у кун бошим узра
Дўстлар бош ҳам эгадир.

Ўша дамги иқболим ҳам,
Онажоним, сенгадир.
Дилда неки журъатим бор,
Дилда неки ҳаяжон,
Бари, бари сенга бўлсин,
Сенга бўлсин, онажон.
Сенга бўлсин бор ҳаётим,
Номим, шоним бир йўла.
Хотирангта ушбу шеърни
Ёзди ўғлинг Абдулла.

1966



НАЙ

Яшнарди у ади尔да дуркун,
Эпкинларга очганча қучоқ.
Келдилару одамлар бир кун
Танасига санчдилар пичоқ.

Айирдилар аввал қўзидан,
Сўнг бағрини олдилар ўйиб:
Етмагандай бу ҳам бўғзидан
Пуфладилар лабларин қўйиб.

Кўрмаганди бунчалар хўрлик
Ҳатто аёз тилганда юзин.
Аламига чидолмай шўрлик,
Нола тортиб юборди узун.

Одамлар-чи, тўпланди шу он
Фарёдига қилолмай тоқат.
Бир қамишни йиғлатиб чунон,
Сўнг ўзлари қилдилар роҳат.

1966

ШОИРЛАР ҲАЁТИ

(Ҳазил)

Шоирлар сурати турибди қатор,
Мана бу — Лермонтов, мана бу — Фурқат.
Дунёга сифмаган буюклар ночор
Бугун рамкалардан боқишар фақат.
Нима ҳам қиласарди бир жонсиз бўёқ,
Парчалаб ташларди тирик бўлганда.
Шоирлар ҳаёти ҳамиша шундок,
Рамкага тушади фақат... ўлганда.

1966

ЖАННАТ

(Ҳазил)

Эртак дегани бу — болага эрмак,
Эртак дегани бу — ширин ақида.
Мен бир кун укамга сўйладим эртак
Афсонавий жаннат ҳақида.
Кавсадан гапирдим унга аввало,
Сўнгра мақтаб кетдим ширу шарбатни.
Дам ўтмай у йифи бошлади роса,
Топиб бергин, деди, ўша жаннатни.
Нима ҳам дер эдим, ўйласам бундоқ,
Тушибман мен ўзим қўйган тузоқقا.
У десам бу деди, бу десам ундоқ,
Хуллас, қанд-қурс бериб бошладим боқча.
Жаннат деб кўрсатдим боқчани андак,
Майли, болага бу ўйин бўлади.
Лекин катталарга сўйламанг эртак,
Улардан қутулиш қийин бўлади.

1966

* * *

Чувалади ўйларим сенсиз,
Хаёлимга тароқ ургайман.
Менинг қўлим етмаган юлдуз,
Тушларимда сени кўргайман.

Баланддасан тоғлар қоридан
Чақирасан мени илгари.
Ёлбораман арвоҳ ортидан
Интилувчи Ҳамлет сингари.

Маҳшаргача, майлига, кетай,
Кетай, майли, бўлиб овора.
Сени сўраб қўймаса нетай
Ерда қолган севги бечора.

1966

* * *

Ёмғирли кун эди,
Атроф жим, сокит,
Маъюс кўзларингта боқардим сармаст.
Секин шивирладинг: — Боқмагил, йигит,
Севгинг менга янгилик эмас...

Ёмғир ҳам тинмади ўша куни ҳеч,
У ҳам қуволмади кўздан хобингни.
Совуқ, рутубатли хонамга шу кеч
Олиб қайтдим изтиробингни.

Тунда ҳам жимгина ёш тўқди осмон,
У менинг ҳолимга йиғлар эди, бас!
Бас, дўстим, мени деб чекмагил фифон,
Сенинг кўз ёшинг ҳам янгилик эмас.

1966

“ОСМОН УФҚЛАРГА...”

Осмон уфқларга сепар кул рангин
Булутлар чопади, ҳорғин беэга.
Ҳаво нега мунча маъюс,
Ҳаво нега мунча ғамгин:
Оҳ, мен сендан ажралдим нега!..

1966

САРОБ

Олти ойким, шеър ёзмайман, юрагим зада,
Олти ойким ўзгаларга тилайман омад.
Олти ойким, дўстларим ҳам пана-панада
Истеъдодим сўнганидан қилар каромат.
Ниманидир ахтараман — шеърдан ҳам улуф,
Ниманидир ахтараман — нондан азиэроқ.
Дунё ўзи бепоён-ку, рангларга тўлуғ,
Бироқ менинг кўзларимдан ранглар ҳам йироқ.
Инжиқ руҳим май истайди гоҳи-гоҳида,
Фақат унинг оғушида топаман ором.
Хаёлларим сархуш бўлиб кезган чофимда
У беармон кунларимга қайтаман тамом.
Кўз олдимда киприкдайин тизилар йиллар,
Ҳар бирига маржон бўлар аччиқ унларим.
Хира туман орасида чўғдай милтиллар,
Жайрон қувиб жайрон янглиғ ўтган кунларим.
Ўшанда ҳам бўлар эди осмону адир,
Ўшанда ҳам кезар эдик шундоқ яланг бош.
Билмас эдик китоб нима, шаҳар нимадир...
Энагамиз тунда ою, кундузи қуёш,
Қуюндайин чарх урадик доим тўзонда,
Чанг нелигин билмас эдик ўша маҳали.
Онамизни ўйлар эдик инсон деганда,
Аммо она танҳолигин билмасдик ҳали.
Балолардан асрар эди ўзи табиат,
Бошимизга сочар эди беминнат зиё.
Тўнкарилган осмон ости — шу сирли хилқат
Бизнинг учун ҳам кулба-ю ҳам буюк дунё.
Кунларимиз жилғалардай ўтдилар оқиб,
Мактаб бордик — оғир бўлиб қолдик дафъатан.
Девордаги арслон ёлли картага боқиб,
Секингина шивирлашчик: мана шу Ватан!
Ватан! Менинг бор қисматим шу бир сўзда ҳал,

Балки мен ҳам бахш этурман унга жон-тани.
Лекин дўстлар, ростин айтсан, мен ўша маҳал, —
Жондан ортиқ севар эдим она-Ватанни.
Дўстлик билан бир бутундир, дердилар дунё,
Мен ҳам мангу дўстлик учун ичардим қасам.
Тайёр эдим Раҳимовдай бўлгали фидо,
Ўйлар эдим, дўстлар учун жангга ярасам.
Кўз олдимда шу қадарли пок эди олам,
Гўё нурдан яралганди инсон деган зот.
Ҳа, онамни ўйлар эдим инсон деган дам,
Йўқ, маймундан тарқамаган дердим одамзод.
Бу дунёда алам бўлмас, бўлмас деб фироқ
Даста-даста китоблардан ўқирдик таълим.
Равон йўллар қаршингизда турибди муштоқ,
Дерди бизга ҳарф ўргатган ёш бир муаллим.
Олис жануб тортганидай қушча юрагин,
Йироқларга етаклади мени бир сурон.
О, Абдулла, кўзларингни очиб қарагин,
Ким айтади бу дунёда йўқdir деб бўрон.
Йиллар она қучоғидан олди-ку юлиб,
Савдоларга урди мени мурғак ёшимдан.
Бир маҳаллар қуюндайин юардим елиб,
Энди бўлса у айланар менинг бошимдан.
Шеър излайман бу кун Тошкент кўчаларида,
Секингина зирқирайди беором қалбим.
Мен умримнинг бу суронли кечаларида
На бир таскин топа олдим, на шеър тополдим.
Юрагимга бир маҳаллар кирган туйгулар
Энди сендан кетгаймиз деб сўрайди жавоб.
Мени бир зум ҳол-жонимга қўймайди улар,
Қўймайдилар, ваъдаларинг чиқди деб сароб.
Кўз олдимда собит турар фақат шу Ватан,
Кулбаси ҳам кенглик қадар чулғайди мени.
Туйгуларим фақатгина унга берар тан,
Юртим, мен ҳам умрим қадар севгайман сени.
Мен ҳам сенинг қуёшингда ўсиб-улғайдим,
Қарздорман, тупроғингда қолдирдим излар,
Аммо айтинг, қайда қолди у ёшлиқ пайтим,
Қайда қолди мен ишонган у ўзга ҳислар.
Таъна қилмай ахир севгим мукофотини
Инсон учун минг оташда куяр эдим мен.

О, қанчалар севар одим инсон зотини,
Қандай буюк муҳаббат-ла севар эдим мен.
Бугун тўниб, атрофимга қарайман секин,
Ўт беролмас қалбга энди у ёшлиқ дамлар.
Мен инсонни бир инсондай севардим, лекин
Нечун кўпдир ҳалигача разил одамлар.
Қайлардадир ҳамон кезар зулмат тимсоли,
Қайлардадир ҳамон тинмай оқмоқда-ку қон.
Кўзларимга гоҳ кўринар телба мисоли
Мен бир вақтлар сажда қилган ҳазрати инсон.
Қайлардадир фиску фасод, ҳасад, хусумат,
Инсоният фарзандларин тортмоқда дорга.
Гар бор бўлсанг жавоб бер, эй илоҳий қудрат,
Наҳот гўдак ишончини ёзибсан қорга?!

Олти ойким, руҳим шундай учмиш танадан,
Олти ойким, мени хаёл эзар беомон,
Олти ойким аллакимлар пана-панадан
Тош отади дарвозасиз қалбимга томон.
Шовқин тўла кўчаларда кезаман танҳо,
Яна шеърим юва бошлар дилдан фамимни,
Хаёлларнинг гирдобида қолганда аммо
Аlam билан хотирлайман муаллимимни.
Хазон тўла боғчаларга бораман, тағин,
Яна ўзни хаёл ила шеърга ташлайман.
Тўниб қолган юрагимга бериб бир таскин
Яна кувноқ кўшиқларни куйлай бошлайман.
Не тонг, ахир фарзандмиз-ку шу замонага,
Ахир она сийнасидан фарзанд тонолмас,
Қўл кўтариб бўлармиди ахир онага,
Зотан, унга қўл кўтарган — фарзанд саналмас.

1966



ТАБИАТ

Узоқларда қолди туғилған уйим,
Ажиб болалигим қолди узоқда.
Қолди ҳоммопишга күмилған ўйим.
Қолди сингилларим бари йироқда.
Энди мен эслайман кўзларимда нам,
Ўша йилларимнинг оташ сеҳрини.
Кўмсаб талпинаман гоҳи-гоҳи дам
Мунис сингилларим маъюс меҳрини,
Шундай пайтда ўзинг айлагил шафқат,
Сингил бўла қолгил, менга, табиат.

Ақлим танидиму қошимда шу кун,
Жасур акаларим сафини кўрдим.
Уларнинг бари ҳам ботир ва дуркун,
Мен улар сафига шеър билан кирдим.
Энди мен эслайман кўзларимда нам,
Ўша давраларнинг оташ сеҳрини.
Кўмсаб талпинаман гоҳи-гоҳи дам,
Жасур акаларим ажиб меҳрини.
Шундай пайтда ўзинг айлагил шафқат,
Ака бўла қолгил менга, табиат.

Ўтган кунларимга боқиб мунтазир,
Софинчдан ёнади ёнган бу жоним.
Афсуски, ёнимда эмассиз ҳозир,
Донишманд устозим — сиз, отажоним.
Энди мен эслайман, кўзларимда нам.
Ҳикматли сўзларнинг оташ сеҳрини.
Кўмсаб талпинаман гоҳи-гоҳи дам,
Донишманд отамнинг шафқат, меҳрини.
Шундай пайтда ўзинг айлагил шафқат,
Ота бўла қолгил менга, табиат.

Мен азиз онамни тупроққа қўйдим,
Ҳали тинган эмас қўздаги ёшим.
Олис кечалари ҳижронда куйдим.
Энди қай сийнага қўяман бошим.
Энди мен эслайман қўзларимда нам,
Она деган сўзнинг қайтмас сехрини.
Қўмсаб талпинаман ҳар зум, ҳар қадам
Онам оғушини, онам меҳрини.
Шундай пайт ҳам ўзинг айлагил шафқат,
Она бўла қолгил менга, табиат.

1966



АЛВИДО, УСТОЗ

(Faafur Fulom хотирасига)

“Зўр карвон йўлида етим бўтадек
Интизор кўзларда ҳалқа-ҳалқа ёш...”
Сарбоним, қўлингдан кетдимикан эрк,
Сарбоним, не учун кўтармайсан бош.

Сўқир, ёвуз ўлим, минг дод дастингдан,
Зулматдай кирдингми шеър майдонига.
Ажал, сен найзангни санчдингми чиндан
Ўзбек шеъриятин паҳлавонига.

Олис фазоларга кетган ҳам қайтар,
Ботгувчи қуёш ҳам чиқар билмай ҳад.
Наҳот она халқим алвидо айтар
Бугун Faafur Fulom бошида абад?

Илк бора жигарим силқиди балким,
Лол қотган тилимга келмади калом.
Йиғла, онажоним, эй она халқим,
Бугун йўқ қошингда фарзанди Fulom.

Дардли мусиқалар, ингрангиз бир-бир,
Ўзинг ҳам йиғла, эй, дилда қотган ғам.
Ёруғ бу оламда бормикан, ахир
Шоир вафотидан ортикроқ мотам!

Зор йиғлаб навосиз қолмагай дунё,
Ўзи чора топмай йиғлагай алам.
Шогирдлар қўлидан тушмагай асло
Сенинг қўлларингдан тушган шу қалам.

1966

БАҲОР ШАМОЛИ

Баҳор келаётир,
Тоза, мусаффи.
Мовий кенгликларда ўйнайди шамол.
Даралар қўйнида зангор бир ҳаво,
Туманли шаҳр ичра ётмоқлик малол.

Қоялар кўксисда шодмон, беқайғу,
Оний умри билан солланар чечак.
Баҳор бу — энг тоза шаббодадир бу,
Баҳор бу — энг тоза шамолдир демак.

Кенгликлар бағрига ураман ўзни,
Кўзимга кўрингай дилбар диёrim.
Гўдак нафасидек юпатар юзни
Қиши бўйи интизор кутган баҳорим.

Баҳор-ку ўтади шамолдек шитоб,
Майли, ўтажак у ва ўтар бўлсин.
Азизим, умрингда ҳаво бўлсин соғ,
Умринг шамоллари муаттар бўлсин.

1966

ЮРАК ВА АҚЛ

(Эркин Воҳидовга ҳазил)

Ақл дейди: — Ичма ичимлик,
Закускаси бўлмаса асло.
Юрак дейди: — Фақат ичайлик,
Ичмаслиқдан борми ҳеч маъно.

Ақлингга ҳеч қулоқ солма деб
Ўргатганди шоир, на чора.
Юрагининг гапига кириб
“Язва” бўлиб қолди бечора.

1966

БАҲОР

Яна баҳор келди. Яна оламда
Ажиб бир гўзаллик, ажиб бир баёт.
Мен сени қутлайман шу улуғ дамда,
Улуғ елкадошим, музaffer ҳаёт!
Ташbihҳ ахтармангиз ушбу ғазалдан,
Нақд жойда насия не керак асли.
Аён бир хислатинг бордир азалдан,
Сени атамишлар уйғониш фасли!
Еллар ҳам уйғонди ишқалаб кафтин,
Офтоб ҳам юксалди — тик келар қуёш.
Тоғлар ҳам юк ташлаб кўтарди кифтин,
Безавол майса ҳам силкитади бош.
Тарновлар бўғзида лола ҳам кўркам,
Терак учларида изғир мавжудот.
Ҳаттоқи туйгусиз, чирик ҳазон ҳам
Яшил пўпанақдан боғлабди қанот.
Ҳовлиқма жилғалар чопар беэга,
Қушлар қий-чувига тўлмиш дала, боғ.
Сенинг висолингдан қувонмай нега,
Баҳор, соғинтирдинг ахир кўп узоқ!
Ялдо кечасидай рутубатли қишиш
Солди руҳимизга оғир бир сурур.
Сен келдинг, уйғонди яна шўх олқиши,
Йиғлаган кўзларга тушган каби нур.
Ҳа, мангув заволлик бўлмас оламда
То суйин сочаркан абри найсонлар.
Мен сизни эслайман аммо шу дамда,
Мангугта кўз юмган азиз инсонлар.
Азалий ҳукмини ўқиди ҳаёт, —
Неча бор само ҳам кўмди қуёшин.
Иқболи саждагоҳ бўлғанлар, ҳайҳот,
Ўзлари тупроққа қўйдилар бошин.

Ўн ойким, сўнмишдир у таниш наъра.¹
Ҳамон фироғида фифон чекар Шош.
Баҳор келаётир, бош кўттар, қара,
О, сурур куйчиси, донгдор замондош.
Ҳамсуҳбат бўлмадим (ким эдим зотан),
Тавоб ҳам қилмадим гулшан маконинг.
Лекин шеър баҳоси муҳлисгадир тан,
Қандай чексиз эди руҳий поёнинг!
Бугун-чи, не кезар ўтли қонингда!
Эвоҳ, унда на шеър, на май, на сафо.
Бу қандай мулоқот? Не ҳол? Ёнингда
Жой олмиш ўзга бир суюкли даҳо.²
Бақиёс эди у шеър лочини!
Хаёли бамисли Кўрагонийдек.
Гар тарих эврилса, шуҳрат тожини
Унга кийгизарди Султон Улугбек.
Балҳдан ҳориб қайтган Алишер мисол
Энди тўлғизганди чўккан довотин.
Кетди бир пок сиймо, теран бир хаёл,
Қолдириб дунёда ҳеч ўчмас отин.
Бақо-ю бебақо аён буюклик
Ўтди сўнгти дамда бош эгиб қуи.
Фақат билганидан қолмас тириклик,
Мана, гулга чўммиш Чигатой бўйи.
Бу сокин элда ҳам ивирсир баҳор,
Ўчган хотиралар чирофин ёқиб.
Қарайман, қабрлар ястанмиш қатор,
Маъсум бинафшадан сирғалар тақиб.
Кимнингдир кўксига энгашганча гул
Мармар сағанадан ўқиб турад байт.
Баҳор, қатра ёшим айлагил қабул,
Онам бошига ҳам бордингмикан, айт?!
Унинг оромгоҳи бундан олис жой,
Олисда ётибди менинг паноҳим.
Бугун кетганига тўлибди беш ой,
Беш ойким, кўксимда ёнади оҳим.
Фарёд чекканим йўқ эл ичра тақир,
Ўч ҳам олмадим мен ўз қаламимдан.

F.Ғулом кўзда тутилган.
M Шайхзода кўзда тутилган.

Онажон, онажон, кечиргил ахир,
Шодланмасин дедим биров ғамимдан.
Дунёдан кетмасин ҳеч ким бемаҳал,
Ҳеч кимни босмасин ногаҳон ўқинч.
Аммо ўз бошига келмагунча гал,
Онажон, тош қалблар турармиди тинч.
Куйларман хотиранг балки вақт етиб,
Бир умр ўртанур лекин танда жон.
Суронлар йўлимда турибди кутиб,
Ўзинг қўлла энди мени, онажон.
Бугун атрофингда баҳордир балки,
Балки шабнам ичра фарқдир ҳазин тош.
Майсалар тенгрангда қатордир балки,
Лекин сен ётасан кўтаролмай бош...
Бунчалар қаттолсан, о сирли олам,
Бунчалар бедилсан, бепоён хилқат.
Сенинг ҳикматингнинг сўнги-ку одам,
Наҳотки шунга ҳам қилмайсан шафқат.
Майса ҳам уйғонар қайта қиши ўтиб,
Заррача бўлса ҳам бир ҳиммат унга.
Наҳотки энг улуф фарзандинг кетиб,
Бошин кўтаролмай ётса мангуга.
Онамни сўрайман сендан эрта-кеч,
Қайтар деб сўрайман чок этиб яқо.
Лекин менинг дардли саволимга ҳеч
Жавоб беролмассан, о, соқов даҳо!
Жавоб олабилди ҳеч ким ҳам зотан:
На султон, на гадо, на шоҳ, на фақир.
Ким қанча қувмасин сенинг ортингдан
Бир уюм тупроқни кўрсатдинг ахир.
Хаёт талвасаси тинмагай, аммо
Мангу боқий қолур Инсон ва Хаёл.
Мерос аталмагай барчага фано,
Қисмат аталмагай ҳар кимга завол.
Фақат ўтмиш билан яшамас инсон,
Гарчанд бўлолмайди ундан ҳеч озод...
Кечаги ғамини ўйласа обдон
Букчайиб қоларди бугун одамзод.
Кетган азизларни хотирлаб гоҳо,
Майлига, чекайлик бир зумгина оҳ.
Хаёт тантанаси бошланмиш, аммо,
Дўстлар, нур васлига ташлайлик нигоҳ.

Шу буюк офтобнинг мукофотини
Эъзозлаб қўяйлик айтиб шукронга.
Дилдан ўчирайлик фамнинг отини,
Баҳор ҳам баҳт каби ахир ягона.
Бу кун шеъри чиққан шоирдай дунё
Жилмайиб қўяди барчага масрур.
Темурбек гумбазин қўйнини гўё,
Ёритгани каби бир лаҳзалик нур.
Дилбар келинчакнинг кўксисда фулу,
Зардолу шохига ташлар кўз қириш.
Барг аро шуълашар кафтлармикан у...
Баҳор тетапоя гўдакдай шириш.
Юксак арғувоннинг учидаги ҳилол
Пахмоқ булатларни этади нимта.
Қайдадир шоира куйлади беҳол:
— Кўнглим ҳам бу кеча ойдай яримта...
Увада камзулда биллур тутмадай
Булатлар ортидан боқади юлдуз.
Қайдадир юртини эслаб инграпай най,
Қайдадир қўзигул ёради илдиз.
Қайдадир гулшандан ахтариб висол
Ел кезар — тоғларнинг гўзал арвоҳи.
Шоирнинг дилрабо байтлари мисол
Оҳ тортиб тизилар турналар гоҳи.
Қизғалдоқ баргидек учар дилдан фам,
Тошқинлар киради қалбимга маним.
Баҳоринг муборак бўлсин ушбу дам,
Менинг Ўзбекистон — дилбар Ватаним.
Фақат сен қалбимга чўқтирмай малол
Чарчаган руҳимга илҳом солурсан.
Баҳор ҳам, умр ҳам ўтар эҳтимол,
Фақат сен дунёда мангу қолурсан.

1967



СЕНГА

Ватаним деб сени уйғондим!

Ҳамид Олимжон.

Менинг ҳам бор дўсту қарогим,
Шаънларига шеърлар куйладим.
Лекин танҳо қувонган чофим,
Сирдошим деб сени ўйладим.

Бедард эмас умр ҳам асло,
Ҳасратлардан гоҳо сўйладим.
Шубҳа ичра қолганда танҳо,
Фамдошим деб сени ўйладим.

Қучолмасман мен сени ҳаргиз,
Сен осмонсан, мен-чи, зарра тан.
Қиблағоҳим, юпанчим ёлғиз,
Сен барҳаёт онамсан, Ватан...

1967

СОЗИМ

Мен шоирман,
Истасангиз шу,
Ўзимники эрур шу созим,
Бировлардан олмадим туйфу,
Ўзгага ҳам бермам овозим.
Мен куйладим — гоҳ дилда кадар,
Гоҳ севиниб шеър тўқийман мен.
Тингламаса ўзгалар агар,
Ўз-ўзимга шеър ўқийман мен.
Мен куйладим ушбу оламда
Инсон бўлиб туғилганимни.
Мен куйладим баъзан аламда
Йиғлаб-иияғлаб бўғилганимни.
Мен куйладим бу олам аро
Собит турган халқимни фақат,
Мен куйладим ўтмишнинг қаро
Зулматида йўқлигин шафқат.
Керак бўлса, амр этса юрак,
Келтиурман умримга имон.
Менинг учун на таъзим керак,
На ҳалвойтар каби шуҳрат-шон.
Шайдо бўлиб юрганда бирдан
Хаёлимга ташламанг каманд.
Мижғов ва паст, фийбат гаплардан
Жажжи шеърим қўюрман баланд.
Хаёл каби кенг эрур олам,
Майда гапни кўтартмагай шеър.
Керак бўлса менинг учун ҳам
Жавоб берар бобом Алишер.

1967

ОНА

Кўкда юлдуз учса ногаҳон
Битди дерлар қайси бир тақдир.
Бундай ғамни кўтармак осон,
Бу эҳтимол бизлар ҳақдадир.
Баъзи тунлар кўкка тикиб кўз
Эслаб дейман онамни шу он:
Она кетса, юлдуз-ку, юлдуз,
Кулаб тушса арзийди осмон.

1967

* * *

Ўзимни мозийнинг бағрига урдим,
Ва шу он шукронга айтиб қайтдим мен,
Кимдир кўрмай кетган баҳтни мен кўрдим,
Кимдир айтмай кетган сўзни айтдим мен.

Мени кутаётир ажиб келажак,
У менинг иқболим, менинг баҳтимдир.
Мен кўрмаган баҳтни кимдир кўражак,
Мен айтмаган сўзни айтажак кимдир.

1967

МЕН СЕНИ КУЙЛАМОҚ ИСТАЙМАН

Оқ шеър

Мен сени куйламоқ истайман,
Сенинг юзларингни куйламоқ истайман,
Сенинг қўзларингни куйламоқ истайман.
Юзларким, малаги афсонада йўқ,
Кўзларким, жаннати ризвонада йўқ.
Мен сени куйламоқ истайман,
Аммо шундай куйласамки,
Йиртилиб кетса овоз пардаларим...
Мен сендан бўсалар олмоқ истайман:
Аммо шундай бўсаларким —
Тирқираб қон оқса лабларимиздан,
Зотан, одамлар севгисини ҳам
Алами, нафрати, қувончи каби
Ҳайқириб, ҳайқириб очиб ташласин.
Истайманки, наъра тортсин чақалоқлар ҳам,
Ўликлар ҳам тинч ётмасин қабрларида.
Мен ҳамма нарсани буюклигича кўрмоқ истайман
XX аср одамларида.
Зотан, бу аср
Хар қандай чекланиш, ҳар қандай қулликни
Итқитиб ташламоқда ўз елкасидан...
Бу асрнинг талаби оддий ва содда:
Юрагинг буюрган ҳар қандай гапни,
Тилагинг буюрган ҳар қандай гапни
Ҳеч кимдан тортинмай ўртага ташла,
Бўғзингда қолмасин овозинг асло!
Мен шу асрнинг бир митти фарзандиман,
Мен унинг бутун қўполлигини,
Бутун нозиклигини,
Бутун совуқлигини,
Бутун ҳароратини
Сенинг шу ғунчадек нозик лабларингга
Жо қилмоқ истайман, севгилим...

1967

АРМАНИСТОН

Ватаним қүёшга кўксини очиб,
Осиё қўйнида яшнаган бўстон.
Мен бу кун дарёлар, тоғлардан ошиб,
Қучоғингта келдим, гўзал Ҳаястон.
Бир ёнингда турар оқсоч Аракат —
Тоғлар тасбиҳининг гавҳар донаси.
Нима ҳам дер эдим, гўзалсан фақат,
Эй, сен арман юртинг фамгин онаси.
Бир ёнингда эса Севандай баҳр,
Мисоли булутлар ичидаги қамар.
Арман ҳасратлари бари бундадир,
Бундадир Мажнуннинг дўсти Оҳтамар.¹
Бунда Сосун ўғли кезиб юрибди.
Отдан тушган эмас ҳамон фидойи.
Минг йиллик фамлардан сўйлаб турибди
Гарни харобаси, Звартноц жойи².
Гўзал Арманистон, эй қадим диёр,
Эй, Одам Атонинг ўтай боласи.
Қанча кўп дарбадар фарзандларинг бор,³
Барининг кўксида ўкинч, ноласи.
Уч бўстон булбули Саят Наво бу,
Қўлида сози-ю, қалбига алам.
Туманян юртим деб чекканда қайфу,
Арман қисматига йиғлади олам.
Чаренц таъналардан ҳайиқмай тақир,
Шеърият кўкида кўтарди ялов.
Ҳайҳот, бу зотни ҳам ёндириди охир,
Ўзи муқаддас деб сифинган олов.
Гўзал Арманистон, мени афв эт,
Даъвом йўқ шуҳратинг овозасига.

¹ Оҳтамар — мажнунсифат ошиқ образи.

² Гарни, Звартноц — қадимиий ибодатхоналарнинг харобалари.

³ Арман ҳалқининг катта бир қисми тарих тақозоси билан бутун лунёга сочилиб кетган.

Сен билан турибман бу кун бетма-бет
Бош уриб Ереван дарвозасига.
Буюк фожиантнинг гувоҳи эрур
Жаҳон пучмоғида ҳар етти тараф.
Йўл усти сенга ҳам қўнганди Темур,
Сени мутаб ётди неча йил араб.
Афсона ошиғи буюк Искандар
Саройларинг бузди эрмакка фақат.
Дунёга тўзғидинг бамисоли пар,
На Салжук, на Чингиз қилишди шафқат.
Тозига чап бериб қочган ҳар тулки
Арман тупроғини бўяди қонга.
Босқинчи сўзининг маъноси шулки,
Нонга тўйғанди ҳам тўймас маконга.
Тарих деб аталган қисмат бу, ахир,
Қошида юзтубан ҳаттоқи худо.
Кимни у камситиб, этмаган таҳқир,
Кимни у юртидан қўлмаган жудо.
Менинг ҳам ватаним жанглар гувоҳи,
Менинг ҳам тупроғим топталғанди хор.
Менинг ҳам руҳимда аждодлар оҳи,
Менинг ҳам қонимда қилич занги бор,
Минорлар эмас бу — фалакка қасам,
Қасоскор боболар кетмишлар санчиб.
Мен тортган ғамни ҳам бир-бир санасам,
Ўлик фиръавнлар кетарлар сапчиб.
Яхшиям неча бир замонлар ўтиб,
Кўрдик ватанимиз озод, музaffer,
Гўё таъна тошин саноғи битиб,
Тарих сопқонидан тушган каби зар.
Яхшиям замонлар дастурхонида
Баробар турибмиз таъми бир туздек,
Яхшиям қуёш бор толе тонгига,
Арман май шишиласи узра юлдуздек.
Гўзал Арманистон, эй қадим диёр,
Эзгу эҳтиромим қабул эт жондан.
Сен ҳанча бўлмагин сулув ва дилдор,
Юргизлаб келмадим Ўзбекистондан.
Мен бир кезиб юрган куйчи шоирман,
Не тонг, Ҳаястонга келибман бу кун.
Бахтни куйламоққа анча моҳирман,
Ғамни куйламоққа тилларим тутун.

Ташна бу руҳимга шеър бўлиб кирди.
Мовий дараларда асрлик туман.
Шеър мени чаманлар сайрига бурди,
Саргашта этган ҳам ўша “ёсуман”.
Хайр, Арманистон, эй, гўзал диёр,
Хайр, Наирининг тонгти саломи.
Хайр, Севан кўли, пок ва буғубор,
Хайр, мангү ўлмас арман қаломи.
Эзгу тилакларим сен учун бўлсин,
Ўтмишинг қадарли боқий бўл, бор бўл.
Йироқ фарзандларинг бағрингга тўлсин,
Барига она бўл, сингил бўл, ёр бўл.
Доим мағурур турсин Гарнида Кегарт,¹
Оҳу тўдалари кезсин мардона.
Мендан ҳорғин йўлчи келганда фақат
Ўзингни бегона тутмагин, она.

1967



¹ Кегарт — арманча йўлбарс дегани. Гарнида шундай ҳайкал ҳам бор.

НЕЧУН ТИМ ҚОРАДИР АРМАН КҮЗЛАРИ

Нечун тим қорадир арман күзлари,
Хассос табиатнинг сеҳримикан бу?
Ё гўзал бўлсинлар арман қизлари —
Деган оналарнинг меҳримикан бу?
Йўқ, бу меҳр эмас, сеҳр ҳам асло,
Бу кўзлар ўз-ўзин айлаб қўяр фош.
Йифидан бўлармиш кўзлар тим қора...
Ҳеч ким арманчалик тўкмаган кўзёш.

1967

* * *

Алвидо, деб қўлларимга бойладинг бир тола соч,
Ошиқ аҳли ичра кимни сайладинг, бир тола соч?
Қолди умрим доми ишқда, соч каби ҳолим забун,
Толеимни тола-тола айладинг, бир тола соч.

1967

СЕВАН КЎЛИ

Севан кўли, сенга айтар икки оғиз гапим бор,
Ушбу сўзим сенга фамдош бир юракнинг матлаби.
Арманистон осмонидай соф экансан, беғубор,
Рухсорингда гард йўқ экан арман тупроғи каби.
Майли, сенинг оғушингда Зангу оқмасин асло,
Майли, мовий сувлар билан қайта лим-лим тўлмагин.
Севан кўли, рухсорингга губор қўнмасин аммо,
Куриб қолсанг қуригину лекин нопок бўлмагин.

1967

ЕРЕВАН КЎЧАСИДА

Салминахонимга

Мен Ереван кўчасида озар қизин учратдим,
Умрим бўйи илк мартаба дуч келдим мен рўёга.
Йўқ, мажусий эмас эрдим, лекин суратдай қотдим,
Биродарлар, бундай гўзал келмагай ҳеч дунёга.
Бекор бўлди иқтидорим,bekor bўlди юрагим,
Бекор бўлди шеъриятим ул гўзалнинг қошида.
Бекор бўлди саёҳатим, bekor bўlди юрмагим,
Бекор бўлди Ереван ҳам туйгулар талошида.
Ёш умримни тарозуга солиб аста қарайман,
Ёшлиқ ва шеър бу дунёнинг азал-абад тимсоли.
Мен-ку, шеърни тўқимоққа сал-палгина ярайман,
Лекин сенсиз йиглаб ўтгум Самад Вурғун мисоли.
Озар қизи, нега менга зарра қиё боқмадинг?
Бошим узра туар эди Ўзбекистон суврати.
Озар қизи, нега менга гулларингдан тақмадинг?
Фузулийнинг даҳосига хурматимнинг хурмати.
Тақдир деган подшо бўлса ошиқларнинг ҳоли танг,
Қаёнларга олиб кетар мени ҳам бу йўлларим.
Тилакларим бажо бўлур ва лекин сен бўлмасанг,
Бамисоли Искандардай очиқ кетар қўлларим.

1967

НУТҚ

(Faфур Fулом вафотининг бир йиллигига)

Faфур Fулом ўлганига бир йил тўлибди,
Нарёнини ўйлаганда сесканар одам.
Faфур Fулом учун бир йил нима бўлибди,
Бу — мангалик йўлидаги биринчи қадам.
Биз учун-чи, бир йил демак “шунчаки план”,
Бола-чақа, ўтин-кўмир, уй-жой ташвиши.
Гоҳо унга марсия деб ёзган шеър билан
Мангаликка қоларман деб ўйлади киши.
Лекин фақат оёқ билан чиқмаслар тоққа,
Арқон керак, чўкич керак, керак улов-от.
Бу асрдан мангаликка ёрлиқ олмоққа
Етмас экан фақатгина шеърий истеъдод.
Faфур Fулом — буюк шоир, файласуф, ҳакам,
Faфур Fулом — адаб, нотик ва соҳиб сурур.
Эҳ-ҳе, бунинг барчасини санамоққа ҳам
Керак бўлар лофи билан яна бир умр.
Асқад ака лутф ётгандай, у мисли кўзгу,
Бизнинг учун халқ тимсоли, ўзбек тимсоли.
Камалакдек неча рангли дарёларни у
Жамлай олган бир ўзида денгиз мисоли.
Бу дунёда кўпдир балки ҳар хил муаммо,
Мумкин унинг баъзисини кўра билмаслик.
Нима деса деяверсинг одамлар, аммо
Мумкинмас ҳеч улуғ зотта ҳавас қилмаслик.
Мангаликка кетаётир шоир шошганча,
Мовий кўкка шаън қуёши ўрламоқда, бас,
Faфур Fулом тирикликни истаса қанча,
Биз ҳам унга ўшанчалик қилгаймиз ҳавас.

1967

ҚУШЧАГА

Бир танишим саъва қуш асраб, сал
ўтмай қўйиб юборган экан. Шўрлик
қайтиб келибди. Ўзи дон
топиб еёлмаган бўлса керак.

Эй қушим, кўкка қараб кўздан ёшингни тўкма кўп,
Бунчалар андуҳи ғам ичра қафасни сўкма кўп.

Ношукурлик қилма мунча, соҳибингга айт шараф,
Ул сенга дон-дун бериб аҳволингта тургай қараб.

Ёфса ёмғир кўчаларда қолмагайсан зор-зор,
Йиғлама, қушчам, сенинг кулбанг-ку бор, кулбанг-ку бор.

Қайга ҳам боргай эдинг берганларида эрк сенга,
Шаҳр ахир фиж-фиж эрур, ошёнлари ҳам берк сенга.

Бош олиб қиши кунлари қайга кетардинг, жонгинам,
Оҳ бечора, билмагайсан сен жануб йўлларини ҳам.

Бенаво ҳар бир гўдак кўргач сени тошлар отур,
Пистадек қалбингта, ваҳ, тошлар қадар ғамлар ботур.

Қол ўшал масканда сен, эрк деб дилингни тилма кўп.
Сен ахир қушсан ожиз, инсонга тақлид қилма кўп.

Биз қафасни севмагаймиз, бизга на уйдир ҳожат,
Давримизни яйрашиб биз куйласак еттай фақат.

1967

* * *

Кўйгил, у қунларни эслатма менга,
Қалбимни ёқмасин бу хазон фаслинг.
Энди бегонаман, жонгинам, сенга,
Энди бегонадир менга ҳам васлинг.
Гоҳида севиниб, гоҳи ғамдадир
Ишқ узра ёзардим мен эркин қанот.
Билмайман қайси кун, қайси дамдадир,
Менинг қисматимга чанг солди сайёд.
Унинг қўлидадир бу кун имконим,
Бу кун ҳамроҳимдир гўзал изтироб.
Кўйгил, у қунларни эслатма, жоним,
Кўйгил, юрагимга сен берма азоб.
Ўзгалар юзимга боқса ҳам ҳайрон,
Фақат сен томоша қилма ҳолимни.
Фақат сен шеъримни севма ҳеч қачон,
Фақат сен ҳимоя қилма номимни.
Дариф тут ишваю назокатларинг,
Фақат сен юзимга боқмагил кулиб.
Ҳайҳот, энди барча илтифотларинг
Менга туюлади масхара бўлиб.

1967

ГҮЗАЛЛИК

Кузнинг рутубатли оқшоми эди,
Боелар сокингина чекар эди оҳ.
Руҳимда бир хазон айёми эди,
Ажиб гўзаликка дуч келдим ногоҳ.
Мисли хаёл эди у малак сиймо,
Чирой оламининг тенгсиз сайқали.
Кўзларим олдида турарди гўё
Навоий ғазалин тирик ҳайкали.
Бир зум кўзларимдан йўқолди уйқу,
Бир зум баҳор каби ёришди олам.
Бир зум хаёлимдан чекинди қайфу,
Бир зум юрагимдан кетди фам-алам.
Бир зум гўзаликнинг ҳузурида жим
Самовий ҳисларга бўлиб қолдим банд.
О, доно табиат, о буюк ҳаким,
Ҳикмат кўрмадим ҳеч мен сенга монанд.
Ўзинг юракларга чўқтириб кадар,
Халос ҳам қилурсан раҳм этган дамда.
Шундай гўзалларни яратмасанг гар,
Қолиб кетармидик бир умр фамда.

1967

* * *

Оҳ уриб ҳар ёнда изгийди шамол,
Замон макон бермай уни қистайди.
Орзуси фақат шул: у ҳам тоғ мисол
Дили ором олиб ётмоқ истайди.

Аросатда инграпар тоғлар ҳам, аммо
Қўҳистон бағрида тополмас илож.
Армон қилар у ҳам, шамолдай гўё
Мовий кенгликларда ёзсан дер қулоч.

1967

* * *

Баҳор кунларида кузнинг ҳавоси,
Танимни жунжитар оқшомги шамол.
Нега мунча ғамгин найнинг навоси,
Нега қалбим тўла ўқинч ва малол?
Барглар орасига тинмасдан сира
Ошно юлдузлардан тўкилади нур.
Билмайман, қийнайди қайси хотира,
Титроқ юлдуз каби музлаган шуур.
Мағлуб баҳодирнинг найзаси мисол
Маъюс эгилади терак учлари,
Барглар соясида ўйнайди беҳол
Уйкудаги қизнинг бедсер тушлари.
Атрофимда ётар ғарид бир виқор,
Билмам, нега ўчди қалбим сафоси.
Нима ҳам қилардим, на иложим бор,
Баҳор кунларида кузнинг ҳавоси.

1967

КУЗ МАНЗАРАЛАРИ

Яна далаларга бошлайди ҳавас,
Боғларда хазонлар ёнади лов-лов.
Дўстларим, бу кузнинг барглари эмас,
Менинг юрагимдан тўкилган олов.

Шохларда мезонлар ялтирас хира,
Пойида шивирлар менинг куйларим.
Дўстларим, булар ҳам мезонмас сира,
Бу менинг чувалган, сўнгсиз ўйларим.

Қуёш ҳам фалакда бамисли рӯё,
У энди ёндирилас, ялтирас фақат.
Дўстлар, у ҳам энди қуёшмас асло,
У олис ёшликда қолган муҳаббат.

1967

СЕВГИ ЎЛИМИ

Ёмғир тинмай ёғди кун бўйи,
Ёмғирли кун каби эзилди дардим.
Яйдоқ кўчаларда жим юрган кўйи
Сенинг изларингни ахтардим.
Уфқларда эса аччиқ бир туман
Менинг кўзларимга қурди заҳар.
Увишган қалбимни сокинлик билан
Эзар эди бўм-бўш бу шаҳар.
Энди сен тутмассан асло қўлимни,
Үтган севгим учун очмассан аза.
Оҳ, қандай ўлим бу севги ўлими,
Унга на қабр бор ва на жаноза.

1967

ОҲУ

Маконинг бўлибди тоғлар ораси,
Сенсан гўзалликнинг асли, сараси.
Маъюс юрагингда ишқнинг яраси,
Сен ҳам ошиқмисан ёки, охужон.

Даралар қўйнида нени истарсан,
Нечун доим фамгин, доим мустарсан.
Латиф шижаотинг қайга қистарсан,
Сен ҳам ошиқмисан ёки, охужон.

Йўқ, сен ахтармассан тоғлардан макон,
Ва на гўзаллигинг учун шуҳрат-шон.
Сайёд жабри сенга бермайди имкон,
Сен ҳам ошиқмисан ёки, охужон.

Кўй, жоним, кўзларинг тўлмасин ёшга,
Тонгда оёғинг қўй баланд бир тошга.
Сени қуёш ўзи кўтаргай бошга,
Сен ҳам ошиқмисан ёки охужон.

1967

ПАҲЛАВОН МАҲМУД ҚАБРИ ҚОШИДА

Мадорсиз қўлимга қалам олганда
Ё узоқ йўлларда ҳориб-толганда,
Бир номард қошида ожиз қолганда
Паҳлавон Маҳмуддан сўрадим мадад.

Юлдузлар мисоли кулганда руҳим,
Бўронли ҳисларга тўлганда руҳим,
Баъзан шеър устида сўлганда руҳим,
Паҳлавон Маҳмуддан сўрадим мадад.

Куйладим, фазога нақлим етмади,
Ўйладим, дунёга ақлим етмади.
Қай ишга қўл урдим, шаҳдим етмади,
Паҳлавон Маҳмуддан сўрадим мадад.

Мен учун хилхона бўлганда олам,
Гумбазлар остидан чиқди бир алам:
— Ҳаётсан, бунчалар фарёд айлама,
Мен ўзим мададга зорман-ку, болам.

1967

АБДУЛЛА ҚАҲХОР

Йўллар ортимизда қолар эдилар,
Саҳролар қоларди чексиз, бетакрор.
Нега улар чексиз, десам дедилар:
Бу ердан ўтганди Абдулла Қаҳхор.

Йўллар ортимизда қолар эдилар,
Чўққилар қоларди юксак ва қатор.
Нега улар юксак, десам дедилар:
Бу ердан ҳам ўтди Абдулла Қаҳхор.

1967

* * *

Оталар боладан ранжиса озроқ,
Гоҳида шундайин сўзни дейдилар:
— Болам, кексаларни қадрла кўпроқ,
Боғлаб қўйган эмас бизни, дейдилар.
Кекса дилингизга тушмасин титроқ,
Оталар, чайқалиб турибди олам.
Сиз ҳам болаларни қадрланг кўпроқ,
Боғлаб қўйган эмас болаларни ҳам.

1967

* * *

Умр ўтиб борар мисоли эртак,
Эртанинг кетидан келиб қолар шом.
Фақат фафлат ичра ётмагин, юрак,
Қайтиб келмас сира бу ёшлик айём.

Пайт келар, ваъданинг қиммати қолмас,
Муҳлат бермас у дам тўлган паймона.
Ўтган бир онингни қайтара олгай
На кўзёш, на афсус ва на баҳона...

1967

* * *

Дунё бир гулзордир кенг ва бетимсол,
Юлдузлар фунчадир унинг учida.
Кўғирчоқ ичида қўғирчоқ мисол
Гуллар ўстирамиз хона ичида.

Дунё бир боладир шўх ва бетимсол,
Унинг ахтаргани шодлик ва кулгу.
Кўғирчоқ ичида қўғирчоқ мисол
Унга эрмак бўлиб қолмасак бўлди.

1967

ШОИР

Парво қилма, дўстим, эзилма сира,
Фамгин қўшиқларни куйласа шоир.
Мисралари гарчанд маъюс ва хира,
Лекин барчаси ҳам қалбига доир.
Буюк замонанинг оташин зарби
Унинг қаламига ёт эмас асло.
Агар керак бўлса Шарқни ва Farбни
Ёлғиз бир шеърига эта олар жо.
Лекин у юрагин қасддан ёқмагай,
Қалбига оламдан оқар оҳанглар.
Айтинг, ҳилол бунча маъюс боқмагай,
Айтинг, мунча сулув бўлмагай тонглар.
Айтинг, Боботоғнинг силсиласида
Сакраб кезмасинлар мунис оҳулар.
Улар акс этади шеър мисрасида,
Ажиб ўйчан қилиб қўяди улар.
Парво қилма, дўстим, эзилма сира,
Фамгин қўшиқларни куйласа шоир.
Мисралари гарчанд маъюс ва хира,
Барчаси ҳам шайдо қалбига доир.

1967

СОВФА

(*Бухоро газининг Москвага етиб бориши муносабати билан*)

Қани қўлингни бер, эй қардош диёр,
Ўзбек йигитининг қайноқ кафти бу.
Бу кунги совғанинг ўзга номи бор,
Заҳматкаш юртимнинг юрак тафти бу.
Бахтини бус-бутун топгунича то, —
Не-не балоларни қўрган ўзбекман.
Меҳмон жой сўраса, аямай ҳатто, —
Унга жонини ҳам берган ўзбекман.
Дилбар Фарғонадан соҳибкор халқим
Ҳар йили узатар тонналаб мева,
Бундайин бисотни кўрмаган балким,
Маккага қатнаган милионлаб тева.
Томди яйловида маъсум қўзичоқ
Дўстлар деб кўз очмай берар жонини,
Хисоблаб чиқишига сон етмас бу чоқ
Мурунтовдан кетган олтин конини.
Бизнинг пахтага-ку, барча мунтазир,
Ер юзи ўртада кўрмоқда баҳам...
Қандай баён қиласай фикримни ахир,
Мана, олиб келдик ўтимизни ҳам.
Газ деган, дўстларим, нима бўлибди,
Азалдан жонимиз сизга садақа.
Жаҳон-ку рост гапни кўриб турибди,
Бизлар шундоқ эдик, бизлар шунақа.
Бизлар баҳш этамиз дўстларга олов,
Мана, Осиёнинг күёши сизга.
Ёз пайти саратон қиздирса лов-лов, —
Сиздан ҳам шаббода келгуси бизга.
Ва лекин шамолдай саргардон юриб,
Бахтимни ахтариб кезмаслигим чин.
Мен бу кун Москва ёнида туриб
Сени улуғлайман, эй она халқим.
Бир неъмат бўлсин деб қалбда қонни ҳам
Анор донасига жойлаган жонсан.

Агар қўйиб берса, кенг жаҳонни ҳам
Зарга ўрагувчи Ўзбекистонсан.
Нурли истиқболда барчанинг кўзи,
Олдинда келажак турар аломат.
Майлига, яшнасин бутун ер юзи,
Дўстларнинг жонлари бўлсин саломат.
Буюк салафларнинг силсиласида
Ахир Россиянинг фарзанди бисёр.
Лермонтовнинг ўтли бир мисрасига
Майли, Ўзбекистон оташи нисор.
Бу оташ тоблайди дўстликни фақат,
Бу оташ ортияр иқболнинг кучин.
Бу оташ тафтида ҳурмат ва ҳиммат
Табаррук зотларнинг даҳоси учун...

1967



ЁЗАЖАКМАН

Дўстлар, демангиз, мен шеъру достон ёзажакман,
Мен шеъру достон ичра бир аффон ёзажакман.
Ҳайрона бокур бу маним аҳволима ҳар ким,
Мен эрсам ўзгалар аҳволига ҳайрон, ёзажакман.
Шоир дилига қилма ҳавас, бут эса бағринг,
Шоир юрагин доимо вайрон ёзажакман.
Солди дилима қанча алам ул шўху бадхӯ,
Билмамки, ахир қай бири қурбон, ёзажакман.
Осмон элининг турфа-туман юлдузи кўпдир,
Хўбдир бариси, равшани — чўлпон ёзажакман.
Сен шеърга қўлинг чўзмагил, эй жоҳили нокас,
Бўлсанг-да “худо” номингни шайтон ёзажакман.
Бошингта агар қўнса шу кун шарпаи иқбол,
Пойингта, элим, бош уриб қуръон ёзажакман.
Қулдир демангиз гарчи номи Абдулла эрурман,
Расул ҳам эмас, йўқ ҳали унвон, ёзажакман.

1967

МИНОРАИ КАЛОН ТЕПАСИДАГИ ЛАЙЛАК

Ташлаб кетди бу шаҳарни беклар, амирлар,
Ташлаб кетди бу шаҳарни ислом шавкати.
Ташлаб кетди бу шаҳарни шайхлар, кабирлар,
Ташлаб кетди маҳмадона Манғит давлати.

Булбуллар ҳам кетди бундан кўзини ёшлаб,
Товуслар ҳам қайларгадир аста йўқолди.
Фақат бир қуш бу шаҳарни кетмади ташлаб,
Фақат лайлак Бухорода мангутга қолди.

Мен бу ҳолга ҳайрон бўлиб боқдим ҳар сафар,
Бир шеър излаб Бухорони кезаркан узоқ.
Ажаб, қушнинг оёқлари фўзага ўхшар,
Қанотлари эса унинг пахтадек оппоқ.

1968

АЛИШЕР

Жаҳонки муқаддас нени кўрибди, --
Барига онасан, эй қодир ҳаёт.
Беш юз йил наридан боқиб турибди,
Нурли бу юзларга нуроний бир зот.

Шу буюк ўғлингни ардоқлаб дилдан, --
Халқим, таъзим этсанг арзигай тамом.
Унинг номи билан бирга битилган
Дунё дафтарига ўзбек деган ном.

Бойқаро ирғишлиб истак отида
Жаҳонга боққанда мисли бола шер, --
Ҳирот дарвозасин бир қанотида
Шеърий лашкарини тизган Алишер.

Дунёда бирор ном қолдирмоқ учун
Юрт бузиш шарт эмас, деган гап-ку, рост.
Кимдир пеш қилганда найзанинг кучин,
Алишер қаламни кўрсатган, холос.

Тун билан тонг эрур ташбиҳда удум,
Мисоли заҳру май, ҳажру шакар лаб.
Кимнидир қуёшдай эсласа мардум,
Кимнидир зулматдай юрарлар қарғаб.

Нидо тингла, бу кун, юртинг тарафдан,
Эй, йироқ Ҳиротда маскан топган эр!
Огоҳ бўл, Алишер, сен ушбу гапдан:
Ҳар икки набиранг бири — Алишер.

Байтингга бир бора қовушган ҳар лаб,
Такрорлаб кетгуси маҳшаргача то.
Қаратиб турибсан бу ён, не ажаб,
Миллиард мартабали жаҳонни ҳатто.

Бировлар наздида жоҳил Осиё
Фақат завол кўриб, кўрмаган камол.
Мусо илтижоси етди-ю гўё,
Ҳақ Тур тоги узра кўргазди жамол —

Жаҳон меҳробида пайдо Алишер...
Шодмон қасида айт сен ҳам, эй қуёш!
Беш юз йил унга ҳам нима гап ахир,
Мингга қадам қўйди йигирма беш ёш.

1968



АЛИШЕРНИНГ ОНАСИ

(Болаларга)

Билмам, қандай аёл бўлган
Алишернинг онаси.
Балки унинг ақлига ҳам
Лол бўлган замонаси.
Балки унинг кўзларида
Бўлган оғир бир хаёл.
Балки ғамгин бир зотдир у,
Балки шўхчан бир аёл.
Балки буюк фарзандига
Териб келган чечаклар.
Балки тунлар унга бедор
Айтиб берган эртаклар.
Майлига, у ким бўлмасин,
Ёлғиз бир сўз маъноси:
Алишернинг онаси у,
Навоийнинг онаси.

1968

ГОРЬКИЙ

Адиб, тақдирингта таъзим қил бу кун,
Бу кун эҳтиром қил толе қошида.
Қаро кечмишингга разм қил бу кун,
Не кунлар ўтмаган Руснинг бошидан.
Қўш калла бургутли улкан Россия
Ардоқлай билмаган ҳатто ўз ишқин.
Шарафсиз юртининг шарафи дея,
Шарафсиз қўлларда жон берди Пушкин.
Буюк Лермонтовнинг оташ чоғлари
Кулдай совурилди бадбўй сўзлардан.
Бу зотни ҳаттоки Кавказ тоғлари
Яшира билмади ёвуз кўзлардан.
Ёш қалбим замонлар дардига тўлуғ,
Тарихни ўйлайман мен гоҳи онлар.
Бу юрт ғамлари ҳам нақадар улуғ,
Бу юрт шавкати ҳам не бир ўғлонлар...
Шеър ҳам ёзмас эдим мен унга балким,
Пойлаб ҳам турмовдим таваллуд кунни.
Таажжуб қиласман тақдиригаким,
Жафо-ю ғам бўлмиш дорилфунуни.
Давр ўқи дилини юз пора қиласмиш,
Зирағчадан зада жаҳоний бир зот.
Аччиқ кечмишига ишора қиласмиш,
Ўзига танлаган чоғда тимсол-от.
Яхшиям тубанда қолиб у тақдир,
Топди устоз деган қутлуғ номни у.
Оқибат замонда кўролди охир
Пушкин кўролмаган эҳтиромни у.
Адиб, тақдирингта таъзим қил бу кун,
Бу кун эҳтиром қил толе қошида.
Қора кечмишингга разм қил бу кун,
Не кунлар ўтмаган сенинг бошингдан.

1968

ЖУМБОҚ

Идроким борича яшадим фақат,
Фаҳм этдим дунёни баймкон, қат-қэт.
Ёлғиз бир жумбоққа ақлим етмади:
Қайдан туғилади, билмадим, ҳасад.

1968

ХАТОЛАР

Ватерлоода хато қилди Наполеон —
Жаҳонгирнинг қайтди шу кун омади.
Мана ўтса ҳамки неча бир замон,
Ү ҳақда гапирмаган одам қолмади.

Бобом пайғамбарлар қасоси учун
Гоҳо осийларнинг олди бошини.
Уни қарғадилар хатоси учун,
Ҳамон отмоқдалар таъна тошини.

...Хато қилган бўлсам кечиргин, болам,
Юз йил давомида чўзаверма, бас.
Кўриб турибсан-ку, мен оддий одам,
Наполеон эмасман, Темур ҳам эмас!

1968

БИРИНЧИ МУҲАББАТИМ

Кеча оқшом фалакда ой бўзариб ботганда,
Зуҳра юлдуз милтираб, хира ханда отганда,
Руҳимда бир маъюслик, сокинлик уйғотганда,
Мен сени эсга олдим, биринчи муҳаббатим.
Эслаб хаёлга толдим, биринчи муҳаббатим.

Ўтди ёшлиқ завқ билан, гоҳи тўполон билан,
Гоҳида яхши билан, гоҳида ёмон билан,
Айри ҳам тушдим бальзан қалб билан, имон билан,
Лекин сени йўқотдим, биринчи муҳаббатим,
Мангу фафлатда қотдим, биринчи муҳаббатим.

Дунё деган шундайин англаб бўлмас сир экан,
Гоҳ кенг экан, гоҳида туйнуксиз қаср экан.
Лекин инсон ҳамиша бир ҳисга асир экан...
Нечун билмовдим аввал, биринчи муҳаббатим,
Парво қилмовдим аввал, биринчи муҳаббатим.

Холбуки орзуладан жудо ҳам бўлганим йўқ,
Юлдуздай кулганим йўқ, ой каби тўлганим йўқ.
Эрта хазон гул каби сарфайиб сўлганим йўқ,
Сени эслаб йиғлайман, биринчи муҳаббатим,
Эслаб бағрим тиғлайман, биринчи муҳаббатим.

Йўлин йўқотса одам — муҳаббатга суюнгай,
Фуссага ботса одам — муҳаббатга суюнгай.
Чорасиз қотса одам — муҳаббатга суюнгай,
Мен кимга суюнгайман, биринчи муҳаббатим.
Фақат эслаб ёнгайман, биринчи муҳаббатим.

Нидо бергил, қайдасан, шарпантга қулоқ тутдим,
Сирли тушлар кўриб мен бор дунёни унутдим.
Тонгда туриб номингга ушбу шеъримни битдим,
Дилдаги оҳим менинг, биринчи муҳаббатим,
Ёлғиз Оллоҳим менинг, биринчи муҳаббатим.

* * *

Бул ажаб, хор кимсадин имдод сўрайди хорлар,
Сиз бемор кўксига бош урмангиз, эй беморлар.

Гар фалак буржида шамс уйқуга солса ўзни,
Етди навбат бизга деб чақнар эмиш сайёrlар.

Саждага бошинг уриб фарёд чекма, эй рафиқ,
Энди сен топгаймидинг, топмабди-ку ағёрлар.

Фозилу дониш эли кўл ювса бу дунёга гар,
Во ажаб, оқдан сувин нўш этар шайх хунхорлар.

Нафс ила дунёга дил берган фосиқлар, сиз букун
Яссавий хок-пойидан айлаб олинг тумморлар.

Ким берар дунёга зар, абгор ўлиб қолгай ўзи,
Кимки дорни бузса гар, анга қурилтай дорлар.

Кимсалар, бадбин дея боқманг бу кун Абдуллага,
Тингласа гоҳи юриб мозий элидин зорлар.

1968

* * *

Севгидан сўйлардинг у кун энтикиб,
Сўйлардинг висолнинг яқин келишин.
Мен бўлсам кўзимни қайгадир тикиб,
Ўйлардим дунёning савдоли ишин.

Бугун-чи, бир ўзим, юрибман танҳо,
Севги ҳам, висол ҳам бўлдилар абас.
Барчаси мангуга тарк этди, аммо
Фақат ўша ўйлар тарк этган эмас.

1968

САМОЛЁТДА ЁЗИЛГАН ШЕЪР

Чарх ураг эрдим фазода, юлдузим йўлдош эди,
Юлдузимга термулиб юлдуз кўзимда ёш эди.

Дер эдим: — Жон юлдузим, васлингга бир етказ мани,
Дер эди: — Кўк севмагай сендай гуноҳкор бандани.

Чарх ураг эрдим фазода, юлдузим йўлдош эди,
Юлдузимга термулиб юлдуз кўзимда ёш эди.

Дер эдим: — Туш, юлдузим, йўқса заминга, сен ўзинг.
Дер эди: — Хуш кўрмагай ташвишли ерни юлдузинг.

1968

БУ КУН

Ваҳки, ишқ саҳросида қолдим беишқ танҳо бу кун,
Чиқма, Қайс, оҳим билан ёнмоқда бу саҳро бу кун.

Чехраи заррин сира кўрмакка ҳожат қолмади,
Шамс нарвони уза ағёр эрур пайдо бу кун.

Шарҳи дил этмай туриб рад этди ёрим, бўйлаким
Қисмат омин айтди, айтмай зарра бисмилло бу кун.

Нун лабинг узра сокин қолди ҳилолдек ҳолатим,
Ҳарф ўйин айлай десам, ўзга эрур имло бу кун.

Багри қонлар бирла ёрнинг зарра дарди йўқ, не тонг,
Иблис ила кўкда ҳам машғул эрур олло бу кун.

Чархи қажрафторнинг шеваси доим шул экан,
Васл уйида ғайр эли айлаб юрар ялло бу кун.

Ёр висоли толеингда бўлса, Абдулло, агар
Сенга парво қилсалар ҳам қилмагин парво бу кун.

1968

БАҲОР КУНЛАРИДА

(Ҳазил)

Баҳор чоғи эди,
Шод эдик жуда.
Боғда дилдор билан айладик висол,
Жилмайиб юрардик худа-бехуда,
Худди китобларда ёзилган мисол.

Бирдан гумбирлади момақалдириқ,
Ҳавонинг авзойи бузилди, не ҳол?
Ёмғир ҳам шарилаб қўйди-ку шу чоқ,
Худди китобларда ёзилган мисол.

Бир зум ёмғир ичра қолдик иккимиз,
У менинг кўксимга бош қўйди беҳол.
Чўмдик аллақандай ҳисларга ҳам биз,
Худди китобларда ёзилган мисол.

Йўқ, энди китобга ўхшамади ҳеч,
Курғур ёмғир биздан кетибди кулиб.
Икков икки ёнга тарқалдик шу кеч,
Менинг белим оғриб, у тумов бўлиб...

1968

КЕТМОҚДАМАН

Яхши қол, эй, дилбарим, дилда кадар, кетмоқдаман,
Ишқ аро энди ҳолим зеру забар, кетмоқдаман.

На ишончу на қувончу на кўнгилдан гапни оч,
Барчасидан ушбу кун йўқдир самар, кетмоқдаман.

Мен қуёш юзлимга деб, тун-кечалар бердим юрак,
Оқибат отганда тонг қондир жигар, кетмоқдаман.

Неча кунлар ўтди, лекин сўрмадинг ҳолимни бир,
Охирида ҳол сўраб келсанг магар, кетмоқдаман.

Келганимда дедиларки, бу йигит кони зарап,
Кетмагимдан, охир айт, борми зарап, кетмоқдаман.

Билмадим, ҳеч бормикин асли дардимга шифо,
Хаста бу Абдулладан олгин хабар, кетмоқдаман.

1968

ИЛФОР ИШЧИ ВА ЧАҚҚОН МУХБИР ҚИССАСИ

Ишчи тонгда туриб олиб
Курилишга боради.
Фишт теради, тош йўнади,
Шагалини қоради.

Кўл ишда-ю, аммо ўзга
Хаёл кезар бошида,
Боғчадаги қизчасининг
Лентаси йўқ сочида.

Телпагини йўқотибди,
Ўйинқароқ кенжаси.
Янгисини оббер, — дейди,
Йифлаб чиқди кечаси.

Бирорига папка керак,
Ўйлаб ҳамма-ҳаммасин,
Ишчи шу кун икки ҳисса
Бажаради нормасин.

Кун ярмидан оғмай туриб
Мухбир келиб қолади,
Илфор, — дея уни, дарров
Суратини олади.

Эртасига газетада
Хабар чиқар бир қулоч:
“У янги йил шарафига
Меҳнат қилди...” На илож!

Газетани ўқиб ишчи
Кулибина қўяди,
Илфорлигин сабабини
Янги йилга йўяди.

Кунлар бир-бир ўтиб борар
Қамчилашиб отини.
Вақти етиб бир кун унинг
Туғиб қолар хотини.

Ким ҳам ахир толеидан
Кувонмайди бу чоғда.
Үғил күрдик, деб қўяди,
Оғзи унинг қулоғда.

Ўлмай бир кун катта бўлса
Одам бўлар чақалоқ.
Аммо ҳозир боқиши керак,
Оч қолмасин бақалоқ.

Ахир жиндай чиқум керак,
Ўйлаб ҳамма-ҳаммасин,
Ишчи шу кун уч баравар
Бажаради нормасин.

Эртасига газетада
Хабар чиқар бир қулоч:
“Балиқчилар кунига у
Меҳнат қилди...” На илож!

Газетани ўқиб ишчи
Кулибгина қўяди.
Илфорлигин сабабини
Балиқчига йўяди.

Кунлар яна ўтиб борар
Бир-бирини қувлашиб,
Ҳозирчалик ёмон эмас
Яшайдилар қувнашиб.

Аммо одам ҳаётида
Бордир куннинг қораси,
Ажал етиб бир кун унинг
Қазо қиласи онаси.

Марҳум деган ўзи бориб
Кирмайди-ку қабрга.

Чиқим керак қўмишга-ю,
Майда-чуйда тадбирга.

Онасининг ўлишини
Қайдан билмиш у фариб,
Йўқса аввал озроқ нарса
Қўймасмиди жамғарив.

Қабр устига лавҳа керак...
Ўйлаб ҳамма-ҳаммасин,
Ишчи энди тўрт баравар
Бажаради нормасин.

Кун ярмидан оғмай туриб,
Мухбир келиб қолади.
Пешқадамни қаққайтириб
Суратини олади.

Эртасига газетада
Хабар чиқар бир қулоч:
“Май байрами шарафига
Меҳнат қилди...” На илож!

Газетани энди ишчи
Бир бурчакка отади.
Бу мақтовга нима дейсиз?
Ўйлаб боши қотади.

Уйда бундоқ таъзия-ю,
Бу ёқда бу масхара.
Наҳот одам аҳволини
Сўрамаса тасқара.

Энди иш ҳам қолиб кетиб
Сўка бошлар фурбатни:
“Биламиз-ку биз ҳам ахир
Байрамларга хурматни.

Шу замоннинг оғушида
Етдик биз ҳам вояга.
Қалбларимиз лиммо-лимдир
Қанча-қанча вояга.

Майли, баҳор байрамидек
Яшнатаильик оламни,
Лекин, ука, ёшлик қилиб
Ранжитдинг-ку одамни".

Үйлаб ҳамма-ҳаммасини
Хуллас тинчи йўқолар,
Хумпарни бир болпай, — дея
Газетага йўл олар.

Кейин билса мухбирнинг ҳам
Бор экан ўз ноласи,
Чиқим учун ёзган экан, —
Туққан экан холаси.

1968



ҲАҚИҚАТ ЙЎЛЛАРИ

Поёни йўқ тарихнинг кечмишини ўйлайман,
Ёш идроким замонлар қаршисида қолур лол.
Ва шу улкан дунёнинг кемтигидан бўйлайман,
Унда бирор куради, бирор бузар бемалол.
Баъзан ёмон от қолур яхши одамдан ҳатто,
Қай бир ёвуз кимсани яхши дерлар эрта кун.
Наҳот, дейман, дунёда событ нарса йўқ асло,
Наҳотки етукликтининг тимсоли йўқ бус-бутун?
Дейдилар, ҳар замоннинг бордир ўз тарозуси,
Оҳ, нақадар рост эрур ушбу буюк ҳақиқат.
Мангулик салтанатнинг қанча-қанча кўзгуси
Офтоб олдида шамдай милтираб қолди фақат.
Султон эса ҳам гарчанд ўз даврида Улуғбек
Оддий бир қулбободай қиличга эгди бўйин,
У-ку қайта тирилди ҳеч нима кўрмагандек,
Лекин дунёнинг иши бамисоли от ўйин.
Мангуга қолай дея шухрат қули Искандар
Юксак тоққа ўзининг суратини солибди,
Хўжасида бўлса ҳам қанча-қанча сийму зар,
Қарангки, жулдур кийган Эзоп мангу қолибди.
Ҳа, садақа кам эрур мангулик халтасида,
Пайҳон бўлар саройлар, қанча юксак қабрлар.
Гоҳ оддий тасодифнинг оддий бир ҳамласида
Капалак қанотидай учиб кетар қасрлар.
Балки замонлар ўтиб, даврлар шамолида
Совурилар қанча зот, яна қанча буюклиқ.
Ўйлайман, мангуликнинг ойнаи жамолида
Ким қоларкан севгидай абадий ва суюклик...
Ким муқим тураг экан сонсиз авлодлар оша,
Кимнинг иши доимо аталар экан савоб?
Ким фалакни қўёшдай мангу қилгай томоша,
Қай бир хилқатни инсон беминнат айлар тавоб?
Ҳақсизликдан мазлумнинг ичга сифмаса дарди,

Агар зулмат ичида кўринмай қолса ҳаёт,
Қайга у сажда қилиб, қайга дилин ёрарди,
Қай суюнчиқ қошида айлар эди дод-фарёд.
Шу мўъжаз ҳаётимда кўрдим қанча севинч, фам,
Гоҳо тик боқолмадим разолатнинг кўзига.
Ушбу ёруғ дунёда топсам ҳам, топмасам ҳам,
Барибир талпинардим ҳақиқатнинг ўзига.

1969—2000



ЮРТИМ ШАМОЛИ

Йўлларда елдирим мисоли елдим,
Еллар водийсига бошлади ҳавас.
Елвагай Ҳисорнинг бағрига келдим,
Сен эсдинг — тараалди сийм танда атлас,
Сен эсдинг — очилди ёрнинг жамоли,
О, юртим шамоли, юртим шамоли.

Мен-ку бу дунёда бир зори висол,
Карбало даштида Мажнун сифатман.
Шамоллар ичида мен ҳам бир шамол,
Чечаклар атридан мен ҳам сармастман.
Лекин сен руҳимнинг мангу хаёли,
О, юртим шамоли, юртим шамоли.

Қанча шамолларга юзимни бурдим,
Улардан эсдилар турфа хил нафас.
Уларда гоҳ қайфу, гоҳ шодлик кўрдим,
Тўхтамай ўтдилар бари ҳам бир бирпас.
Фақат қайфулардан сен ўзинг холи,
О, юртим шамоли, юртим шамоли.

Шамоллар эсгандир ушбу дунёда,
Шамоллар гоҳ қуюн, гоҳида довул.
Улар гоҳ ошкора, гоҳо рўёда
Қанча бўйтонларни совурган буткул,
Лекин сен бўлмагин боғлар заволи,
О, юртим шамоли, юртим шамоли.

Эсгин, эй, боғларнинг жамоли кулсин,
Мовий нафас билан тўлсин этаклар.
Учқур қўшиқларга бу олам тўлсин,
Шаънингга шоирлар айтсин эртаклар.

Эсгин, Ватанимнинг таралсин боли,
О, юртим шамоли, юртим шамоли.
Мени чорлаётир олий бир жамол,
Билмасман, оҳ, унга қачон етурман.
Бу гулшан водийда мен ҳам бир шамол,
Шамол каби келдим, шундоқ кетурман.
Лекин Абдулланинг боқий камоли,
О, юртим шамоли, юртим шамоли.

1969



САРАТОН

Саратон чоғи бу — зарра шамол йўқ,
Тутлар кавагида мудрар фурраклар.
Ногаҳон фалакка урган каби дўқ,
Сўзсиз қотиб тураг бўйчан тераклар.

Осмон лол-лов ёнар офтоб қўридан,
Уфқда саробдан оташин балдоқ.
Чинқириб юборар куннинг зўридан
Қайгадир беркиниб олган чирилдоқ.

Бирдан тиниб қолар шу бетинч дунё,
Ҳатто шаршаракнинг ўчгандай саси.
Борлик сув тагига чўккандай гўё
Қанчалик термулма — чиқмас нафаси.

Гўдак уҳича ҳам шамол топилмас,
Бутанинг тагида бўзтўрғай ҳайрон.
Деҳқон тол тагига чўзилди бирпас,
Тинди шохчадаги қушча ҳам бийрон.

Менинг деҳқон бобом, андак ором ол,
Қуёш буровига олган палла бу.
Саратон ўзи ҳам мудрайди беҳол,
Оҳангиз ялла бу, сўзсиз алла бу!

Ҳали тонг фунчаси очмасидан лаб,
Наҳор фарофатин ўйламай тақир,
Кимсасиз далага кўзни уқалаб,
Чиқиб келганингни кўрдим-ку ахир.

Кўрдим-ку манглайинг тер билан қотиб,
Бераҳм оташга берганингни тоб.
Кўрдим-ку тепангда ўзин йўқотиб,
Ҳайратдан лол қотиб қолганин офтоб.

Азму шижаатинг мен ахир кўрдим,
Кўрдим кўзларингда чарчоқ бир кулгу.
Майли, ором олгин, эй бобо юртим,
Саратон жунбушга келган пайт-ку бу.

Бутун олам гўё улкан дошқозон,
Қайдадир — кўринмас униғ нарёфи.
Бу қайнот қозонни кузатмоқ осон,
Ичига тушмоқлик осонмас чофи.

Чўнтақдан тўкилган тангалар мисол
Шуълалар ўйнайди супа учидা.
Бирордан хижолат бўлган каби тол
Ер чизиб туради — дами ичида.

Офтоб қайта бошлар, кўланка майдон,
Яна бош кўтарар номозшомгуллар.
Секин мовийлашар қизарган осмон,
Оқариб кўринар кумушранг йўллар.

Яна елканини кўтарар шамол,
Яна чуғурчуқлар уйғонар боғда.
Бобо ёнидаги боладай хушҳол,
Тўргайлар чарх урап сўнгсиз самода.

Яна ела бошлар оқшом нафаси,
Шеър они, ишқ они, меҳнат они бу.
Бу қуёш ўлкасин оташин саси,
Ўзбек диёрининг саратони бу.

1969



ХОТИРОТ

Уйдан кетганимга ўн йил бўлибди,
Ўн йил қишлоғимдан юрибман узок.
Мен юрган йўлларда ўтлар унибди,
Кўмилиб бўлибди мен кезган сўқмоқ.

Ёшлик чоғим эди, шўхлигим тутиб
Исмим ўйган эдим битта теракка.
У ҳам жароҳатдай кетибди битиб,
У ҳам юксалибди менсиз юксакка.

Бузилиб бўлибди аллақайси дам
Ҳовли ортидаги омонат қўприк.
Бу ерда мен билган одамларнинг ҳам
Баъзиси энди йўқ, баъзиси тирик.

Ҳайратга тушмасман бу ҳолдан сира,
Дунё бу — қувфинди охудай елар.
Дунё бу — энг оддий хукмига кўра
Кимдир туғилади ва кимдир ўлар.

Лекин қалбни босди ногоҳ бир сукут,
Ногоҳ бир ҳаяжон эзди дилимни.
Умрим йўлларини босмаганми ўт?
Хазон кўммаганми ҳаёт йўлимни?

Қўксидан номимни бешафқат, баттар,
Ўчиргани каби оқбадан терак,—
Бағрига исмимни ёзган бўлса гар,
Ўчирмадимикан бирорта юрак?

Ёшлигим бехуда ўтмадимикин?
Гўзал туйғуларим бормикин тирик?
Ногаҳон бузилиб кетмадимикин
Бирорта юракка мен солган кўприк?

Йиллар умримизга қиласми шафқат?
Бирор иш бормикан айлагали ёд?
Қайта тиклаш мумкин барчасин, фақат
Қайта тикланмагай ўчса хотирот!..

ОНА САЙЁРА

Қаршимда ер шарин сурати турар,
Салмоғи Қуванинг анорича бор.
Тим қора осмонда порлаб кўринар,
Шу жажжи сайёра кўркам, улуғвор.
Унга боқаману ушлайман ёқа,
Наҳот шу кўрганим рост бўлса, наҳот?
Наҳотки еримиз шу кичик соққа?
Наҳотки биз шунга жо бўлсак, ҳайҳот!..
Уммонлар кўринар қатра ёш мисол,
Чигит увоғича келмас тоғлар ҳам.
Қитъалар, денгизлар афтода бир ҳол,
Бари бир нуқтага бўлиб олмиш жам.
Набилар, расуллар, доҳийлар унда,
Қабрлар, қасрлар тургандир қатор,
Балки хув кўринган мовий тўлқинда
Сув ичган гўдакнинг нафаси ҳам бор.
Кулоққа чалинар отлар дупури,
Сор бургут ўзини ўлжага ураг.
Шарқда чўпон ёқсан гулханнинг нури
Шимол сайёҳига кўриниб турар.
Ана, Ҳимолойнинг бағрида бир қиз,
Елкада кўзаси — борар булоққа.
Соҳилда учрашди икки қалб ёлғиз,
Шивир-шивирлари келар қулоққа.
О, она сайёра, курраи кутлуг,
Самодан сувратинг илк бора кўрдим,
Ҳавои бир хаёл сеҳри эмас, йўқ,
Фарзанд меҳри билан мен боқиб турдим.
Кун кеча эмасми, хислатинг санаб,
Шеър ёзиб юардим сенга парвона.
Бу кун сувратингга сўзсиз босдим лаб,
Шу сенми, ёлғизим, шу сенми, она...
Фалақда бир ўзинг турибсан ҳайрон,
Наҳот сен бўлмасанг бунчалар танҳо,
Сийнангта ёпишган фарзандинг — инсон
Бева бағридаги етимдай гўё...
Қайга кетмоқдасан бунчалар шошиб?
Ором истайсанми кўқда овора?
Балки фарзандингни кўксингта босиб
Йиғлаб кетмоқдасан, она сайёра...

Фарзандларинг бордир сонсиз-саноқсиз.
Во ажаб, қадрингни гоҳида билмас.
Улар-ку қошингда чангдай салмоқсиз,
Лекин бағрингга ҳам сиққиси келмас.
Осмон торлиқ қилган гала чумчуқдек
Макон талашади гоҳо бетартиб.
Сен-чи, меҳварингда айланасан тек,
Яхшию ёмонни елкангда ортиб.
Сенинг юрагингда лахта-лахта қон,
Сийнанг нималардан бўлмаган пора.
Қайгу-ҳасратларинг барчаси аён,
О, бунча дардкашсан, она сайёра.
Сен ҳозир суратсан кўзим ўнгида,
Эшита билмассан сўзимни балким.
Бир зумлик безовта ўйлар сўнгида
Яна руҳсорингта тикиламан жим.
Бир ёнда ложувард Баҳри Мұҳит бор,
Бир ёнда заъфарон Саҳрои Кабир.
Бир ёнда оқ сочли тоғлар пурвиқор
Сенинг толеингта ўқийди такбир.
Эллар тўзғиб ётар гул япроғидек,
Бир ён шоҳу гадо, бир ён дўст, ғаним.
Бир ёнда хаёлий Эрам боғидек
Буюк ва бетимсол менинг Ватаним.
У менинг кўзимга ҳилоддай маҳваш,
Офтоб келар фақат унинг қошига.
О, она сайёра, бағрингни поклаш
Менинг ватанимнинг тушган бошига.
Унинг кучоғида ғамдан йўқ нишон,
У ерда тентимас иблис хаёли.
У ерда дўстликни улуғлаб инсон,
Такаллум қиласи кумри мисоли.
Йиллар ўтар, балки ўтар кўп замон,
Ер юзи чулғанар бахтга, чаманга.
Агар дардларингта бўлолса дармон,
Руҳим фидо бўлсин шундай ватанга.
Мен ҳам бир ўғлингман, она сайёра,
Бағринг мен учун ҳам хоки пок бўлсин.
Толеинг тоабад бўлмасин қора,
Манглайнинг оқ бўлсин, ярқироқ бўлсин.

1969

* * *

Бу жойларга нега келдим мен,
Қизиқмасам унут чиройга.
Нечун келиб бошим эгдим мен
Ҳасратларим қўмилган жойга.

Ахтараман титраб дамо-дам
У аламли кунимдан нишон.
Наҳот ортда қолган ғамин ҳам
Унугтиси келмайди инсон.

1969

* * *

Оташга сифинди бир замон халқим,
Арзини йўллади ўтли самога.
Шоирлар тарихни этдилар талқин
Бош эгиб ўтпарамаст ўша даҳога.
Халқим бидъатлардан бугун кўп йироқ,
Мен ҳам шоирликдан йироқман балким,
Лекин меҳнатингни куйлайман бу чоқ,
Сени улуғлайман, пахтакор халқим!

1969

ҚАНОТ

Инсонда қанот йўқ,
Ачинманг бунга,
Зотан унга юрак — сабот берилган.
Күшда-чи, сабот йўқ, шунинг-чун унга
Қочиб қолмоқ учун қанот берилган.

1969

* * *

Ёндиму ва лекин ҳижрон тунида
Сенга ахволимни этмадим баён.
Сокин кечалари кўзим ўнгида
Мунис қарашларинг бўлди намоён.

На сен назар қилдинг ҳолимга бир бор,
На мен айта билдим сенга бирор сўз.
Шундай ўтиб борар умримиз бекор...
Орамизда сарсон бир жуфт қора кўз.

1969

ИЛК СЕВГИ

Оддий машинани кўрса болалар
Ҳайратга тушишни канда қилмайди.
Олис-олисларда улкан кемалар
Учид юрганини улар билмайди.

Биз-чи, дунё ишин биламиз андак,
Оила қурамиз, бола кўрамиз.
Лекин машинага боққандай гўдак,
Ҳамон илк севгини эслаб юрамиз.

1969

* * *

Оҳ, ўтган у кунлар қайтмагай зинҳор,
Ўчган муҳаббатнинг ёнмоғи душвор.
Нигоҳинг қадама қарофимга сен,
Унда тўкилмаган кўз ёшларим бор.

1969

БИЗНИКИЛАР

Чапай аскарлари келдилар босиб,
Босиб келди оқлар устига.
Томошибин йигит юраги тошиб,
— Бизниkilар, — деди дўстига.

Раҳимов фашистларнинг кўзича
“Миссершмит”ларнинг кўзини ўйди.
Кимдир мамнуният билан ўзича,
— Бизниkilар, — деб қўйди.

Йироқ ўлкаларда кезарди сайёҳ,
Кезарди юртига кўзини тикиб.
Юртимиз номини эшитиб ногоҳ,
— Бизниkilар, — деди энтикиб.

Ҳеч ким мангу эмас ушбу оламда,
Агар бир кун таним кўмсалар,
Кошкийди кимлардир туриб тепамда,
— У бизники эди, десалар...

1969

РУҲИМ

Вужуд деганлари асли нимадир?
Дайр денгизида юрган кемадир.

Бир кун бир қояга урилгай кема,
Руҳим, сен вужуднинг фамини ема.

Юксак фазоларда айлагил парвоз,
Сенда на оҳанг бор ва на бор овоз.

Сенга на бўронлар кор қила олур,
Сени на йўқотиб, бор қила олур.

Сен мисли камалак — юксак ва сўлмас,
Камалакни эса парчалаб бўлмас.

1969

ЧЕКСИЗЛИК

Дейдилар, фазонинг чегараси йўқ,
Миллиард юлдузларнинг сўнги ҳам фазо.
У шу қадар чексиз, шу қадар буюк,
Хаёлга сифдириб бўлмайди ҳатто.

Баъзан фазоларга боқаман узок,
Руҳимга шу туйфу сифмас гупириб.
Чексизлик юракни қисганда, шу чоқ,
Торгина уйимга кетаман кириб.

1969

ЎЗБЕКИСТОН

Юртим, сенга шеър битдим бу кун,
Қиёсингни топмадим асло.
Шоирлар бор, ўз юртин бутун —
Оlam аро атаган танҳо.
Улар шеъри учди кўп йироқ,
Қанотида кумуш диёри,
Бир ўлка бор дунёда, бироқ
Битилмаган достондир бори:
Фақат ожиз қаламим маним,
Ўзбекистон, Ватаним маним.

Юрмасман ҳеч беҳиштни излаб,
Тополмасам чекмасман алам.
Ўтирмасман эртаклар сўзлаб,
Мусалло деб йўнмасман қалам.
Кўкламингдан олиб сурурни,
Довруғ солди устоз Олимжон,
Faфур Фулом туйган фурурни
Қилмоқ мумкин дунёга достон.
Олис тарих қадамим маним,
Ўзбекистон, Ватаним маним.

Кечмишинг бор чиндан ҳам узоқ,
Илғай олмас барчасин кўзим.
Мақтамасман мозийни бироқ,
Ўтмишингни ўйлайман бир зум.
Забтга олиб кенг Осиёни,
Бир зот чиқди мағрур, давонгир,
Икки аср ярим дунёни
Зир қақшатди Буюк жаҳонгир.
Айтгум, бу кун, у маним, маним.
Ўзбекистон, Ватаним маним.

Боболардан сўз кетса зинҳор,
Бир қалом бор гап аввалида.

Осмон илми туғилған илк бор
Кўрагоний жадвалларида.
Қотил кўли қилич солди маст,
Қуёш бўлиб учди тилла бош.
Дўстлар, кўқда юлдузлар эмас,
У, Улугбек кўзидағи ёш.
Ерда қолган, о, таним маним,
Ўзбекистон, Ватаним маним.

Кўз олдимдан кечар асрлар,
Кўз-кўз этиб нуқсу чиройин.
Сарсон ўтган неча насллар,
Тополмасдан туғилған жойин.
Америка — сеҳрли диёр,
Ухлар эди Колумб ҳам ҳали,
Денгиз ортин ёритди илк бор,
Берунийнинг ақл машъали.
Колумбда бор аламим маним,
Ўзбекистон, Ватаним маним.

Кўп жаҳонгири кўрган бу дунё,
Ҳаммасига гувоҳ — ер ости.
Лекин, дўстлар, шеър аҳли аро
Жаҳонгири кам бўлар, рости.
Беш асрким, назмий саройни
Титратади занжирбанд бир шеър.
Темур тифи етмаган жойни
Қалам билан олди Алишер.
Дунё бўлди чаманим маним,
Ўзбекистон, Ватаним маним.

Боболардан сўзладим, аммо
Бир зот борким, баридан суюк:
Буюкларга бахш этган даҳо,
Она халқим, ўзингсан буюк.
Сен ўзингсан, энг сўнгги нонин
Ўзи емай ўелига тутган.
Сен ўзингсан, фарзандлар шонин
Асрлардан опичлаб ўтган.
Она халқим, жон-таним маним,
Ўзбекистон, Ватаним маним.

Бош устингдан ўтди кўп замон,
Ўтди Будда, ўтди Зардушти.

Ҳар учраган нокасу нодон,
Она халқим, ёқангдан тутди.
Сени Чингиз ғазабга тўлиб
Йўқотмоқчи бўлди дунёдан.
Жалолиддин самани бўлиб
Сақраб ўтдинг Амударёдан.
Сенсан ўшал қаманим маним,
Ўзбекистон, Ватаним маним.

Толеингда бор экан яшаш,
Гоҳ қон ичдинг, гоҳида шароб.
Этмоқ бўлиб юртим хомталаш,
Бош устингта келди инқилоб.
Чора истаб жанг майдонидан
Самоларга учди унларинг,
Шаҳидларнинг қирмиз қонидан
Алвон бўлди қора тунларинг.
Конга тўлган кафаним маним,
Ўзбекистон, Ватаним маним.

Лекин офтоб поймол ўлмас,
Кавакларда қолмас ой нури,
Одил ҳакам — Ҳақ бор, бегараз,
Мазлумларнинг буюк фамхўри.
Килич серпаб толе тонгида
Ўзлигингни таниб қолдинг сен.
Ўғлонларнинг қатра қонида
Ўзбекистон номин олдинг сен.
Номи кутлуг гулшаним маним,
Ўзбекистон, Ватаним маним.

Тинч турарми бу кўҳна олам,
Тинч турарми доғули замон.
Оромингни бузди сенинг ҳам
Фашист деган ваҳший оломон.
Қоним оқди Данцигда маним,
Собир Раҳим йиқилган чоғда.
Лекин, юртим, кезолмас ғаним.
Ўзбекистон аталган боғда.
Сенсан номус ва шаъним маним,
Ўзбекистон, Ватаним маним.

Кеч куз эди, мен сени кўрдим,
Деразамдан боқарди бирор.

У сен эдинг, о, дәжқон юртим,
Туар эдинг ялангтүш, яёв.
— Ташқарида изиллар ёмғир,
Кир, бобожон, яйрагил бир оз.
Дединг: — Пахтам, қолди-ку ахир,
Йифишириай келмасдан аёз.
Кетдинг, умри маҳзаним маним,
Ўзбекистон, Ватаним маним.

Сен кетарсан балки йироққа,
Фарғонада балки, балқарсан.
Балки чиқиб оқарган тоққа,
Чўпон бўлиб гулхан ёқарсан.
Балки устоз Ойбекдек тўлиб
Ёзажаксан янги бир достон.
Балки Ҳабиб Абдулла бўлиб,
Саҳроларда очажаксон кон.
Тупроғи зар, маъданим маним,
Ўзбекистон, Ватаним маним.

Майли, юртим, кезсанг ҳам дунё,
Фазоларга қўйсанг ҳам қадам,
Ўзлигингни унутма асло,
Унутма ҳеч, онажон ўлкам.
Бир ўғлингдек мен ҳам бу замон
Кечмишингни қўлдим томоша.
Иқболингни кўролдим аён
Истиқдолнинг уфқлари оша.
Иқболи ҳур, шўх-шаним маним.
Ўзбекистон, Ватаним маним.

Завол кўрма ҳеч қачон, ўлкам,
Завол билмас шу ёшиңг билан.
Музaffer бўл, голиб бўл, ўқтам,
Дўсту ёринг, қардошинг билан.
Асрларнинг силсиласида
Боқий тургай кошонанг сенинг.
Улуғ башар оиласида
Мангу ёруғ пешонанг сенинг.
Мангу ёруғ масканим маним,
Ўзбекистон, Ватаним маним.

1964—70

ҚАРШИ ҚЎШИФИ

(*Отамга бағишлайман*)

Мен бу чўллар қўйнида туғилиб топдим камол,
Кўхна сардобаларда кўмилиб қолди дардим.
Лекин нар асрлондан сут талаб қилган мисол,
Олис шаҳар, тоғлардан илҳомимни ахтардим.

Гоҳо топдим мен уни, гоҳида қолдим noctor,
Оғир ўйлар ҳам сурдим Сирдарё бўйларида.
Шеърлар битдим гоҳида ўжар ва мажнуншиор,
Саргашта булбулларнинг беусул куйларида.

Дўстлар орттиридим бунда турфа хил, турфа одат,
Гоҳо бирисин топсан, бирисини йўқотдим.
Меҳмон бўлди бу ерда қалбимга илк муҳаббат,
Олис кечалар унинг фуссасини ҳам тортдим.

Мана бу кун, эй юртим, гоз турибман қаршингда,
От айланиб жойини топар, деганлар доим.
Сен ҳақингда шеър битиш шарафи бор бошимда,
Эй сен, саҳрои халқим, эй сен, туғилган жойим.

Ким айтади қўйнингда илҳом бор деб доимо,
Хусусан саратоннинг ёниб турган палласи?
Бир нафас тақлифингга ташриф этса мабодо,
Ҳар қандай шоирнинг ҳам пир бўлар ҳафсаласи.

Бу ерларнинг бори шу: қип-қизил саҳро бари,
Фақат сароб жимирилаб чорлар сирли базмга.
Унча ҳам сулув эмас саҳронинг жонзодлари,
Насрга ярашмаса, ярашмайди назмга.

Лекин унинг баҳори, о, сен, чўллар баҳори,
Софинтирган онамнинг дийдори сендей, ширин.
Эрта кун қовжирашдан бўлса ҳам дилда зори,
Лола лаби хандону тубда доғи яширин.

Оёқланган қўзидай довдирап елда майса,
Кўм-кўк мовий осмонда кезиб юрар оқ булат.
Тўрт тараф қисиб келиб, ногаҳон жала қўйса,
Оlamга анқиб кетар минг хил кўкат, минг хил ўт.

Лекин офтоб забтидан қочиб боради баҳор,
Ношуд сайёд дастидан қалби қон оху каби.
Хайр энди, баҳорим, кўришгунча то дийдор,
Маҳшар келмай юмилди баҳорнинг қақроқ лаби.

Шундайин шитоб билан ўтди-ю кетди кўклам,
Заъфарон адирларда тентирар энди қуюн.
Бамисоли шаддод қиз бир бора айлаб карам,
Сўнгра лабин чўччайтиб қилгани каби ўйин.

Қайноқ бир тўзон ичра гуркирар энди осмон,
Бош устингда ўт пуркар самонинг аждаҳоси.
Аста-секин кун қайтар, босилар қайноқ тўзон,
Елар оқшом нафаси — салқин тун ибтидоси.

Ҳар недан гўзалроқдир балки чўл кечалари,
Уфқлар кафтдек равон, кўк сочган бор бисотин.
Термулсанг кўрингайдир жаннатнинг гўшалари,
Юлдузлар чуғурлашиб сўйлашар тафсилотин.

Сизни жондан севаман, о, юлдузли кечалар,
Кўйнингизда ниҳондир сирли ва дилбар хаёл.
Сизни суронли кунлар кўмсаганман нечалар,
Сиз билан танҳоликда сўзлашсам, деб бемалол.

Лекин шаддод ҳаётнинг юлдузда борми иши,
Инсонлар бор — юлдуздан юлдузлар қадар йироқ.
Инсонлар бор — ўзидан бўлак йўқдир ташвиши,
“Савдойи” — деб атайди шоирни улар кўпроқ.

Гина қилиш энди бас, гапни ҳар ёқقا бурсанг,
Хилма-хил қудуратлар чиқа берар қатма-қат.
Хуллас, гул ва юлдузни бир четта қўйиб турсанг,
Бу ерларнинг бори шу — қип-қизил саҳро фақат.

Йўл юрсанг ҳар жойларда работлар вайронаси,
Искандар, Кутайбадан қолган сонсиз даҳмалар.

Бу ерларда илк бора янграган Темур саси,
Чингизийлар бошига солиб қўрқув, ваҳмалар.

О, улардан не қолди? Турфа ривоят фақат...
Бирори қурганини бошқаси қилди вайрон.
Вақтинг бемалол бўлиб, сўйлай берсанг ҳикоят,
Ҳаттоқи Фирдавсий ҳам боқарди сенга ҳайрон.

Ва лекин шу фурсатда қалбимда ҳасрат билан,
Ўзбегим диёрининг кечмишини ўйлайман.
Мен бу кун дўстларимга афсус-надомат билан,
Ерга чўп қадамаган амирлардан сўйлайман.

Менинг қадим элимдан уйқучи Сайд Олим
Чўл ошиб Ҳисор томон чиққани маҳал йўлга,
Жіловдори бўлмаса юган тортмаган золим,
Қайси ҳафсала билан сув чиқарсин бу чўлга?

Шу боисдан сахронинг қалбида бир гўр ётар,
У менинг бобом қабри, қизимнинг бобожони.
Ҳар ўтганда руҳимга туганмас қайғу ботар,
Култум сув ҳасратида узилган йигит жони.

У бир замон қудуқнинг тубида қолган экан,
Сув кўзин очай деса — босиб қолибди тупроқ.
Шум ажал бояқишининг пайидан чалтан экан,
Тўғрироғи, муҳтоҷлик дастини қирққан кўпроқ.

Мен бу кун саҳар чоғи, заррин қүёшга боқиб,
Шу шўрлик аждодимнинг номини шеърга солдим.
Масканин ёритмоққа қалбимда шуъла ёқиб,
Лавҳи ёдин битмоққа тунлардан сиёҳ олдим.

Мен унинг набираси, қўлимда қалам билан,
Қалбимда алам билан пойига қўйдим қадам.
Унинг-ку иши йўқдир бу тирик олам билан,
Лекин орзузи бор-ку, ният топмас-ку барҳам.

Ҳа, қудуқлар тубида кўмилиб кетмас армон,
Ҳар қандай заволнинг ҳам бордир сўнги, худуди.
Қабрлар тепасида ёнган ўт ҳам бегумон
Бирорта ўксик қалбнинг чақнаётган умиди.

Бу жойлар обод бўлар албатта эрта-индин,
Гўристон гулистондир, Муқимий айтган мисол.
Лекин ўтган боболар бу ишни билармикин,
Билармикин, теграсин қуршаб турганин иқбол?

Биз ҳам бир кун ўтармиз бу дунёи қадимдан,
Бизнинг ҳам қалбимизда кетгуси балки армон.
Балки кимдир бизни ҳам хотирлаб қўйса зимдан,
Парчалаб қабр тошин келурмиз ўша замон.

Мана бу кун боболар арвоҳи чаппор урар,
Менинг азамат юртим — ўзбекнинг сахросида.
Ҳазрати Хизр эмас, Жайхуннинг саси юрар,
Саксовул босиб ётган чўлларнинг маъвосида.

Мен-ку шеър ёзмасам ҳам саҳроларга сув чиқиб,
Шу буюк мамлакатим обод бўлиши тайин.
Лекин она ҳалқимнинг ўтмишига кўз тикиб
Келажаги ҳақида ўй сургум келар майин.

Иложин топса агар, кетмоннинг дастасин ҳам
Ерга қадаб термулиб, кўкартиргувчи бу ҳалқ.
Жазм этса кўкка бўяр жаҳон харитасин ҳам,
Бугун чўлга чиқибди, нияти топсин барҳақ.

Бугун у Жайхун сувин келмоқчи чўлга бошлиб,
Жайхун бу — ўз ҳалқимнинг ўз армони, дунёси.
Ярашмас бу дарёга ўтиранг қармоқ ташлаб,
Жайхун бу — кучга тўлган Ватанимнинг дарёси.

Мен унинг бўйларида ўйларга толдим узоқ,
Қирғовул хониш қилган тўқайларга бурдим юз.
Бир томон Туркман эли, бир томон Қорақалпоқ,
Ё насиб, деб Жайхунга чўкка тушиб тиккан кўз.

Дарё-чи, шамшир каби ялтираб ётар дарё,
Тушовидан бўшалган от каби чопар сарсон.
О, сен дарбадар дарё, о, сен серхатар дарё,
Бунчалар вазминсану бунчалар қув, ўжарсан!

Сен қайга ҳовлиқасан эрта-кеч билмай тиним,
Сен қайга ҳовлиқасан, беканору кўр, басир?

Азизим, бу дунёда йўл юрсанг йўқдир қўним,
Азизим, ўжарликни ёқтиришасиз бизнинг аср.

Мен сенинг висолингни кўргали келдим атай,
Мавжларингга қўшилиб жўша билмадим бироқ.
Сен билан суҳбат қуриш қўлимдан келмас, нетай,
Сен буюк бир наҳрсан, мен бўлсам оддий ирмоқ.

Ҳа, дайр денгизида якка инсон — зарра қум,
Замонлар соатидан ўтар у қатор-қатор,
Лекин сен борсан, Аму, денгиздай теран руҳим,
Лекин сен борсан, халқим, кўкрагим Помирча бор.

Помирдай юксакликдан теграмга боқсам агар, —
Кўзимга кўрингайдир Ватаним, она халқим.
Унинг-ку қучоғида чўллардан қолмас асар,
Абадий музликлар ҳам гул очиб кетар балким.

Чунки шукуҳин берди халқимга буюк шуур,
Буюклиқдан буюклиқ туғилиб келган доим.
Сен ҳам шу буюк элда яшнай бер доим мағрур,
Эй, сен, азамат халқим, эй, сен, туғилган жойим!

1970



КЕНГЛИК НУҚТАСИ

Ҳисор тоғларининг нақ этагида
Макон бор хушҳаво, сарбаланд, юксак.
Ажиб бир осмон бу, осмон тагида.
Юлдузлар қўл чўзсанг шундоқ етгудек.
Она табиатнинг хуш санъати бу,
Инсон ва юлдузлар салтанати бу.

Бу ердан ўтибди ернинг белбоғи,
Беқасам тўн демак бу рангин диёр.
Фалакда юлдузлар чақнаган чоғи
Нишондор ўзбекнинг сурати тайёр.
Улуғбек номида зўр кошона бу,
Дунёда бешдан бир расадхона бу.

Бу ерга термулиб паришон дунё
Тўғрилаб олади қўлда соатин.
Не ажаб, пайт келиб айтолсак ҳатто
Жумлаи жаҳоннинг хуш саодатин.
Шундоқ қутлуғ жой бу, қутлуғ макон бу,
Не қутлуғ, жонажон Ўзбекистон бу.

Атрофда водийлар товланар ҳал-ҳал,
Минг йиллик чинорлар кўкка боққан тек.
Бу ерда, во ажаб, юз йиллар аввал
Дунёга келибди султон Улуғбек.
Ажиб тасодиф ё шаҳри Ҳумой бу,
Ҳойнаҳой, даҳоси тутанмас жой бу.

Оқшом тушмасидан бунда бесабр,
Ўнлаб кўз термулар осмон-фалакка.
Бу Зуҳал, мана бу Дубби Акбардир,
Зухраой пиқирлар бир четда якка.
Юлдузлар васли бу, васли жаҳон бу,
Ошиқ мунахжимга айши нишон бу.

Тонг отиб чиқар-ку ишбоши офтоб,
Қошида бош эгиб қолма тағин жим.
Замон шиддатини қилолмай ҳисоб
Ер чизиб турибди ёш бу мунажжим.
Азизим, фам чекма, ваҳму гумон бу,
Охир тизгинингга келгай замон бу.

Ҳар зумда дунёning бурчакларига
Хабарлар жўнайди қатор ва қатор.
Хоҳласанг, учавер Марсдан нарига,
Хоҳласанг, фалакнинг у бурчига бор.
Қўлингда тап-тайёр ҳадди ҳисоб бу,
Ҳадди ҳисоб берган шахри Китоб бу.

Қутлуғ жой кўп эрур ушбу дунёда,
Юлдузни кўзлаган лочин ҳам талай.
Ҳар нечук, шу соат, шу сонияда,
Она юрт, мен сени созимга солай.
На мақтов, на олқиши, на пуч занаш бу,
Она юрт қалбимга солган фараҳ бу.

Кездим бу ерларда танҳо шодумон,
Юлдузларга яқин, кўзлардан йирок.
Қалқиб турган билан теппамда осмон
Англаб етармидим маъносин бироқ.
Ҳар нечук, билганим, юлдузфишон бу,
Ўйғоқ Ватанимдан битта нишон бу.

Бор бўл, тафаккурга ёр бўлган диёр,
Бор бўл, юлдузли тун, оқшомлар майин.
Битта мунажжиминг мисоли бедор,
Она юрт, мен сенга мафтун ўтайнин.
Балки шоирлик ҳам яхши отдир бу,
Улугбек ютидан хотиротдир бу.

1970



* * *

Дўрмон боғларига тинч оқшом чўкди,
Чинор баргларига инди куйларим.
Шаҳарда зерикиб, боф томон чиқди
Эски танишларим — ошно ўйларим.

Бу жойлар баҳаво, гўзал ва лобар,
Офтоб ҳам кўз узмас ёна ва ёна.
Юксак аргувонлар, оғочлар сербар,
Бу шеър кошонаси, бу ижодхона...

1970

ИЛТИЖО

Юзларингни майлига яшир,
Керак эмас, нозлар, имолар.
Гўзалликнинг қошида ахир
Чўкка тушган ҳатто худолар.

Кимга фойда беҳуда жунун
Ва дунёга favfo солишдан.
Айрилиқдан қўрқмасман бу кун,
Мен қўрқаман севиб қолишдан.

1970

ҲАМИД ОЛИМЖОН ХОТИРАСИГА

Үрик гуллаганмиш кечаги тунда,
Баҳор муждаси бу, яйрагин, эй жон.
Йиллар ўтар экан, бугунги кунда
Олтмишга кирибсиз, устоз Олимжон.

Бир ёнда Ҳулкар бу, бир ён Омон бу,
Бир ён шоирамиз — машҳури олам.
Сизнинг тегрангизда аҳли замон бу,
Сизнинг тегрангизда дўстлар бўлмиш жам.

Барҳаёт Ойбек бу — қутлайди мамнун,
Қутлар Faфур Fулом — донгдор замондош.
Сизни қутлаётгир дўст-ёрлар букун,
Қутлар Ўзбекистон — мағрур эгиб бош.

Етимтов бағридан чиққан навқирон,
Сиз бу — шеъримизнинг энг жаранг саси.
Сизнинг сатрингизда қурмиш ошён
Учирма қуш каби шеър илоҳаси.

Олтмишга кирибсиз, ёдингиз аммо
Шабнамдай маъсуму кўклам каби ёш.
Ахир қанча қадим бўлмасин дунё
Бағрида нур борки, қаримас қуёш.

Ҳаёт бўлсайдингиз турардингиз шод
Улкан шу давранинг энг ўртасида.
Тириклик шаънини улуғлаб кушод
Достон иншо этиб, битиб қасида.

Ҳаёт бўлсайдингиз, ҳар салқин саҳар
Ошно булоқиарга қўярдингиз лаб.
Юрадингиз элда азиз, мўътабар,
Сонсиз шогирдларнинг манглайн силаб.

Яхшиям боқийдир дилбар шеърият,
Самандар мисоли ўлим билмас жон.
Миннатдор юрт сизни қутлайди фақат,
Қутлуг бу айёмда, устоз Олимжон.

Юрт бу кун карвонлар бошида нордир,
Юрт бу кун Шарқ ичра тенгсиз бир диёр.
Юрт бу кун оҳудай хўп ишвакордир,
Сир каби сермавждир, Помирдай пойдор.

Толе юлдузининг қутлуг зиёси
Саодат буржида балқай, замон бу.
Қадим бир диёр бу — йўқдир қиёси,
Ажиб бир бўстон бу — Ўзбекистон бу.

Устоз, созга солай боқий ҳаётни,
Боқий шеър қошида бош эгай бир он.
Шодлик ва баҳтини куйлаган зотни
Шодлик билан эслар одатда замон.

1970



ҚИРГИЗ ДИЁРИ

Чингиз Айтматовга

Азамат Манас юрти, Тўқтағулнинг ватани,
Алпомиш ва Навоий юртидан сенга салом.
Юксак тоғлар ўлкаси, мовий кўллар маскани –
Қирғизлар диёрига ўзбеклардан эҳтиром.
Мангу оппоқ қор билан ялтирайди Олатов,
Бамисоли қирғизнинг бошидаги оқ қалпоқ.
Ям-яшил яйловларда сон-саноқсиз оқ ўтов
Қирғиз халқин қалбидай беғубору тоза, пок.
Эй, қадим Осиёнинг абадий ёш ўлкаси,
Ялангтўш ва меҳнаткаш ўзбек билан инисан.
Қирғизларда женгайдир ўзбекларнинг бекаси,
Шону шараф осмонин чақнаган чақинисан.
Бутун дунё билади ижодкор Чингиз номин,
Азамат халқ, шуҳратинг бундан ҳам бўлсин зиёд.
Не ажабки, барҳаёт Faфур Fулом қаломин
Қирғизлар ҳам унутмай, айлаб турган бўлса ёд.
Чорвадорсан, ботирсан – кўлда қўбизинг билан,
Пахтакорсан, ишчисан, дарёни бурувчисан.
Роса термилиб боқсанг шу қийиқ кўзинг билан
Куппа-кундуз кунда ҳам юлдузни кўргувчисан.
Шу бепоён дунёнинг бағрида тенг фарзандмиз,
Завқ олурмиз баробар ўлану куйларидан.
Азал-абад ҳамдаммиз, азал-абад дилбандмиз,
Салом келтирдик сенга Сирдарё бўйларидан.
Кетмасин бошимиздан асло баҳт беланчаги,
Янграсин дўстлик куйи, янграсин шеър, тарона.
Бор бўл, эй Қирғизистон – қўёшнинг келинчаги,
Дўстини топган инсон дўстни десин ягона.

1970

* * *

Кузак шамоллари эсдилар яна,
Сокин юрагимда туйфулар қўзғаб.
Келгил, паривашим, келгил жимгана,
Келгил самолардан мезонга ўхшаб.
Оқшом туманида кезайлик хушҳол,
Тўнган юлдузларга боқайлик тўйиб,
Шивалаган ёмғир, дайдиган шамол,
Майли, изимиизни кетсинлар ювиб.
Боғларда хазонлар шовиллар қуюқ,
Улар соялардир, жонгинам, фақат.
Нақадар буюқдир бизнинг муҳаббат.
Поёнсиз оламга боқайлик сўзсиз,
На ҳасрат, на сўзнинг бордир кераги.
Бизнинг теграмизда ёнаётган куз
Қайси бир ошиқнинг сўнган юраги...

1970

ҚУТЛОВ

Йиллар ўтаётир пояма-поя,
Йиллар — умидларга оташин чароғ.
Замон-ку фазода билмас ниҳоя,
Ўтган фурсатлар ҳам қайтмагай бироқ.

Умрдан йил ўтса, яширмоқ нечун,
Юрак симоб янглиғ титрагай ҳар гал.
Устоз лутф этгандай, ҳар фурсат учун
Кудратли қўл билан қўяйлик ҳайкал.

Кечган ҳар онингга назар солсанг гар,
Шоирнинг шоҳ сатри раводир балким,
Олтин уйди ахир фазолар қадар,
Менинг бобо юртим, азamat халқим.

Ҳали офтоб ишга шимармасдан енг,
Ҳали Зухро кўқдан боққанда яккаш,
Туманли далалар қўйнида кездинг,
Менинг сингилгинам, муnis, жафокаш.

Сенинг меҳнатингдан тупроқ очиб зар,
Ватаним беқиёс бўстон бўлғуси.
Сенинг шавкатингни ёзаверса гар,
“Шоҳнома” янглиғ бир достон бўлғуси.

Мадху санолардан хижолат каби,
Қизларнинг ёноғи ёнади гулгун.
Бу кўҳна оламнинг ҳар тўрт тарафи,
Не ажаб, қутласа сизларни бутун.

Бунчалик шон-шуҳрат учрамас тайин,
“Минг бир кеча”ларнинг афсонасида.
Юртим, сени яна қутлаб қўяйин,
Кутлуг Янги йилнинг остонасида.

Мангулик водийси узра билмай ҳад,
Йиллар-ку югурек ел каби ўтгай.
Халқим, юксалавер офтобдай баланд,
Қутлуг замон сенга елкасин тутгай.

Сенинг шавкатингни улуғлаб юрсин,
Буюк анжуманлар, олтин сатрлар.
Тегрангда лол қотиб, бош эгиб турсин,
Ўттан ва ўтажак йиллар, асрлар.

1970



ЎРМОН

Яланғоч, сарғайған, кимсасиз ўрмон,
Бошингда чарх урар кузги довуллар.
Сенинг япроқларинг эса беармон
Баҳор қўшиғини айтиб шовуллар.

Арчазор ортидан сайрап бўғиқ қуш,
Уфқлар сўнгида қора бир рёё.
Узоқ-узоқларда ғамгин ва бехуш
Чўзилиб ётибди улкан бир дарё.

Ўрмон қўйнидадир сеҳр ила жоду,
Бундадир хаёлнинг сокин онлари.
Нақадар сулувсан, нақадар инжу,
Эй, сен, шимол юртин чўнг ўрмонлари.

Сенинг қучогингда оқшомлар майин —
Туйдим туйфуларнинг соз нашъасини,
Заъфарон зулфингга тақиб кетайин
Олис чўлларимнинг бинафшасини.

1970

ДОРИЛФУНУНГА

Укам Дониёр Бегимқуловга

Неки қалбимизга чўф бўлиб тушган
Сенинг оташингда тобланган бари.
Фиштин биноларинг тафтида пишган
Муҳаббат аталмиш севги гавҳари.
Ўйлар сурар эдик тегрангда узоқ
Толиба Лайли-ю, талаба Мажнун.
Муҳаббат дарсидан бергансан сабоқ,
Вафо дарсхонаси, эй дорилфунун.
Сенинг қучоғингда топдик дўсту ёр,
Дўстлик нималигин англаб ололдик.
Ҳазил-мутойиба бўлса ҳам бисёр
Ва лекин дўстликка содиқ қололдик.
Бу кун ҳар қайларда юрсак ҳам йироқ
Дўстларни эслаймиз — дилда ҳаяжон.
Оташин дўстликдан бергансан сабоқ,
Эй, сен дорилфунун — муnis онажон.

1970

ШОИР

Демангиз, дунёning ташвиши қолиб,
Ўзини ҳар ёнга уради шоир.
Тоғдай оғир юкни кифтида олиб,
Күшдай енгил бўлиб юради шоир.

1970

СЕРГЕЙ ЕСЕНИНГА

Сен ажиб шоирсан, поксан, бокира,
Дилларга жо эрур ҳар бир деганинг.
Аммо менга ёқмас, ёқмайди сира
Сенинг итлар билан ошно эканинг.

Дўст ила душманнинг бормай фарқига
Оғиз солмоқ итга одатдир азал.
Сендеқ ажиб шоир, тушунмам, нега,
Итга бағишлабсан энг дилбар ғазал.

Тоқатим йўқ менинг кўпрак зотига,
Ҳануз хотирамда у солган яро.
Инсон оғу қўшгач гул ҳаётингта
Сен итлар қошига қочганмидинг ё?

Хойнаҳой гапим шу: Сен битган ашъор
Йиллардан барибир ошиб ўтарди,
Итларга меҳрингни этгунча изҳор,
Одамларни севсанг — шу ҳам етарди.

1970

МҮМИН МИРЗО

Ҳазрат Навоийнинг назари тушган,
Юрагида балки шеър қони жўшган,
Ғунчадек қалбида оҳи увишган
Мўмин Мирзо, укам, сени ўлдирдилар.

Кўлингга солмишлар тилладан занжир,
Шаҳзода йигитга ҳурмат бу, ахир!
Бу нечук қабоҳат, бу нечук таҳқир,
Мўмин Мирзо, укам, сени ўлдирдилар.

Гўрингда ўт ёнгур амирлар худбин,
Билганлар на номус, на виждон, на дин,
Майпаст бобонг ҳам букибди қаддин,
Мўмин Мирзо, укам, сени ўлдирдилар.

Сенга салтанатнинг қандай дахли бор,
Сен-ку маъсум гўдак, покиза дилдор,
Олим бўлармидинг, балки санъаткор,
Мўмин Мирзо, укам, сени ўлдирдилар.

Укам, ёвузларнинг топғанлари шу,
Ўз ўғлини ит бўлиб қопғанлари шу,
Ўз қалбин кағанлаб ёпғанлари шу,
Мўмин Мирзо, укам, сени ўлдирдилар.

Топғанлари заҳар, тўкканлари қон,
Қандай замон экан, дўстлар, у замон.
Болам деб, оҳ чекар Бадиуззамон,
Мўмин Мирзо, укам, сени ўлдирдилар.

Сен-ку йўқсан, аммо қотиллар яшар,
Ҳамон гўдакларга қилич қайрашар.
Қачон пок бўларкан булардан башар,
Мўмин Мирзо, укам, сени ўлдирдилар.

Беш юз йил беридаги эсладим бирпас,
Лекин бу беҳуда мотаминг эмас,
Қалбимни ўргада аллақандай сас...
Мўмин Мирзо, укам, сени ўлдирдилар.

1971

НОМАЛЬЛУМ ОДАМ

У на шоир эди ва на машхур зот,
Лекин дунё билан бир эди дарди.
У ҳам бошқалардай кечириб ҳаёт,
Шошиб ишга бориб секин қайтарди.
Англарди дунёни у ҳам хўп теран,
Маъюс боқар эди ботгувчи кунга.
Баъзида юраги ёнгани билан
Парво қилмас эди ҳеч қачон бунга.
У қабр устида сўзламади нутқ,
Табрик ҳам айтмади тўйларда хандон,
Ўлим бу — нишонга бориб теккан ўқ,
Туғилиш — шиддат-ла тортилган камон.
Шон-шуҳрат талашган турфа хил ғариб,
Шўрлик кимсаларга кулиб боқарди.
Юрмасди ҳар қайдга илинж ахтариб,
Қалбида бир дунё гувлаб оқарди.
Бировнинг у билан бўлмади иши,
У ҳам дуч келганга очмади юрак.
Насаб, икир-чикир, мол-мулк ташвиши
Уни этолмади зарра жонсарак.
Лоқайдни дўппосла, деса эҳтимол
Унга ёпишарди нокаснинг бари.
Унинг кўзларида ёнарди беҳол
Йироқ юлдузларнинг сирли нурлари.
Оламнинг бу майда ғалваси нечун?
Бари ўтадиган, бари нокерак.
Тариқдай заминнинг устида беун
Яшаб ўтди шундоқ буюк бир юрак.
Қайдан келганди у? Билмади кимса,
Қабрга ҳам жимжит кириб кетди у.
Менимча, дунёнинг устидан роса
Мириқиб қаҳқаҳа уриб кетди у.

1971

НЕКРАСОВ ҲАСРАТИ

(Шоирни ўқиб)

Пушкин шеъри ҳали янграрди мағур,
Лермонтов чарақлар назм осмонида.
Шоир бўлиш қийин,
Шоир бўлиш оғир
Шундай буюкларнинг Каҳкашонида.

Шоир хаёлларга берилади, бас,
Ерёмушка йиғлар саҳар чоғида.
Фақат шоир бўлиш...
Бу ҳали етмас —
То киshan бор экан юрт оёғида.

Нечун кулфатларга тўла бу ҳаёт,
Нечун мужик ҳолин бўлмайди куйлаб.
Сўнгсиз ҳасратларга кўмилган бу зот
Кезади кимсасиз Петербург бўйлаб.

Некрасов ҳасрати, о, рус ҳасрати,
Поёнинг бормикан, ҳаддинг бормикан?
Сенсан — бу аёвсиз Сибирь даҳшати
Ва мужик қалбига санчилган тикан.

Шоир қаламида ҳасратлар қат-қат,
Шоирни чулғайди ўйлар дафъатан.
Яшаб қолармикан шеърим оқибат?
Озод бўлармикан нотавон Ватан?

Пушкин шеъри ҳали янграрди мағур,
Лермонтов чарақлар назм осмонида.
Шоир бўлиш қийин,
Шоир бўлиш оғир
Бундай буюкларнинг Каҳкашонида.

1971

* * *

Келдим қошингизга чопиб, энтикиб,
Майсага бурканган тоғ этаклари.
Уч ой йўлингизда ётдим кўз тикиб,
Эй, баҳор бекаси — май чечаклари.
Гарчанд юрагимга гул рухсоридан
Хазон япроқлари энди яқинроқ.
Ҳар нечук қиши фаслини тунд дийдоридан
Жажжи капалакнинг васли ширинроқ.
Қалдироқ гумбурлар юксак тоғларда.
Чилтор қилларида тараалар ёмғир.
Шамол шовиллайди қадим боғларда,
Буюк кўхна дунё кўпчийди оғир.
Мен унинг кўйнида кездим сабодай,
Қорлардан лоларанг оловлар ёқдим.
Бир зум шаҳаншоҳлик теккан гадодай,
Умр ўтар, дедиму дунёга боқдим.
Кучоқ оч, дилбарим, шу гул наҳорга,
Туманли туйфулар босмасин оғир.
Илтифот қилмасак жажжи баҳорга,
Нуроний куз бизни сийламас, ахир.

1971

МАКТУБ

Фазаллар тўқирдим сенга бир замон,
Кўшиқлар айтардим тунлар бошингда.
На чора, ушбу кун ўзга бир инсон,
Ўзга бир муҳаббат турар қошингда.
Эшитдим, хазонли боғларда танҳо
Ўтказар эмишсан сокин пайтларни.
Сарғайган дафтаринг варақлаб гоҳо¹
Такрорлар эмишсан маҳзун байтларни.
Мен ҳам тонглар баъзан йўлга қарайман
Мунаввар қуёшта кўксимни очиб.
Сенинг хаёлингдан мадад сўрайман,
Сенинг хаёлингта бораман қочиб.
Лекин қутулмоқ йўқ ҳижрон дастидан,
Фақат қалбимизда бардош ва сабот.
Дунёда жамики ҳислар устидан
Қаҳқча уради қадим бу ҳаёт.
Надомат нимага ва афсус нечун?
Оlamда неки бор ўчар бешафқат.
Бизнинг вазифамиз кўникмоқ беун,
Бизнинг вазифамиз унутмоқ фақат.
Йиллар ўтиб кетар такрор ва такрор,
Ёшлик ҳам ўтади бенишон, бесас.
Лекин ўша чоқ ҳам хўрсиниб, бир бор
Севгандим, набирам, дея олсак бас...

1971

ЧОРЛАШ

Дўсти фарид, кел, қўлингни тут,
Юрагингда ёқай аланга.
Кел, бир зумга дунёни унут,
Кўтараийин сени баландга.
Пастда қолсин нобакор хилқат,
Пастда қолсин танбал булутлар.
Юрагингда чақнасин фақат
Ёруғ хаёл, самовий ўтлар.
Юксакларда чарх уриб айлан,
Руҳинг мангу турсин ёришиб,
Ўлганда ҳам вужудинг билан
Кетмагайсан ерга қоришиб.

1971

* * *

Булбул ўтай эрур зоғлар орасида,
Югурик сув ўтай тоғлар орасида.
Муҳаббат дардидан бемор қалблармиз,
Ўтай бўлсак не тонг, соғлар орасида.

1971

ЁЛФИЗЛИК

Кўкда ой кезади бесару сомон,
Йироқ замин узра ташлаб ҳорғин из.
Мана, ўтса ҳамки неча минг замон,
Кўкда ой танҳодир, кўкда ой ёлғиз.
Одамлар моҳтобга яйраб қарашар,
Ёлғизлик негадир ойта ярашар.

Кўкда қуёш кезар, у муниш она,
Миллиард юлдузларнинг шамси талъати.
Юлдузлар бўлса ҳам гарчи парвона,
Ёлғизлик бўлибди лекин қисмати.
Ҳар нечук офтобнинг йўриги бошқа,
Ёлғизлик ярашар она қуёшга.

Боболар гоҳида ўқинчда қолиб,
Шоҳларнинг номига нома битганлар.
Инсонлик шарафин хотирга олиб,
Тангрининг ёдини зикр этганлар.
Деганлар боқишиб сирли самога:
— Ёлғизлик ярашар фақат худога.

Мен на ой, на қуёш, на ер, на само,
Шуълага интизор гиёҳдай ўсдим.
Ёлғизлик ҳасратин тортмайлик асло,
Бор бўлсанг, ёдга ол мени ҳам, дўстим.
Ёлғизлик ҳасратин кўрсатма, тақдир,
Ёлғизлик инсонга ўлим-ку, ахир...

1971

СУВ

(Ҳазил)

Жуда ажайибдир инсон удуми,
У сувни жуда ҳам, жуда ҳам суяр.
Дейлик, бирор жойда ниҳол кўрдими,
Албатта, тагига сув қуяр.
Чанқаб келганда-ку, бирор ташна лаб
Албатта сув ичар, мириқар, тўяр.
Ортиб қолганин ҳам ҳатто авайлаб
Эгнидан ё бошидан қуяр.
Сув омборларин-ку, айтиб ўтиrmай,
Инсон бундай ишни жойига қўяр.
Ураган пучмоқни ковлаб эринмай,
Албатта, у ерга сув қуяр.
Хўш, ундан кейин-чи,
Хўш, ундан кейин,
Инсон сувдан яна қандай завқ туяр?
Бекор қолганида, баъзида секин
Бир-бирин тагига сув қуяр.

1971

* * *

Ногоҳ энтиқди-ю, эгилди камон,
Ўқ учди белгисиз ёқларга томон.
Кекса отасининг қаддин дол этиб,
Кетиб борар эди фарзанд шу замон.

1971

ҲАНГОМА

Қор ёғарди бўралаб,
Қолиши масди довулдан.
Тўйга айтиб кетиши
Шундок қўшни овулдан.

Йўлга чиқди йкки чол,
Тўйга бориш қарз бешак.
Бирори отга минди,
Бирори минди эшак.

Қор-чи, ҳамон ёғарди,
Ёғар эди гупиллаб.
Йўлни эшак бошлади,
От эргашди лўкиллаб.

Гапга тушди икки чол,
Суҳбат у ёқ-бу ёқдан.
Ўтган-кетган, баланд-паст,
Гоҳ калла, гоҳ туёқдан.

Суҳбат деган соз нарса,
Қолмасанг бас сургалиб.
Йўргалар эшак ҳамон,
От боради эргалиб.

Аста-секин кун қайтар,
Уфқаларда ўчган ранг.
Қор оралаб қайдадир
Бир юлдуз чақнар аранг.

Чоллар-чи, ҳамон йўлда,
Суҳбат ўша-ўшайди.
Бири деди: — Оқсоқол,
Кун ботганга ўхшайди.

Йўғ-э, уста, — дер бири, —
Кўздан қолибсиз буткул.
Тўрт чақирим овулга
Наҳот юрсак бир кун йўл.

Аммо бу гап рост эди,
Юлдузлар чақнар бот-бот,
Олдинда эшак борар,
Орқада лўкиллар от.

Овулдан-чи, дарак йўқ,
Оппоқ эди қир-қия,
“Адашиб кетдикмикан,
Куппа-кундуз куни-я?

Гап босдими ё ғафлат,
Тавба, бу қандоқ ўйин?”
Қор тинди-ю, чолларнинг
Ичига кирди қуюн.

— Қора қища тўй қилмай,
Баттар бўлгур нокас, гов.
Баччағарнинг аслида,
Феъли совуқ эди-ёв.

Қайдадир чўзиб-чўзиб
Увлаб қолди-ку қашқир,
Ким ҳам, айтинг, бундоқ чоқ
Ташвишга тушмас ахир?

Хусусан, кексайғанда
Хафа бўлиб кетасан.
Айтайлик, ўша қашқир
Ғажиб кетса нетасан?

Қора совуқ тиш қайраб
Қовурғани эзарди.
Кенг сайҳонда икки чол
Йўл ахтариб кезарди.

Йўл қаёқда, тўрт тараф
Қалин, оппоқ қор эди.

Энг баттари — совуқда
Жон сақлаш душвор эди.

Қайтай деса изига,
Белги ҳам йўқ, из ҳам йўқ.
Қалтирайди икки чол,
Таскин ҳам йўқ, сўз ҳам йўқ.

— Не бўлса ҳам топширдик
Яраттанинг ўзига!
Таваккал деб, от бошин
Қайирдилар изига.

Пешонада борини
Кўрар инсон деган зот.
Йўл солдилар қайгадир,
От бошин қўйиб озод.

— Бир кор-ҳол бўлмай энди,
Уйни топиб борсак бас, —
Сургалади от ҳоргин,
Орқада эшак бесас.

То тонгтacha икки чол
Юрди, турди, суринди.
Узокъларда бир маҳал
Кора нарса кўринди.

Бўғоти бор, ҳайтовур,
Ўхшаб турар қишлоққа.
“Худога минг шукр”, деб
Юрдилар ўша ёқقا.

Туман ичра дов-дарахт,
Турар эди ялтираб.
Тонгга яқин қишлоққа
Киришдилар қалтираб.

Тугаганди бардош ҳам,
Тугаганди бор сабот.
Етмай бир дарвозага
Тўхтаб қолди шўрлик от.

— Жой сўрайлик, нарёғи
Бир гап бўлар, оқсоқол.
Қамчин билан таҳа-туқ,
Дарвозани қоқди чол.

Изфирин-чи, изфирин,
Еру кўкда ҳорғин тус.
Бир кампир чиқди шу тоб,
Кўлида хира фонус.

Сўз бошлади чол титраб,
Ҳалқумига келиб жон:
— Бир кечага бизларга
Жой берсангиз, янгажон.

Қора қуюн чарх уриб
Кўз олдини тутарди.
Кампир келиб яқинроқ
Фонусини кўтарди.

— Ҳой, сенми бу, ер юткур,
Имонингдан кечдингми?
Алжайран ё тўйда
Ароқ-пароқ ичдингми?

Алқисса шу: от йўлни
Уй томон бурган экан.
Чол-чи, ўз кампиридан
Жой сўраб турган экан.

1971



МУАЛЛИМ

Муаллим ҳақида сўзим ушбудир:
Муаллим камолот ичра кўзгудир.
Ўқидим Геродот, тарихни кўп бор,
Форобий, Дантени такрор ва такрор.
Барини ўқидим, лол қолди ақлим,
Барига устозсан ўзинг, муаллим.
Алишер қалбига солган сеҳр-файз
Сенсан, эй муаллим, устоз Абул-Лайс.
Кутлуғ хонадонда қутлуғ қалом бу,
Ҳамид Олимжон бу,Faфур Фулом бу.
Буюк Темур сендан топгандир таълим,
Сен шундоқ, азиз зот, азиз муаллим.
Рост айтсам, ўзингсан энг аввал даҳо,
Сен ҳаёт ганжида дурри бебаҳо.
Улуғ айёмингда шеърий қалом бу,
Шогирдлар номидан қутлуғ салом бу.

1972

* * *

Болалик йиғларим эслайман оз-оз
Босиқ уйқу ичра ётганда олам.
Тонглар қулогимга келарди овоз:
“Faфлатда ётмагил, эркатой болам”.
У жажжи баҳорнинг шўх саси эди,
У мунис онамнинг нафаси эди.

Йиғлар ўтди, бир оз улғайдик, бу кун,
Ватан хизматига бир қадар дастёр.
Оlam ташвишидан юракда тўлқин,
Ватан кудратидан қалбда гурур бор.
Энди сен чорласанг, токи танда жон,
Лаббай деяжакман, Ватан, онажон.

1972

САОДАТ

Пахтакор қиз Саодатга

Токи ғолиб экан музaffer ўлка
Шаънингга шеър айтмоқ шоирга одат.
Бу гулшан водийда ўзингсан бека,
Эй, менинг пахтакор синглим Саодат.

Сирдарё бўйида мезон ялтираб,
Ажиб хаёл билан банд бўлмиш кўнгил.
Ва лекин бу сафар мен сенга қараб.
Йўндим қаламимни, меҳнаткаш сингил.

Ўзбекнинг минг йиллик одати эрур
Она деб, сингил деб чекмаклик малол.
Қалбимни не учун босмасин фурур,
Қаршимда сен турсанг етук, баркамол.

Шоён меҳнатингнинг нишонаси бу —
Қора қошлинигга қўнган чанг, фубор.
Сувори экансан — заҳматинг эзгу,
Замона Барчини — меҳнаткаш, дилдор.

Юрting ғолиб эса — толеинг балқсин,
Хигча қоматингда лоларанг тасма.
Айттил Муборакка — ошга ўт ёқсин,
Айттил Софияга, келтирсин ўсма.

Шаддод Асибаю дилдор Анзират,
Айттил, чилдирмасин айласин тайёр.
Юлдузлар базмида ой ҳам бир зийнат,
Даврада Фарҳодинг турсин баҳтиёр.

Зафар айёмида чеҳралар гулгун,
Тушсин даврангизга кўк юлдузлари.
Таҳсин, ташаккурим сизгадир бу кун,
Эй, она юртимнинг она қизлари.

1972

Қўшиқ

Қўшиқ учар эди кўкда беармон,
Учарди янгратиб осмон, уфқни.
Бадкирдор одамлар бир кун беомон
Ярадор қўлдилар қўшиқни.
Мажруҳ турна мисол қулаб тушди у,
Шодлик қулаб тушди арши аълодан.
Мана, минг ийларким қўшиқ серқайғу,
Ҳамон ҳасрат чекар ўша балодан.
Шикаста юрак бу чекмасин озор,
Жаҳон шоирлари тураг қошида.
Чоллар дуо қилса, оналар бедор
Алла айтиб чиқар унинг бошида.
Ҳамманинг армони — соғайсин қўшиқ,
Заррин қанотидан чеврилсин осмон.
Шодлик билан тўлсин тўрттала уфқ,
Кулги билан балқсин бу қадим жаҳон.
Бедор термуламан қўшиққа мен ҳам,
Майли, ҳасратида рангим сарғайсин.
Балки кўролмасмиз биз уни хуррам,
Болалар баҳтига қўшиқ соғайсин...

1972

ҚОЗОФИСТОН

Ўлжасга

Тиниқ чашмалар бор ҳаддан зиёда,
Мовийдир Балхашнинг суви ҳам бироқ,
Бироқ, қозоқ ҳалқин қалби дунёда
Барча чашмалардан кўра тиниқроқ.
Нур билан чулғониб ётибди шоён
Буюк Олатовнинг кўркам келбати.
Олатов кўркамдир, лекин бу замон
Ундан ҳам кўркамроқ қозоқ савлати.
Қозоқ сахроси — бу беадад сахро,
Хаёлдай бепоён, чексиз ва йироқ.
Чиндан ҳам буюқдир бу сахро, аммо
Қозоқ бағри эса ундан ҳам кенгроқ.
Шундоқ ажиб юртсан, жон Қозофистон,
Қардошим, курдошим, бовурим азал!
Буюк Шарқ қўйнида бахти нурафшон
Ўзбек диёридан саломим бу гал!
Бирдир элимизнинг оташ каломи,
Бирдир теграмизда сахролар яйдок.
Бирдир элимизнинг насаби, номи,
Бирдир кўқимизни ёритган чақмоқ!
Абай ҳикматию Навоий сози
Кўркам хонадоним муаттар этган.
Буюк яратганга бўлсин тавозе,
Удир бахтимизни баробар битган.
Дийдор бошлаб келди, қани, узат қўл!
Ўлжасим, жўлдосим, дўстим, қарогим!
Таъзим, эҳтиромим айлагил қабул,
Эй улкан қозофим, улкан қозофим...

1972

ҚОЗОФИСТОН ОҲУСИ

Кўкчатовда кўк камзулли бир оху кўрдим,
Таажжубки, оёғида қизил этикча.
Кўз узолмай узоқ маҳал термулиб турдим,
Сўнг изидан кетабердим бошим эгикча.
Шўх, чиройли сўқмоқларда қадам-бақадам,
Ўқ етмасга қадар чиқдим изидан бориб.
Оху эмас, афсонага дуч келдим шу дам,
Во дариғо, қайтиб тушдим чарчаб ва ҳориб.
Ойнакўлга бориб қолдим айлаб мен шитоб,
Кўк камзулли у охуни излаб сарсари.
Ойнакўлнинг тубида ҳам кўринди шу тоб
Оху эмас, Ўлжас шеърин тоза мавжлари.
Сайёҳликнинг ўжар қалби тутиб қўлимдан
Кетавердим, кетавердим сарсон-саргардон.
Мовий кўллар, чўнг ўрмонлар чиқди йўлимдан,
Оҳ, бунчалар кенг экансан, жон Қозогистон.
Излайвериб, ҳориб бўлгач, оқибат бир тун
Кўк тепага чиқиб олиб ўй сурдим узоқ.
Олмаота чарх уради теграмда бутун,
Сўзласанг-чи, бу қандоқ ҳол, муҳтарам қозоқ?
У мен кўрган оху қани, қайда у жайрон,
Қайси жойни макон этган у нозик ниҳол?
Дедиларки, қозоқ элин кезабер ҳайрон,
Ҳар қайда ҳам у бир карра кўргазгай жамол.
У Абайнинг армонидир — нозланиб турган,
У Олатов сулувининг мақоми эрур,
Кечагина нортуюни қувалаб юрган
Қозоқларнинг карашмали илҳоми эрур.

1972

СОФИНЧ

Парчагина булут,
Чексиз осмон,
Адир ортидаги ёлғиз оёқ йўл.
Барча ташвишларни унутиб, шодон,
Қайтгим келаётир қошингга буткул.

Қисмат майин ичдим — аччиқ ва тахир,
Туйдим эҳтироснинг самовий кучин.
Дунёда одамзод яшамас, ахир,
Фақат иродасин синамоқ учун.

Парчагина булут,
Чексиз осмон,
Адир ортидаги ёлғиз оёқ йўл.
Барча ташвишларни унутиб, шодон,
Қайта олсам эди қошингта буткул.

1972

ЯХМАЛАК

Қизим Шоирага

Яхмалак отасан, шодон қийқириб,
Овозинг жаранглар биллурий боғда.
Қизим, болаликнинг фаслига кириб,
Илк бора яхмалак отдинг шу чоғда.
Илк бор ҳаётингда қор сайлидир бу,
Изингдан шуъладек югурап кўзим.
Қўрқма, полапоним, чекмагил қайфу,
Йиқилсанг турғизиб қўяман ўзим.
Оппоқ қор қўйнида нуроний олам,
Қучоги бувингнинг бағридек юмшоқ.
Яйраб қол, шу мунис оғушда, эркам,
Ёруғ дунё сенга қучоқ очган чоқ.
Яйраб қол, майли, шу кумуш майдонда,
Яйраб қол чойшабин йиққунча фалак.
Чунки она қизим, ёруғ жаҳонда
Равон йўл битта шу: бу ҳам яхмалак.
Ҳали улғаярсан, униб ўсарсан,
Гапларим маъносин англарсан ҳали.
Олис яхмалакни эслаб қўярсан
Йўллар машаққатин тортган маҳали.
Ҳозир-чи, кезавер, майли, бепарво,
Мурғак юрагингда фусса тутмагин.
Бахting бутун бўлсин, қизгинам, аммо,
Дунёдан яхмалак отиб ўтмагин.

1972

* * *

Нимаики ёзма касалхонада —
У сўнгги ишингдек туюлаверар.
Falati туйфулар кезар дунёда,
Ҳаммаси миянгга қуюлаверар.
Гоҳо ваҳималар бағрингни тилиб,
Роса чўчитади, юришмас ишинг.
Лекин ногаҳонда эшик очилиб
Кириб келар дўст ё танишинг.
Яна олам ёруғ, юракда фулу —
Хонанг сеҳрли бир нурга тўлади.
Жуда оддий гапдир бир қараашда бу,
Лекин қўшиқ қилиб айтса бўлади.

1972

НАСИҲАТ

(Ҳазил)

Насиҳат тинглаймиз умрда қанча,
Ҳатто баъзисини тортолмайди от.
Дўстлар, насиҳатнинг ўрни бўлакча,
Ўгит берар, ахир, шу билан ҳаёт.
Мен ҳам ўз-ўзимга анчадан буён
Насиҳат беряпман қатъий, бешафқат.
Чунки, бир насиҳат тинглаган замон
Эсдан чиқиб кетар ўзга насиҳат.

1972

ГЕНЕТИКА

Мен ҳам яшайпман ўз замонимда,
Давримдан қайга ҳам тушардим йироқ.
Ва лекин билмадим, менинг қонимда
Қайси бир бобомнинг хислати кўпроқ.

Барчага баробар мерос бу башар,
Отадан қош-кўзни олган ўғилдек.
Билмадим, қонимда қай аждод яшар,
Балки Бобо Кайфий, балки Улуғбек.

Тунлар қулоғимга чалинар элас,
Туллорлар кишинаши, отлар гурроси.
Балки Муқанна бу — тиниб-тинчимас,
Балки Панипатда Бобур урҳоси.

Балки танглайимни кўтариб кетган,
Дарбадар бир ошиқ ва ё сарбадор.
Балки бирор бобом шаҳаншоҳ ўтган,
Балки вужудимда дарвиш қони бор.

Мен яхши англайман, мозий не демак,
Тарихда ҳар кимнинг бор ўз замони.
Лекин танимиизда кезар-ку бешак
Олис боболарнинг минг йиллик қони.

Нечоғли сабот бор ёвқур Широқда,
Эрйигитов тўпга кўксин босар жим.
Раҳимов ғанимга ташланган чоғда
Алпомиш шиддатин пайқамаган ким?!

Оҳу боласи бу — оҳудай боққан,
Шерваччада эса шернинг шиддати.

Авлодлар қонида минг йиллаб оқдан
Буюк боболарнинг турфа хислати.

Неки эзгулик бор жаҳонда пойдор
Жойлаб ола билдик барчасин қонга.
Асрлар сўнгида толе келиб ёр,
Фарзанд бўла билдик ўтли замонга.

Сингди руҳимизга, мангу барҳаёт
Алишер шеърию Пушкин баёти.
Сингди руҳимизга ғолиб ҳиссиёт —
Жасур боболарнинг тенгсиз саботи.

Сингди қонимизга шу оташ дунё,
Сингди қонимизга муҳаббат, ғазаб.
Йироқ авлодларга бизлардан аммо
Қай бир хислатимиз қоларкан, ажаб?

Нима қолар экан? Қай эзгу тилак,
Қай ҳис, юракларда тополган камол?
Йироқ авлодларга бизлардан бешак
Қолар курашларда тобланган хаёл.

Шу ёвқур асрда яшадик рўй-рост,
Ранжу балолардан ҳайиқмай тақир.
Йироқ авлодларга бизлардан мерос,
Буюк бардошимиз қолгуси ахир.

Яшадик шу рангин дунёда масъул,
То эллар кўз ёши бўлмасин чашма.
Ўзни бағишладик курашга буткул,
Демакки, яшадик оромга ташна.

Ташна яшадик биз меҳрга мутлоқ,
Ишқقا, муҳаббатга ташна ўтдик биз.
Гоҳ эса қуёшдек порлоқ ва йироқ
Ҳаққа, ҳақиқатга ташна ўтдик биз.

Ташна яшадик биз нурга, зиёга,
Қаён кетмоқдасан, эй учқур замон?!
Оқибат бел боғлаб келди дунёга
Бизнинг асримизда валламат инсон.

Тўфон, қасиргалар кечар-ку ҳали,
Кечади авлодлар қатор, галма-гал.
Балки оро топиб башар сайқали,
Туғилар энг олий инсон, мукаммал.

У ўзин танигай шунда дафъатан,
Тўфон, қасиргалар босириқ бир туш!
Шу буюк сайёра — ягона Ватан.
Инсон ўз баҳтидан ўзи ҳам сархуш.

Мунис нигоҳини қадаб қуёшга
Тураг у нурдай пок, ишқдай безавол.
Кечмиш камолотин кўтариб бошга.
Йироқ асрларга кўз тикиб хушҳол.

Тураг у гўдакдай беғубор кулиб,
Балки кулгуси ҳам биздан мерос бу.
Риштаи жонида бир зарра бўлиб
Бизнинг ҳам қонимиз гупургай, рост бу...

Боболар дунёдан ўтдилар шундоқ,
Биз ҳам етукликка бўлмадик тимсол.
Лекин сен бўларсан бокира мутлоқ,
Лекин сен яшарсан фаришта мисол.

Каҳкашон сайрида ҳур қуёш билан
Кезарсан то абад шодумон, хуррам.
Лабда табассуму кўзда ёш билан
Сенга талпинаман, буюк набирам...

1973



ДЕНГИЗГА

Йўлим бошлади то, кездим дала-тоғ,
Кездим не юртларни — чиройи тенгсиз.
Насиб этган экан сен билан бу чоғ,
Илк бора рўбарў келдим, эй денгиз.
Саҳройи ўзбекман, толеим кулиб,
Муқимман, ўз юртим билан ҳаётман,
Ва лекин, дунёда шамолдай елиб,
Денгиздай кенг қалбни ахтарган зотман.
Қалбим очай дейман сенга ушбу чоқ,
Лекин тинглармидинг, баҳри беомон.
Менман бу — қошингда зарра бир ушоқ,
Сен — кўкка шашша ташлаган уммон.
Нени англар эдинг, сен-ку бир хилқат,
Миллиард туйфулардан қотган шарора.
Сенга дил очмоқ ҳам фол кўрмоқ фақат,
Инсон ўз қалбини англаса зора.
У соҳир ҳислардан кечди беомон,
Афсунгар туйгулар бўлганлар фойиб.
Бешафқат тафаккур асли бу замон,
Фарид дейми уни ва ё ғаройиб.
Унинг пойидадир замин — зироат,
Унинг пойидадир ҳаттоки само.
Қайда шеър? Қайда сир? Қайда синоат?
Қайда Мажнун учун дашти Карбало?
Денгиз, таниб олгин уни бир карра,
Хазрати инсондир — ўзи қўйган от.
Денгиз, шеър эмассан энди сен зарра,
Сен — пўлат занжирлар забтидаги зот.
Ҳа, буюк шоирлар қадами ўчган,
Ҳеч ким мавжларингдан ўқимас туйфу.
Хитобмас тўлқинлар бағрига тушган,
Қайси бир балиқчи ташлаган тўр-ку.
Фарзандман шу буюк асримга бещақ,
Мен ҳам унинг учун дилни ўргарман.

Оҳ, лекин кўксимда ёнган шу юрак
Бир кун тош қотмаса дея қўрқарман.
Олис уфқларда ёнган бу маёқ,
Афсус, мен учун ҳам хаёлмас асло,
Бўронлар қалбимга солмагай титроқ,
Йўқдир мен учун ҳам сеҳр ила рўё.
Тўплар гумбурлаши, ваҳшат садоси,
Куткуларга тўлган ушбу кун замон.
Ташландик ушоқнинг бўлиб гадоси
Тўп-тўп чағалайлар оҳ чекар нолон.
Юлдузлар ёнади, офтоб чарақлар,
Кукунга айланар вужуд ҳам, аммо
Яралган эканки Инсон бир вақтлар,
Наҳот туйғудан у бўлгай мосуво?!

Сарсон, соҳилларда тентираб яна
Ўйга ботармикан беруҳ ошиқлар?
Денгизлар уфқига боқиб мардона
Куйлармикан ҳеч ким ўтли қўшиқлар?
Мовий далаларда ўзни унутиб,
Шабнам ичра кезса малла ранг тойчоқ,
Фазогир Миррихнинг меҳридан кечиб
Боқармикан унга энтикиб, муштоқ?
Улуг илоҳасин — тилсиз жамолин
Унутиб қўймасми бир кун одамзод?
Буюк насибасин — тенгсиз хаёлин
Шу буюк тафаккур этмасми барбод.
Илҳоминг дилимда, хайр, эй денгиз,
Гарчанд висолингдан асло қонмасман.
Лекин ёшлигим ҳам ўтар-ку эсиз,
Бир вақт ёнганимдай балки ёнмасман.
Балки сайр этгали мавжларинг бўйлаб,
Тагин қайтажакман, эй ошно уммон.
Сен-чи, куйлайвергин ҳамиша гувлаб,
Инсонлар қалбига солиб фалаён.

1973



АЛЛОМА

Бирор жойда топилса ногоҳ гавҳар донаси,
Чўнтағи тешик ҳар ким даъво қилган ҳамиша.
Мен ҳам орзу этардим, яхши ном баҳонаси
Мени ҳам ёдга олса файри эл, шуҳратпеша.

Қанча буюк зотларга мақон бўлган Хоразм,
Ўтган, кетган тарихинг барчага кундай аён.
Сира ажаб эмасдир Машҳад ҳам айлаб базм,
Бир Қиёт фарзандига таъзимда бўлса жаҳон.

Қайтди буюк аллома ўз юртин қучогига,
У боис қалбим яна фуур билин тўлибди.
Во ажаб, шундай бир зот ўз қадрин топмоғига
Унча-мунчамас, роса минг йил керак бўлибди.

Ҳолини билмаганга рўбарў келсанг агар,
Қалбингдаги арслоннинг мўйловига чўзгай қўл.
Мен-ку оддий инсонман, лекин шундай дам баттар
Ўн минг йиллик фуурим қўзғалиб кетгай буткул.

Халқим, тенгсиз фарзандлар бергансану дунёга,
Зар қофозга ишқибоз мурғдай устин ёпгансан.
Сўнг юз йиллаб фаромуш кўзинг тикиб самога,
Дафинаи ганжингни эслатишса топгансан.

Беруний бобомиз шу, исми ҳам Абу Райҳон,
Ба форси гуфтаам гар аз замони пур Сино.
Бу зотни етиштирган қадим Шарқ, кўҳна жаҳон,
Кумуш соқол, тилла бош, асл қомусий даҳо.

Шарафай замондан боқади у беписанд,
Буюк шарқ тафаккурин беназир хазинаси.
Мустабид Маҳмуд эмас хаёлини этган банд,
Билгисиз эллар шавқи, юлдузлар нашидаси.

Шунчалик бўлар ахир аллома деганлари,
Агар-чи, қисмат чигал, ношкур ул замона.
Жавоҳир истеъдоднинг меваси бунинг бари:
“Осор ул-боқия”ю “Ҳиндистон” у “Сайдона”.

Ушоққина одамман, жуссам отамдан ҳадя,
Лекин майда ҳисларни ёқтирумас асло жиним.
О, буюк Шарқ, буюк Шарқ, сенинг шавкатинг дея
Не буюк фарзандларинг заҳмат чеккан бетиним.

Қайда улар? Қайси бир пучмоқларда бенишон...
Афсуски, ўз қадрини билмас доим одамзод.
Бу кун Абу Райҳонга таъзимда экан жаҳон,
Бу — буюк бобомизга замонадан бир имдод.

Довотим қуримади, мудом фахрия битай,
Энг улуг аждодлардан хаёлимга ёғсин нур.
Шундай зотларни берган халқимга таъзим этай,
Фуруримга фуурурдош ким бўлса — минг ташаккур.

1973



ҚАСОСКОР ҲАҚИДА БАЛЛАДА

(“Қорақум” фильмі учун ёзилған)

Саҳро оташида қоврилар гуллар,
Чарх урар бошида маҳзун булбуллар,
Гулшанга қаҳрингиз сочманг, эй, чўллар,
Сизнинг ўзингизни ёндирап қасос.
Қон йиғлар ярали оху боласи,
Фалакка чирмашар ғамгин воласи.
Ҳаққа етганида унинг ноласи,
Сайёдни қонига қондирап қасос.
Шамширга қўлинг чўз, титрама, эй, жон,
Рақиблар устига от сол беомон.
Номусу ор учун жангга кир, ўғлон,
Тоғларни ўзидан тоңдирап қасос.
Қўлида ғамгин соз — қуйлайди бахши,
Ҳасратга тўлмасин бу эллар дашти.
Адолат йўлида кимки адаши,
Сойларни қон билан тўлдирап қасос.
Қисмати хору зор ўтди боболар,
Ажал шамширини тутди боболар.
Бир-бирин қонини тўқди боболар,
Мұҳаббат гулларин сўлдирап қасос.
Бу мунгли қиссага шулдир интиҳо,
Қасос деб оламни босмасин бало.
Бўлса гар дунёда адолат, вафо,
Хайру саховатта йўл берар қасос.

1973

ТУРМУШ ТАШВИШЛАРИ

(Ҳазил)

Турмуш ташвишлари,
Турмуш ташвишлари,
Биз сендан баландроқ тура олсайдик,
Биз сендан баландроқ юра олсайдик,
Балки ўнғаярди дунё ишлари,
Турмуш ташвишлари,
Турмуш ташвишлари.

Хотин иш буюрар,
Бола йиглайди,
Боғча деб қайгадир югурмоқ даркор.
Балки шу ташвишлар бўлмаса эди,
Шоир бўлармидим анча улуғвор.
Турмуш ташвишлари,
Турмуш ташвишлари.

Қассоб оғайним бор —
Қароқчи — “пират”.
Суякни кўшмаса кўнгли тўлмайди.
Ахир, қофияни еб бўлмас “брат”.
Наҳот сен бўлмасанг турмуш бўлмайди,
Турмуш ташвишлари,
Турмуш ташвишлари.

Улуг режалар бор менда ҳам ахир,
Хусусан, бир ишни битказмоқ даркор.
Унда қаҳрамоним ёвқур фазогир.
Кошкийди, сен шуни билсанг, нобакор
Турмуш ташвишлари,
Турмуш ташвишлари.

Шириндир шу ҳаёт,
Холи фироқдан.
Майли, битмасин ҳеч унинг ишлари,
Ҳаволаб кетсак гоҳ
Тортсин оёқдан,
Турмуш ташвишлари,
Турмуш ташвишлари.

1973

МУЗАФФАР ЎЛКА

Озод Вьетнамга

Неча йил бу замин ўт ичра қолди,
 Неча йил бурқсиди бу юрт самоси.
 Неча йил дилларни ларзага солди
 Мўъжаз бу ўлканинг фарёд садоси.

Гарчи туғилмадим у ерда, лекин
 Унинг иқболидан дил уйим обод:
 Чунки, голиб келди оламда тағин
 Қирғин урушлардан ҳорган одамзод.

1973

ТАНИШЛАР

(Ҳазис)

Шоирларнинг азал танишлари кўп,
 Улар ўтгандан сўнг яна кўпаяр.
 Ҳар хил шаҳарларда яшашар тўп-тўп,
 Баъзан гап йифишар, баъзан гап ёяр.

Балки бирга ичган бир пиёла чой,
 Ҳамсұхбат бўлгандир замона талаб.
 Гар шундай бўлдими, аҳволингтавой,
 Тириклай устингта ташлар гап қалаб.

Бошга тушганда-чи, ногаён савдо,
 Уларнинг бирорин қани, топиб кўр.
 Шоир, бундайларга қилмагин парво,
 Танишсиз қолсанг ҳам шоир бўлиб юр.

1973

НИЯТ

Умрим китобидан бир варақ ўтди,
Бир саҳфа шодлигу бир саҳфа заҳмат.
Кимдир дўстим дея қўлини тутди,
Кимнингдир дастида санги маломат.

Ҳаёт дегани шу, қалбнинг тубида
Қолғуси шодлик ҳам, қайфу ҳам қатор.
Ва лекин умримни аввал-сўнгига
Ватансиз тасаввур этмоғим душвор.

Сокину улуғвор бонг урар соат,
Ўйларим чарогин яна ёқурман.
Янги йил дарича қоққан бу фурсат
Ўлкам камолига хушнуд боқурман.

Борми ундан бўлак менга ҳеч шодлик,
Борми ундан ўзга толе ва аъмол?
Орзум не, не бахтга бўлолдим молик?
Ундан айри баҳтни этдимми хаёл?

Дунё бепоёндир, турфадир Инсон,
Юлдузлар мисоли беадад қисмат.
Лекин баҳтга ошён бўлсин бу жаҳон,
Инсонга осойиш ёр бўлсин фақат.

Соатнинг интиҳо бонги ҳам тинди,
Қолди яна бир йил орқада кўркам.
Қани, қўлларингни узаттил энди,
Севикли диёрим, навқирон ўлкам!

1973

УМР

(Хориждаги шебр)

Қалбимда гоҳ фуур, гоҳида фараҳ,
Шу учқур дунёни турфа кўрибман.
Юртма-юрт, элма-эл, фарсаҳ-бафарсаҳ
Умрим довонларин ўлчаб юрибман.

Умр-ку ўтади гулдурос солиб,
Унинг қайтганини ким ҳам кўрибди?
Во ажаб, қай бир зот, ўз умри қолиб,
Менинг қадамимни ўлчаб юрибди...

1973

МЕН АНГЛАБ ЕТГАН ФАЛСАФА

Бозорга ўхшайди асли бу дунё,
Бозорга ўхшайди бунда ҳам маъни.
Иккиси ичра ҳам кўрмадим асло,
Молим ёмон деган бирор кимсани.

1973

ОНАМНИ ЭСЛАБ

Шамол увиллайди,
Қор, бўрон тошиб,
Тепалик тўшига ўзни уради.
У ерда тупроқда бағрини босиб
Танҳо бир сагана маъюс туради.
Қошига чиқай деб бўзлаб йўл юрдим,
Кўкрагимни тилди изгирин, тикан.
...Нетай, онажоним, қанча одам кўрдим,
Сендан яқин кишим йўқ экан...

1973

ОЙБЕК НОМЛИ ХЎЖАЛИКДА

Икки дарё туташмиш бунда,
Бири Чирчиқ ва бириси Сир.
Шуъла ўйнаб кумуш тўлқинда,
Хаёлингни айлагай асир.
Икки дарё туташмиш ажаб,
Бири назм, бири насли пок.
Бири замин — табаррук матлаб,
Бирида бор шуълаи афлок.
Термуламан бу хуш чиройга,
Хўп зуккосиз, одамлар, мудом.
Икки дарё туташган жойга
Ойбек дея қўйибсизлар ном.

1973

БАҲОР НАШИДАСИ

Яшилланди оппоқ тоғлар пурвиқор,
Адирларда чопар гувлаб бўз анҳор.
Бош кўтарди нимдош майса, гул-чечак,
Сулувларнинг соchlарида тол баргак.
Атир ҳиди анқир илиқ ҳавода,
Баҳор кезар чўл, адирда, саҳрова.
Тонгдан то шом чаман ичра сарсари,
Гулдан гулга қўниб учар болари.
Мовий қўкда қушлар қоқар шўх қанот,
Бош кўтарди жами жонзод, мавжудот.
Қўҳна тупроқ фунча каби очиб лаб,
Олаётир навбаҳорни қаршилаб.
Баҳор аввал кириб келгай юракка,
Чулғар дилни турфа орзу тилакка.
Гар инсонга ёрдир толе, саодат,
Баҳор бергай tengsiz шодлик, фарогат.
Ошиқ магар ишқда эса баҳтиёр,
Муҳаббатдир баҳордаги илк шиор.
Баҳордир бу — сирли олам санъати,
Табиатнинг жажжи, рангдор суврати.
Баҳордир бу — сулувларнинг ол юзи,
Баҳордир бу — гўдакларнинг илк сўзи.
Олқиши бўлсин қадами шўх қўкламга,
“Хуш келибсан, деймиз, баҳор, ўлкамга!”
Юртим азал баҳор ила дилкашдир,
Она тупроқ навбаҳорга пешкашдир.
Жаранг солсин гўдакларнинг кулгуси,
Бор бўл қўклам, бор бўл ўлкам, келгуси!

1973

ГЛОБУС

(Болалар учун)

Глобусни боболар
Курраи арз, дебдилар.
Яшаган сайёрангни
Билмоқлик фарз, дебдилар.
Столимнинг устида
Глобус турар ҳар чоқ,
Укам Абдурайимнинг
Боши каби юмалоқ.
Узун-узун дарёлар
Ётишибди узалиб,
Синглим Озода чизган
Чизиқ каби чувалиб.
Шаҳар ёки қишлоқдир
Манов кичик нуқталар,
Чинор барглари каби
Парча-парча қитъалар.
Яшил матога ўхшаш
Манов жойлар денгиздир.
Сизга айтсам, аслида
Денгиз улкан, тенгсиздир.
Бир гапни билдим, аммо
Айтмаса ҳам дадамлар,
Ерда яшар жуда кўп,
Турли-туман одамлар,
Мана бу жой Африка,
Аникироғи Занжибар.
Занжибарда бадани
Қора тусли занжи бор.
Люксембургдир манов жой,
Конго эса бундадир,
Бу-чи, ҳаммага таниш
Қаҳрамон юрт — Кубадир.

Ўзимча фикр қилдим
Тажрибасиз калламда:
Эҳ-ҳе, қанча эл-элат
Яшар экан оламда.
Телевизорда кўрганман
Неча-неча марталар.
Кичик кичикка ўшар,
Катталарга катталар.
Боқсам, у ҳам эркатой,
Бошқаларга ўхшайди,
Ҳайронман, у болани,
Одаммас, деб ким айтди?
Қайси кун қувноқ монгол
Иссик тортди кўзимга,
Бундоқ ўйлаб қарасам,
Ўшар экан ўзимга.
Шундай экан, одамни
Хилламоқ нечун керак?
Менимча, ҳаммада ҳам
Бир каллаю, бир юрак.
Ўйламанг, бу гапларни
Аллақайдан тўқидим.
Ҳаммасини мана шу
Глобусдан ўқидим.

1974



ЁШЛИК

Эллигинчи йилларнинг тонглари ёдимдадир,
Эриган новвот каби субҳидам ширин уйқу.
Фақаттинга эзгулик, ишонч бисотимдадир,
Хаёлларим беғубор, яғир бўлмаган туйғу.

У маҳаллар чўлларда армондан бўлак не бор,
Бечора чорвадорга қайдадир рангин жаҳон.
Бир қаламкаш устозим айтгани каби ночор —
Саҳройи йигитларда қайдан бўлсин ҳаяжон...

Лекин иноқ эдим мен аслим — табиат билан,
Бепоён хилқат билан тунлар бўйи суҳбатдош.
Кўчат ҳам ўтказардим кўп яхши ният билан,
Билсам-да жазираға бера билмасин бардош.

Назаримда у чоғлар бутун олам пок, тоза,
Камалак орзу эса, офтобдир кўз қарофим.
Эсимдадир, ўзда йўқ қувонган эдим роса,
“Алифбо”ни қўлтиқлаб, мактабга борган чоғим.

Дўппимни ерга олиб, энди ўйлаб қарасам,
Ёшлик дегани асли покклиқ экан, беғубор.
Доимо хаёл эзгу, доимо эзгу қасам,
Үргада бурда нону қаноат топган қарор.

Ундан бу ёғи эса демак очилган фунча,
Турфа шамоллар билан долғаланган бир ҳаёт.
Ташвишсиз умрнинг ҳам қизифи йўқдир унча,
Хаёллар тинган билан тинмагай ҳеч гирдибод.

Оҳ, ажиб гулшанда ҳам бўлмаса дейсан тикан,
Одам-ку бу — одамзод, бетимсол, буюк, кабир.
Лекин одам ичра ҳам оласи учрар экан,
Ҳайрат билан боқмоқдан ўзга чоранг йўқ тақир.

Орзую армонимни шеърий йўлда қайтадан
Сўзлаб турибман балки ёшлиқ баҳона бўлиб.
Муқаддас замин ҳаққи ёқа тутиб айтаман,
Қанийди куйлайверсанг ҳамиша баҳтни тўлиб.

Шу мўъжаз ҳаётимда кўрдим қанча лўттибоз,
Кўрдим гоҳо шеърфуруш, гоҳо сур, мансабфуруш.
Зарра бир мақтов десанг томдан ташланар шоввоз,
Лекин ишдан гап очсанг бера билмайди туриш.

Яхши ҳам бундайларнинг дасти қисқа замонда,
Йўқ эса кўрсатмасин буларнинг амалини.
Ўз ҳайкалин кўярди учраган ҳар майдонда,
Ағдариб ташлаб ҳатто Навоий ҳайкалини.

Ганг чаққандай гарангсиб, нохуш бир туйфу билан,
Турган эдим, лол, ҳайрон катта йўл ёқасида.
Ўтиб қолди бир гуруҳ оташин қутқу билан,
Йироқ келажак учун айтганича қасида.

Етмишинчи йилларда қари бир ўсмир бўлиб,
Қўлтиқда “Данте” билан унинг ортидан чопдим.
Қитмир йўлдошларимнинг феълидан роса тўйиб,
Укам қаториларидан самимиятни топдим.

Оддий шеърки, пок бўлса қадри ошар жаҳонда,
Бетимсол авлод учун бўлармикин топиб сўз.
Эй менинг ёшлиқ дўстим, яша дейман омонда,
Қўлдошимсан қалби соф, йўлдошимсан ёруф юз.

Одамзод — одамга хос неки бўлса дунёда,
Сенинг ҳам қалбинг аро жой топгани аниқ гап.
Хислатинг мўл ва лекин ҳаммасидан зиёда,
Сен покиза ёшликсан, беғубору тоза қалб.

1974



ҲАМЗА МОНОЛОГИ

Мени ўлдирилар Шоҳимардонда,
Юртимнинг қонини текин сўрганлар.
Мени ўлдирилар ота маконда,
Ўзимнинг тилимда сўйлаб юрганлар.
Улар кимлар эди? Тўрвадан бўлак
Илинжи бўлмаган гадой хурофот.
Улар кимлар эди? Ватанни лак-лак
Ақчага сотмоқчи бўлган мусовот.
Фаҳмини еб бўлган қай бир ногирон
Демиш-ки, кўр бўлсин буткул бу дунё.
Янги йўлга кирса каттакон жаҳон,
Мен уни танисам айбиммиди ё?
Уруш қилай десанг оллоҳ на ҳожат,
Топилар жаҳонда баҳона бисёр.
Сармоянг ушбу кун бўлганда форат,
Шоирга тошингни отдингми, фаддор!
Қарадим дунёнинг ичу тошига,
Султонлар ҳоҳиши султондай қолмоқ,
Йўқ эса шартмиди юртнинг бошига
Беҳуда қиронни келтириб солмоқ.
Буюк Алишерни юрган унутмай —
Элнинг шони қани? Қани закоси?
Валлоҳи аъзамдан нарига ўтмай
Қанча йигитларнинг сўнди даҳоси.
Улуғбек самога интилганда тик,
Элнинг шуурига чулғаб бир рӯё —
Хўқизнинг шохидаги хира пашшадек
Минфирилаган сен-ку, хурофий дунё.
Бурнинг қани деса қулоғин туттан,
Хонни ҳоқон деган бечора тўра,
Каттакон дунёни аён эшитган
Элни бошлармиди олдинга сира.
Файласуф эмасман, аскардирман чин,
Шоирман — ғазалхон аҳли турганда.
Йироқ уфқларни ўйлардим лекин
Ўзимча шеъримни куйлаб юрганда.
Эй баттол ғанимим, англаб ол рўй-рост,
Сенга аён этсам дилда ниятни,
Умримни яшадим курашчига хос,
Кураш билан топдим абадиятни.

1974

ИРОДА

Ошга етганида йигитнинг дasti,
Тошларга тегмасин боши ҳеч қачон.
Сен инсон таянчи, сен башар бахти,
Эй буюк ирода, тўзим билмас жон.

Фарзандин қабрида она жигархун,
Унинг фарёдидан дунё ғамхона.
Бу ғамдан тоғлар ҳам лол қотмиш бутун
Ва лекин оёқда тик турди она.

Қирқ йил заҳмат чекди қай бир закий зот
Бир кун этмоқ учун фикрин ифода.
Унинг буткул умри кетарди барбод
Агар сен бўлмасанг, событ ирода.

Сен борсан — топталиб кетмас заковат,
Сен борсан — одамзот етгай шарафга,
Йўқ эса қалбида тоғдай матонат
Яшащдан не маъно эди Машрабга.

Аччиқ кўз ёш бўлиб оқди у баъзан
Муҳаббат ўтига дуч келгани он.
Лекин ирода бу — ёнди қайтадан,
Ўтли қўшиқларга айланди ҳижрон.

Не бир буюк зотлар бош эгди ночор
Томуғдан йўл топмай нурли ҳаётга.
Лекин ирода бу, енголди такрор
Таянч бўлганида Бобурдай зотга.

Неларни кўрмаган инсоннинг боши,
Неча бор қоврилиб, тирилган жаҳон.
Барига етаркан сабру бардоши,
Демак, иродадан яралган инсон.

1974

МУАЛЛИМЛАРГА

Нечоғ бахтиёрман, таъзимда шу тоб
Сизнинг шаъннингизга битмоқдаман байт.
Не одам бўлардим, қўлимда китоб
Бирор ҳарф танимай турсайдим лоқайд.
Сиз-ку “Алифбо”дан “Қомус”гача то
Бари-барисини таниттан устоз.
Илк бор Сиз кўрсатган дурахшон Зухро
Буқун шеърим ичра ташбиҳдир мумтоз.
Сиз мўъжаз юракда ёқолган ёғду
Оқибат қуёшдек соча олур нур.
Буюклар ҳаққига қасамёд гап бу:
Сиздан бошланади асли Тафаккур.
Оlamда кўп эрур муборак онлар,
Табаррук зотлар ҳам гарчанд кўп эрур.
Сизгадир илк раҳмат, азиз инсонлар,
Мунис муаллимлар, Сизга ташаккур.

1974

ЧҮЛИ БОБОНИНГ НАБИРАЛАРИГА ДЕГАНИ

Йиллар, ойлар ўтса, Ватан топса сайқал,
Боғларда очилса сўлмас лолалар.
Шу жойлар чўл эди десак бир маҳал,
Ишонармикансиз, болалар.

Мовий кўллар узра сузса чағалай,
Адирларда кезса оққув галалар,
Шу жойда ҳаёт йўқ эди десак, ҳар қалай,
Ишонармикансиз, болалар.

Бу жойларда ўтган ҳасратли аждод,
Томчи сувга зору кўз ёш жолалар.
Уларнинг ҳасратин шоир этса ёд,
Ишонармикансиз, болалар.

Мен-ку ишонаман, сахролар гуллаб,
Сизнинг қий-чув билан тўлгай далалар.
Ўшандা, фидойи оталарни эслаб,
Таъзим қиласмисиз, болалар.

1974

САЛОМНОМА

Баҳор чоғи чулдираган ирмоқлардан,
Сўқмоқлардан ва зангори ўтлоқлардан,
Адирларда кечган шодон, хуш чоғлардан,
Салом бўлсин саховатли йил бошига,
Салом бўлсин яшил кўклам наққошига.

Саратоннинг қуёшидан бўлсин салом,
Қор сўраган тоғ-тошидан бўлсин салом,
Танти деҳқон бардошидан бўлсин салом,
Салом бўлсин ойларнинг энг эзгусига,
Салом бўлсин унинг оппоқ инжусига.

Яқин қўшни — салом деган куз чоғи бу,
Ноз-неъматга тўлиб турган кучоғи бу,
Тўй чоғи бу, режаларнинг юз чоғи бу,
Салом бўлсин тўйни бирга тўйлашганга,
Салом бўлсин бир девордан бўйлашганга.

Одамлар бор — бир умрлик толега ёр
Ва истайди дўстларига толе бисёр.
Эзгу йилда эзгу ўйлар топсин қарор,
Салом бўлсин хуш саодат айёмига,
Салом бўлсин зафарнинг илк паёмига.

Саломларнинг барчасидан шулдир маъно:
Бўй таратсин олам бўйлаб яшил маъво,
Гуркурасин, кучга тўлган юрт доимо,
Салом бўлсин ўн икки ой сарварига,
Салом бўлсин йилнинг тўнгич Январига!

1974

ҲАВАС

Баҳор осмонида чақнаса чақин
Кўксингдан отилар оловли нафас.
Эй, сен, жавон шоир, ўспирин оқин,
Ўтли юрагингта қилурман ҳавас.

Кўкда юлдуз эмас, у сирли қўшиқ,
Интизор йигитнинг чашмига сингтан.
Муҳаббат дардига мубтало ошиқ
Сенга ҳавас билан бокурман чиндан.

Беланчак бошида ўйнар парча нур,
Жажжи чақалоққа бор дунё абас.
Шу парча шуълада кўрдинг не сеҳр?!
Гўдагим, мен сенга қилурман ҳавас.

Лочин юракдир бу — яшиндай шаҳди,
Фаддор қояларга ургувчи қанот.
Сенга ҳавас билан бокурман, рости,
Ўлимга тик кўксин тута олган зот.

Бахтидир, қай қалбда ёниқ нур, зиё,
Бахтидир, қай қалбда ёниқ ҳаяжон.
Шу сабаб дастида бўлса ҳам дунё,
Ўтли ёшлигини кўмсайди инсон.

1974

* * *

Фаним бўйлолмасмиз иккимиз сира,
Дўст ҳам бўйлолмасмиз балки ҳеч қачон.
Балки эмасдирсан сен ҳам бокира,
Балки эмасдирман мен ҳам покдомон.

Иккимиз учун ҳам ёлғиз шу офтоб,
Иккимиз учун ҳам ягона замин.
Мен ҳам сенинг учун битмадим китоб,
Сен ҳам шуҳратимни этмассан таъмин.

Кимга нима керак? Нечун сохта шон?
Нечун мангаликдан беҳуда талаб?
Ахир иккимиз ҳам сўнг манзил томон
Кетмасмиз дунёning юкин орқалаб.

1974

РАЙХОН

Фурсат-фурсат инсонга кўринганда тор жаҳон,
Яхшилар дийдорини кўмсайди доим кўнгил.
Боболарим юргида тутқаздинг даста райҳон,
Бошим кўкларга етди, Шамсиқамар, жон сингил.
Хонанишин кунлардан безиб келгандим асли,
Чексиз чўллар гардини айласам девдим тавоф.
Руҳ менда тийра фасли, айни жазира фасли,
Жаннатмакон гўшангдан гул тутқаздинг босавоб.
Бу жойларда кезгандим тентираб йиллар бурун,
Саҳро узра ташнаҳол тўрғай каби чарх уриб.
Куйлагандим гоҳ тўлиб боболар орзуларин,
Гоҳ майин истиқболнинг ўйларига эдим гарқ.
Саҳрода сарбонларнинг оқарган сўнгаклари,
Жаҳаннамий дашт узра ялтираб турган сароб...
Абадий орзулардан сўйларди бунинг бари,
Жаҳоний дилларга ҳам солгудай зарб, изтироб.
Мен-ку бу юрт ўғлиман, жон ипим унга пайваст,
Иқболи иқболимдир, армони бўлса — армон.
Ота юрт вайрон эса, фарзандга жаҳон абас,
Нечундир менга у чоқ танҳо шухрат, ёлғиз шон?
Шул сабаб, арқонга ҳам қил қувват, деган мисол,
Қадимий Жайхун сари келдим айлаб шитоблар.
Гоҳида йироқдарда соғинсам, қўмсаб висол,
Йўлладим қасам тўла турли шеърий китоблар.
Қалбida турфа ният қайнаган зотлар аро
Соғинмас ким ҳам ахир каттакон дунё юзин.
Кўкка боқсам, ўйимни чулғайди чексиз само,
Ерга боқсам, дилкаш деб тингладим Жайхун сўзин.
Мана бу кун у турар қаршимда виқор тўкиб,
Йўқ, йўқ, у — дарё эмас, у — армон, у — бир ҳаёт.
Кечиб не-не асрлар, қанчалар замон ўтиб,
Шу қондош парча ер ҳам топар бўлмишdir нажот.
Бугун ота юртимга келмишdir улуф Жайхун,
Ҳайратдадир бўзтўрғай: “Ахир бу нечук сайхон”.

Саҳрода қарор топмиш ҳаттоки дилбар жунун:
Бўй сочиб туар, мана, бир даста садарайхон.
Синглим, шу райхонингда бир армоним парчаси,
Умримнинг бир фуссаси барҳам топди муқаррар.
Ундадир ҳали чексиз чаманзорларнинг саси,
Назар сол кенгликларга, жон синглим, Шамсиқамар.
Қўлларингда жон топмиш минг йилик орзу, ҳали
Зангори уфқларга узанган чаман бўлғай.
Инсон буюклигидан нишона ушбу, ҳали
Она замин узра сен яратган гулшан бўлғай.
Дунёда тариқ каби беданабоп гап ҳам мўл,
Дунёда ташвиш ҳам мўл қисгудек юракларни.
Лекин бу кун оламда баҳтиёр ўшал кўнгил —
Сиёдиролса ўзига энг олий тилакларни.
Замину замон яшнаб, ўчганда тамом саҳро,
Пешкаш бўлурман мен ҳам туганмас меҳрим билан.
Турфа ранг чаман аро, Сиз тузган гулшан аро
Етиб келурман мен ҳам райхондек шеърим билан.

1975



* * *

Ҳаддим борми сизга бир сўз демакка,
Ҳатто узр айтмоқда сигарми ҳаддим?
Сизнинг хуснингизга боққали якка,
Қанча савдоларни бошдан ўткардим.
Сизга икки олам борича нисор,
Сиз икки оламдан баландсиз мутлақ.
Сизга фақатгина термулмоқ даркор,
Сизга фақатгина лозим сифинмоқ.

1975

* * *

Сен борсан — мен учун бу ҳаёт гўзал,
Сен борсан — мен учун дилбар коинот.
Сенсиз қолар эдим зулматда тутал,
Сенсиз қолар эдим буткул bemurod.

Сенинг висолингда умрим яширин,
Чечаксан, мен учун асло сўлмассан.
Шу қадар дилбарсан, шу қадар ширин,
Афсус, шундайлигинг ўзинг билмассан.

1975

* * *

Сахро сўқмоғида бошин эгиб жим
Бир кимса кетмоқда, билмасман у ким.
Агар у сен бўлсанг, қошингта борай,
Агар у мен бўлсам, тезроқ кел, дўстим.

1975

ГЕНЕРАЛ

Музаффар зотларга мотам ножоиз,
Уларнинг ҳаққидир фақат ифтихор.
Биз мағрур бош эгсак ўшалар боис,
Уларга лойиқдир энг олий ашъор.

Жасур нажоткорлар саф — қаторида,
Ўзбек йигитининг номи ҳам кушод.
Тинчлик айёмининг бу наҳорида,
Собир оғамизни этмоқдамиз ёд.

Ватан деган чоғда оддий ошён,
Ўлан тўшагини англағанлар мўл.
Мадад сўраганда чорасиз жаҳон,
Сиз Тошкент бағридан узатгансиз қўл.

Қайси бир мамлакат, қайси сарҳадда
Нажоткор дўстларни зор кутган тупроқ.
Мурғак хаёлимда шундоқ ҳолатда
Тасаввур этолдим мен Сизни кўпроқ.

Бани одам учун нажот ахтариб,
Жон берган шаҳидлар руҳига қасам.
Одамзод яловдай юргай кўтариб,
Ўзбекнинг шу қатра, тоза қонин ҳам.

Билмадим у соат, у сўнгги фурсат,
Нелар кечган экан Сизнинг хаёлдан.
Балки, Она-Диёр кўкида қат-қат,
Варраклар кўргансиз ўзғир шамолдан.

Балки, сўнгги дам ҳам умидга тўлиқ,
Ёруғ бу кунларни этгансиз хаёл.
Менинг бешигимга отилган ул ўқ,
Сизнинг умрингизни узган эҳтимол.

Буюк Аждод бермиш бус-бутун ғуур
Ва қийиқ кўзларда мерос жасорат.
Жасур сафлар аро от суриб мағрур,
Энг ғаддор ёвларни этгансиз форат.

Сиздек фарзандларга шарафдир пеша,
Сизга мангуликнинг хуш таронаси.
Сиздек ўғлонларни ёдлар ҳамиша,
Мунис Ўзбекистон — мардлар онаси.

1975



АВЛОДЛАР ҲИКОЯСИ

Ярим тун.
Овулдан йўлчи ўтмоқда,
Тулпор туёғидан чақнайди тошлоқ.
Ногоҳ от дупури кириб қулоққа
Чўчиб уйғонади кекса чол мудроқ.
— Кексалик қурсин-да...
Уф тортар узун,
Хотираада Бойсун,
Чақнаган ўқлар...
Чол то саҳаргача юммайди қўзин,
Набираси эса донг қотиб ухлар.

1975

ШУКРОНА

Шукрана айт аввал парча нон учун,
Сўнг қултум сув учун шукрана такрор.
Чунки бу оламда, яширмоқ нечун,
Сенга шуларни ҳам кўп кўрганлар бор.
Буюклар баҳтига ҳавас қил, аммо,
Инсонлигинг учун шукр айттил зинҳор.
Чунки бу оламда сен учун ҳатто
Оддий инсонликни кўп кўрганлар бор.

1975

КАКЛИГИМ

Тоғлар элчиси деб хуш кўрдим сени,
Куш ичра энг ажиб қуш кўрдим сени,
Инжа дийдорингни туш кўрдим сени,
Манзили тоғ билан дарё каклигим.

Олис Боботоғдан бир тонг маҳали,
Келдинг дўстим билан мени кўргали.
Зиёрат гоҳ инсон, гоҳ қушнинг гали,
Хуш келдинг, дедим, оҳ, зебо каклигим.

Кафтимдан беҳадик доңлар терардинг,
Теграмда товланиб яйраб юрардинг.
Мунчоқ қўзларингни тикиб туардинг
Чўмсан хаёлларга гоҳо, каклигим.

Билмадим не бўлди — кетдинг бедарак,
Дўрмон боғларини кездим жонсарак.
Кущдан дўст топгандим, кўп кўрди фалак,
Энди қайлардасан, ошно каклигим.

1975

* * *

Ионгил сен менинг муҳаббатимга,
Менинг муҳаббатим буюқдан буюқ.
Бовар эт ва лекин ушбу гапимга:
Дилимда нафрат ҳам буюқдан буюқ.

1975

ИККИ СОНИЯ

Уйда тинчи бўлсин йигитнинг аввал,
Сўнгра бутун бўлсин дўстнинг имони.
Инсон юрагини тилкалар азал,
Шу икки нарсанинг буюк армони.
Биридан бошланар шу ёруғ олам,
Дунёга кўйилгай осто надан от.
Уйдан боши эгик чиқдими одам,
Ўша кун тор унга буткул коинот.
Йигитнинг бир умри дўст билан бутун,
Дўст билан шириндир заққум ҳаёти.
Дўстдан панд еган чоғ не бор унинг-чун!
Бад унга ҳаттоки бор инсон зоти.
Буюк шиддат билан жўшаркан ҳаёт,
Шу икки нарсага биз гоҳ бепарво,
Шу икки сония ҳамдам бўлган зот,
Менинг назаримда, энг азиз сиймо.

1975

* * *

Тингла, бу абадий садо бўлади,
Гадонинг душмани гадо бўлади.
Иккови бир-бирин егунича то
Ўртада бу дунё адо бўлади.

1975

ТАРБИЯ

*Кенгга кенг дунё,
Торга тор дунё.*

Халқ мақоли

БИРИНЧИ МАШГУЛОТ

Жиндаккина феълингизни
Кенгроқ қилинг, домлажон.
Шунда сизга кўрингайдир
Кўп фалати бир жаҳон.
Дўлтингизни олиб аввал
Қаранг у ён-бу ёнга,
Дуч келгайсиз энг аввало
Ҳаёт деган уммонга.
Унда сиздан бўлак яна
Яшайди кўп одамлар,
Елкасида ва ё шодлик,
Ва ё ташвиш, ё фамлар.
Дунёи хос деб аталган
Бир макон бу, ҳар қалай,
Фам-ташвишлар қаторида
Шодлик ҳам бор бир талай.
Билмам нечун сизнинг нигоҳ
Бир нуқтада қотмишдир,
Чексиз гўзал дунё сиздан
Юз ўгириб ётмишдир.
Кенг бўлсангиз у чоқ сизга
Очилигайдир кўп сирлар,
Кўрингайдир кўхна мозий
Ва келажак асрлар.
Ҳиммат нури кўзингизни
Ёритолса бирор он,
Руҳингизга ҳимматлар ҳам
Ёғилгайдир бегумон.
Хўжа Ҳофиз девонида
Булбул сайрар сиз учун,
Оҳ, нақадар гўзал эрур,
Бу тириклик, бу очун,

Мусиқа бор бу дунёда,
Шеърият бор, сафо бор,
Худди гўдак кулгусидек
Муҳаббат бор, беғубор.
Мовий кўкка боқиб тингланг
Турфа қушлар воласин,
Субҳидамда ошиқларнинг
Чеккан чексиз ноласин.
Энди азиз каллангизни
Буриб бу ён бир қаранг,
Товланади тегрангизда
Япроқчалар тилла ранг.
Сиз уларнинг ҳолига ҳам
Боқинг холис ниятдан,
Япроқ умри битса ҳамки,
Сўзлар абадиятдан.
Қаранг, нечоғ гўзал эрур
Қир-адирлар зангори,
Шундай пайтда дилни ўртар
Мангу яшаш хумори.
Жилдираган ариқчага
Бир зум қараб тургайсиз,
Ишонаман, сиз унда тоғ
Қорликларни кўргайсиз.
Очилгайдир қаршингизда
Юксак юртлар жамоли,
Чўққиilarга тирмашгайсиз
Тоғ серкаси мисоли.
Оқшом чўқар ва қўзғалар
Тўрт тарафдан шамоллар,
Оғушига олгай сизни
Кўп ажойиб хаёллар.
Юлдузларга термулгайсиз,
Учгайсиз ҳам самога,
Кўз ташларсиз кенгликларга,
Уфқларга, дунёга.
Қалбингизда на адоват,
На ҳасад бор, на кадар,
Руҳингизда улуғворлик
Ҳис қилгайсиз бир қадар.
Энди ерни фаҳм эттайсиз,
У нок каби йўқ банди,

Домла, мўъжаз шу нок узра
Яшар одам фарзанди.
Одам эса сизга қавмдир,
Замондошдир, ўлкадош,
Бирор йиртқич даф қилганда
Ёнингизда елкадош.
Аниқ шариф шажарангиз
Қаршиングизга келсин сал,
Сиз ҳам одам фарзандисиз,
Унутмангиз ҳеч маҳал.
Руҳингизни чулғамаса
Ногаҳоний бир бало,
Миянгизнинг тархи энди
Очилгай иншоолло.

ИККИНЧИ МАШГУЛОТ

Баъдаз, мавжуд аҳволингиз
Тавсиф этиб атайин
Бошқаларга ибрат учун
Майли айтиб ўтайнин.
Тирик жонсиз, тонгми-пешин
Ўрнингиздан турасиз,
Одамсиз-ку, балки аввал
Туш таъбирлаб кўрасиз.
Ўнгингизда тунов кечган
Турли бадбин ўй-хаёл
Тушингизда дўзах бўлиб
Акс этгандир, эҳтимол.
Қийин сизга, қандоқ қилиб
Бу ҳолатдан қочасиз.
Захрингизни энг аввало
Болаларга сочасиз.
Курбон бўлар балки илк бор
Шўрпешона бир чивин,
Тутиб олиб эзгилайсиз,
Тополсангиз гар эвин.
Болалар-чи, оҳ, болалар,
Тарбиясиз, қув, суюқ,
Шох билан дум битса агар
Шайтондан ҳеч фарқи йўқ.

Хотин-чи, у хотин эмас,
Дам сўзлаб, дам тўхтайди,
Супургини миниб чопган
Алвастига ўхшайди.
Қовоқ уйиб, ижирғаниб
Энди ишга жўнайсиз,
На бирор гап чиқар сиздан
Ва на гапга унайсиз.
Кучукчангиз дуч келади,
Бир тепасиз, “ванг” дейди,
“Ванг” дегани, ким билади,
Балки “феълинг танг” дейди.
Остонадан бошланади
Ана энди кенг ҳаёт,
Сиз-чи, ишга йўл оласиз
Фоят-фоят эҳтиёт.
Мусофирдек кўча-кўйда
Жовдираисиз аланглаб,
Бамисоли ўғри мушук
Тўрт томонга жаланглаб:
Ана, Тошмат ўтиб кетди,
Пайқамади муттаҳам!
Пайқаса ҳам сўрашмади,
Демак, душман ўша ҳам!
Чойхонада уч-тўртта чол
Чақ-чақ сұхбат қилади,
Сұхбат қайда, айнаганлар,
Сизни фийбат қилади.
Жой бермади трамвайда
Аллақандай бир башант,
Касофатнинг касри уриб
Яна тағин сиз тажанг.
Ишхонангиз қарши олар
Пештоқлари ялтираб,
Гул тувакда чечаклар ҳам
Нозиккина қалтираб.
Сиз-чи, дилгир, маҳкамага
Уввос тортиб кирасиз,
Ўзингизни ўргимчакдек
Бир бурчакка урасиз,
Варақлайсиз газетани
Дуч келасиз оловга:

Мукофотни беришибди
Падарлаънат ановга.
Ахир қандоқ бедодлик бу,
Миянгизга урар қон,
Қолмаётир бу дунёда
Хаё, инсоф, дин, виждон!
Бошланади яна қайта
Ифво, фитна, ур-сурлар,
Одам эмас бу юрганлар,
Худо ҳаққи унсурлар.
Кўлингиздан келса агар
Тўкиб тимсоҳ ёшини,
Айлантириб ташлайсиз ҳам
Ҳатто дўстлар бошини.
Ташқарида эса ҳаёт
Уммон каби тошади,
Қитъалардан қитъаларга
Чўнг булутлар ошади.
Қайлардадир ҳал бўлади
Буткул эллар тақдири,
Юз йилларга арзигай гоҳ
Сониялар ҳар бири.
Буюк тарих чархпалаги
Ғувлар бетинч ҳар қачон,
Коинотта сачраб кетар
Учқунлари, алъамон.
Бизга насиб бўлмиш яшаш
Шундоқ улуғ дунёда,
Буюк инсон қадамидан
Гурсиллар ер зиёда.
Энди гапни очиқ айтсам,
Кўрсичқонга ўхшайсиз,
Бароқ мошни кўрмагунча
Ҳеч бир гапни уқмайсиз.
Ҳолбуки, эл ҳиммат, меҳри
Пешкаш эрур сизга ҳам.
Дил очсангиз, жамъи одам
Дилкаш эрур сизга ҳам.
Ҳолбуки, эл заҳмат чекар
Сиз учун ҳам кун-бакун

Сиз-чи, фақат ўйлагайсиз
 Ўзингизни, хўш нечун?
Не бир зотлар умрин тикиб,
 Кезади кўк бағрини,
Сиз бўлсангиз кўрмагайсиз
 Бурнингиздан нарини.
Тушунаман, умр қисқа
 Ҳақ дасти ҳам қисқароқ.
Аммо нечун шу умрда
 Бунча бадбин яшамоқ?
Бир қарашда закий зотсиз,
 Бир қарашда доносиз,
Аммо, билмам, қай жин урмиш,
 Яшолмайсиз ифвосиз!
Одам ўғли, завол кўрма,
 Бўлма одам заволи,
Тушунтиридим ҳамма гапни
 Кўрга ҳасса мисоли.
Эндиғи сўз... хуллас, феълни
 Кенгроқ қилинг, домлажон,
Сизнинг кўрган бу кун эса
 Кун эмасдир ҳеч қачон.

1975



* * *

Ошиқни тасвиirlай дегандим бирров,
Беҳуда ишни қўй дедилар дарров,
Уйкуда сўзлаган кимсадек ошиқ,
На ўзи тушунгай, на уни бирор.

1975

* * *

Дунёда ҳар ишнинг бордир ўз гали,
Олис хотиралар ҳамроҳ ишимга.
Шоирлик ёдимдан чиққан маҳали
Чўпонлик йилларим тушар эсимга.

Қўйлар сурувини ҳайдайман борҳо,
Сибизға чаламан баъзида бегам.
Сурувим ичида кўраман гоҳо
Мени чўпон деган кимсаларни ҳам.

1975

* * *

Сен менинг исмимсан, номимсан тугал,
Сен буюк бобомнинг асл макони.
Дедим ва дегайман ҳамиша дангал,
Самарқанд дегани ўзбек дегани.
Қайта туғилмоқлик насиб этса гар,
Самарқанд бўларди жойим муқаррар.

1975

ҚИШ КЕЧАСИ

Тақиллайди эшик ногаҳон,
Кимсан? — дейман, тугаб саботим.
— Очгил, — дейди. — Мен сенга мөхмон,
Билмоқ бўлсанг — Ташвишдир отим.

Тақиллайди эшик ногаҳон,
Кимсан? — дейман тугаб саботим.
— Очгил, — дейди. Бу — мен, қадрдон,
Билмоқ бўлсанг — Бардошдир отим.

Ташқарида шамол увиллар,
Туни бўйи юммайман кўзим.
Туни бўйи баҳс қиласр улар,
Тун эса-чи, жуда ҳам узун.

1976

СЕНИНГ ОВОЗИНГ

Ёмғир ёғаётир кўқдан, отажон,
Жилғалар кўчада дарёдай тошар.
Жажжи опаларим эса бу замон,
Жилғалар бўйида жилғадай шошар.

Менга сизнинг кўз ёш ёмғирдай абад,
Масканимга сингай оҳанг сингари.
Менинг кулогимга етгайдир фақат,
Сизнинг қалбингизнинг соғинч унлари.

1976

ТАФАККУР МОНОЛОГИ

I

Билмасман, қайдадир менга ибтидо,
Билмасман, қайдадир менга интиҳо.

Асрлар қаъридан ўтаман сокин,
Менга бари бирдир — ким кул, ким ҳоким.

Сизнинг күтқу билан зарра ишими йўқ,
Шундоқ салобатли карвонман улув.

Менинг қўнғирофим эшитолган зот,
Ўзин баҳтли деса арзир умрбод.

II

Мени атадилар худо деб аввал,
Пайғамбар дедилар ва даҳо тугал.

Буюкман баридан минг-минглаб карра,
Худо ҳам, даҳо ҳам мендан бир зарра.

Мен асли ҳосила эрурман гарчанд,
Лекин бутун ота — кечаги фарзанд.

Теграмда чарх урсин, майли, замон, вақт,
Мен-чи, ўз-ўзимга масъулман фақат.

Қаршимда гердаяр тоғлар ҳам бекор,
Улар менинг учун шунчаки сангзор.

Баҳри Мұхит нима? Нима у денгиз?
Чайқалган сувлардир, рангиз ва нурсиз.

Офтоб, сайёralар чарақлаб ётар,
Мен учун оддий ҳол: борлиқ мухтасар.

Ҳайрат нималигин билмасман асло,
Ҳатто чексизлик ҳам идрокимга жо.

III

Ҳа, менга ҳеч эрур коинот, жаҳон,
Лекин мени қийнар фақат бир армон.

Мени қачонлардир яратган зотдан,
Қарздорман, яъниким, одамизоддан.

У гоҳ буюк эрур, гоҳ забун, барбод,
Сира тушунмадим мен уни, ҳайҳот.

Фақат идрокимга занжирдир шу ғам,
Сени эплолмадим, жувонмарг одам.

1976



БИР ТАНИШИМ ҲАҚИДА БАЛЛАДА

Эслайман, болалик чоғимда бир кун
Безори тош отди менга бесабаб.
Йиғладим бир четда бағрим бўлиб хун,
Атрофга кўз тикдим ночор, мўлтираб.
Албатта, бирор-бир мадад истардим,
Ахир, тушунарли бундақа ҳолат.
(Бола бўлгансиз-ку, сизлар ҳам қадим,
Демакки, эсласам тортмам ҳижолат.)
Хуллас, кимдир келиб йўл канорида
Саёқ рақибимни ушлади маҳкам:
— Қутуриб қолдингми кучинг борида,
Бошингга тушганда биларсан, бўтам...
Анча мулзам қилиб жўнатди уни,
Сўнг келди мен томон жилмайиб, ёввош:
— Сен ҳам тортаверма ҳадеб бурунни,
Керак бўлар, ука, ҳали кўп кўз ёш...
Хушёр тортиб қолдим шунда, албатта,
Ҳатто дадиллашиб қолгандим бироз.
Унинг-чи, кўзлари порларди катта,
Мард ва майин эди ундаги овоз.
Дедим: — Хизрмисиз, бобом айтгандек,
Мадад берасизми шундай чоғларда?
У маъюс жилмайиб, қош чимирди тек:
— Боласан, хаёлинг кўп узоқларда.
Майли, Хизрманми ё Хизр эмас,
Ҳар нечук турибман қошингда аён.
Бирор ножӯя иш рўй бердими, бас,
Кимдир ажрим қилса — ўша мен, ўғлон.
Болага, албатта ҳикмат бир чақа,
Чиллак ўйин каби аниқ тасаввур.
У исмин айтди-ю, кетди бир ёқقا,
Мен ҳам ҳайё-ҳайт деб кетдим ҳайтовур,
Ким кўп бу дунёда, ҳар хил бола кўп,
Биримиз бесарроқ, биримиз ёввош.

Мен ҳам қанчасига озор бердим хўб,
Қанчасин дастидан тўқдим ҳам сўнг ёш.
Бироқ, йиллар ўтиб, улғайган сайин
Ўйга келар экан бошқача гаплар.
Ўйга солар экан, тайин-нотайин,
Ҳар хил нарсадаги ҳар хил тарафлар.
Куршай бошлар экан миянгни ров-ров,
Нега? Нечун? — деган саволлар ўжар,
Дейлик, фалончининг ўғли-ку, меров,
Нега имтиҳондан қатнашмай ўтар?
Бунақа гапларни тафтиш қилишни
Ўргатмаган эди агарчи отам.
Лекин кўра бериб шул каби ишни
Лол қота бошладим энди чинакам.
Буткул ҳодисотнинг сабабин аммо
Англаб етмоқликка ўтмасди тишим.
Шундай маҳалларда кўзимга гўё,
Кўриниб кетарди ўша танишим.
Бир кун гузарда денг, Тўхта лапашанг
Сув тўла кўзасин чил-чил синдириди.
Ўйга келгач эса, айбдор деб қаранг,
У ўтай акасин тутиб урдирди.
Тавба демоққа-ку, ёш эдим ҳали,
Бовужуд, қайга ҳам етарди арзим.
Ўша танишимга ўша маҳали
Ҳатто хат ёзмоққа эттандим жазм.
Қайга жўнатардим мактубни, аммо
Қайларда юрибди ғаройиб ул зот.
Олис кечалари у билан танҳо
Суҳбат қуарар бўлдим хаёлан бот-бот.
Васваса дейсизми, рўё дейсизми,
Доно фикрингизга ҳавола бу ҳол.
Бир кун забтга олиб тасаввур изми,
Тушда кўрдим уни аниқ ва яққол.
Арзим баён этдим биратўласи,
Нега келмайсиз деб тутдим сўроққа.
Тўхта лапашангнинг ўтай акаси
Кетиб қолганини айтдим, узоққа.
У маъюс жилмайди: — Биламан барин,
Ахир, юмушим кўп оламда, укам.
Бирини эпласам, эплолмам бирин,

Қандай улгурайнин, ёлғизман мен ҳам...
Шундай деб танишим кўздан йўқолди,
Яъни, тўғрироғи, бузилди уйқум.
Унинг шаҳди аммо ёдимда қолди,
Мардона эди у ҳамда камсуқум.
Йиллар ўтиб кетди, озми-кўп, мана,
Оlam ишларидан бўлдим хабардор.
Биламан, Хизр ким ва бидъат нима,
Биламан, ёшлиқ ҳам кетди бетакрор.
Бари ўтиб кетди бир туш мисоли,
Эслайман гоҳ маҳзун, гоҳида қувноқ.
Фақат ўша сиймо, унинг хаёли
Менинг шууримга ўрнашди мутлоқ.
Дунё ишларига бўлиб юзма-юз,
Гоҳо келолмасам ўзим-ўзимга,
Унинг дийдорини қўмсайман ҳануз,
Кўринсайди дейман бир зум кўзимга.
Балки кўришмоққа энди фурсат йўқ,
Балки кута бериб ўзим ҳам толдим
Ва лекин дунёда у зотнинг аниқ
Иши кўплигига ишониб қолдим.
Мехрибон устозлар назарида гоҳ
Унинг нигоҳини пайқаб қоламан.
Кимдир ҳушёр бўл, деб, айласа огоҳ,
Ўша учрашувни ёдга оламан.
Наби ҳам, расул ҳам эмас эди у,
Лекин у мен учун бекиёс, порлоқ.
Балки келмагайман энди рўбарў,
Лекин у йўлимни ёритган чароқ!
Унинг ёди билан умрим сарафroz,
Усиз ҳаёт менга машаққат эди.
Эслайман, қомати дол эди бир оз,
Номи эса унинг Ҳақиқат эди.

1976



МАЛОМАТ ТОШЛАРИ

Хушёр бок, то фоний умр кечади,
Тегрангда турфа хил тошлар учади.
Бири қора ҳасад ё фараз тоши,
Бири ёвуз туҳмат ё мараз тоши.
Майлига қай бири келмасин, қачон,
Улардан муддао ҳамиша аён.
Улар сабр косанг тўлдирмоқ бўлар,
Улар умринг гулин сўлдирмоқ бўлар.
Бошимдан ўтганин этсам гар баён,
Хушёр бок уларга ҳамиша, ўғлон.
Ва лекин дунёда ўзга тош ҳам бор,
У сенга етказмас беҳуда озор.
У асло кўксингта ўқ каби ботмас.
Танинг зирқиратиб, бурнинг қонатмас.
Умринг йўлларига бўлмагай у банд,
Ё кўнгил шишасин этмагай парканд.
Сен томон нолакор, қай он етар у,
Faфлат фариштасин бедор этар у.
Идрокнинг мавжига теккани замон,
У мудроқ руҳингта солгай ғалаён.
У виждан тамали, диёнат тоши,
Маломат тоши бу, маломат тоши!
У балки аликсиз қолган бир салом,
У балки авжида бўлинган қалом.
У балки дўстингта очиб дил, юрак,
Тўйида айтилмай қолган бир тилак.
Фарзанди дуч келгай балки аломат,
Жажжи қўлларида санги маломат.
Қабр тепасидан тош ҳайкал бокур,
Олис хотиралар гулханин ёқур.
Сен унга сўнгти дам эгганмидинг бош,
Оҳ, нечоғ шафқатсиз тош эрур бу тош.
Инсоннинг то фазлу фалокати бор,
Унинг бир-бирига маломати бор.

Ташрифга кўз тиккан беморлардан то
Шоҳлар дилигача маломатдир жо.
Бахтсиз кимсаларнинг кўздаги ёши,
Асли, яратганга маломат тоши.
Жанглардан қайтмаган фарзанди учун
Оналар дилида маломат тутун.
Қадим одамзодга неча минг замон
Маломат тошлари ҳамроҳ ҳар қачон.
Асрый кошонага то оғат келур,
Нолакор мозийдан маломат келур.
Минг йиллаб самога боқди одамзод,
Фалақдан тилади мадад ва имдод.
Ва лекин топгани фалокат бўлди,
Шул сабаб ҳар сўзи маломат бўлди.
Чорасиз Машрабнинг қиёмати бу,
Инсоннинг худога маломати бу!
“Мен одам эдим-ку, инсон фарзанди!”
Бу — етимFaфурнинг маломат банди.
Ҳануз сарҳадлардан фамгин сас келур,
Маломат тошлари басма-бас келур.
Одамни маҳв этур фарзанди одам,
Одам эрур аммо томошабин ҳам.
Етим гўдакларнинг кўздаги ёши,
Бу — жумла жаҳонга маломат тоши.
Гар буюк замонга фарзанд эрурмиз,
Адолат бирла гар пайванд эрурмиз.
Одам қадри магар буюқдан буюк,
Лекин қай дилларда маломат тугук.
Не деб сўзлаганкин, боқиб биз сари,
Бетимсол Ойбекнинг ҳорғин кўзлари?!
Сарғайган саҳфалар аро боқиб тек,
Қодирий қабрини сўрар Отабек.
Йироқ соҳилларда тарагиб оҳи,
Кезар Альяндининг қонли арвоҳи.
Ҳа, қону тер билан йўғрилиб кам-кам,
Шундоқ барпро бўлди даврон муҳташам.
Ҳар лаҳза мозийга гарчанд кетажак,
Лекин олдда бизни кутар келажак.
Гар қолур биздан ҳам эзгулик, карам,
Лекин дегайларми бизни мукаррам?!

Мудроқ виждан учун, сохта шон учун,
Бехуда тўкилган қанча қон учун,
Заминнинг тузалмас жароҳати деб,
Мовий дунёларнинг ҳаловати деб,
Бир кун эгилмасми одамзод боши,
Бизга ҳам ёғмасми маломат тоши?
О, буюк мавжудот, ҳазрати инсон,
Сенинг аслинг гаҳи фафлати инсон.
Гаҳи сен баркамол бўлиб кўриндинг,
Гаҳи бечораҳол бўлиб кўриндинг.
Юлдузин бошингдан сочса ҳам само,
Гоҳо ўз қадрингни билмадинг, аммо.
Эзгулик йўлида ҳар битта қадам
Раҳмат муҳри эрур сенга, эй одам!
Оlam узра буқун кўтармишсан қад,
Унутма, буюксан, буюксан беҳад.
То кезар бошингда ҳиммат қуёши,
Сенга ёғмаса бас, маломат тоши!..

1976



ХОТИРА

Билмадим, сен қандай йўлчи қуш эдинг,
Бир зум қўниб ўтдинг ошиёнимга.
Билмадим, сен қандай сирли туш эдинг,
Кўз очсан, ҳасратлар солдинг жонимга.
Менга-ку, ариқда оққан сувни ҳам,
Гоҳо миннат билан узатди дунё.
Нетай полапоним, бу зиқна олам,
Сенга ўшани ҳам кўрмабди раво.
Яшамоқ сенинг ҳам ҳаққинг эди-ку,
Ажал кўнғирофин не учун чалдинг.
Сен онанг дилида тирик бир қайфу,
Отанг юрагида чакиндай қолдинг.
Келиш-кетишингдан не эди матлаб,
Не учун бошимга солдинг бунча фам.
Анор донасилик қаторинг ўртаб,
Бағримдан ситилиб кетдинг-ку, болам...

1976

ОМАД ҲАҚИДА

Омад деган нарса дунёда бор гап,
Бу ерда ҳар қандай хурофот бекор.
Ҳозир сен шеъримни турибсан тинглаб,
Демак, сен — ҳаётсан, омад сенга ёр.

Бошқача қисмат ҳам мавжуд-ку, ахир,
Балойи қазодан асрасин зинҳор,
Мен сенга шеър ўқиб турибман ҳозир,
Демак, мен — ҳаётман, омад менга ёр.

Қолган ўртадаги гапларни энди
Нима деб атасанг сенда ихтиёр.
Фалакда ҳаттоки қуёш бекинди,
Бизлар барҳаётмиз, омад бизга ёр!

1976

СУРАТ ВА СИЙРАТ

Майли, сувратимга боққилу қувон,
Лекин сийратимга ташлама назар.
Бир ёқдан туганмас бахт берди жаҳон,
Бир ёқдан туганмас ўқинч ва кадар.

Чароғон умримни ёритган қүёш,
Торгина кулбамга боқмади гоҳо.
Заминдек айланган савдоли бу бош
Қолди қисмат ичра заминдек танҳо.

Оҳ, нечоғ рангларга тўлиқ бу жаҳон,
Оҳ, нечоғ ширин шу тириклиқ, кадар.
Майли, сувратимга боққилу қувон,
Фақат сийратимга ташлама назар.

1976

ТАҚЛИДЧИ ШОИРГА

Тақлид қила бергин етса бардошинг,
Модомики сенда бор экан ҳавас.
Фақат бир қора кун кўтариб бошинг,
Асл нусхаман деб дод солмасанг бас.

1976

БАҲОР СЕНИКИДИР

Қизим Юлдузга

Баҳор сеникидир,
Югур энтикиб,
Югур адирларнинг лолазорига.
Мен эса қувонай кўзимни тикиб,
Тоғларнинг ҳаётбахш, тоза қорига.
Баҳор сеникидир,
Толма елишдан.
Югур, соchlарингга баргаклар тақиб.
Мен эса қувонай қаҳратон қишидан
Омон чиқа олган илдизга боқиб.

1976

СУРУР

Қиши чоғин беғубор тонгидир ушбу,
Тўрт тараф қор ичра — томоша кўзгу.
Ҳали кўзларингда новвотранг уйку,
Ҳар нечук, наҳоринг муборак бўлсин!
Не баҳтки, сен билан эгизак сурур,
Майли баҳордир у, майли қиши эрур.
Осойиш замонда қалбингда гуур,
Ватанинг, диёринг муборак бўлсин!
Сендан нелар кутар бу олам-жаҳон,
Бир ёнда замину бир ён қаҳқашон.
Эҳ-ҳе, сафларинг ҳам неча минг, милён,
Шу чексиз қаторинг муборак бўлсин.
Ҳали тонг қуёши тоғу тощдадир,
Не ёруғ ўйлар ҳам мудроқ бошдадир.
Сен олти, бобонг-чи олтмиш ёшдадир,
Қўшалоқ баҳоринг муборак бўлсин.

1977

МОМО ОФТОБ

Энг кичик заррадан Юпитергача
Узинг мураббийсан.

Faafur Fulom

Эй, сен момо қүёш, эй биби офтоб,
Ёлғиз сен чароғсан, ёрсан бошимда.
Зардуштий мисоли юкиниб шу тоб,
Үтиниб туурман йигит ёшимда.
Сўнгти дам чорасиз Муқанна сифат,
Дил сўзим ўзингта айтай саросар.
Офтобим шу келар йилда ҳам фақат,
Шодликлар таратгин элга баробар.
Зулмат гўшаларни тундан эт фориғ,
Бахт томсин шуълангнинг зар қанотидан.
Офтобим, ҳимматинг тутмагил дариғ,
Дунёда ҳеч битта инсон зотидан.
Ойдин деразадан кириб бор аввал,
Умидвор беморнинг хонаси томон.
Бахш этгин унга ҳам умри мукаммал,
У ҳам баҳорларга етолсин омон.
Тонгти шуъланг каби тарат табассум,
Маъсум гўдакларнинг дудоқларига.
Қатра ёш томмасин асло, бирор зум,
Мунис оналарнинг ёноқларига.
Балки саҳар чоғи кўз очиб ўқтин,
Кекса чол сен томон боққай интизор.
Балки у тилагай умридан бир кун,
Офтобим, унга ҳам раҳм эттил зинҳор.
Офтобим, гарчи бу коинот аро
Мўл сенга айтгулик орзу ҳам тилак,
Мангубир армонга бовар эт аммо,
Ҳануз кўп дунёда муз қотган юрак.
Офтобим, майлига, бир тонг, бирор зум
Тафtingta чулғама дала-тузларни,
Ўша зотларга ҳам қилгил тараҳум —
Эрит диллардаги қотган музларни.
О, қанча юракни этмишdir асир,
Хасад деб аталган қора бир бало.

Офтобим, шулар ҳам кун кўрсин ахир,
Зулмат қалбларига юбор нур-зиё.
Сенинг-ку, даргоҳинг беҳад, бепоён,
Мана бу Farb бўлса, мана бу Машриқ.
Пойингда бу жаҳон мисли бир ошён,
Инсон бамисоли сочилиган тариқ.
Устоз лутф этгандек, оламда не бор —
Барига мураббий сенсан доимо.
Офтобим, шу мунис заминни зинҳор —
Мехру шафқатингдан этма мосуво.
Дўстлар сафида шод тарона айтиб,
Мен ҳам дилдан сенга қилурман хитоб,
Ҳар ўтган зум учун шукронга айтиб,
Сенга талпинурман, эй момо офтоб!

1977



НИСБИЙЛИК

Жуда яхши! — деймиз мана бу нарса,
Гёё хукм каби янграр сўзимиз.
Ўйлаб кўрганмизми ҳеч бирор марта,
Киммиз ўзимиз?
Жуда ёмон! — деймиз мана бу нарса,
Гёё хукм каби янграр сўзимиз.
Ўйлаб кўрганмизми ҳеч бирор марта,
Хўш, ким ўзимиз?
Кимгадир ёқамиз биз ўзимиз ҳам,
Кимгадир ёқмаймиз биз ҳам ўзимиз.
Шунаقا чархпалак экан бу олам,
Демак, нисбий эрур ҳар бир сўзимиз.

1977

МИШ-МИШ

Унинг миш-мишидан ранжиманг асло,
Нима бўлса асли наслида бўлган.
Она қорниданоқ ўзи ҳам ҳатто,
Асли миш-миш билан дунёга келган.

1977

ФАЗАЛ

Бу ишқ сириин китоб этдинг, китобинг ичра мен борман,
Ўкурман деб хитоб этдинг, хитобинг ичра мен борман.

Ярашгайдир, ажаб, сенга ажаб нозу таманнолар,
Кетурман, деб шитоб этдинг, шитобинг ичра мен борман.

Юзинг ҳажри билан оқсан лаболаб чашм селобин —
Ичурман, деб шароб этдинг, шаробинг ичра мен борман.

Умид узгил, дединг ошиқ, муҳаббат риштасин узгум,
Узурман, деб азоб этдинг, азобинг ичра мен борман.

Қаён қолди ўшал сўзким муҳаббат кўшкини, эй ёр,
Тузурман, деб сароб этдинг, саробинг ичра мен борман.

Дилимда қолган ушбу ҳар на манзил кулбаи ишқни —
Бузурман, деб хароб этдинг, харобинг ичра мен борман.

Муҳаббат гулшани ичра олиб Абдулланинг қалбин,
Чалурман, деб рубоб этдинг, рубобинг ичра мен борман.

1977

ҚОР

Бул ажойиб кун эрурким,
Ялтирар ҳар ёнда қор.
Кўқда офтоб, ерда юлдуз,
Гарчи йўқ осмонда қор.

Бул ғаройиб шеър недур деб
Парпирар Юлдуз қизим.
Мен дегайман, боқ, азизим,
Хадра-ю Дўрмонда қор.

Еттига тўлмиш, тўкилмиш
Катта қизнинг тишлари.
Оқ садафми ушбу ёнда
Дур каби дандонда қор.

Суҳбат айлаб турган эрдим
Мен Зариф қизчам билан,
Кимдир айтди: кўп йўтајманг
Иккингиз, балконда қор.

Ушбу қорким эрта-индин
Сув бўлар, бўстон бўлар.
Сочда кўрдим тўртта тола
Бул асл бўстонда қор.

1977

ТАРЖИМАИ ҲОЛ

Дўстлар учрашади: — Салом! — Яхши қол!
Аслида мана шу таржимаи ҳол.
Ганимлар дуч келар — жанг бўлар пухта,
Таржимаи ҳолга қўйилар нуқта.

1977

* * *

Асқад Мухторга

Туман тушаётир қирларга сокин,
Дўрмон боғларида билтур қаҳратон.
Мажнунтол уватда ҳоргин олар тин,
Оппоқ соchlарини ёйган паришон.
Ногоҳ уйқу ичра қарсиллар эман,
Атрофда сукутнинг ҳоргин нафаси.
Балки далаларга чўккан бу туман,
Йироқ юлдузларнинг сирли шарпаси.

1977

ЙИЛЛАР АРМОНИ

Кимгадир яхши гап айтдик, биродар,
Кимдир бир умрга раңжиб ҳам кетди.
Кун кеча ёш дердик ўзни бир қадар,
Бугун-чи, балоғат пайти ҳам етди.

Инсон ўз умрини ўйласа кўп вақт
Қийнайди ўзидан ўтган қусурлар.
Кимгадир айтилмай қолган бир раҳмат,
Кимдандир сўролмай қолган узрлар.

Муқаммал кўрмоқчи бўлдик дунёни,
Етук бўлолмадик ўзимиз бироқ.
О, йиллар армони, йиллар армони,
Армон кўрмадим мен сендан буюкроқ.

Инсонга тобемас замон, инчунун,
Инсон юрагида аламлар қат-қат.
Фақат бир таскин бор, барчаси учун
Афсус чека билсанг — шу ҳам бир давлат.

1977

* * *

Коинот гултожи инсондир азал,
Унладир энг олий тафаккур, амал.
Ҳатто у тубанлик ичра ҳам танҳо,
Ё фалак, ижодинг бунча муқаммал.

1977

ЯНВАРЬ

Яна далаларнинг шовқини тинди,
Яна раққосадек тинди момиқ қор.
Январь оқшомлари, айвонда энди
Хаёл сурмакликни этдинг ихтиёр.

Бу — ойна кўл эмас, қишиш — бу, замҳарир
Кўнгил тубларидан сирли хаёллар.
Борлиқ ҳам мисоли ўйчан мусаввир
Нақш этмиш деразанг узра саволлар.

Зангори баҳорни ётар туш кўриб,
Қайдадир — уммонлар тубида қуёш.
Момо қишиш оқ жужун тўқир ўлтириб,
Келинчак заминга ягона сирдош.

Оппоқ рўмолига ўраб куртагин
Ухлайди қишиш бўйи бу зангор чирой.
Фақат, ором ол, деб сўйлаб эртагин
Кезади далалар тепасида ой...

1978

ИКАР

(Талабаларга)

Фазога илк бора қанот қоққанни
Икар деб атамиш хаёлан инсон.
Үзини беаёв ўтда ёққанни
Унутмай юради абадий жаҳон.

Икар битта эмас, йўқ, битта эмас,
Саноғи юлдузлар мисоли катта.
Кимки илк савобга из очдими, бас.
Шу йилнинг Икари бўлгай, албатта.

Яроғим йўқ дея илк бора қўлин
Саломга чўзган ҳам Икар аталгай.
Тарқ этиб фордаги асрый манзилини
Илк чайла тузган ҳам Икар аталгай.

Икардир Прометей номини олиб,
Ўт излаб худолар қошига борган.
Икардир илк севги домида қолиб
“Яллама ёрим”ни куйлаб юборган.

Одамзод бошидан ўтиб не кунлар,
Икарсиз қолмаган лекин ҳеч қачон.
Бирорин жигарин чўқиб қузгуналар,
Бирори ўтларда ёнган беомон.

Гуллар майдонида анқийди ҳануз
Жасур Брунонинг жизғанак дуди.
Ёвқур Спартакка бурайми ё юз,
Ё раб, Икар зотин борми худуди.

Нурга, рўшноликка баҳш этиб ўзни
Не зотлар ўтмади қадимдан қадим.
Не ажаб, ҳаттоқи Гулсара қизни
Икар деб аташга айласам жазм.

Жасорат тимсоли Икардир абад,
Жисми гар ўтларда кеттандир ёниб.
Музаффар фазогир учаркан баланд
Замона Икари деймиз қувониб.

Эй, менинг давроним, ўзинг босабот
Кўкда ҳам кўкрагинг кериб турибсан.
Ҳар қадам, ҳар зумда битта каашфиёт,
Бесаноқ Икарлар бериб турибсан.

Инсон даҳосига борми ҳад-худуд,
Соат чиқ-чиқидек тин олмас дунё.
Одамзод фор ичра қоларди маҳдуд,
Ўша — бир Икари бўлмаса, аммо.

Замину замонда ўзингсан ғолиб,
Эй, менинг диловар, оловқалб укам,
Сен ўзинг устозсан, сен ўзинг толиб,
Сен ўзинг армоним, умидларим ҳам.

Сен борсан — бу даврон дастурхонида
Офтоб ҳам бамисли қўрдан чиққан нон.
Сен борсан — нур порлар юрт осмонида,
Сен борсан — событидир бу қадим жаҳон.

Замон қўлларингдан тутмишдир бу кун,
Ўлмас боболарнинг руҳи бўлсин ёр.
Арслон жуфтгарчиси¹ каби ва лекин
Обрў юқи билан яшама зинҳор.

Ҳаққинг бор, дилингда аждод фуури,
Устозлар қошида, майли, этгин бош.
Унутма ва лекин, улар ҳар бири
Икар бўла олган — асрига йўлдош.

Фахру фууурингга келмасин малол,
Оқмаган дарёнинг номидир тақир...
Синмас қанот билан — буюклар мисол
Икар бўла олгин ўзинг ҳам ахир!

1978

¹ Жуфтгарчи — шер ва арслонларнинг ёмиш топишларида восита-чилик қилувчи ҳайвон.

ИЗҲОР

Қанча диёрларда сайр этиб юрдим,
Қанча манзилларда туздим ошён.
Ва буюк ҳикматга ахир юз бурдим,
Сийланган жойида азиздир инсон.

Юртим сенда экан насибам тугал,
Сен ўзинг масканим, сен ўзинг шоним.
Сен онам, сен синглим, ёримсан, азал,
Эй, жоним, жаҳоним — Ўзбекистоним.

Иста, қисматимга ўзинг бер барҳам,
Иста, яхши кунда номим қилгил ёд.
Менсиз ҳам мукаммал экан бу олам,
Менсиз ҳам баҳтга ёр экан одамзод.

Юртим, фақат сенинг қўлингдан тутиб,
Болангдай эргашиб кета олсам, бас.
Сен пири комилсан, мен сенга муҳиб,
Сени танимаган мени ҳам билмас.

1978

ТАЛАБА ЖУРНАЛИСТГА

Фунчага гул бўлиб очилмоқ учун
Мактаб яратмабди қодири фаффор.
Сенда-чи, газет бор ҳам дорилфунун,
Агар очилмасанг — ўзингсан айбдор.

1978

УМР ЎРТАСИ

Эсган бу илк баҳор шамолими ё
Қайдадир адашган кеч кузнинг саси.
Ранги ҳам, тузи ҳам ноаён дунё,
Қирқми ё эллик бу, умр ўртаси.

Хипчинин чух-чухлаб, этаги боғлиқ
Болакай шовқини келар у ёқдан.
Ўнгирин қоққанча кўк соқол отлик
Чиқиб келаётир ҳозир бу ёқдан.

Сокин муюлишда кокилин ўйнаб
Ёр кутган дилбарга тушдими кўзинг.
Ўтабер фалакнинг чархини ўйлаб,
У, сенинг эҳтимол, қизинг — юлдузинг.

Кўрган бир тушингга топмадинг таъбир,
Ям-яшил тоғ әмиш, теппаси-чи, қор.
Қай кун қабр узра ҳам дўстинг учун бир,
Ва ўзинг учун ҳам йифладинг бир бор.

Ажиб сукут ичра милтирас олам,
Офтоб ҳам қиздирав, тик келиб бу чоқ.
Самода камолнинг авжими, қайдам,
Ё завол наласин алами кўпроқ.

Қайга шошаётир умри равонинг,
Не топдинг ва недан бўлдинг мосуво?
Бир зум гупурса ҳам вужудда қонинг,
Бир зум барчасидан сукунат рано.

Ўтмишу келажак бир зум ёнма-ён,
Гоҳи паст, гоҳ баланд бўлиб сурингай.
Етти оғайнини ҳам кўқда ногаҳон
Савол аломати бўлиб кўрингай.

Қарайсан, йироқда бир йўлчи танҳо,
На ортга бурилар, на чиқар саси.
Бошда тож, дилда ўт ва қўлда асо,
Ўша кетаётган умринг ўртаси.

1978

ХАЙРИХОҲ

Ҳамдам ахтаради ҳар қандай одам,
Дўстим деб атайди топса бегумон.
Дўст излаб беҳуда кезгунча олам,
Оёғинг остига боқсанг-чи, инсон!
Мунис кўзларини тикиб, мўлтираб,
Болакай юзингдан узмайди нигоҳ.
Унда не мурод бор? Унда не талаб?
У сенга сомеъдир, сенга хайриҳоҳ.
Изингдан термулиб қолди кекса чол,
Кўзда таважжухи, дуоси тилда
У сенга тилади барака, иқбол,
Яна бир хайриҳоҳ топибсан элда.
Сен ганим атаган қай битта инсон
Сен учун қайдадир чекди танҳо оҳ.
Ўша ҳасрат ҳаққи келтиргум имон,
У сенга хайриҳоҳ, чиндан хайриҳоҳ.
Хайриҳоҳ одамлар, бетаъма ҳамдам,
Оlam бир бутундир шу инокликдан.
Ахир муҳаббат ҳам, ахир дўстлик ҳам
Бошланган эмасми хайриҳоҳликдан?
Улар бор — руҳингта ғам келмас ғолиб,
Майли, гадо бўлгил, майли, бўлгил шоҳ.
Гар дўст йиқитса ҳам оёғинг чалиб,
Бошингни силайди ўша хайриҳоҳ.

1978

ҲОЛАТ

Бир нафас қүёшни ўз ҳолига қўй,
Оташин дилингга этмагин қиёс.
Бир нафас қүёшдай кўрсатсин у рўй,
Бир нафас қүёшдай порласин қуёш.

Бир зум денгизга ҳам боққил бетуйғу,
Дема, ўйларимдай у теран, тенгсиз.
Бир зум балиқларга ватан бўлсин у,
Бир зум денгиз бўлиб гувласин денгиз.

Шамолнинг бўйнига осилма бир дам,
Елмасин майли у хаёлинг мисол.
Бир зум ўз ҳолича яйрасин у ҳам,
Бир зум шамол бўлиб тентисин шамол.

Бир зум сен заминни қўйғил бекутку,
У ахир кўп туйди туйгулар таъмин.
Бир зум майсаларга она бўлсин у,
Бир зум замин бўлиб яшасин замин.

Бир зум ўз ҳолимга қўй сен ҳам, болам,
Аён-ку менга ҳам Инсон матлаби.
Бир зум одам каби яшайин мен ҳам,
Мен ҳам яшай бир зум бир одам каби.

1978

ВИСОЛ

Қора денгиз шеъри

Сира кўз ўнгимдан кетмас ушбу ҳол:
Қоя теппасида ёнарди ялов.
Ҳарир либосини ечди-ю, дарҳол
Денгизга ташланди бир парча олов!

Бу не қисмат эрур? Бу не фалокат?
Бундайин висолга борми ҳеч чора?
Билмай не қиласин, тўлғаниб фақат,
Уҳ тортиб юборди денгиз бечора...

1978

ДИЕР

Кўпдир бу дунёда эллар, элатлар,
Қадим ва ноқадим халқлар, миллатлар.
Ҳар бири ўз тили, ўз эли билан,
Эл ичра ҳар бири ўз феъли билан,
Ранг-баранг суратли одамлар яшар,
Ишлашар, куйлашар ҳамда курашар.
Балки кимдир кимни учратмас минбаъд,
Айрича намоён шодлик ва кулфат.
Тўйлар давом этар, бола туғилар,
Чўққи забт этилар, китоб ўқилар.
Чорраҳалар тизгин, бозорлар фужон,
Улфатлар, мажлислар, йигин, оломон...
Ҳар бири гўёки ўз сири билан,
Алоқаси йўқдай бир-бири билан,
Мана шу турфа хил эллар барини,
Улфатни, йигинни, ёшни, қарини
Бирлаштириб турар бир ном дафъатан,
У она диёрдир, жонажон Ватан!
Кўпдир бу дунёда кентлар, овуллар,
Кўчалар, шаҳарлар, бекатлар, йўллар.
Кўмир сепилгандай тупроқлар кўрдим,
Не-не водийлару кумлоклар кўрдим.
Узоқ кутб ёқда музлар қарсиллар,
Жануб тоғларида гулхан чарсиллар.
Ўзича ҳар бири ўзга маъводир,
Ўзича ҳар бири ажидунёдир.
Ҳар бири гўёки ўз сири билан,
Алоқаси йўқдай бир-бири билан.
Аммо шу турфа хил, рангдор тупроқни,
Кентлар ва овуллар, шахру қишлоқни
Туташтираб турар бир ном дафъатан,
У она диёрдир, жонажон Ватан!

1978

* * *

(Ҳазил)

Оқ қофоз, юзингта сирим айтаман,
Мени бу сафар ҳам тинглагил, дўстим.
Кеча битта ўзим сайр этиб чаман,
Бир гўзал дилбарнинг домига тушдим.

Оқ қофоз, оқ қофоз, сенинг юзингда
Қанча гўзалларнинг тасвирлари бор.
Аммо минг йил ўтиб, келиб ўзингта
Бундай гўзал юзин кўрмабсан зинҳор.

Туардим қошида беҳис, безабон,
Андиша босарди елкамдан оғир.
Нетай, шеър бағишлиб қизга ўша он,
Байт айтдим ўзимни тутолмай охир.

У мени тинглади мисли нилуфар,
Ақиқ лабларида тер шабнам эди.
Лекин қайрилди-ю, шоир бўлсанг гар,
Шеърингни қофозга бориб айт, деди.

Оқ қофоз, юзингта сирим айтаман,
Мени бу сафар ҳам тинглагил, дўстим.
Кеча битта ўзим сайр этиб чаман,
Бир дилбар гўзалнинг домига тушдим...

1979

КАВКАЗ

Кавказни севаман.

Лермонтов

Яшил Нарзананинг ўтлоқларида
Ўйнайди шамол ва тойчоқ басма-бас.
Абадий сукут бор осмон қаърида,
Абадий сукунат қаърида Кавказ.
Замин арзандаси, э, кибор маъво,
Аянч қисматларга гувоҳ салтанат.
Бир елкангда Демон — у ёвуз даҳо,
Бир елкангда шоён инсони ҳазрат.
Кавказ, кимларга сен иқбол даргоҳи
Кавказ, кимларга сен қатағон диёр.
Сенда насорону ислом илоҳи
Сенда бари, бари бўлмиш барқарор.
Ёвуз кимсалардан қочиб, улоқиб,
Кимлар ахтармаган бағрингдан макон.
Мовий осмонинига ҳасратда боқиб,
Лермонтов пойингда берган эди жон.
“Кавказни севаман, севаман Кавказ”,
Бу — не даҳоларнинг эзгу нидоси.
Бу жойга келтиргай қувфин ё ҳавас.
Бу жойда ҳар зотнинг бор ўз худоси.
Одам зурёдига не бўлса жоиз —
Мен ҳам юрагимга ошно билганман.
Кавказ, қучогингта на бирон боис,
Увоқ туйфулардан қочиб келганман.
Қор каби покиза, тоғдек сарбаланд
Ўтюрак инсонлар дийдори армон.
Инсон дасти кўкка етса ҳам гарчанд,
Фарид туйфуларга тутқун у ҳамон.
Ҳамон қайлардадир ҳасад, хусумат
Энг олий ҳисларни топтагай мутлоқ.
Юксаклик истасанг тоққа чиқ фақат,
Теранлик истасанг денгизларга боқ.
Кавказ, сайёҳ сўзим маъзур тут бир дам,
Кавказ, ҳасратларга йўқ менда ружу.

Дунёда ҳиммат ҳам, дилозорлик ҳам
Инсон фарзандига ҳамроҳдир мангур.
На ҳайёт, на ўлим, на баҳт, на кулфат
Мени ҳам ҳайратга солгай бу замон.
Юксак чўққиларинг қўйнида фақат
Хаста юрагимга топсайдим дармон.
Кавказ, шарқ уфқида эй, тенгсиз диёр,
Эй, буюк шеърият дорилбақоси.
Ўзбек тупроғидан келибман бу бор,
Сенгадир ошуфта қалбим сафоси.
Энг олий ҳисларга ким бўлса гадо,
Кўтаргил, о, Кавказ, чўққилар томон.
Фарид туйғуларнинг бандасин аммо
Бўронларинг билан ғарқ эт беомон!

1979



ОНАЖОНИМ, ШЕЪРИЯТ

Ҳамдам бўлдинг мен билан
Ҳар қандайин кунларда,
Юлдуз бўлдинг чароғон
Энг қоронғи тунларда,
Судбат қурдик гоҳ шодон,
Гоҳо ҳазин унларда,
Энг олий баҳтим менинг,
Онажоним, шеърият.
Топган тож-тахтим менинг,
Жонаажоним, шеърият.

Сен билан бақамти то
Бу оламда юрдим мен,
Турфа хил инсонларни
Ҳам танидим, кўрдим мен.
Дўйстлар билан гоҳ шодон
Давронимни сурдим мен,
Энг олий баҳтим менинг,
Онажоним, шеърият.
Топган тож-тахтим менинг,
Жонаажоним, шеърият.

Эсингдами, азизам,
Ўтди қанча довонлар,
Ўтди қанча тўфонлар,
Ўтди қанча ёбонлар,
Яхшиликдан сўз очдик
Гоҳ дуч келса ёмонлар,
Энг олий баҳтим менинг,
Онажоним, шеърият.
Топган тож-тахтим менинг,
Жонаажоним, шеърият.

Ҳамдам бўлиб сен билан
“Ҳамса”дан сабоқ олдим,
Йироқ-йироқ юлдузлар
Сеҳрини дилга солдим,
Меҳмон эмас, қасрингда
Балки бир умр қолдим,
Энг олий баҳтим менинг,
Онажоним, шеърият.
Топган тож-тахтим менинг,
Жонажоним, шеърият.

Ҳар қисматта ҳар кимнинг
Даврони сабаб бўлгай,
Шеър ун чекса шоирнинг
Армони сабаб бўлгай,
Мен фаҳр этсам умримнинг
Ҳар они сабаб бўлгай,
Энг олий баҳтим менинг,
Онажоним, шеърият.
Топган тож-тахтим менинг,
Жонажоним, шеърият.

Гарчи мушкул кўп бўлди
Мўъжаз менинг муҳитда,
Зухур этдим барчасин
Ҳасратли бир сукутда,
Ҳақ йўлин топдим лекин
Сен билан ёнган ўтда,
Энг олий баҳтим менинг,
Онажоним, шеърият.
Топган тож-тахтим менинг,
Жонажоним, шеърият.

Англадимки, оламда
Юрт танҳо, Ватан танҳо,
Банд этган хаёлимни
Тенгсиз шул чаман танҳо,
Нокаслар эмас, йўқ, йўқ,
Ёлғиз сен баланд, танҳо,
Энг олий баҳтим менинг,
Онажоним, шеърият.

Топган тож-тахтим менинг,
Жонажоним, шеърият.

Умид ёрким, етгаймиз
Сен билан йироқларга,
Мақсадим ёқиб турган
У нурли чироқларга,
Дуч келмасак бас энди
Турфа хил фироқларга,
Энг олий бахтим менинг,
Онажоним, шеърият.
Топган тож-тахтим менинг,
Жонажоним, шеърият.

Ҳақ сенга мурод ўлсин,
Шавкатинг на зар, тилло,
Ҳақ деганинг умри ҳам
Ҳақ каби узун, илло,
Бошин этгай ҳамиша
Остонангда Абдулло,
Энг олий бахтим менинг,
Онажоним, шеърият.
Топган тож-тахтим менинг,
Жонажоним, шеърият.

1979



КАРВОН

(Устоз Миртемир хотирасига)

Сизга ташланмади, ох, не-не зотлар,
Улар ҳар мўминга ташланар эди.
Ташланмаса дили ғашланар эди,
Улар пучак жонлар, аҳли бедодлар.

Жиндеккина нозик феълингиз билан
Сокин бир қўнғироқ чалиб ўтдингиз.
Ёруғлик кунларни бедор кутдингиз,
Дардлашдингиз фақат элингиз билан.

Нечоғлик хокисор эдингиз, устоз,
Ялангтўш, меҳнаткаш, қалам деҳқони.
Қадим Туркистоннинг танти ўғлони,
Покиза эдингиз мисли оқ қофоз.

Не-не ўлкаларнинг не даҳолари
Сиз боис ўзбекча сўйлаган эди.
Сизнинг лафзингизда куйлаган эди,
Қошғарийдан қолган тил садолари.

Шеърингиз учкуру ўзингиз карвон,
Манзилга шошилмай келар эдингиз.
Ох, устоз, ҳолбуки билар эдингиз —
Югурик даврондир асли бу даврон.

Сизнинг армонингиз яшар қароғда,
Балки у бўйлагай асрларни ҳам.
Во дариф, мана шу сатрларни ҳам
Ёзсан бўлмасмиди сиз тирик чоғда.

1979

ЁШ РАССОМЛАРГА

(Жавлон Умарбековга)

Бамисли Бойсунда бойчечак гуллаб,
Тошкент томларида ёнди қизғалдоқ.
Ё товус патларин ёйғандай хиллаб,
Намоён бўлдингиз айни кутган чоқ.

Даврада ўрнингиз, ўтинг, марҳабо,
Юртимнинг фаройиб ўғлонлари Сиз.
Қайда юргандингиз ўйчан ва шайдо,
Ўзбек санъатининг имконлари Сиз.

Хозирча номингиз билмайди жаҳон,
Хозирча келинни чизмоқдан сиз шод.
Билмайсиз, елкангиз оша шодумон,
Кузатиб турганин Музаҳҳиб, Беҳзод.

Сизга муштоқ ҳали турфа оҳанглар,
Устоз Чингиз Аҳмар бор бу бўстонда.
Билмайсиз, сиз четдан ахтарган ранглар
Кўмилиб ёттанин Чаганиёнда.

Сизни кутиб тураг ҳали кўп маъни
Деҳқоннинг киприги узра қўнган чанг.
Сизни кутиб тураг оппоқ паҳтанинг
Бағрида яширин қанча сирли ранг.

Бугунча аслига ўхшаса сурат,
Заррин рамкаларга қувнаб солгайсиз.
Юз рангда товланиб келганда шуҳрат,
Сувратин чизолмай шошиб қолгайсиз.

Узун сочингизга бир кун оқ тушар
Сезмай ҳам қоларсиз умр ўтганин,

Чизган расмингизга ўғлингиз бесар
Нотаниш бўёқни чаплаб кетганин.

Майли юрсангиз ҳам дарвишдай кезиб,
Бўяб чиқсангиз ҳам майли жаҳонни,
Фақат бир ўтиңч бор, бергайсиз чизиб,
Онамиз суврати — Ўзбекистонни.

1979



БАҲОР ХОСИЯТИ

Қарангки, баҳорнинг вазифаси йўқ,
Бирор маҳкамадан маош олмас у.
Унга кор қилгайдир на араз, на дўқ,
Сафарга чиқдими, келмай қолмас у.

Юксак қасрларни буркар чечакка,
Гадо кулбасини безар саросар!
Эзгулик бобида фақат у якка,
Фақат у барчага тенг ва баробар.

Кўнгил даричасин очиб қўйинг ланг,
Фуссали дилда ҳам қулади баҳор,
Умидвор инсонлар, уни олқишиланг,
Фақат хосиятли бўлади баҳор.

1979

ИНСОН ҚАЛБИ

Инсон қалби билан ҳазиллашманг сиз.
Унда миллат яшар, унда тил яшар.
Унда аждод фахри яшайди сўзсиз,
Унда истиқомат қиласи башар.

Инсон қалби билан ҳазиллашманг Сиз,
Унда она яшар, яшайди Ватан.
Уни жўн нарса деб ўйламанг ҳаргиз,
Хайҳот! Кўзғалмасин бу Қалб дафъатан!..

1979

ШОИР ВА ИЛҲОМ

Айни тонг чоғида кўз очди Илҳом,
Боқди атрофига солланиб, күшод.
Порлади чашибида Илҳомий пайғом,
Илҳом кайфияти эди буткул шод.

Адо этмоқ учун эзгу хизматин
Илҳом қалби сўнгсиз шавқ билан тўлди.
Ўша ажиб ҳамда хуш кайфиятин
Таниш шоирига етказмоқ бўлди.

Шуълага чулғади қанотин аввал,
Юлдузлардан осди бўйнига маржон.
Тугиб юрагига ҳисларин тугал
Илҳом замин сари йўл олди шодмон.

Умидвор эди у, заминда бир кун
Бунёд бўлажакдир ажиб бир ижод.
Сатрида юлдузлар сочажак учкун,
Ўқиган ҳар бир дил фаровон, обод.

Илҳом пайдо бўлди таниш кўчада,
Ўшандоқ безанган — қанотлари зар.
Аммо бу гал уни хилват гўшада
Кутиб турад эди осий Ифвогар.

Зарра очирмасдан Илҳом кўзини
Ифвогар ненидир гапириб солди.
Шоир ўтирган деб сендан юзини
Маржонларин бир-бир юлқилаб олди.

Тортиб олди ҳатто зиракларин ҳам,
Илҳомнинг бошига солди қиёмат.
Илҳом нари кетди маъюс, боши ҳам,
Бу қандай кўргилик? Бу не маломат?!?

Илҳом шоир томон йўл олди ночор,
Дилида минг шубҳа, бошида минг ўй.
Аммо дарвозанинг тагида бу бор
Кутиб турар эди уни Ҳасадгўй.

Чўлтоқ ҳассасини ўқталиб Ҳасад
Илҳомнинг бошига туширди чунон:
— Ким қўйибди сенга парвозни, номард,
Бизлар ер юзида юрсак саргардон.

Шундоқ деб Илҳомнинг нозик ва майин
Қанотларин Ҳасад юлиб ташлади.
Бу ҳам етмагандек, шафқат қилмайин,
Илҳомнинг юзига лойлар чаплади.

Ҳайдот! Не қиласин билмайин Илҳом
Илк бор кўз ёш тўқди шу тонг, аслида.
Беканот, белибос, дийдираф тамом
Туарди қандайдир маҳлук шаклида.

Илҳом дарвозани чор-ночор қоқди,
Билолмасди шўрлик ҳануз айбини.
Шоир дарвозани очди-ю ёпди:
Танимайман, деди, сендай дайдини.

1979



ОИЛА

Каттаси кетганди балиқ овига,
Чўмилиб-нетмасин, ишқилиб.
Турли тасавурлар олар довига,
Кампирнинг нафаси келар тиқилиб.—
— Ҳой, сиз ҳам болани ўйланг-да бундоқ...—
Кампир эрк берганча пуч хаёлига,
Капгирни қайғадир илиб ўша чоқ
Танбех бера бошлар чолига.
Чол-чи, кўзойнагин артганча бот-бот
Китоб варақлади: Бедилми, Машраб...
— Мошинда кетувди кенжаси шаддод,
Юрсин-да, ишқилиб, кўзига қараб...
Кун ҳам эрта ботди, билмадим, кузми,
Биттаси кечкида ўқийди.
— Сен ҳам ўйлагин-да анави қизни?—
Чол ҳам кампирини нуқийди.
Ҳеч қайда ҳеч гап йўқ, шундоқ икковлон
Бир-бирин бесабаб койир, турткилар.
Лекин иккиси ҳам билади пинҳон:
Болаларни ўйлайди улар.
Сўнгра бир маҳалда узун-қисқа бўлиб
Болалар ҳам келар галма-гал.
Дастурхон атрофи боради тўлиб,
Хайрият, ҳаммаси жам, тугал.
Кампир: — Шукр, — дейди қимтиниб лаби,
Чол ҳам жилмаяди:
Тушунар...
Дунёда ҳеч бир гап бўлмаган каби
Болалар овқатни туширас.

1979

САМОВИЙ МЕҲМОН, БЕШ ДОНИШМАНД ВА ФАРРОШ КАМПИР ҚИССАСИ

Хабар келди Фан шаҳрига
Олис Жунгли томондан.
Ўтган кечада алланарса
Ёниб тушмиш осмондан.

Юлдуз деса юлдуз эмас,
Ёйўлдошми бир дайди.
Ҳар ҳолда у шов-шув соглан
Тарелкага ўхшайди.

Бу хабардан илм аҳли
Бир зум ўйга толдилар.
Яна бирор миш-мишдир деб
Шубҳага ҳам бордилар.

Чархлаб туриш керак аммо
Туйғу билан ақлни...
Ҳар эҳтимол жўнатдилар
Жунглига беш вакилни.

Бешови ҳам тенгиз олам,
Беш қитъадан бўлмиш жам.
Дунёдаги барча илм
Шул бешовда мужассам.

Дунёдаги тилларни-ку
Беш бармоқдай билишар.
Керак бўлса қушлар билан
Хандон сұхбат қилишар.

Хуллас, бешов йифилишиб
Жунгли томон елдилар.
Ҳатто фаррош кампирни ҳам
Бирга олиб келдилар.

Дарҳақиқат, Жунгли нотинч,
Не дараҳтлар шалпайган.
Үрталиқда алланарса
Ётар эди, ялпайган.

Ойнакларни тутиб бешов
У ёғидан ўтдилар.
Бу қанақа гап бўлди деб
Бу ёғидан ўтдилар.

Ва ниҳоят сирли уйни
Уриб очиб олишди.
Ичкарига қараб бирдан
Анграйишиб қолишди.

Ётар эди ўриндиқда
Аллақандай бир маҳлук.
Бир кўзи бор...манглайида,
Иккинчиси мутлақ йўқ.

Лаб-даҳани одамга ҳам
Ўхшаб-ўхшаб кетарди.
Қўл-оёғи узун-узун,
Сап-сариқдир ранг зарди...

Беш донишманд ўзни энди
Йўқотиши тамоман:
Ҳазилакам гапми ахир
Меҳмон тушмиш самодан!

Мана буни айтса бўлар
Энг олий, зўр муаммо!
Ўраб олди уни бешов,
Миқ этмасди у аммо.

Кўрсатиши унга дастлаб
Чексиз олам тарҳини.
Сомон йўли, альфа, бета
Буржларининг фарқини.

Меҳмон эса қимир этмай
Ётарди жим, сулайиб.

Манглайида битта кўзи
Боқар эди дўлайиб.

Кўрсатдилар унга яна
Ёзув, шакл, формула.
Мозийни ҳам кўрсатиши
Кино қилиб бир йўла.

Дунёдаги тилларни-ку
Луғат қилиб уйиши.
Шу жумладан ўзбекча ҳам
Бир-икки сўз дейиши.

Мехмон ҳануз қимир этмай
Ётарди жим, сулайиб.
Манглайида битта кўзи
Боқар эди дўлайиб.

Кармикан, деб қулофига
Бақириб ҳам кўрдилар.
Соқовми, деб имо билан
Чақириб ҳам кўрдилар.

Таҳдид билан ҳатто бир оз
Сикувга ҳам олиши.
Охир чарчаб, ўзлари ҳам
Сулайишиб қолиши.

Иш чиқмади, демак бизни
Тушунмади у тараф!
Ўша пайт, денг фаррош кампир
Кириб келди тентираб.

Фаррошда у, уни-буни
Йиғишиштиromoқ унга тан.
Ўриндиқда ётган зотни
Кўрди кампир дафъатан!

— Вой бечора болагинам,
Дард забтига опти-ку!
Холдан тойиб, бошқа кўзи
Юмилиб ҳам қопти-ку!

Рангини кўр, сомон дейсан,
Сувданмикан ё ўтдан! —
Шундоқ дея фаррош кампир
Бўла кетди гиргиттон.

Азбаройи меҳр билан
Бошгинасин силади.
Тикандайин тикка ўсган
Сочгинасин силади.

Кампир билмас, ким бу маҳлук,
Ё билса ҳам унутди.
Ича қолгин, жон болам, деб
Ҳатто унга сув тутди.

Ўшанда денг, ҳалигининг
Қон чопди-я юзига.
Дувва-дувва ёш ҳам келди
Биттагина кўзига.

Жон киргандай бўлди бирдан
Оёқ-кўли қимирлаб.
Жилмайгандай бўлди ҳатто
Гапиргандай шивирлаб.

Айлантириб битта қўзин
Боқди у ёқ-бу ёққа.
Бир маҳал денг, дабдурустдан
Меҳмон турди оёққа.

Олимларнинг ушбу ҳолдан
Чимирилди қошлари.
Бу қанақа сир бўлди, деб
Тамом қотди бошлари.

Кор қилмади шунча илм,
Этди қанча саргардон.
Фаррошларнинг юлдузидан
Тушдимикан ё меҳмон.

Не бўлса ҳам мурод ҳосил,
Фан шаҳрига елишди.

Фаррош кампир сирин эса
Сал кейинроқ билишди.

Олимларнинг хизматлари
Йўқ, бекорга кетмапти.
Шунча ишни қилишибди.
Фақат Мехр етмапти.

1979



* * *

Ҳимматли гапларга қулоқ солмоқ даркор.
Қулоқ солмоқ даркор ҳалқнинг сўзига,
Лекин одамларнинг бир одати бор,
Мақол тўқийдилар мослаб ўзига.
Масалан, ит — вафо, демишлар, ҳайҳот,
Ит эгалари буни тўқиганлар заб.
Бирорлар итидан бўлгил эҳтиёт,
Ўзингники бўлса бошқа гап...

1979

* * *

Ҳўқизнинг бўйнига тақсанг тақинчоқ,
Томоша аҳлига бўлгай овунчоқ.
Сен одам шаклида юрган бир говсан,
Хайф сенга на нишон, оддий бир мунчоқ.

1979

ДОНИШМАНД ДЕДИКИ

Донишманд дедики, осонни кутма,
Имкондан ортиқ бир имконни кутма.
Дарёдан дарёни талаб айлагил
Ва лекин ҳеч қачон уммонни кутма.

1980

АЁН БҮЛГАЙ

Агар ёринг хиром этса,
Саболардан аён бўлгай,
Такалуми чаман берган
Садолардан аён бўлгай,
Агар ёринг қуёш бўлса,
Анга асло боқиб бўлмас,
Камолингми, заволинг ё —
Самолардан аён бўлгай.
Агар ёринг ҳусн шоҳи —
Ўтар бўлса шаҳарлардан
Гузарларда қолиб кеттан
Гадолардан аён бўлгай.
Агар ёринг жафокордир,
Жафокор, деб, отин айтма,
Унинг асли ўзинг чеккан
Жафолардан аён бўлгай.
Агар ёринг садоқат деб
Сенга кўнгил қўяр бўлса,
Куйиб ағёрларинг, баҳти,—
Қаролардан аён бўлгай.
Агар ёринг муҳаббатни
Ниҳон сақлар, гумон этма,
У бир ганждири, бироқ ҳадди
Адолардан аён бўлгай.
Агар ёринг бўлиб Ширин,
Агар ўзни десанг Фарҳод,
Қиёсинг чин ва ё лофдир,
Вафолардан аён бўлгай.
Агар ошиқсан, Абдулла,
Қаноат қил сабр бирла,
Надур ҳолинг — сенга боқсан
Балолардан аён бўлгай.

1979

БАХМАЛЛИК ГИЛАМ ТҮҚУВЧИ ҚИЗЛАРГА

Бахмал бағридаги мұйжаз дастгоҳда
Бахмал гилам түқір уч нафар сингил.
Уччовлон бекаңдир бу гул даргоҳда,
Номлари Мукаррам, Буойша, Ойгул.
Неча ранг ва неча анвойи бүёқ
Ажиб бир санъатга айланар бунда.
Қизлар қалбидаги меҳру иштиёқ
Ранг-баранг ип бўлиб бошланар бунда.
Қизлар ўтинг қилди: — Бўлса гар имкон
Шоирлар номимиз шеърга қўшсалар.
Қизлар, йўлингизда пешкашдир жаҳон,
Илтифот бўлурми шеърга бунчалар.
Сизнинг бу яратган мұйжиза санъат
Юз йил тўзим билмай турмоқлиги рост.
Яшаса шоирнинг шеъри шул муддат,
Дўпписин кўкларга отарди паққос.
Фурсат қархисида боқий нима бор?
Шеърми у, қасрми, гиламми, палак?!

Сизнинг қошингизда менинг бу ашъор
Бамисли гулзорга қўнган капалак.
Арзигай номингиз ёйсак оламга,
Шул эрур менинг ҳам умрлик дардим.
Ва лекин аслида, сизнинг гиламга
Битгулик байт ёзсан бахтли бўлардим.

1979

ПАХТАКОР АБДУРАЙИМ АКА БИЛАН БАХТ ҲАҚИДА СУҲБАТ

Бахт нима? Ҳаётми ва ёким хаёл?
У недур? Мулкми ё умр безавол?
Ё у сира ўчмас муҳаббатмикан?
У ё меҳнатмикан? Ё санъатмикан?
Ишдан ҳориб қайтдинг, дилгир ҳойнаҳой,
Рафиқанг узатди бир пиёла чой.
Унут бўлди шунда чарчоғинг, зоринг,
Кўнгилдан бир нафас кетди губоринг.
Балки баҳт ўшадир? Сезмагандирсан,
Уни ўзинг билмай излагандирсан?
Сизнинг касбингиз шу, пахтазор ичра
Эртадан то оқшом тинмайсиз сира.
Йиллар чангидир бу сочингизда оқ,
Меҳнатдан, юмушдан қолмабсиз бироқ,
Қарайсиз — бир ёнда ўғлингиз ўқтам,
Бир ёнда қизингиз — сафдадир у ҳам.
Замон тинч, орзулас дилда аломат.
Лекин энг муҳими — борсиз саломат.
Балки баҳт дегани мана шу ҳолдир,
Балки шу муҳташам толе, иқболдир.
Бахт нима? Ҳаётми ва ёким хаёл?
У недур? Мулкми ё умр безавол?
Менинг назаримда буларнинг бари,
Бахт деган дараҳтнинг шоҳобчалари.
Бахтга ўша чой ҳам даҳлдор эрур,
Ақл ҳам, чирой ҳам даҳлдор эрур,
Ҳаётнинг ғалвали гулдуросидан,
Қувончи, ташвиши, хуш садосидан
Йироққа тушмасак баҳтдир мана шу,
Қандайдир муаллақ манзил эмас у.
Бахт тенгдир шоири бастакорга ҳам,
Абдурайим деган пахтакорга ҳам.

1979

БОБО ВА НАБИРА

Имиллаб боради йўлда мўйсафид,
Ўтган асрларнинг хаёли бошда.
Ёнида типирлар набираси хит,
Кўйворса етгудай шаҳди қуёшга!

Чол-чи, тутмиш унинг қўлидан маъкам,
Набира кўзида андиша-ю зор.
Ота, набирангни озод қўй бир дам,
У ҳали узоқча кетмоғи даркор.

У ҳали номингни қўксига жойлаб,
Самолар қўйнида ургусидир барқ.
Уни қадамингта ташлама бойлаб,
Кўйвор набирангни, отажоним, Шарқ...

1979

* * *

Бунчалар камолот, айт-чи, кимда бор,
Кимда бор бунчалик латофат, ҳусн.
Шу чирой, шу ишва, шу ноз, шу виқор,
Бахтиёр жуфтингта муборак бўлсин.

Севганинг қалбida, билмам, қай ният,
Демасман, шаънингга шеърлар битсин деб.
Сени яратгандир асли табиат
Бир шоир ҳажрингда куйиб ўтсин деб...

1979

БИР УСТОЗ ЎГИТИ

(Ҳазил)

Топган-тутганингни халқقا бер, қўзим,
Ўшанда ҳеч қачон топмайсан тўзим.
Лекин бир мантиқни унутма асло:
Яъни, мансубдирман халқقا мен ўзим.

1979

* * *

Оқар дарёга ҳам кимдир банд берган,
Ҳаёт кимга заҳар, кимга қанд берган.
Эй ғофил, саркаш деб мени камситма,
Фаним сенга эмас, менга панд берган.

1979

* * *

Ҳар қалай қўлимда шарбат тўла жом,
Гар маҳзун бўлса ҳам қалбимда илҳом.
Энди бир самимий дўст ҳам топсайдим,
Бахтили санар эдим ўзни батамом.

1979

ИСТАК

Орзум шул, ўчмасин ёнган чироғинг,
Юлдуздай нур сочсин чашминг-қароғинг.
Магар чинор бўлсанг, чинордай яша,
Бевақт узилмасин бирор япроғинг.

1979

ЗИЁ

Не зотлар ўтдилар ҳасратта тўлиб,
Кунлари зимистон, туни сим-сиё.
Фазога термулиб, Улугбек бўлиб,
Йироқ дунёлардан ахтарди зиё.
Шоҳлар юрагида балқирмиди нур,
Расуллар меҳридан порларми дунё?
Тубсиз зулумотда банд бўлган шуур
Бир-бирин қалбидан ахтарди зиё.
Оlamни пайпаслаб мисли ногирон
Топганлари бўлди жаҳолат, риё.
Валий наздида ҳам бенурдир жаҳон,
Магар ўз қалбida бўлмаса зиё.
Қандай замонларга гувоҳмиз, устоз,
Ерга тушган каби хуршид ҳам гүё.
Кўк эмас, ушбу кун замин сарафroz,
Фалакка заминдан таралар зиё.
Абас, йўқликларга кетди жаҳолат,
Асримиз уфқида у мисли рўё.
Бу қандай сир эрур, қандай синоат,
Одам одам учун тараттай зиё?
Шуурга нур сочиб, машъал кўтарган
Сиздек устозларга олам маҳлиё.
Дейман хуш айёмда Сизни қутларкан:
Қалбингизда сира сўнмасин зиё!

1980

ОЗАРБАЙЖОН

Хаёл оти билан кезгил ҳар ённи,
Топмассан бундайин хушбахт бир онни.

Мухр этди дилларга тарих инчунин,
Қадим қондошликини — олий эҳсонни.

Эъзозлаб турибди кўтариб бошга,
Бу кун озар эли Ўзбекистонни.

Сўйласин минг йиллик мўйсафид тарих,
Бу дўстлик билганми шубҳа, гумонни?

Ўзбекман, англамай қаёққа бордим,
Шу инжа озарий тилни, забонни.

Дўстлик бу — муҳаббат янглиғ фараҳким,
Билгай у на ҳадни ва на довонни.

Асли Муқаннага қиёс этгулик
Бобакнинг қалбидан тошган түғённи.

Низомий болидан ҳалво пишурмиш
Навоий забт этиб туркий жаҳонни.

Бир лаҳза кўлидан қўйганми ўзбек,
Ўзинг айт, Фузулий битган девонни.

Азизим, дилимда асраб юрибман
Насимий қолдирган собит имонни.

Вурғуннинг шеъри деб жон чекса ўзбек,
Озар ҳам аярми Faфурдан жонни.

Сен билан кечмишнинг жангоҳларида
Бирга таниганмиз яхши-ёмонни.

Тарих-ку, муҳташам ёдгордир олий,
Сўйлайин шу кунни, айни шу онни.

Қондошлиқ туғини кўтариб кушод
Тавоб этмоқдамиз гулгун маконни.

Хазар коса бўлсин, яъни жоми Жам,
Сипқаргил, шарафла давру давронни.

Мен сендај мезбонни топмоғим гумон,
Сен ҳам тополмассан мендай меҳмонни.

Мавжуд бўлмасайди оламда агар,
Ўйлаб топар эдим Озарбайжонни.

1980



ИНСОН МАНЗАРАСИ

Баъзан ўйлаб дейман, не бўларди гар
Кудратин кўргазса табиат хассос.
Ва инсон сувратин унинг муқаррар
Феълу атворига айлаб қўйса мос.

Бунёд бўлар эди ажиб бир ҳолат,
Не-не инсонларнинг абас ор шарми.
Намоён бўларди аввал хушомад,
Эмаклаб юрарди бу қавмнинг бари.

Бешак яшиарди турфа қилмишин
Издиҳом ичида бадкор мунофиқ.
Таниб бўлмас эди лекин юришин,
Яъни ўз феълига мос ва мувофиқ.

Қанчалар ранг-баранг инсон ҳаёти,
Бари очиқ-ойдин шундоқ турарди.
Оёғи осмонда ифвогар зоти
Айри тили билан изғиб юрарди.

Ҳа, магар чеврилса олам шу тахлит,
Имон келтириардим бир ҳолга бешак:
Оёғин заминга қадаган событ,
Комил Инсон зоти не чоғлик юксак.

Фақат у мавжудки, олам файзиёб,
Фақат инсонликка унинг ҳаққи бор.
Устивор инсонлар, сиз нечоғ ноёб,
Сизни учратган қалб нечоғ баҳтиёр...

1980

ҚЎРИҚХОНА

Асраймиз ўсимлик хилларин тайин,
Асраймиз ҳайвонлар камёб зотини.
Ҳатто атрофларин ўраб атайин
Кўриқхона деймиз сўнгра отини.

Саёқ овчиларга у ён йўл бўлсин,
Жарима соламиз, қамаймиз ҳатто.
То у жонзодларни тинчига қўйсин,
Қирилиб битмасин тирик дунё то.

Мунис мавжудотта меҳру шафқат бу,
Бу инсон қалбида балқан ҳамият.
То яшар қайдадир бу янглиғ туйғу,
Ҳар нечук қирилиб кетмас табиат.

Оlamda кўп нарса камёб бир қадар,
Не-не туйғулар ҳам камёбдир, алҳол.
Мен дердим соф қалбни учратган сафар,
Дарҳол ўраб олинг атрофин, дарҳол.

Инсоф йўқолмасин, ўранг мустаҳкам,
То уни юзсизлик этмасин хароб.
Эзгуликни асранг, оламда у ҳам
Тождор турна каби бўлмасин камёб.

Оқибатни асранг, оқибат гўё
Айиқдай қайдадир топмасин завол.
Ҳаёни асрангиз, куймасин ҳаё
Оташга дуч келган полапон мисол.

Имонни асрангиз, у доим танҳо,
Ундадир мужассам инсон матлаби.
Авлодлар ахтариб юрмасинлар то,
Уни аллақандай Қор одам каби.

Виждонни асрангиз ҳар недан ортиқ,
Ягона заминни асрагансимон.
Боболардан қолган ноёб бу тортиқ
Токи авлодларга етолсин омон.

Эзгу, латиф ҳислар бўлмасин таҳқир,
Булбулни бойқушга топширманг зинҳор.
Худбин ва дилозор кимсанинг, ахир,
Оғзи қон йиртқичдан қандай фарқи бор?!

Тўқайга ўт кетса ёнгай бус-бутун,
Адолат борлиққа ёлғиз онадир.
Дунё ҳам, инсонлар қалби ҳам бугун
Ёвузликдан зада Кўриқхонадир.

1980



УЧИНЧИ ОДАМ

Инсонлар бир-бирин юрса ардоқлаб
Үргада восита асли зиёда.
Ҳар икки одамни тургувчи боғлаб
Учинчи Одам бор лекин дунёда.

Учинчи Одам бу — ўзи бир хилқат,
Ўшадир дунёга илк қўйган қадам.
Икковлан ўлжани келтирган фурсат
Ўчоққа ўт ёқсан учинчи Одам.

Пайғамбар шаклида у соҳиб кутқу
Бандага худони далолат этган.
Не ўжар шоҳлардан элчи бўлиб у
Гоҳо бош келтирган, гоҳ боши кеттан.

Мұҳабbat бобида у-ку бир маҳрам,
Унингсиз висол ҳам йўқдир аслида.
Шоирнинг ёр учун битган сатрин ҳам
Ёд олган ўшадир — шеърхон шаклида.

Унинг бир унвони ҳакамдир азал,
Шунчалар мұхтарам учинчи бу зот.
Токи бу оламда меҳр нотугал,
Мен фақат ўшандан қўрқаман, ҳайҳот!

Ахир у эмасми дўстни ғаниму
Ғанимни дўст қилиб қўйгувчи одам.
Магар у бешафқат бошласа гулу
Дунёга ғавғолар солгай чинакам.

Рўёни рост деса, миттини кабир,
Жанубни Шарқ деса айлаб имолар.
Куфрли дунёда оз эмас, ахир,
Ўшанинг измидан юрган сиймолар.

Учинчи бу одам тирикдир токи
Дунёнинг чайқалиб турмоғи аён.
Серғалва асрда бу зот ҳаттоқи
Салтанат шаклида бўлар намоён.

Оlamda, asliida, bordir dўst va ёв!
Orzum shul: pokiza kўrsam viжdonni.
Kimsaning nomidan kimsaga birov
Sotib yobormasa, deйman imonni.

Кўлларим кўксимда, бетинч, бетоқат,
Taъзимлар қилурман сенга ушбу дам.
У — менми, у — сенми, ким бўлма, фақат
Сенга инсоф берсин, учинчи одам!

1980



ИЛТИМОС

Сенга балки аён, балки ноаён
Бир ҳаёт ҳадисин айлайин баён.
Майли, сувлар кечгин, майли, ўтда ён,
Ҳаргиз илтимосга кунинг қолмасин.

Саргардон, йўлларда қолсанг ҳамки оч,
Сабру қаноатни қилгил бошга тож,
Нотанти йўлдошга бўлма ҳеч муҳтож,
Ҳаргиз илтимосга кунинг қолмасин.

Таънадир дунёда ёмондан ёмон,
Нон бериб рангингни этгайдир сомон.
Ақлинг бутун бўлса, тўрт мучанг омон,
Ҳаргиз илтимосга кунинг қолмасин.

Бўри эмас дейсан одам одамга,
Кўзинг каттароқ оч, боққил оламга,
Бирор отамга дер, бирор онамга,
Ҳаргиз илтимосга кунинг қолмасин.

Саховат аҳлига гарчи юз бурдим,
Гоҳи дам ҳайратда лол қотиб турдим,
Норнинг ит олдида чўкканин кўрдим,
Ҳаргиз илтимосга кунинг қолмасин.

Оҳ, дўстим, демагил қайдан бу туйғу,
Шеърим сен учун ҳам бўлолсин кўзгу.
Менинг бир жайдари фалсафамдир шу:
Ҳаргиз илтимосга кунинг қолмасин.

1980

ТУЛКИ ФАЛСАФАСИ

— Устоз, — деди бир кун тулки тулкига,
Нечун биз нишонмиз доим кулкига?

Ўрмонда бўри ҳам, ҳатто жаноб шер,
Бир-бирин туртишиб: — Тулкисан-а, дер!

Бошқалар устидан кулмаслар нечун,
Бу ҳол қоронғудир биз ёшлар учун.

— Ука, — деди шунда тулкига тулки,
Бундай ҳодисотнинг сабаби шулки,

Касбини эплолмай қолса аксари,
Тулкилик қиласди ҳайвонлар бари.

Кўпинча иложсиз қолган фурсатда
Тулкилик қиласди шер ҳам, албатта!

Лекин бизнинг ишни эплолмас улар,
Шу сабаб ўрмонда масхара бўлар.

Сен-чи, бундай ҳолдан асло ўқинма,
Бошқалар сингари четга бекинма.

Тулкисан, бундай чоф тулкилик қилгин,
Тулки деб кулсалар, қўшилиб кулгин...

1980

ДҮСТАРИМГА АЙТГАНИМ

Дунёда кўп нарса унутилади:
Қашшоқлик, мартаба, қувонч, қайгулар.
Унутилиб борар муҳаббат дарди,
Унутилар йиллар, йўллар, туйгулар.

Қирқ йиллик адоват унутилар секин,
Унутилар ҳатто юракдаги дарз.
Яхшиларнинг меҳри унутилмас лекин,
Унутилмас улар олдидаги қарз.

1980

ДУНЁНИ ҚИЗҒАНМА

Дунёни қизғанма мендан, азизим,
Мен сенинг кўчангдан ўтмасман зинҳор.
Менинг бу оламда ўз айтар сўзим
Ва ўзим сифинар мозорларим бор.

Дунёни қизғанма мендан, азизим,
Сен ичган булоқдан ичмасман асло.
Сен юрган тоғларда қолмагай изим,
Сен кечган дарёдан кечмасман асло.

Дунёни қизғанма мендан, азизим,
Қалбингни ёқмасин шубҳа ва сўроқ,
Мен ўзга манзилга тикканман кўзим,
У сенинг кулбангдан жуда ҳам йирок.

1980

ШАРҚ ҲИКОЯСИ

Аниқ йили эсимда йўқ,
Аллақайси замонда,
Бир қишлоқда ота-ӯғил
Яшар экан омонда.

Улар ғоят тутув экан,
Ўртада мол-жони бир.
Минг қилса ҳам ота-ӯғил,
Минг қилса ҳам қони бир.

Бир куни денг, шу икковлон
Қайгадир йўл олишди.
Минай деса от-улов йўқ,
Ўйланишиб қолишиди.

Куриб кетсин йўқчилик ҳам
Ким неларга зор эди.
Икковининг ўртасида
Битта эшак бор эди.

Гарчи у ҳам бир оз яғир,
Гарчи андак бедармон.
Шу эшакни минсакми, деб,
Ўйлаб қолди икковлон.

Ота деди: — Ўғлим бундан
На сен, на мен тингаймиз.
Ӯғил деди: — Ота, буни
Галма-галдан мингаймиз.

Ота доим ота ахир,
Яъни мудом иззатда,
Эшакка у минди дастлаб,
Ӯғил яёв, албатта.

Бир қишлоқдан ўтардилар
Икков секин тиқирлаб,
Ортларидан тўрт-беш одам
Кулиб қолди пиқирлаб.

— Аҳмоқ экан манави чол,
Аҳмоқ ҳаддан зиёда.
Ўзи улов миниб олган,
Ўғли эса пиёда.

Фалати бир ҳисни туйиб
Шартта пастга тушди чол.
— Кела қолгин, ўғлим, — деди, —
Эшакка сен минақол.

Энди ўғил тўқимдаю
Ота яёв кетарди.
Энди улар бошқа қишлоқ
Кўчасидан ўтарди.

Борардилар сўзсиз, секин,
Аста-аста тиқирлаб.
Ортларидан тўрт-беш одам
Яна кулди пиқирлаб.

— Аҳмоқ экан манов бола,
Аҳмоқ ҳаддан зиёда.
Ўзи улов миниб олган,
Отаси-чи, пиёда.

Ёш эмасми, бирдан унинг
Орияти қўзғолди.
Шартта пастга тушди у ҳам,
У ҳам яёв йўл олди.

Юриб-юриб иккаласи
Неча адир, қир ошди.
— Боре, — дея сўнг эшакка
Иккови ҳам мингашди.

Аммо тағин бир манзилдан
Ўтар бўлди икковлон.

Не кулфатки, бу жойда ҳам
Тинч қўймади оломон.

— Аҳмоқ экан булар роса,
Инсофи йўқ лаванглар,
Икки одам бир эшакни
Миниб опти, қаранглар.

Маломатдан ота-ўғил
Тамом ҳориб толдилар.
Ғазаб билан бир-бирига
Термулишиб қолдилар.

— Айтмабмидим, — деди ота, —
Гап уқмадинг, тирранча.
Элу юртнинг ўртасида
Бўлдик роса бўлганча.

Қўл силташди бир-бирига,
Қолди фойда-зиён ҳам.
Ота у ён кетиб қолди,
Бу ён кетди ўғлон ҳам.

Қондошликнинг милион йиллик
Ришталари узилди.
Ўртага бир эшак тушиб
Оралари бузилди.

1980



ИШОНЧ

Табиат, ишончдан айирма сира,
Айирма, ўчмасин дилдан шукуҳинг.
Бенишон йўқолиб кетгандан кўра
Яхши-ку тентираб юрса гар руҳинг.

Тимқора осмонга ой чиқса дилбар,
Заминга тўкилса нури сарсари.
Булутлар ортидан боқолсанг агар,
Абадий йўқлиқдан афзал-ку бари.

Сен юрган боғларни баҳтга тўлдириб,
Сайр этса шомларда дўст ила ёрон.
Уларни ўргулсанг шаббода бўлиб,
Ахир бу толенинг нимаси ёмон.

Бир кун фарзандингнинг ўксик дилида
Ўйғонса ғамларни енгтан муҳаббат.
Капалак мисоли учиб йўлида,
Сен уни қутласанг, ахир, бу не баҳт.

Ғамгин ва беиқбол ёринг оҳ уриб
Болишга бош қўяр, кўз ёши тахир.
Сен унинг тушига билдирмай кириб,
Тасалло беролсанг, саодат ахир.

Сен-ки, хор вужудни бир кун, табиат,
Юлқиб оларкансан дилбар ҳаётдан,
Мени шу ишончдан айирма фақат,
Айирма сен мени шул бир бисотдан.

1980

СЕН ҚАЙДАН БИЛАСАН

Сен қайдан биласан,
Балки юлдузлар
Менга сирларини
Сўйлаётгандир.
Сен қайдан биласан,
Балки бу кўзлар
Унсиз бир кўшиқни
Куйлаётгандир.
Сен қайдан биласан,
Балки кенг олам
Шу мўъжаз қалбимга
Бўйлаётгандир.
Сен қайдан биласан,
Балки мени ҳам
Кимдир қайдадир жим
Ўйлаётгандир...

1980

* * *

Умр қисқа эди,
Қисқартирдик яна.
Озгина баҳтни ҳам бўлиб ташладик.
Кулфат оқибатда қилди тантана,
Шундагина кўзни ёшладик.
Жаҳлдор табиат энди юз ўтири.
Боқмади, чопсак ҳам йифлаб ортидан.
Тирик от ўрнига ёғоч отни берди,
Уйни эса берди ернинг остидан.

1980

* * *

Дейдилар, ит ҳураг
— Ўтади карвон,
Ранжу балолардан
Ёнмасин жонинг,
Лекин алам қиласар,
Бир умр гирён
Итлар орасидан
Ўтса карвонинг.

1980

ОЛОМОНГА

Машраб осилганда қаёқда эдинг?
Чўлпон отилганда қаёқда эдинг?

Суриштирганмидинг Қодирийни ё
Қалқон бўлганмидинг келганда бало?

Ҳукмлар ўқилур сенинг номингдан,
Тарихлар тўқилур сенинг номингдан.

Нимасан? Қандайин сеҳрли кучсан?
Нечун томошага бунчалар ўчсан?

Қаршингда ҳасратли ўйга толаман,
Қачон халқ бўласан, эй сен, оломон?!

1980

ДАВРА ҚЎШИФИ

Бош кўтарган ҳар бир жондор гарчи кас эмас,
Назар солгин, пойингдаги у бир хас эмас.
Лайло бўлсанг у ҳам Мажнун, асло паст эмас,
Сен учундир бор ҳаётим, шуҳратим, шоним,
Кўлларингни бергил менга, ширинзабоним.

Дўстларинг ҳам бу даврада, яйрасанг, нетгай,
Умрдир бу, чорласанг ҳам тўхтамай ўтгай,
Шоир сенга пок муҳаббат жомини тутгай,
Сен учундир бор ҳаётим, шуҳратим, шоним,
Кўлларингни бергил менга, ширинзабоним.

Муҳаббатим лол қотган ул тоғларинг айтсин,
Тонгда оҳим такрор этган боғларинг айтсин,
Менсиз ўтган ҳар бир лаҳза чоғларинг айтсин.
Сен учундир бор ҳаётим, шуҳратим, шоним,
Кўлларингни бергил менга, ширинзабоним.

Келармидим қошингга гар бўлса ихтиёр,
Жон риштаси боғланмишдир пойингта эй, ёр,
Шоду хуррам бу даврада яира эй, дилдор.
Сен учундир бор ҳаётим, шуҳратим, шоним,
Кўлларингни бергил менга, ширинзабоним.

1980



ДОСТОИЛАР

ЖАННАТГА ЙҮЛ

(Драматик достон)

Иштирок этувчилар

Йигит	Фаришталар
Она	Дўст
Ота	Ўзга одам
Тарозибон	Ўспирин
Югурдак	Қария
Чол	Кимса
Ҳур қиз	Садо
Фаришта	

БИРИНЧИ КЎРИНИШ

Маҳшар саҳросида фужрон оломон. Тарозибон ҳузурида
Йигит ва Ўзга одам

Йигит

Маҳшар тонги аста-секин оқариб келар,
Кўз олдимда содир бўлди Улуғ Қиёмат.
Неча юз йил давом этди, билмам, бу йўллар,
Тарозибон қошига ҳам етдик, ниҳоят.
Тарозига тушар эмиш гуноҳ ва савоб,
Қайси бири кўпроқ экан ишонамиизда?!
Не бўлса ҳам, тарозиси бўлмасин нобоп.

Ўзга одам

Тарозибон не деса шу, ишонамииз-да!
Қайси куни йиғлаб кетди бир мўйсафид чол,
Етти бора ҳаж савоби бўлмабди қабул.

Йигит

Нечук энди?

Ўзга одам

У дунёда юз бериб қай ҳол,
Отасини сансираган экан бир бор ул.

Йигит

Минг мартаба шукр бўлсин парвардигорга,
Мендан рози кетган экан қиблагоҳларим.
Эс билмаган гўдакликни йўйсак бекорга,
Сенсираган эмасман мен, йўқ гуноҳларим.
Дўстлар билан калтаклашган чоғларим бўлган,
Ҳар хил куфр ишларим ҳам кўпдир, билмадим.
Балки менинг гуноҳ халтам лиммо-лим тўлган,
Лекин ота ҳурматини канда қилмадим.

Тарозибон

Билдик, сипо зот экансан, на хору на хас,
Навбатинг ҳам етиб қолди, титрама, юр сен!

Ўзга одам (титраф тарозибонга яқинлашади)

Салом, тақсир, бисмиллоҳир раҳмонир раҳим.

Тарозибон (қўлида дафтарчасини варақлаб)

Бу ёқقا тур. Исминг нима? Ҳожати ҳам йўқ,
Тамға босиб қўйган экан сенга Оллоҳим.
Сенинг жойинг аросатда. Кўнглинг бўлсин тўқ.

Ўзга одам

Тақсир, агар рухсат бўлса, бир саволим бор,
Умрим ўтиб, илк мартаба сўз сўрашим бу.

Тарозибон

Ҳа, тушундим. Дўзахдан ҳам бўлма умидвор,
Сенинг жойинг аросатда, тайин дедим-ку?

Ўзга одам

Тақсир, менинг энг сўнгти бир аризам шулки, —
Наҳот бекор кетаверса шунчалик тавоғ?!

Тарозибон

Гапни чўзма, аросатга борасан, чунки,
Сен на гуноҳ қилгансану, на зарра савоб.
Қани ким бор?!

Ўзга одам тарозибондан узоқлашади.

Йигит

Хайр, биродар. Нима бўлди?!

Ўзга одам

Аросатга.

Йигит

Худо сақласин!

Тарозибон (Йигитга)

Хой, йигитча, имиллама, кармисан баттар,
Чидаб келган бизнинг жонни худо ёқласин.
Минг йилмикан тарозунинг бошида жойим,
Жаннат, дўзах тўлса тўлар, тўлмас бу дўкон.
Марҳаматин дариф тутмай қодир худойим,
Одамзотни санамасдан яратган экан.
Кошки булар фариштага ўхшаса сал-пал,
Шулар келиб бу дунё ҳам бузилиб кетди.

(ичкарига қараб)

Хой, югурдак, қара дейман, чилимга сув сол!

Йигит

Амакижон, мен келувдим, навбатим етди.

Тарозибон

Амакингни топиб бўпсан, жиндек сабр қил,
Бизларнинг ҳам жонимиз бор, биз ҳам мутеъмиз.
Наинки сен, ишлайверсак бизларнинг ҳам, бил,
Оғзимизга келиб қолар она сутимиз.
Сен қаёққа шошмоқдасан? Шунча йил кутдинг, —
Қора гўрда кўкрагингни босганча захга,
Пайт келганда барчасини наҳот унутдинг?
Шошма, йигит, улгурасан ўша дўзахга.

Йигит

Балки жаннат кутмоқдадир...

Тарозибон

Қайдан биласан?

(иҷқарига)

Ҳой, чилимни келтир дейман!

Югурдак фаришта
(иҷқаридан)

Ҳозир, хўжайин!

Тарозибон
(Йигитга)

Сендаиларга дўзах яхши, мулла бўласан.

Йигит

Агар ёрдам қиласангиз-ку жаннат ҳам тайин.
Анча-мунча савобим ҳам бордир, ўлдими?!
Қарасангиз бўлар эди тезроқ, амаки.

Югурдак фаришта чилим келтиради.
Тарозибон чилимни пешлайди.

Шу ҳам ахир кайф бўлдими, чилим бўлдими,
Билмасман ҳеч, берганлари ҳасми, тамаки.
Бир зум ҳордиқ чиқарайин,

(Югурдак фариштага)

Ҳой, сен болакай,
Ҳисоблаб кел менга бунинг қилмишларини.
Сал янглишсанг, билиб қўйгин, ҳолинг бўлдарвой,

(Бир дафтарча узатиб)

Шу дафтардан топажаксан бор ишларини.
Бугунги кун ҳисобидан ўн мингинчи бу.
Дафтарчада қалам билан белги қўйганман,
Бир озгина дам олайлик, ҳориб бўлдим-ку.
Ростин айтсам, шу ишлардан чарчаб тўйганман.

(Йигитга)

Қани, ўтири, яқинроқ кел, сен ҳам ҳорибсан,
Омад келиб тушиб қолсанг беҳиштга шояд,

Бу оламга анча эрта келиб қолибсан?
Боиси не, фалокатми ёки жиноят?

Йигит

Бир фалокат юз берганди тошқин маҳали,
Қизалоқни сой сувидан қилгандим халос.

Тарозибон

Шунаقا де? Аммо, лекин етмас бу ҳали,
Баъзи ишлар бўладики тасодиф, холос.
Савоб деган нарса ахир тасодиф эмас,
Етмиш икки томирдан у оқиб келгуси,
Яхши одам яхшилигин англамай қолмас,
У виждонни бир вазифа дея билгуси.
Қайси куни бир ношукур дўзахга кетди,
Мен ўзим ҳам бир мушт урдим, ростин айтганда.
Қуриб кетган, суюгига ёпишган эти,
Қалби тўла ҳasad экан — ношукур банда.
Қанча-қанча бегуноҳнинг бошига етган,
Ҳатто бола-чақасига урмиш гуноҳи.
Ким билсин, у дўзахга ҳам чап бериб кетган,
Ҳа, болакай, кенг экан-да худо даргоҳи.

Йигит

Бизларнинг ҳам маҳаллада бор эди бир зот,
Ўша қайга борган экан, айтсангиз билиб.

Тарозибон

Ким эди у? Текинхўрми, кофирми, шаддод?

Йигит

Салом берсанг чўнтағингни кетарди шилиб,
Кимдан зарра фойда чиқса ўша заҳоти
Бориб ётиб олар эди остонасига.
Товламачи одам эди, ўтди ҳаёти,
Тавқи лаънат осилмасдан пешонасига.

Тарозибон

Ким билади, унақалар кўп ахир, укам.
Ким ҳам ахир бундайларни йўлга солибди...
Қайси куни биттасини дўзахга ёзсам,

Гўринг куйгур нақ жаннатта ўтиб олибди.
Қайта олиб келишади, ёзиб юбордим,
У нокасни тиқажакман дўзах қаърига.
Инобатга ўтар ахир менинг ҳам қаҳрим,
Одамлар у, чидайдиган бари-барига.
Балки сен ҳам ўғридурсан ё нокас, суллоҳ,
Тургандирсан ноилождан бўйнингни буриб.
Балки олган сал барвақтроқ жонингни Оллоҳ,
Гуноҳларни қилмагансан балки улгуриб.

Югурдак фаришта ичкаридан чиқади, қўлида гуноҳ-
савоб дафтарчаси

Югурдак

Мана, тақсир, олиб келдим, текшириб кўринг!
Икки пайса етмас экан беҳиштга.

Йигит

Ҳайҳот!

Тарозибон

Ўзингни бос, пешонангни минг жойга ургин —
Ўзгартиргай тақдирингни на оҳ, на фарёд —
Демак, сенинг гуноҳларинг ҳаддан зиёда,
Жаҳаннамга боражаксан начора, ахир,
Бўйнингни эг, тавба қилгин, боқий дунёда
Бошқалардай бир бандасан,
Фарқинг йўқ тақир.

Йигит

Мен дўзаҳдан чўчимасман, устимдан кулма,
Мен чидайман, аммо қайдা ҳақиқат, имон?

Тарозибон

Ўзингни бос, ҳой йигитча, шаккоклик қилма,
Худойимнинг қаҳри ёмон, фазаби ёмон!

Йигит

Мен дўзаҳдан минг мартаба даҳшатли бўлган
Ҳодисалар ва кунларни кўрганман аввал.
Мен шайтондан минг мартаба даҳшатли бўлган

Олчоқларни кўриб, чидаб турганман аввал.
Лекин, айтинг, қаёқда у олий ҳақиқат?
Кетаётиб фақат шуни билмоқ истайман.

Тарозибон

Сендақанги ботирларни кўрганман фақат —
Майли, сенинг жавобингни бермоққа шайман.

Йигит

Нечун энди фақат менинг?

Тарозибон

Чунки бир замон
Сен қутқазган у қизалоқ менга хизматкор.

Йигит

Ё Оллоҳим! Нечук энди у жаннатмакон
Хизмат қилиб юрар экан бу ерда бекор?

Тарозибон

Сабаб шуким, у бегуноҳ қизча — фаришта,
Майлига у имон тилар сенга тангридан.
Хўш, сен уни қутқазибсан, қуллуқ бу ишга.
Лекин қисмат оғирроқ-ку бунинг баридан.
Сен жаннатий иш қилибсан бунинг учун, бас.
Дейлик бир зум қуллуқ билан қилайлик таъзим.
Лекин гуноҳ деган гап ҳам рўй-рост иш эмас,
Уни кўриб кўрмаслик ҳам гуноҳи азим.

Йигит

Менинг қандай гуноҳларим бор экан, қани,
Илтимосим, энг оғирин берсангиз айтиб.
Яна айтинг, гуноҳ ишни кўрган маҳали
Бўлганмикан тилим тишлаб ўтирган пайтим?

Тарозибон

Айлантирма гапни бунча, иккаламиз ҳам
Ўзимизни галварсликка солмайлик бекор.
Сени яхши танимайман-ку, сен соҳиб қалам,
Сен шоирсан!

Йигит

Валлоҳи аълам!

Тарозибон

Шошмай тур, гап бор.
Сен шоирсан, сенга Оллоҳ ёруғ нур берди,
Оташ берди, забон берди, ҳам улуғ юрак.
Тимсолингда бечоралар ўз дардин кўрди,
Бахтин кўрди, шодликларин кўрганлар бешак.
Боя сенга бир бандани айтиб бергандим:
Қора юрак, ҳасадгўй ҳам манфур ва олчоқ.
Ўзгасини қизиқсиниб ўзинг айтгандинг:
Товламачи ва текинхўр, суллоҳ, ялинчоқ.
Танийсанми сен уларни?

(Tепага қараб)

Ё қодир эгам,
Пардаи хоб орқасидан уларни кўрсат!

Иккинчи арвоҳ намоён бўлади.

Йигит

Ҳайҳот! Мени жаҳаннамда ёндиригин, бироқ
Кўрсатмагин сен буларни, кўрсатма фақат!

Тарозибон

Танидингми?

Йигит

Ха, танидим.

Тарозибон

Айбингни энди

Бир оз англаб олгандирсан, зуккосан, гапир.
Улар қанча бандаларнинг бошига етди.
Сен уларни кўриб, бир сўз дедингми ахир?
Илоҳий дил берган эди сенга худойим,
Кулоқ сол деб шўрликларнинг оҳи-воҳига.
Сен-чи, само шуъласини куйладинг доим,
Шеърлар битдинг юлдузларга, гулга, оҳуга.

Йигит

Мен иқрорман.

Тарозибон

Аммо энди фойдаси йўқ-ку,
Ўз умрини яшаб бўлган энди одамзод.
Ачинаман сенга, иним, инимсан, чунки —
Гар қанотинг бўлмаса-да сен ҳам паризод.
Қодир эгам муҳибларин сийлаган маҳал
Шоирларни киритмишdir пари қавмига.
Фаришталар тил фарқламас, миллат ҳам азал,
Улар фақат кулоқ тутгай кўнгил майлига.

Йигит

Бу гапларни оширдингиз меъёридан сал,
Эшитганмиз бундағанги кинояларни.
Гуноҳимга иқрорман мен, тонмайман тугал,
Юзга солманг, лекин ҳар хил ривояларни.
Майли, дўзах тубларида куйиб кул бўлай,
Майли, қайноқ дарёларда оқсин суягим...
Кўзларимдан қон, ёш оқсин, зардобга тўлай,
Фақат бордир Оллоҳимдан битта тилагим.

Тарозибон

Сўйла, қани, оташ тўла шу кўкрагингдан
Ҳақиқатнинг шуylалари чиқсин сўнгти бор.

Йигит

Менга бир жой кўрсатингки дўзах қаъридан,
Токи ўша арвоҳларни кўрмайин зинҳор!

Тарозибон

Суҳбатимиз маҳсулидир бундайин талаб,
Оғир талаб, ростин айтсам, бундақа жой йўқ.
Билмакдаман, кўкрагингда исёнкор бир қалб,
Мен ўзим ҳам сендей эдим, ҳозир-чи, махлуқ...
Бор, сен ҳозир, аросатнинг даштини айлан,
Майли, жаннат дарвазасин қошига боргил.
Икки пайса савобни сен топишга шайлан,
Майли, йиғла, илтимос қил, майли, ёлборгил!

Йигит

Ёлбормасман, йигламасман, бу қандайин гап,
Бошқалардан савоб олсам гуноҳим учун.
Майли, кетай дўзах сари ҳеч тортмасдан тап,
Мангу азоб чекмоққа ҳам етади кучим.

Тарозибон

Кўп қайсалик қилма, иним, бу азоб боқий,
Фоний дунё азоби ҳам сенга етарли.

Йигит

Менга яна нечук керак ўзгалар оҳи,
Қарғиш ўзи бор экан-ку, анча айтарли.

Тарозибон

Ҳар кимдан ҳам сўрамассан, албатта, савоб,
Сен деб ким ҳам роҳатидан кечар, укажон.
Сен отангни ва онангни кўрарсан шу тоб.

Йигит

Мен уларни кўраманми?

Тарозибон

Мен айтсам, ионон!

Йигит

Оҳ, фалакнинг юлдузлари, чақнанг тобора,
Фаришталар, баҳтлимассиз мен каби алҳол.
Мен дўзахда ёнай, майли, лекин бир бора
Мен уларни кўражакман, бу нечук висол?

Тарозибон

Ҳа, кўрасан, лекин шуни унутма асло,
Аҳволингни баён қилгил фарзандларга хос.
Зора улар илтижосин тинглаб таоло,
Жаннат йўлин сен учун ҳам кўрсатса рўй-рост.

Йигит

Раҳмат сенга, холис хилқат, олийҳиммат зот,
Сендайларни яратиби — тангрига шукр.

Менинг учун бу йўриғинг олий мукофот,
Ота-онам висолини кўрайин бир қур.
Лекин билгил, мен уларга арз этиб бешак,
Савоб сўраб йифламасман, кечирсин худо.
Ўзларига етмас балки, менга васл керак.
Балки қайта кўришмасмиз, хайр, алвидо!
Менга висол керак фақат.

(чиқиб кетади)

Тарозибон

Хой, яна ким бор?

ПАРДА

ИККИНЧИ КЎРИНИШ

Аросат яланглигига Йигит ёлғиз ўзи

Йигит

Умрим ўтди сарсонликда, саргардонликда,
Яхши-ёмон замонларни кўриб келдим мен.
Баъзан маъно топа олдим чин инсонликда,
Баъзан эса уни ерга уриб келдим мен.
Мана, ўша тарозибон, у-ку, фаришта,
Инсонлардан кўра юксак туражак-ку у.
У зотга ҳам қийин экан бундақа ишда,
Кўзларида алланечук норизо туйфу.
Қийин ахир уларга ҳам, қалблари бордир,
Қийин ахир уларга ҳам — бордир кўзлари.
Фақатгина фармон берар Оллоҳи қодир,
Лекин қалбни англамайди қизлар сингари.
Энди қайга борсам экан бу дашт, саҳрова,
Қайга бориб, падаримни кимдан сўрасам?
Билолмасам, ким дўзахда, ким арш-аъюда...

Йигит қаршисида Чол пайдо бўлади

Ч о л

Ха, йўл бўлсин, мулла йигит?

Й и г и т

Валлоҳи аълам!

Ч о л

Кимсан, ўғлим? Йўлинг қайга, имонинг бутми?
Қадамингдан подшоларнинг ҳиди келади?
Лекин энди ҳаммага бир тангрининг ҳукми.
Ким жаннати, ким дўзахи — ўзи билади.

Й и г и т

Ота, адам саҳросида йўлчиман танҳо,
Дўзахиман, худойимнинг ҳукмига кўра.
Марҳаматин дариф тутмай Оллоҳим аммо
Висол учун рухсат берди.

Ч о л

Эришсанг зора.

Ким билан сен учрашмоқчи бўлгандинг, ўғлон?
Гар мен билан бўлса, қани, гапир, тинглайин.
Агар қарзинг қолган бўлса — айтгин шу замон,
Ақча эмас, дуо билан, майли, тўлайин.

Й и г и т

Ҳеч кимсада қарзим ҳам йўқ, олди-бердим ҳам,
Гарчанд мени таламаган нокас қолмаган.
Ақча учун икки дунё чекмасман алам,
Зотан, унинг ўзи менда сира бўлмаган.

Ч о л

Хойнаҳой, сен бирор қизни кўрмоқчидирсан,
Қасам ичган бўлсанг керак икки дунёга?

Й и г и т

Оҳ, отажон, қанийди мен севилган бўлсам,
У қиз мени танимагай еру самода.

Чол

Унда кимни кўрмоқчисан?

Йигит

Ота-онамни,
Энди сўнг бор руҳларига бошимни эгсам.

Чол

Бузрукворинг ким эдилар?

Йигит

Эл чеккан фамни,
Даф этувчи бир зот эди, табиблар отам.

Чол

Шунаقا де?! Отанг билан иккаламизнинг
Вазифамиз ўхшаш экан.

Йигит

Сиз кимсиз?

Чол

Гўрков!

Шундоқ, гўрков, сенга айтсан, ҳар биттангизни
Бу ёқларга олиб келган икковимиз, икков.
У ўлдирган, мен бўлсан-чи, ўзинг биласан,
Ер остига жо қилганман отанг гуноҳин.
Кўп масхара қилишарди бизларни, билсанг,
Оҳ, тириклар қайдан билсин гўрковлар оҳин.
Менга, мана, жаннат ато қилди худойим,
Холбуки мен одамларни гўрга тиқардим.
Гап шундаки, яхшиларни кўмганда доим
Туни билан ухлаёлмай йиғлаб чиқардим.
Яхшилари бор, албатта, табибларнинг ҳам,
Ана, бири ҳамроҳ бўлиб юрибди менга.
Тузук одам, ҳа, чиндан ҳам жаннати одам,
Ана, ўзи келаётир, танитай сенга.

Ота яқинлашади. Даставвал у Йигитни — ўелини
пайқамайди.

Ота
(гўрков чолга)

Хўш, оғайни, йўлни энди жаннатга бошли!

(Ўғлига кўзи тушиб)

Манови ким? Тушимми, ўнг?

Йигит

Ота, отажон!

О, Оллоҳим, бошимизга осмонни ташла,
Қайтдими-а, қайтмас дея ном олган замон!

Ота

(ўғли билан кўришади ва гўрков чолга)

Менинг пушти камарим бу, суюкли ўғлим,
Нуридийдам васли учун тангрига шукр.

Чол

Хасратлашиб олинг, майли, мен кутай бир зум.
Кампирни ҳам кўрсайдингиз, бобои тушкур.
Мен бефарзанд бир одамман...

Йигит (гўрковга)

Раҳмат, эй бобо,
Ёр бўлгуси сизга шояд абадий роҳат.

Чол (йигитга)

Тангри сенга йўлдош бўлсин, майлига, аммо.
Ҳамроҳимни хафа қилиб қўймагин фақат.

Гўрков чол узоқлашади

Йигит (бир неча дақиқадан сўнг)

Мендан рози кетгандирсиз ҳойнаҳой, дада,
Кимга фурсат берибди бу югурик олам.
Баъзан имкон тополмадим ростин айтганда,
Мўъжазроқ бир тош қўйгандим қабрингизга ҳам.

Ота

Марҳумларнинг ҳурматини бажо этмоқлик
Тирикларга ибрат учун топилган бир йўл.
Мурдаларга нима керак? Фақат кафанлик,
Ўғлим, сендан мен розиман, розиман буткул.

Юрагингда асрading сен ота ҳурматин,
Мармартош ҳам кўйдинг менинг тепамга, бироқ
Ким муносиб фарзанд бўлса, падар шавкати
Фиръавннинг эҳромидан бўлар баландроқ.
Бир қария ётар эди менинг ёнимда,
Ўғли унинг тепасига қўйди улкан тош.
Бироқ бир кун иблис кирди ўғил қонига,
Ўғил бир кун таъмасини айлаб қўйди фош:
Қабртошда ўзин исми ёзилмай қолмиш,
Сангтарошни олиб келди бир кун у нокас
Ва ўз исмин ўйдирди ҳам, бу савоб эмиш,
Йўқ, бу савоб аталмагай, манманлик, холос.
Қабристондан ўтиб қолган бирорта кимса
Ҳашаматли мармар тошни кўриб қолган он,
О, бу тошни қўйган фалон азамат деса,
Ота эмас, ўз обрўсин билган у инсон.
Кўряпсанми, инсон зоти ўлимни ҳатто
Манманлиги учун рўй-рост ишлатмоқ бўлар.
Оқибати нима кечди? Етди-ю фано
Ҳаммаси ҳам йўқлик сари айлади сафар.
Мендан аввал шўрлик онанг ўтди оламдан,
Мана, бугун кўрибсанки, ҳаммамиз фоний.
Бирор хабар борми, билмам, шўрлик онангдан.

Й и г и т

Сизни кўриб туришим шу — келганим они.
Тарозибон қошигача юрдик неча йил,
Унинг ҳисоб-китобидан сал аввал ўтдик.

О т а

Энди жаннат қучоfigа борармиз, ўғил?

Й и г и т

Йўқ, дада, мен дўзахиман.

О т а

Нимага? Нечук?

Й и г и т

Қўйинг, бу ҳол янгиликмас мен учун, дада,
Олиб қўйган кўринади жойимни биров.
Бу дунё ҳам олғирларга боқар экан-да.

О т а

Қўйгин, болам, ҳазил қилма, қисмат беаёв!

Й и г и т

Бундан ортиқ қисмат бўлмас ахир, дадажон,
Жазо учун жой бормикан дўзахдан ортиқ?
Энди менга барибирдир ер билан осмон,
Дўзах экан хизматимга берилган тортиқ.

О т а

Не қилайин, айбламасман Оллоҳ даргоҳин,
Гарчанд сенинг қисматингдан чекмоқдаман оҳ.
Бор экан-да, мен билмаган оғир гуноҳинг,
Үғлим, ахир пок эдинг-ку, нур каби, э воҳ!
Сендан рози юрар эди каттаю кичик.
Гоҳо келиб розилигин менга айтарди.
Нечун энди дўзахисан? Нимага? Нечук?
Қайси нокас гуноҳини сенга ағдарди?

Й и г и т

Ҳа, дадажон. Ҳамма гап ҳам ана ўшанда.

О т а

Наҳот бирор гуноҳлари сенга ёзилмиш?

Й и г и т

Ҳа, дадажон, ўзгаларнинг гуноҳи менда,
Нокасларнинг гуноҳлари менга ёзилмиш.

О т а

Нима учун? Жойидами, эс-хушиңг, ўғлим,
Чалқаштириб қўймоқдасан ҳар хил гапларни.
Нокасларнинг гуноҳига жавоб берар ким?
Дейлик, бирор зино қиласа — сенга хатларми?
Тушунмадим мен сира ҳам.

Й и г и т

Эшитинг, дада.

Сиз жавобгар бўлгандингиз беморларга.

О т а

Рост!

Йигит

Сиз қанчалар қайғургансиз улар ўлганда,
Софайганда бўлардингиз хурсанд бекиёс.
Вазифамга кўра мен ҳам табиброқ эдим,
Инсонларнинг руҳларига эдим жавобгар.
Руҳи мажруҳ нокасларни кўрсам, не қилдим,
Ўз тинчимни ўйлаб нари қочганман баттар.
Улар эса бамисоли қутурган итдай
Руҳимизга солар эди, фулу, қатағон.
Ожизларни талар эди бижғиган битдай,
Бир пул бўлиб қолар эди номус, ор, виждан.
Ожиз қолган бечоралар айланиб боши
Сиздан дори сўрар экан энди ўйласам.
Барисига мен кабилар айбдордир рости.
Мен жазога муносибман, ўйлаб қарасам.
Аммо, афсус, энди қайта ўтмас одамзод.
Ўз умрини яшаб бўлди, йўқдир фойдаси.

Ота

Ўйлантириб қўйдинг мени, бу қандай бедод,
Ахир ҳар бир ҳукм жорийнинг бор қоидаси.
Сен ўз қўлинг етгунича иш қиласига эдинг,
Бошқасига қолар эдинг ахир ноилож.
Сен ўзинг ҳам бошқалардан ғам кўрар эдинг,
Йўқ эди-ку, ўғлим, сенда салтанат ва тож.
Наҳот энди ҳаммасига сен жавоб берсанг,
Ахир ўзинг покдомонми — шунинг ўзи, бас,
Иғволарга балогардон бўлардинг, билсанг,
Наҳот ўша савобинг ҳам бўлибди абас.
Абдуллатиф гуноҳи ҳам сендадир балки,
Кечир мени, парвардигор, ўзингсан ҳакам.

Йигит

Дада, худо бошқармаган ҳеч қачон халқни,
Ихтиёрин берган эди лекин чинакам.
Кимларнидир йўлдан урган ҳазрати шайтон,
Кимларнидир бандам деган тангри таоло.
Шайтон гапин муридлари бажарган обдон,
Худо йўлин бандалари унугтан гоҳо,
Ҳамма бало ана шунда, қодири ғаффор
Ўша нўноқ бандаларни кечирмас ҳеч бир.

Парво қилманг, дадажоним, баҳона бисёр,
Қисматдир бу, қабрда ҳам тузалмас букур.

О та

Хўш, бу ёғи не кечади?

Й и г и т

Дўзах — надомат,
Лекин сира андуҳ чекманг мен учун, дада.
Қийноқларни кўп кўрганман аввал ҳам, фақат
Алам қиласар икки пайса етмай қолганда.

О та

Етим қолдим ёшлигимдан мен ҳам отамдан,
Одамларнинг эшигида санқидим итдай,
Ҳатто дўзах лол қотарди мен чеккан ғамдан,
Лекин шайтон йўриғига юрмадим қиттай.
Урушларда бўлдим қанча, ўлмаган жоним,
Пешонамга ёзган экан фарзанд, оила.
Сизларни деб бутун умр оқарди қоним,
Фоний умрим яшаб ўтдим ташвишлар ила.
Имонимни бутун қилиб Оллоҳ серкарам
Менга жаннат дарвозасин кўрсатди, шукр.
Оҳ, учма-уч келган экан савобларим ҳам,
Лекин сенга икки пайса бераман.

Й и г и т

Ҳеч бир.

Етти қават ер қаърига тиқса ҳам тангри
Мен дадамни жаннатдан ҳеч қилмасман жудо.
Кечирингиз, дадажоним, боис сафарим —
Васлингизга келган эдим, хайр, алвидо!

О та

Йўқ, йўқ, тўхта!

Й и г и т

Хайр, отажон, уринманг бекор,
Сизни йўлдан қолдирмайин, гарчи кетгум йўқ.
Бу айрилиқ мангаликдир, оҳ на чора бор,
Тангри ҳукми ҳар нарсадан олий ва буюк...

ПАРДА

УЧИНЧИ КҮРИНИШ

Жаннатдаги фоят гўзал қаср. Бу қасрда О на истиқомат
қиласди. Атрофида фаришталар

Фаришталар тиловати

Парвардигор шафқатни
Ихтиёр этди.
Ўн саккиз минг оламни
Йўқдан бор этди.
Бандасига билдириб
Кўнгилларини.
Тайин этди пайғамбар —
Расулларини.
Ҳазрат Одам шу тахлит
Фасона бўлди.
Малойиклар Одамга
Парвона бўлди.
Тўлсин боқий фароғат
Ушбу хонага.
Раҳмат нури даставвал
Мушфиқ онага.

Она баланд таҳтда

О на

Бир даҳшатни сезаётир юрагим тайин,
Безовтаман, безовтаман анчадан бўён,
Гарчанд жаннат оромига ноил бўлмайин,
Нимагадир юрагимда фашлик ҳукмрон.
Тавба, нечук ҳасрат экан менинг ҳасратим,
Она зоти икки дунё наҳот тинчимас.
Туғилғандан то сўнгги дам фарзанд қисмати
Оналарнинг қисматига бўлганми пайваст...
Нури дийдам қайдга экан? Ким ҳам биларди...
Ха, Оллонинг даргоҳи кенг, шаҳри ҳам катта.
Имкон борми? Уни қандай кўриб бўларди?
Уйда бўлса, келар эди ўзи, албатта.
Дайди бўлиб ўсмаганди ўғлим ҳар қалай,
Кутдирмасди, узоқ қолса мактуб ёзарди.
Бу ерда-чи, кўришмоқ йўқ, афсус, на қилай,
Бу ерда йўқ бирор билан бирорнинг дарди.

Ҳур қиз югириб киради

Ҳур қиз

Қутулмадим, қутулмадим шулардан, э воҳ,
Ҳар қаерда бир гўр экан бу йигит зоти.

Фаришта

Илакишиб қолдимикан бирорта арвоҳ,
Фақат, фақат нолиб ўтган бунинг ҳаёти.

Ҳур қиз

Нолимайми? Ҳур кетсам-да боқмасдан, мана.
Маҳрамликка келтирдилар, жаннат беҳуда.
Сабаб нима? Сабаб — феълинг енгил дерлар, ҳа,
Ҳақиқатни тополмасдан куйганман жуда.

Она

Не гап, қизим? Безовтасан, нима гап ўзи?

Ҳур қиз

Йўқ, йўқ, бекам, афв этингиз, шунчаки бир гап,
Ногаҳонда тушди менга номаҳрам кўзи.
Бу ерда ҳам бор шекилли бир хотинталаб.
Остонада ўлтирибди меровланиб у.
Гап сўрасанг, алланечук дудуқланади,
Танир эдим сизни, дейди, шундай дейди-ю,
Тупугини ичга ютиб ҳам суқланади.

Она

Балки бирор танишингдир, балки бир Мажнун,
Балки менинг ўғлим каби куйган бир йигит?

Ҳур қиз

Танимасман, кўрганманман, ёт у мен учун,
Балки бирор дўзахидир, шилқим, бесубут.

Она

Ким экан у? Бу қасрда қандоқ иши бор?
Номаҳрамлар нечун буён қилибди журъат?
Ҳар хил девлар кезар бунда, қўлида чўқмор,
Лекин қадам босмас эди бандаси фақат.

Балки бирор ўткинчидир, балки, эҳтимол...
Шундақалар бўларди-ку у дунёда ҳам.
Элимизда яхши одат бор эди, алҳол,
Мусоғирдан аҳвол сўраш савоб чинакам.
Чақирингиз!

Ҳур қиз

Бекам, ахир мумкинмас сира,
Эркак зоти бу қасрга қадам босмагай!

Она

Мен — инсонман! Агар инсон бўлса бокира,
Иблисларнинг қутқусига қулоқ осмагай!
Тагин шуни унутмангки, унвоним — Она!
Юрагимда не кечишин билолмассиз сиз.
Сиз-ку ахир эрта-ю кеч менга парвона,
Буйруғимдан ўзга бир иш қилолмассиз сиз!

Ҳур қиз

Йўқ бекачим, бу шунчаки юзаки хизмат,
Аслида биз интизомга посбонмиз атай.

Она

Шунақами?
Хўп фалати экан-ку жаннат,
Посбонбоши келганида бу сирни айтай.

Ҳур қиз

Йўқ, бекачим... мен шунчаки чалғидим гапдан,
Истасангиз кира қолсин... Майлига... маъқул.
Лекин фақат гап тегади.

Она

Кимнинг тарафдан?
У ниқобда кирсин, майли. Хоҳишимиmdir шул!

Ҳур қиз чиқади

Не қилардим? Ҳар қайда ҳам нуқтаи низом,
Жаннатнинг ҳам бор шекилли ўз йўсинглари.
Ўғлим нолиб айтганидай, пойлайди мудом
Маҳаллада чойхоначи кўса сингари.

Ҳур қиз Йигитни ниқобланган ҳолда олиб киради

**Ҳур қиз
(Йигитга)**

Ниқобингни оча кўрма, йўқса бу зотнинг
Куйиб кетар савоб билан топган дунёси.

Ҳур қиз чиқади

Йигит

Оҳ, у қандай зот эканки, ўртар саботни,
Ниқобдан ҳам ўтаётир унинг зиёси.

Фаришта

У — онадир, бандаларнинг ибтидосидир,
Унга хурмат жойиз эрур икки оламда.
Унинг меҳри самовотнинг илк садосидир,
Шу боисдан ғалат ҳислар қўзғар одамда.

Фаришталар тиловати такрорланади

**Йигит
(тиз ҷўкиб)**

Рухсат айланг, о, буюк зот, тиз чўкай сизга,
Ҳар хил чучмал тавозедан йироқман гарчанд.
Ногаҳонда кириб қолдим ҳузурингизга,
Лекин она экансизки, мен сизга фарзанд.

Она

Етар, етар, тур ўрнингдан, олижаноб зот,
Балки кекса мураббийсан, падарсан буюк.

Йигит

Ким эсак ҳам барчамизга бергансиз ҳаёт,
Онаси бор ҳар қандайин зотнинг ҳар нечук.

Она

Ҳа, барчасин тушунаман, онаман, тўғри,
Лекин буни англамади одамзод тугал.
Она ўғлин ардоқлар, у бўлса ҳам ўғри,
Лекин фарзанд она қалбин уқмас ҳар маҳал.

Ер юзида жанглар кечди қаттиқ, қатағон,
Оналарнинг дийдасидан оқди қонли ёш.
Унутмангки, мойил бўлса жангларга ўғлон
Она қалби шу қадарли тортади ёввош.

Йигит

Номукаммал эди замин шу сабабдан ҳам,
Неча-неча зотлар унда ахтармишди йўл.
Лекин ажаб тароватли эди у олам,
Жуда қийин тирикликтан узмоқлик кўнгил.

Она

Шундоқ гаплар айтар эди ўғлим ҳар доим,
Эсимдадир, сўнгги нафас топширадим жон, —
У деб эди: “Яратибди бизни худойим,
Начораки, унинг ўзи қиласи пайҳон.
Сабр қилинг, дер эди у, бўлинг мардона”.
Ажиг қувват олган эдим таскин сўзидан.
Сабр қилинг, дер эди-ю, лекин хуфёна
Ўкрап эди, ёш оқарди унинг кўзидан.

Йигит (четга)

Во ажабо, онамни ҳам худди шу тахлит
Сўзлар билан кузатгандим боқий дунёга.

Она

У ҳаётни севар эди босиқ ва событ,
У топиниб яшар эди нурга, зиёга.
Фоний дунё азобларин у татиб кўрди,
Иғволардан тилка бўлди гоҳида дили.
Қайда ҳасад уруғ қўйса, билингки, дерди,
Ўша жойда баланд бўлғай ифво ҳосили.
Ёлғиз эди дунёда у, лекин чинакам
Ёлғизлатиб қўйган эди ҳаёт бешафқат,
Дерди мудом: “Бу дунёнинг доим бири кам,
Орзу билан яшаб ўтар одамзод фақат”.

Йигит (сергакланиб)

Ким эди у?

О на

Ким бўларди бундақанги зот?
Ё бир дарвеш, ё бир олим, ё шоир ахир.
Шоир эди менинг болам, соҳиби ижод,
Қисматини ўйлаб тун-кун ўртанар бағир.

Йигит (четга)

Қодир эгам, сўнгти бора сабот бер ўзинг,
Дариф тутма бардошингни мендан баногоҳ.
Чора қайда? Сўнгги дафъа ниқобда юзим
Волидамга дуч келишни ўйлабмидим, оҳ,
Чора қайда?

О на

...Фалат гаплар айтарди гоҳо,
Эсимда бор, эркаланиб деганди бир гал:
“Ҳар бир зотта ёдгорлик бор, мен бўлсан аммо
Қўяр эдим “Яхши Одам” номли бир ҳайкал.
Сабаб шулким, яхши одам азиздир, ноёб,
Сайёralар тўпи ичра қуёш мисоли”.

Йигит (четга)

Оҳ, онамнинг ҳузурида турибман шу тоб,
Ёзмишимда шундоқ экан унинг висоли.
Аҳволимни баёт этсам кул бўлар куйиб,
Бекор бўлиб кетажакдир топган жаннати.
Дийдорига боқолмадим бир бора тўйиб,
Ўзини ҳам ўртаётир ҳижрон кулфати.

(Onaga)

Бовар этинг сўзларимга, она, онажон,
Жаннат руҳин туймоқдаман сұҳбатингизда.
Гар қоида кўтарса-ю, изн этса осмон
Бўлар эдим азал-абад хизматингизда.

О на

Кимсан ўзи? Қандай зотсан? Аён эт, ё Рабб.
Илтижойинг юрак-бағрим юборди эзиб.
Сўзинг тинглаб ва шикаста бастингга қараб

Она қалбим ниманидир турибди сезиб.
Ким билади, сен сингари ўғлим ҳам бу кун
Қайлардадир кезиб юрар овора, сарсон.
Жаннатдами, дўзахда у — мубҳам мен учун,
Лекин мени она дединг, демак — фарзандсан.

Йигит

Она дедим, чунки ахир онасиз, она!
Сиз ҳам ахир оналиқдан тона билмассиз.
Мени болам деяверинг дилдан, росмана,
Гарчанд фарзанд дийдорига қона билмассиз.

Она

Нетай, nochor аҳволингни турибман кўриб,
Нетай, бунда турли найранг ўйлаб топарлар.
Ўзларининг рухсорларин очиқ қолдириб,
Сендаиларнинг юзларига ниқоб ёпарлар.
Ким эканинг ноаёндир менга бу фурсат.
Билмасмен ҳеч — мақсадинг не? Муродинг нима?
Олағовур ичра ҳозир дўзаху жаннат,
Кимлигингни истасанг — де, истама — дема.

Йигит

Мен ўткинчи бир кимсаман, муҳаббат боис
Ногоҳ тўхтаб ўтган эдим остоңангизда.
Мен хуш кўрган, аммо лекин хур кетган бир қиз
Хизмат қилиб юрар экан кошонангизда.
Севар эдим мен бу қизни қизғин дил билан,
Барбод этган ниятимни лекин сарҳадлар.
Мендан аввал дўстим унга ошуфта бўлган,
Кўришмадим, ёздим фақат турфа хил хатлар.

Она

Ҳа, хур қизнинг у дунёси қорадир бутун,
У қисматга бўй бермаган, қисмат бунга ёв.
Бегонадан хуфя совға олгани учун
Бўғиб кетган буни бир кун бўлажак куёв.
Ҳа, ҳар кимнинг ўз дарди бор, мен бўлсам, мана,
Кимни кўрсам фарзандим деб хаёл қиласман.
Маъзур тутгин каловлансан, мен ахир она,
Жаннатда ҳам болам дея сочим юласман.

Й и г и т

На чора бор? Оналарнинг йўриғи шундоқ,
Мана, менда икки пайса етмас жаннатга
Аҳволимни деёлмадим онамга бироқ,
Савоб керак ўзига ҳам ахир, албатта!

О на

Онанг билан кўришдингми?

Й и г и т

Жаннатда онам,
Лойиқ қаср ато этмиш парвардигорим.
Менинг учун тириклиқда у чеккан алам
Етиб ортар, шу боисдан йўқ зўру зорим.

О на

Савоб керак барчага ҳам ҳалол, бефириб,
Мана, менинг савобларим учма-уч экан.
Лекин уни кўрсайдим гар, савобим бериб
Дўзахга ҳам кетар эдим, кечирсин эгам.

Й и г и т

Ҳамма гап ҳам шунда, Оллоҳ серкарам
Қўш яратмиш чора ила бечора сўзин.
Офтобсиз-ку, маҳв бўларди зулматда одам,
Аммо тика олмасди ҳам офтобга кўзин.
Мен отамни кўриб қайтдим, отам, хайрият,
Ноил бўлмиш фароғатли жаннат васлига.
Ҳосил бўлди, иншоолло, дилдаги ният:
Мен уларни кўрмоқчийдим — кўрдим аслида.
Бошим оққан томон энди кетарман гирён,
Мен сингари чорасизлар изғиб юрибди.
Фовур ичра тўнтарилиб ётибди жаҳон,
Биздайларни эса дўзах кутиб турибди.

О на

Қандоқ мадад берсам сенга? Ушбу маънода
Кўз ёшидан бўлак ишга етмайди кучим.

Й и г и т

Йўқ, онажон, алам чекманг, нурли дунёда
Яшант, майли дуо билан барчамиз учун.

Хур қиз киради

Хур қиз

(Йигитга)

Бўлди, энди тарк этингиз ушбу қасрни,
Посбонбоши келиб қолар, кун оғаётир.

Й и г и т

(четга)

Абадиян олиб кеттум, оҳ, ушбу сирни,
Юрагимга ҳеч ёришмас тун оғаётир.

(Онага)

Сизнинг билан видолашмоқ оғир нақадар,
Биздайларни кўп кўрган гар бу кўҳна дайр.
Энди сизга сўнгги сўзни айтай мухтасар:
Куллуқ сизга, онажоним, алвидо, хайр!

О на

Тўхта, тўхта! Менда ҳам бор сўнгти илтижо,
Ниқобингни бир зум олгин, эй, яхши одам!

Й и г и т

Йўқ, онажон, йўқ онажон, мумкинмас асло,
Оналарнинг ҳаққи эрур роҳатбахш олам.

О на

Не ҳам дердим, нотанишсан сен менга зеро,
Одамларни ўхшаш қилиб қўяркан замон.

(Хур қизга)

Кузатингиз ушбу зотни.

(Йигитга)

Энди алвидо!

Й и г и т

Алвидо, эй меҳрибоним, хуш қол, онажон!

Ҳур қиз Йигитни кузатиб чиқади

Она

Маҳбус каби туравериб ушбу қасрда
Балки фаҳмим ўтмаслашган, толиққан руҳим.
Ким бўлди бу ажаб одам? Ким у аслида?
Шунчаки бир ўткинчими? Ким бўлди у? Ким?
Нимагадир танитмади ўзин, ҳар қалай,
Юрагида дарди тўла, аламзада зот.
Мурожаат қилди менга она деб атай.
Ёнган дилим қайта бошдан ўртади, ҳайҳот!

Ҳур қиз киради

Она
(Ҳур қизга)

Кузатдингми?

Ҳур қиз

Ҳа, кузатдим, эсин қўйган еб,
Тушунмадим, муроди не? Қанақа дарди?
Иккинчи бор видолашдим онам билан деб,
Катта йўлда дабдурустдан йифлаб юборди.

Она

Нима? Нима? Чақир уни, қайтаринг зинҳор,
Оҳ, жаннатинг поймол ўлсин, бошимга етди!

Ҳур қиз

Фурсат ўтди, энди уни ахтармоқ бекор,
У улкан бир издиҳомга қўшилиб кетди.

Она ҳушидан кетади

Фаришта
(Ҳур қизга)

Нима қилиб қўйдинг, ахир, ҳой иблис қизи,
Бечоранинг жаннатини қилдинг-ку абас.
Бежиз сени енгилтак деб айтмаган ўзи,
Йўқса ҳозир сирни очмоқ шартмиди, нокас!

Зулмат чўқади

ПАРДА

ТҮРТИНЧИ КҮРИНИШ

Дўзах дарвозаси олдидағи улкан хандақ. Ўспирин ва
Қария пачакилашиб турган бир ҳолат.

Ўспирин

Талантлиман!

Қария

Талантлисан!

Ўспирин

Такрорла тағин!

Қария

Куни бўйи такрорладим, етмасми, бўтам,
Ёлвораман, бир оз тинч қўй, шафқат айлагин.
Худодан кўрқ, чол кишини қийнама кўпам.

Ўспирин

Биласан-ку, азалийдир бизнинг бу жанжал,
Бир томондан вакил сенсан, бир томондан мен.
Ҳозир сени бўғажакман, чунки менда гал,
Навбат етгач, хунарингни кўрсатгайсан сен,
Талантлиман!

Қария

Талантлисан!

(Ўспирин Қарияни бўға бошлайди)

Кўйвор, ҳой кофир!
Аҳли инсоф, ёрдам беринг!

Ўспирин

Бақир, ҳа, бақир!
Кўрамиз, хўш, қани кимнинг таланти баланд.

Қария бақира бошлайди. Йигит кириб келади.

Йигит

Кимдир бунда Исрофилнинг суридан ортиқ,
Киёматни қойим қилиб додлаётган зот?!

(Уларни ажратиб, ўспиринг)

Ҳой, инсофинг борми ўзи, бу нима қилиқ,
Бобонг тенги бир чолни-я? Кўйвор, ҳой, шаддод!

Ў спирин
(Йигитга)

Дўзахда ҳам тарбиячи пайдо бўлдими?
Воизмисан, нима бало, тавбангдан кетай!

Қария
(Йигитга)

Кўриб сен ҳам атворига кўнглинг тўлдими,
Лекин навбат буницидир, чидайман, нетай.

Йигит

Ҳеч нимани тушунмадим.

Қария

Ҳа, сенинг демак
Соҳанг бошқа ё дунёдан ғофилсан буткул.
Тараққиёт тимсолидир бизларнинг юрак,
Неча минг йил тортишамиз мен зўр деб нуқул.

Йигит

Йифиштириб қўйсангиз-чи, бу ишларни сиз,
Чол кишисиз, ярашмайди сизга бу савдо.

Қария

Иложи йўқ, навбат билан тортишамиз биз,
Тангри бизга шул жазони кўрибди раво.
Кимдир айтиб кетган экан: ҳасад деган дард
Энг аввало ўз эгасин кемиргай деб. Рост!
Менга сира кун бермайди мана бу номард,
Ёш бошига классикман дейди-я паққос.
Ҳозир бунинг навбатиди, мени у бўғди.

Йигит

Сизнинг навбат келганида не қиласиз, хўш?

Қария

Не қилардим, оғзи бурни аралаш тўғри,
Булғалайман ва ҳоказо, кўнглим жуда бўш.

Й и г и т

Ё, алҳазар! Шунча хорми инсон деган ном.

Қария

(Ўспиринга)

Ҳой, юр дейман, тарихни бу тушунмас экан,
Юр, четроқда ишимизни этайлик давом.
Билиб қўйгин, ҳозир менинг навбатим етган!

Улар четга чекинадилар.

Й и г и т

Инсон зоти, сенинг недан каминг бор эди?
Сенга тангри берганди-ку тафаккур, имон.
Замин, ҳаво, — бари сенда барқарор эди,
Нечун дилдан инсоғ ҳиссин айладинг гумдон?
Ахир сен ит эмасдинг-ку, беланиб лойга
Бир-бирингни ғажисанг то сүяқ талашиб.
Самимият қайда эди, тафаккур қайда.
Лугатингда гар бу сўзлар ётди қалашиб,
Ҳасад, ифво қайдан кирди шўрлик каллангта,
Қайдан сени чулғаб олди худбинлик, куфр.
Нечоғлик сен ширин эдинг гўдак паллангда
Ва нечоғлик балчиқ ичра кечирдинг умр.
Майли, кўкда камайса ҳам бирорта юлдуз,
Ерда битта яхши одам кўпайса, дердим.
Инсон учун асли кураш экан-ку жоиз,
Ҳа, дўзахи эканман мен, ўзимдан кўрдим.

Кимса ҳовлиқиб келади.

К и м с а

Қутқаз мени, ўн дақиқа гапимни тингла,
Йўқса ҳозир келиб қолар менинг кушандам.

Й и г и т

Оҳ, бечора, ҳовлиқмагин, ўзингни ўнгла,
Шўрпешона бир кимсасан билсан, билмасам.

Кимса

Бир зўравон мени сира ҳолимга қўймас,
Топширганлар мени унинг ихтиёрига.
Шафқат деган нарсани ҳеч билмайди нокас,
Кунда бир бор пишиб олар сассиқ дорига.

Йигит

Қандай дори?

Кимса

Билмайсанми? Янгисан демак,
Бир ўрага тиқиб олар азиз бошимни.
Ўн дақиқа сўзлаб олай, чорам йўқ бўлак,
Ҳисобга ол касалимни, кўзда ёшимни.

Йигит

Хўш, нимани сўзлагайсан?

Кимса

Ёмонлайман, бил!

Йигит

Нима, нима!

Кимса

Уқмадингми? Ифво қиласман!

Йигит

Хўш, сен кимни ёмонлайсан?

Кимса

Менга бари бир,
Ифво билан ўз дардимга шифо қиласман.
Пайғамбарми, худоми у, инсонми, шайтон —
Мен ажратиб ўтирумайман, демократман чин.
Гўл экансан, каллаварам, галварс ва нодон,
Одаммассан, токи менга тушмабди ишинг.

Йигит

Сендақалар қайда ўсган билмадим асло,
Шу ерда ҳам ҳунарингни қўймабсан, шўрлик.

Кимса

Нега қўйай? Ўзи шундоқ яралган дунё,
Бирор косиб, бирор табиб — касб-кор турлик.
Ростин айтсам, бир сен эмас, ҳамманг ҳам пўкка,
Икки дунё ҳақиқатга ўзимман нозир.
Тарозибон устидан ҳам хат ёздим кўкка,
Олатасир, текшир-текшир у ерда ҳозир.

Йигит

Ҳа, юмушинг оғир экан.

Кимса

Нимага оғир?
Ота-онам орасини бузганман ҳатто,
Бир-бирини заҳарлашиб ўлганлар охир.
Қайнонамни эса эсдан қилганман жудо.
Зир титрарди мени кўрса ҳатто тожу тахт,
Ер юзида сарҳад билмай даврон сурганман.
Хўш, жаннатинг нима бўпти? Бузуқ бир хилқат.
Унда пора олишганин ўзим кўрганман.

Йигит

Бас қил, нокас, бас қил, нокас, муродинг сўйла,
Яна қандай касалинг бор ифводан баттар?

Кимса

Касалимми? Оғир касал. Танангга ўйла,
Тек турсам гар, бор вужудим тинмай қичишар.

Йигит

Йўқол бундан, лаънати зот!

Кимса (кетаётуб)

Айниди бу ҳам,
Иншоолло, яқин кунда тентак бўлади,
Бир бор ўлса Азроилнинг қўлида одам,
Каминанинг дастларида икки ўлади.

ПАРДА

БЕШИНЧИ КЎРИНИШ

Й и г и т

(дўзах қопқаси олдида)

Ҳали дўзах қопқасидан ичкари кирмай
Остонада шунча савдо бўлса-я, ё Рабб!
Умрим ўтиб кетибди-да, ҳеч нени кўрмай,
Тарозибон айтганидай, кўрмабман қараб.

(*Oвоз*)

Аҳли нокас, тингла, тингла! Ҳозир барингни
Ахлат ўра эшигига ҳайдаб йигаман.
Ким яширган бўлса менинг ифвогаримни
Ўзини ҳам ўша жойга бирга тиқаман!

Дўст кириб келади

Дўст

(*Йигитни пайқамай*)

Қайдадир у, йигит умрим қуидирган суллоҳ.
Бошимга у не кунларни ахир солмади.
Менга роҳат бағишлайди уни қийнамоқ,
Чунки менга ўзга юпанч энди қолмади.

(*Йигитга кўзи тушиб*)

Ие, ие, бу сенми... ё... ё қудратингдан!

Й и г и т

Сен ўзинг-чи? Ўзингми, ё мавҳум нишона?!

Дўст

Минг розиман, парвардигор, бу нусратингдан!

Й и г и т

Оҳ, бормисан, биродарим, дўстим ягона!

Дўст

(*Кўришадилар. Жимликдан сўнг*)

Шунақами? Дўзах дегин, Шундоқ бўлдими?..

Йигит

Шундоқ бўлди. Мана сенга сўнгти хulosса!
Ўйлагаймиз на тириклик ва на ўлимни,
Қисмат билан на низо бор ва на муроса.

Дўст

Неча замон бу хилқатда кездим тентираб,
Қолгани йўқ мен кирмаган биронта пучмоқ,
Ҳатто жаннат қошига ҳам бордим муқарраб,
Учратмадим, тополмадим, мен сени бироқ.
Ва сўнг тангри марҳаматин адо этай деб
Ифвогарни топиб олдим бу ердан ахир.
Эрмагим шу, жазолайман аламим ортиб,
Кўп нолойик ишлар билан машғулман ҳозир.

Йигит

Тентирадим ўшанча вақт мен ҳам тахминан,
Ота-онам васлига ҳам етишдим ҳатто.
Оқибатда лоқайд бўлиб қолгандим чиндан,
На дўзаху на жаннатга бор эди парво.
Ҳа, тангрига айтай энди мен ҳам шукрни,
Ҳасратдошмиз, мана, энди шерикмиз, ҳамдам.
Икки пайса савоб боис кўрдим кўп ерни,
Олганим йўқ аммо уни ота-онамдан.

Дўст

Сенинг айбинг нима экан? Гуноҳинг қай хил?

Йигит

Гуноҳимми? Одамзодга ортиқ ишонмоқ!
Шу боисдан икки пайса етмади сабил,
Тарозибон дашном берди, у ҳақдир бироқ.

Дўст

Нимасига ишондинг сен одам боласин,
Айт-чи, унинг қай хислати сени этди ром?
Йиғлаб туриб, сева туриб, дейман, тингла сен,
Ишонмадим инсонга мен, тамом, вассалом!
Осмондаги юлдузларни мумкин санамоқ
Аммо инсон феъл-авторин борми поёни.
Сенга доим нима дердим, эслагин ўртоқ:
Хаёл билан безаб бўлмас асло дунёни!

Эсингдами, қутқазғандинг мени ифводан,
Йиғиштириб олмасимдан ҳали ҳушимни,
Маҳкаманинг котибаси тўсиб дафъатан
Тилаб олди оғзимдаги тилла тишимни.
Ифво, найранг, ҳасад, фийбат булар бариси
Оҳ, азизим, очолмади кўзингни наҳот?!
Сенга вафо қилдими, хўш, илҳом париси,
Жаннат ато қилдими ё “гўзал” коинот?!

Йигит

Тугатдингми?

Дуст

Нимайди, хўш?

Йигит

Ўзинг-чи, ўзинг,
Falva билан не орттирдинг? Айбинг не экан?

Дуст

Ха, ўйлашга мажбур этар сенинг бул сўзинг,
Ишончсизлик бўлди менинг бошимга етган!
Тарозибон роппа-роса бир кун ўлтириб
Кўз олдимда қилмишмни чўтига солди.
Ишонмайсан менга ҳам деб, писанда қилиб,
Дафтарига қўл қўйдирди, тилхат ҳам олди.

Йигит

Сенга қанча етмас экан?

Дуст

Икки пайса, ҳа,
Етишмаган менда ҳам шу маънавий томон.

Йигит

Янглишибиз иккимиз ҳам нозик нарсада,
Чунки инсон ўз номи-ла Ҳазрати Инсон!

Дуст

Ҳазрат Инсон деганинг не? Куруқ сўз фақат!
Мен ҳам инсон, сен ҳам инсон, у ҳам инсон-ку!

Эса қайда ҳазратга хос бирор фазилат,
Булар бари биз тўқиган оддий лисон-ку!

Й и г и т

Ишонмайсан, демак шулдир ақиданг тутал,
Сени ким деб атасак, хўш, одамзод учун?

Д ў с т

Ишончингни поймол қилиб қўярлар аввал,
Сўнгра уни қайта талаб қилмоқлик нечун?
Оҳ, азизим, мени асло ёвуз деб билма,
Мен ёвузлик қурбониман, қалбимда алам.
Ушбу фалат нисбатимдан тағин сен кулма:
Ура берсанг фаюр тортар энг ёввош ит ҳам.

Й и г и т

Яшаб ўтдик тирикликнинг тунд саҳросида,
Масалан, бир набототдек, бир чечак мисол.
Яшнадик гоҳ баҳорларнинг хуш ҳавосида,
Бандимизни букиб кетди гоҳ ёвуз шамол.
Жами инсон борасида менинг бул сўзим,
Ўйлаб қара, тарихда бор ибрат доимо:
Не-не зотлар гар ўзлари топса ҳам тўзим,
Одамзодга кўрмаганлар ёмонликраво.
Эзгуликнинг йўли оғир, серғалва гарчанд,
Юксакларга кўтаради соҳибин бироқ.
Майли, менинг руҳим синик, хаёлим парканд,
Ҳис қилурман эзгуликнинг офтобин порлок.
Асабларим қақшаб кетди, ростини айтсам,
Жаннат, дўзах ғалвасидан бўлдим ҳам безор
Дўстим, сенга бир ниятим изҳор айласам.

Д ў с т

Хўш, у қандай ният экан?

Й и г и т

Рад этма зиндор.
Ҳозир иккови кириб борсак, дейлик, масалан,
Тўлармиди жаҳаннамнинг чексиз маскани?!
Дўстлик ҳаққи, илтимосим эшиг қатъян.
Олгин мендан етмаган шул икки пайсани!

Д ў с т

Нима? Нима? Эсинг бутми? Сенга не бўлди?
Эшитмадим гапингни мен! Қайтиб ол дарҳол!
Билсанг, ҳозир коинотнинг бели букилди,
Оҳ, сарсонлик қуриб кетсин, чарчабсан алҳол.

Й и г и т

Гапим қатъий!

Д ў с т

Куллук! Аммо сабр этиб бирров
Менинг айтар гапларимга қулоғинг тутгин.
Яхши-ёмон ҳикматларинг ўзингта сийлов,
Фалсафангни, азиз дўстим, бир зум унугин,
Кимманки мен ўз дўстимдан олсаму савоб,
Ёлғиз ўзим кетаверсам ўша жаннатга.
Ҳақиқатнинг мезонидир азалдан инсоф.
Ҳар нарсанинг ўз йўриғи бордир, албатта.
Эсингдами, Маҳшар бағрин роса оралаб
Фақат сени, фақат сени ахтардим дедим?!

Й и г и т

Дединг.

Д ў с т

Аммо нима эди мендаги талаб?

Й и г и т

Нима эди?

Д ў с т

Мен қарзимни узмоқчи эдим!
Сўнгги пайтда ифвогардан қилгандинг халос.
Ҳаётимга бахш этгандинг тинчлик, ҳаловат.
Яхшилигинг қайтаролмай қарздор эдим, рост,
Бўйнимда бурч, эзилдим то рўзи қиёмат,
Менинг учун икки олам бўлди бир чақа,
Биласан-ку, қиёмат қарз деган нарсани.
Тушун ахир мени, дўстим, кулоқ тут гапга,
Савобим ол, сен ол мендан икки пайсани!

Йигит

Во ажабо, томошанинг қизифи чиқди!
Биласанми, таъма заҳри куфрдан ортиқ.
Иғвогар-ку, газабингга ахир йўлиқди.
Лекин сенда қарзим бўлса — ол, сенга тортиқ!
Оғайнимдан икки пайса ўмариб шодон,
Мақтанийми падаримнинг олдида, қани?!
Аҳволимни тушун, сен ҳам, баҳаққи имон.
Сен оласан мендан ўша икки пайсани.

Дўст

Асло! Асло! Сен оласан!

Йигит

Йўқ, йўқ, мутлақо!

Дўст

Сен оласан! Сен оласан! Охирги сўзим!

Тепада садо гулдираиди

Йигит

Тингла, дўстим, келаётир қандайдир садо!
Бирга ўсдик, бирга майли топайлик тўзим.

Садо

Волида-ю падарларга қуллуқ ва раҳмат!
Ташаккурлар бўлсин нурли инсон зотига.
Фикрингизни лекин бу ён буринг бир фурсат.
Зеҳн солинг гапнинг асл тафсилотига:
Икки дўстнинг садоқати, меҳри, ҳиммати
Коинотнинг қадридан ҳам тургайдир баланд.
Ҳеч не билан ўлчанмайди дўстлик қиммати,
Кулаттай у сарҳадларни кудрати билан.
Ҳикоятдан мурод шулким, улуғ, муҳтарам
Дўсти содиқ насиб этсин ҳар кимга ҳар он,
Жаннат ато қилажакман иккингизга ҳам!
Жаннат йўли мана, Сизга очиқ, чарофон.

Атроф бирдан ёришиб кетади

ПАРДА

1978

ҲАКИМ ВА АЖАЛ

(Достон)

*Абу Али ибн Сино таваллудининг
1000 йиллигига багишланади.*

I

Жуда қадим замонларда,
Минг йилча бурун,
Бухоронинг шундоққина Афшонасида
Яшар эди, фоят закий битта ўспирин,
Тенгдошлари қаторида ҳали расида.

Чорва билан машғул эди ота-онаси,
Тирикликтан камтаргина ком олган эди.
Лекин шундоқ оиласининг ўша боласи
Ёш бошидан Ҳаким деган ном олган эди.

Бир нарсада танти эрур доим табиат,
Идрок берса қарамагай усти-бошингта.
Неча-неча саройлардан ҳатлаб ўтган баҳт
Ногаҳоний Ҳумой бўлиб келар қошингта.

Ҳакимда ҳам турфа хислат эди мужассам,
Хусусан у табибиликда пур ҳунар эди.
Ҳар бир гиёҳ кўзларига гўёки малҳам,
Малҳам эса гиёҳ бўлиб кўринар эди.

Болаликнинг бегамлиги ўтди кўп шитоб,
Жуда эрта ниш кўрсатди унда тафаккур.
Эрмак бўлди бобосидан қолган тиб китоб,
Табиатдай баравж ўсида, табиатдай ҳур.

Баҳор келса Ўрта чўлнинг далаларида,
Чўлиқларнинг даврасида куни ўтарди.
Гиёҳ териб гоҳо ўрим паллаларида
Ҳўп¹чиларнинг усулида байтлар битарди.

¹ Ҳўп — ҳўқиз билан ғалла янчиш.

Ҳаким деган номи унинг тарқалиб бот-бот,
Не ҳайратки, ҳар учраган топди күшойиш.
Келар бўлди унга энди атроф тумонот,
Ҳар беморда унга истак, ҳар соғда хоҳиш.

Бандасига берай, деса берар экан деб,
Оддийгина хulosасин чиқарган эл-юрт.
Донғи унинг Афшонага бўлган эди зеб,
Кунба-кундан ортар эди бу шон беҳудуд.

Ўнг билан туш, вужуд ва рух, тафаккур, борлиқ
Унинг зеҳну идрокида эди ҳукмрон.
Бу дунёда инсон билан не бўлса боғлиқ
Чулғар эди хаёлини мўъжизасимон.

Ҳали сукут сақлар эди ва лекин тақдир,
Ўрни ҳам бўш истиқболнинг қароргоҳида.
Чорлар эди, ундар эди уни қайгадир
Қишлоғининг чангли йўли гоҳи-гоҳида.

II

Хабар келди Бухоронинг арқидан бир тонг,
Ёш малика хасталаниб ётармиш ҳолсиз.
Қолмабди ҳеч қараашмаган табиб, дуохон,
Малика-чи, ҳануз ҳорғин, ҳануз мажолсиз.

Одам иси ёқмас эмиш, тунд ва бадқовоқ,
Фақат китоб варақлармиш қараб дарчадан.
На яхши-ю, ёмон гапга солмасмиш қулоқ,
Юз ўғирмиш купша-кундуз барча-барчадан.

Бундай ҳолдан амир фоят ташвишда эмиш,
Эзилармиш қизгинанинг ҳолига қараб.
Хуллас, чопар буйруқ билан амирдан келмиш,
Отланиши керак эмиш Ҳаким арк тараф.

Ўша куни келтирдилар Ҳакимни у ён,
Баланд-баланд минорлардан бордилар ўтиб.
Улкан аркка етишганда, бир йигит шоён
Ичкарига бошлиб кетди илтифот этиб.

Мен Мирзоман, деди йигит, вазирдир отам,
Маликага талабгорман, тўй қўлмоққа шай.
Лекин бу қиз эркак зотин хушламас ҳеч ҳам,
Кўмак учун чақиритирдик биз сени атай.

Боз устига bemorman деб, уйдан чиқмас ул,
Ўжар қизни юмшатасан, бошқа гап бекор.
Қанақанги ҳунаринг бор, қўллагил буткул,
Эзиб ички бергил майли, ёзиб бер тумор...

Аввалига гангид қолди бу гапдан Ҳаким,
Эл ичида гарчи бисёр юриши эди.
Неча-неча хасталикни даф этиб, балким
Бундақасин биринчи бор кўриши эди.

У илк марта аянч билан боқди ўзига,
Аянч эди қархисида арк ҳам баякбор.
Қаради-ю, Мирзонинг у ҳиссиз кўзига,
Юриб кетди илгарига дадил, шиддаткор.

— Кўрсатингиз менга, — деди, — ўша bemorni,
Мармар саҳну зиналардан ошиб ўтдилар.
Айланишиб жуда юксак нақшин виқорни,
Зийнатланган бир эшикка бориб етдилар.

— Мана, — деди Мирзо ўйчан. — Малика шунда.
Ошёнадан кўринарди равоқлар олий.
Ҳаким руҳсиз сухан қилди, кутгайсиз бунда,
Қоида шул, иккимизни қолдиринг холи.

III

Одам лойдан бунёд бўлған дейишган қадим,
Хоки туроб бўлажак у ўлгандан сўнг ҳам.
Шак келтириди илк мартаба бу гапга Ҳаким,
Инсон билан талашарди бу уйда ҳашам.

Токчаларда ялтиарди жавоҳир, билур,
Шамдонларнинг қуббалари кескир чараклаб.
Ҳарир парда орқасида гўё фужум нур
Ёш Малика ўлтиарди китоб варақлаб.

Қарисида мўъжизани кўргандай тугал,
Ҳаким бир зум туриб қолди ҳиссиз ва совуқ.
Қиз эмас бу, пари эди ғоят мукаммал,
У шаҳд билан дарпардага ёндошли ёвуқ.

Китобидан бош кўтарди Малика ногоҳ,
Шиквали бир қараш қилди: — Табибми сен ҳам?!
Во ажабо, қаёқда бор бундайнин нигоҳ,
Маликанинг кўзларида чарақларди ғам!

Бамисоли фор оғзида ўсган бир сунбул,
Соя ҳидин уфурарди бу гўзал вужуд.
Хонанишин эди бу қиз, ўй билан машғул,
У ҳаётдан бекинганди, ёлғиз ва маҳдуд.

— Маъзур тутинг, — деди Ҳаким, сўз бошлаб секин,
Ба фармоний олий келдим мен ушбу ерга.
Мен табибман! Фикрат билан иш тутгум лекин,
Дардингизнинг шифоси бор, теккайсиз эрга!

Нафис чинни кўлдан тушиб сингандай гўё
Жаранг солиб кулди қиз шўх, маст каби майсиз.
Улаб кетди бироқ Ҳаким гапни шу асно:
— Йўқ, маликам, фақаттина севиб теккайсиз!

Қанчалик тез ёнган бўлса шундоқ сўнди у,
Бир зум қотди Ҳаким сари кўзларин қадаб.
Рұксиз гўзал маъюсгина қилди гуфтигў:
— Бухорода сендай табиб бор экан, ажаб...

Ошёнага илтифотсиз имо этди сўнг:
— Устозларинг дорулари ана у жойда.
Маликанинг кўзларида порлар экан мунг,
У буюрди: — Табиб бўлиб қолгунг саройда!

Аён эди Маликанинг дилидаги дарз,
У жиловлаб кўйган эди балофат кучин.
Неча йиллик армонини Ҳаким этди арз:
— Рұксат бўлса кутубхона етар мен учун.

IV

Билдиришишdir амир шу кун Ҳакимга рўйхуш,
Муродига етганди у бетўсиқ, бежанг.
Бамисоли фазоларда парвоз этган қуш,
Бамисоли уммонларда чарх урган наҳант.

Бунда асрий қўлёзмалар, девонлар ноёб,
Илми нужум, илми шеъру илми тиб, бари.
Қанча-қанча ҳикматлардан жам бўлган китоб,
Бунда эди инсон ақдlin жавоҳирлари.

Бир кун насиб этармикан менга ҳам шу баҳт,
Мен ҳам нурли бу қасрга соларманми из?
Чулғар эди уни гоҳ орзулар хушбаҳт,
Ўтказарди тунларини Ҳаким уйқусиз.

Саҳифалар орасидан рўбарўсига
Чиқар эди турфа савол, нимага? Нечун?
Ўлар бўлса инсон агар туғилмоқ нега?
Наҳот мен ҳам яшаяпман ўлмоқлик учун!

Яратишдан мурод нима? Бундай чоф Ҳаким
Тавба билан бош эгарди, келтиридим, деб шак.
Бандаларга банда ишин буюрдинг токим,
Ҳар заррада ўзинг борсан, ўзинг бор бешак.

Лекин тунлар идрок ила қолганда якка
Йироқларга элтар эди яна хаёллар.
— Гар ажалга даво топсам етардим ҳаққа,
Ечиларди, — дерди Ҳаким, — барча саволлар.

Шундоқ ўтиб борар эди унинг кунлари,
Фикру ўйин байтга солиб тизарди баъзан.
Ҳордиқ чоғи ошиқарди Афшона сари,
У ердадир волидаси, у ота маскан!

Шуҳрат уни ҳар сония чулғарди аммо,
Умр деган ўтиб борар бетўхтов, шитоб.
Ҳаким бир кун эзгу ишни этди муддао,
Битсам, деди, авлодларга мен ҳам бир китоб.

Тиб илмининг уммонидан гавҳарлар тизиб,
Дафтаримда барин-барин жам эта борсам.
Илмим ила шояд фоний умрдан ўзиб
Йироқ-йироқ авлодларга ҳам ета борсам.

Боболарнинг руҳи ўзи ёр бўлсин дея
Ният билан Ҳаким бир тонг ушлади қалам.
Хонасида пайдо бўлди бирдан жория:
Йўқлаб келди, — деди, — сизни, ўзи, Маликам!

V

Очиқ эди Маликанинг авзойи ғоят,
Остонада ҳатто енгил айлади таъзим.
Бу ташрифдан мутаассир бўлиб ниҳоят,
Бошин эгиб турар эди бир четда Ҳаким.

Жавонларга томон юрди Малика аста,
Туриб қолди ниманидир гўё вараклаб.
Саҳифадан нигоҳ узмай сокин, шикаста
Лекин титроқ бир овозда бошлаб қолди гап:

— Муҳаббатдан сўз очгандинг у қун сен, табиб,
Лекин шуни унутдингки, мен ҳам муслима...
Ҳаким бир зум қараб қолди хаёлга ботиб
Бамисоли лангариши йўқотган кема.

Бухоронинг ғоят теран дарди эди бу,
Юракларга ботган пинҳон игнаси эди.
Маликанинг лабларидан кўчган бу туйфу
Аёл зотин кўр қисматга гинаси эди.

— Муҳаббатни тарғиб этмоқ жоизмас, бироқ
Айт-чи, нетсин ўз қалбини ахтарса ҳар ким?
Маликанинг овозида янгради сўроқ,
Бу жасур қиз қаршисида жим қолди Ҳаким.

Бу — Малика, камол топган юксак саройда,
Бўйга етиб излар эди ўзига ҳамдам.
Муҳаббатни уқдирмоқдан йўқ зарра фойда,
Ташна эди севгига қиз, ташна жуда ҳам.

Ёш Ҳакимдан жавоб кутиб, кутиб бирор ун
Маликанинг кўзларида шуъла ёнарди.
Ҳаким деди: — Икки нарса мубҳам мен учун,
Бири ажал, бири эса муҳаббат дарди.

Жавонларнинг орқасида недир шу асно
Кўчган каби бирданига кетди тарақлаб.
Не ҳайратки, уй буржида турарди Мирзо
Китобларга кўмилганча, кўзи чараклаб.

Ногаҳоний манзарадан иккиси ҳам лол,
Қалқиб кетди, чекингандай зўр рўйи баддан.
Мирзо эса терга ботиб тураркан беҳол,
— Мутолаа қилмоқдайдим, — деди зўрғатдан.

Маликанинг кўзларида чақнади кибр,
Деди: — Нечук интилибди бу зот зиёга?!

Қиз эшикни ёпар экан зарб билан кескир
— Тоқатим йўқ менинг, — деди,— сендек Мирзога!

VI

Ҳар қандайин одамда ҳар бор пинҳон қудрат,
У йўналган жойин кесар лекин тиф каби.
Малика деб Мирзо гарчанд чекса ҳам ҳасрат,
Ўзга эди, бошқа эди унинг матлаби.

Фоят нозик фаҳм этарди буни Малика,
Баттар ўтда ёнар эди таҳтни қизғаниб.
Мирзо дилин босган эди теран таҳлика,
Туни билан ухлаёлмай чиқди тўлғаниб.

— Қаёқдандир келиб қолган бир табиб юзсиз
Маликага сұхбатдошдир, балки ҳасратдош.
Тантиқ қизнинг хаёлин у банд этган сўзсиз,
Тахтга томон ўрмалаган чаён бу, авбош!

Куритмаса бўлмас унинг изини минбаъд!
Тонгда Мирзо Ҳаким томон йўл олди жадал.
Юрагида уйғонганди сўқир бир журъат,
Жўнатмоғи керак лекин тинч ва бежанжал.

Салтанатнинг пойидадир Ҳаким ҳар қалай,
Бошни тиқиб бўларми ҳеч аждар комига.
Хаёлини чулғаб олди режалар талай,
Қарор қилди, Ҳаким тушгай олтин домига!

Мирзо шу кун Ҳаким билан келди юзма-юз,
Одоб ила гап бошлади ғоят узокдан:

— Миннатдормиз хизматингдан, бурчлимиз сўзсиз,
Мана сенга ҳамёндир, бу, — тухфа биз ёқдан.

Энди етар, жўна энди қишлоғинг томон,
Сендан ҳижрат, мендан эса бўлсин сийму зар.
Муроди не, англаганди Ҳаким бегумон,
Ёқар эди Мирзони рашқ, ҳасад кўру кар.

Бу саройда китоб эди илинжи якка,
Етишганди неча йиллик армони билан.
Ҳаким деди: — Тайин эттан мени Малика,
Кетажакман фақат унинг фармони билан.

Саркаш Ҳаким қаршисида бўшацди Мирзо,
Чекинди сўнг афв сўраб ортига ночор.
Ҳаким ҳиссиз қўл силтади, кўхна бу савдо!..
Сўнг киришди китобининг шарҳига такрор.

Сарой ичра зулмат чўкиб, оққанида вақт,
Ой сафарин бошлаганда мағриб томонга,
Даричани очиб Мирзо ярим кеча нақ
Лахча бир чўғ ташлаб кетди китоб жавонга.

VII

Сарой узра ногаҳоний кўринди олов,
Янграб қолди ғовур ичра посбонлар саси.
Қиёқ тилин минорларга чўзиб беаёв
Ёнар эди амирликнинг кутубхонаси.

Хоб аралаш ҳужрасидан югурди Ҳаким,
Даричадан отди ўзин оловга томон.
Фақат сўнгти илинжига улгурди Ҳаким,
Ёзмаларин олиб чиқди у ердан омон.

Тақдир унга берган эди беаёв фириб,
Ҳаким мунглув боқар эди бир уюм кулга.
Тонг чоғида амирнинг хос миршаби кириб,
Ҳайдаб кетди, уни тўғри олий қабулга.

Аён эди, бало уни кутарди сўзсиз,
Аён эди бўлмаслиги зарра ҳам шафқат.
Юксак таҳтдан қаҳр билан тикканича кўз
Қарши олди уни амир, — соҳиб салтанат.

— Сени Ҳаким деб билардик ғоятда донгдор,
Ишонгандик шул сабабдан кутубхонани.
Сен имонсиз зот экансан, фирибгар, айёр,
Не муродда ўт қўйдинг, хўш, жавоб бер, қани?!

Ҳа, ҳакимга тушган эди бу иш уволи,
У букилган ҳаддин букиб, деёлди фақат:
— Тангри воҳид, Бухоронинг шонидан холи
Шон бўлмаган менинг учун, йўқ бўлак шавкат.

Пешонада неки бўлса бандаси кўрмиш,
Жазога мен мустаҳиқман, амрингизга шай!
Лекин буюк бул гуноҳга кимки қўл урмиш,
Уни улуф битикларнинг заволи ургай.

Кулфат деган келса асли кела берар, рост,
Бирчувалган ипни энди тараб чиқар ким?
Китобёқар деган номни олганди паққос
Ўз умрини китобларга баҳш этган Ҳаким.

Китоб эмас, олов ичра ёнганди бағир,
Фақир эди, ўрганмаган мукофотларга.
Олим эди, нечук бошин кўтарсин ахир,
Ҳаким эди, донғи кетган музофотларга.

Туарар эди ўз ёғига қоврилиб Ҳаким,
Ожиз эди ҳодисотнинг тафсирасидан.
Жаранглади кулоқлари остида ҳукм:
— Ҳайданг буни Бухоронинг чегарасидан!

VIII

Ҳали буткул босилмасдан саройда фабро,
Ҳали поён топмасидан миш-мишлар тутал,
Маликанинг ҳузурига чорланди Мирзо,
Уни фоят ўйга солди такалтуф бу гал.

Сипо эди Маликанинг авзойи гарчанд,
Юзларига лекин ҳасрат солган эди из.
Бамисоли зўр мўъжиза рўй бериб бирдан,
Бир кечада катта бўлиб қолган эди қиз.

— Муродингта етдинг, — деди, Малика босик,—
Ҳар ким кўргай не ёзилган шўр пешонага.
Бироқ менга айт-чи, Мирзо, жавоб бер очиқ,
У кун нега кирган эдинг кутубхонага?

Уни тафтиш қилмоқдайди Малика аён
Ва баробар пинҳон дилин борарди ёриб.
Мирзо деди: — Юрагимни ўртагач гумон
Даричадан тушган эдим, соядек бориб.

Оҳ, маликам, — деди Мирзо, — Сиз зотсиз порлоқ,
Сиз ҳилолсиз, йўқ, қуёшсиз, у-чи, сўник шам.
У бир гадо, у бир табиб, у ялангоёқ,
Ахир нечук у бўларди сиз билан ҳамдам.

Қиз дафъатан бўғриқди-ю, айлади хитоб:
— Тингла, Мирзо, мен саройнинг тантиқ нуриман.
Айбимми ё эгнимдаги бу зар, бу кимхоб,
Мен ҳам инсон шуурининг меросхўриман!

Тингла, Мирзо, мана буни дейдилар қиёс,
Бу — Бухоро Маликасин юрак ифшоси:
Сен — тубансан, у-чи, юксак, сен — хок, у — қуёш,
Сен — гадосан, у — тафаккур мулкин подшоси.

Инсон — Ҳазрат! Инсон — кабир! Бу гапни аммо
Уққандирман на падарим ва на онадан.
Ақидамни топтама сен, мен уни зеро
Топган эдим сен ёқсан ул кутубхонадан.

Энди тамом қуриганди Мирзо мажоли,
Сўз дёёлмай Маликага турарди қараб.
Бу қандайин сеҳр бўлди, бу кимнинг фоли,
Аёлдан ҳам чиқар экан авлиё, ё рабб!

Закий бу қиз мантиқ ипин олганди тутиб,
Лекин ортга бурилди-ю, бошин этди ҳам.
Секин деди: — Толеимни тургайман кутиб,
Эркак бўлсанг Бухордан чиқиб кет сен ҳам!

IX

Сўнгги бора боқди Ҳаким она Жайхунга,
Сўнгги бора боқди ҳазин диёри томон.
Қолди юрти, волидаси ботганча мунгта,
Уни олиб кетмоқдайди ҳимматли карвон.

Яхшиямки, тақдир деган юпанч бор, магар
У бўлмаса одам фамдан битарди қуриб.
Бамисоли ошёнига шошган кабутар
Шу бир сўздан паноҳ топар ҳар ким югуриб.

Мана уни қайларгадир йўллади тақдир,
Гарчанд улуғ шуҳратига йўқ эди тараф.
Тасбиҳ каби ўтирилиб қунлар бирма-бир,
Ҳамадонга етиб келди карвон эрталаб.

Билмасди у, қисмат унга не қилар ҳадя,
Баҳт топарми ёки кулфат бегона жойдан.
Бухоролик ҳозиқ Ҳаким келганмиш дея,
Гап тарқалди ўша куни карвонсаройдан.

Эл ҳамиша икки зотнинг куттай йўлини,
Шул икковни юрагига санагай ҳабиб.
Бири шоир — куйлагувчи эзгу дилини,
Бири эса дарддан фориф этувчи табиб.

Тангри уни қисмаганди бундоқ инъомдан,
Кўзига нур, юрагига жоду солганди.
Карвонсарой эшигини ўша кун шомдан
Неча юз-юз мажруҳ одам ўраб олганди.

Бу ерда ҳам чулғаганди Ҳакимни шараф,
Жонбахш қўли унинг яна киришди корга.
Ўқинса-да, у қувфинди умрига қараб,
Шукр, деди қадр берган парвардигорга.

Не бўлса ҳам бу мунглуг юрт, бу унинг Шарқи,
Ошно эди болаликнинг афсонасидан.
Вайрон-ю, рудларининг йўқ эди фарқи
Олисларда қолиб кетган Афшонасидан.

Карвонсарой эшигига шошарди ҳар ким,
Тонгдан то шом узилмасди бунда саф, қатор:
Қай бир дарду хасталикни қайд этса Ҳаким,
Китобига битар эди ўшани тезкор.

Кори-хайрга бахш этарди лаҳзаю онни,
Ортар эди китобида қайд ва саҳифа.
Бир кун ногоҳ йўллаб олий тахтиравонни,
Саройига олиб кетди уни халифа.

X

Вазирликка тайин бўлди Ҳаким ўша кун,
Ажратдилар унинг учун олий, хос макон.
Салтанатнинг осмонига берганди ҳусн,
Йироқлардан учиб келган юлдуз дурахшон.

Ҳаким учун неки жоиз, шай эди, хуллас,
Фақат унга ёлғиз шартни кўрдилар раво.
Уқтиридилар, сен Бухоро фарзанди эмас,
Унутгайсан у ношукур юртни мутлақо.

Лекин Ҳаким шуурига сифмасди бу шарт,
Хаёлида Афшонанинг гўзал осмони.
Паноҳ эди салтанатлар Ҳакимга фақат,
Ажал билан олишмоқлик эди армони.

Даф этди у неча-неча қисмат пандларин,
Неча тилу забонларни фатҳ этди осон.
Йиллар ўтиб, Шарқнинг улуғ донишманларин
Даврасига кирган эди бу жасур инсон.

У тиббиёт оламида кўтарди байроқ,
Улаб чиқди парканд, юлук ипларин бир-бир.
Деди, тан ҳам яхлит эрур, сарғайса япроқ,
Узид олиб обиҳаёт бермаслар, ахир.

Деди: танда бесабаб дард бўлмоғи душвор,
Тараалгай у асаб деган битта маёқдан.
Мұҳаббат ҳам хасталикдир, инжик, шиквадор,
Кириб келмас юракка у аллақаёқдан.

У асрарди дилда яна битта ниятин,
Поёнига етолмасди ва лекин пешлаб.
Кўрсам дерди тан-вужуднинг ботиниятин,
Ёриб кўрсам дерди уни кўл билан ушлаб.

Лекин бундоқ манзарани ҳис этгани чоқ,
Ногаҳоний қўрқинч билан титраб кетарди.
Осийманми? Яратдинг-ку мени ҳам, халлоқ,
Дея туналар, тангрига жим сукут этарди.

Боқар эди ой тамғали тоқи равоққа,
Маҳобати улуф эди, о, унинг ҳаддан.
Тенгиз журъат керак эди ошиб ўтмоққа,
Асрларнинг ўзи тиккан бундай сарҳаддан.

Ажал билан олишувдир, дерди, ниятим,
Иккимиз ҳам ҳақ олдида соме ҳар қачон.
Эшик оға кирди бир кун: — Не дей, ҳазратим,
Бухородан йўқлаб келмиш сизни бир меҳмон.

XI

Ҳаким дили алланечук гувранди шу дам,
Бамисоли эшиттандай бир сўз — жон физо.
Эшик томон йўналди у шошиб, бечидам,
Остонада турар эди бош эгиб Мирзо.

Ҳаким бир зум сукут этди бекалом, бесўз,
Қаршисида фоят юпун зот эди, ҳақир.
Этагини ўпар экан Мирзо букиб тиз,
Нидо қилди: “Мени маъзур туттайсиз, тақсир...”

Олисларда қолиб кетган севикли диёр
Кўрингандир ҳозир Мирзо шаклида балким.
Бағрин очиб лутфу қарам этди ихтиёр,
Меҳмонини ичкарига бошлади Ҳаким.

Фоят узоқ кечмишини арз этди Мирзо,
Қув Малика уни юртдан бадарға қилмиш.
Жиловдори билан икков бамисли гадо
Юртлар кезиб тентирамиш, саргардон бўлмиш.

Ва ахийри паноҳ истаб келмиш бу томон,
Донғи кетган улуғ Ҳаким, юртдош вазирга.
Не қисмат бор, бажарармиш барин бегумон,
Фақат таъқиб этмаса бас тақдир, қасирға.

Ногаҳонда дув ёришди Ҳакимнинг юзи,
Деди: “Олгил истаганча олтин ва кумуш,
Сени менга парвардигор йўллади ўзи,
Топшираман сенга, Мирзо, оғир бир юмуш.

Қабристонга ўтажаксан сен бугун оқшом,
Харид қилиб келтиргайсан янги бир мурда.”
Мирзо ранги узилди-ю, ўчди батамом,
“Ё, ҳазратим, бу нечук шарт”, деёлди зўрга.

Ҳаким деди: “Ажални мен шундоқ йўл билан,
Даф қилурман, муродимдир тажриба фақат.
Гўрковни сен рози айла бисёр пул билан,
Ҳузуримда қолай десанг, сир сақла минбаъд”.

Ўша тунда муродига етишди Ҳаким,
Содир бўлди тиб илмида пинҳон инқилоб.
Ёриб кўрди у инсоннинг танин баваҳм,
Тонг ёришмай дафн этишни буюорди шитоб.

Куни бўйи иккови ҳам дилгир, бенаво,
Хидлагб юрди дафъи дард деб юрак дорини.
Лекин Ҳаким билмас эди, ўша кеч Мирзо,
Келтирганди бўғизлаб ўз жиловдорини.

XII

Шу зайлда салтанатдан Мирзо топди жой,
Ном қозонди Ҳакимнинг бир юртдоши сифат.
Унга меҳру таважжуҳда қаарди сарой,
Қатнашарди донишмандлар қурганда суҳбат.

Сирдош бўлиб борарди у Ҳакимга секин,
Унинг билан интиларди шуҳрат томига.
Битта ҳолдан ўкинарди фоятда лекин,
Нега бу шон келмади деб ўзин номига.

Афшонадан чиқиб қолган битта осий зот,
Лол қолдириб турса наҳот олам-жаҳонни.
Мирзо олис кечалари ухламай бот-бот,
Қарғар эди каж тақдирни, ўртарди жонни.

Асли Мирзо жўн тириклик гандаси эди,
Умри ўтиб билмасди ҳеч, нима онг, шуур.
У тангрининг шундайин бир бандаси эди,
Унинг учун пуч гап эди идрок, тафаккур.

Ҳаким ногоҳ чорлаб қолди Мирзони бир кун,
Узоқ муддат изҳор этди унга хуш ният.
Деди: — Улуг меҳнатимга ясадим якун,
Китобимга нуқта қўйдим, энди, хайрият.

Кўрдим илк бор инсоннинг мен ботин аъзосин,
Тафаккурнинг номидан мен иш тутдим, Мирзо.
Тингла, Мирзо, мен ўлимнинг топдим давосин,
Ажални мен даф қилурман, енгурман, илло.

Қирқта шиша терилганди токча сафига,
Ҳаким бир-бир санаб чиқди эринмай зинҳор.
Деди: — Эшит, жон узилгач, марҳум лабига
Аввал буни, сўнгра буни томизмоқ даркор.

Қирқа етгач жонланади марҳум мутлақо,
Тилга кирап ва оёққа тургайдир бешак.
Осиёликни ўзгаларга кўрмадим раво,
Кўлламадим бул доруни, келтирмай деб шак.

Мирзо кўзин қоплаганди қуюқ бир туман,
Қаршисига тушган каби осмон эшилиб.
Шивирлади: — Ҳакимми бу ёки ёсуман,
Жаҳаннамда ёнмасайдим бунга қўшилиб.

Ҳаким маъюс бир оҳангда сўнг этди нидо:
— Дилим очдим сенга, юртдош бўлганинг учун,
Бул доруни балки менга қўлларсан, Мирзо,
Иншоолло, умр ҳали узундир, узун.

XIII

Ҳамадонга етиб келди мудҳиш бир хабар,
Сарой аҳли ваҳм билан турди оёққа.
Кўкдан офат келтирганмиш сирли кабутар,
Бағридоғ деб аталгувчи битта қишлоққа.

Қай даргоҳга бориб кўнса бу қуш, ҳар мўмин
Ўша замон тил тортмайин адo бўлармиш.
Қуш бир уйнинг ёстигин қуритса бугун,
Эрта ўзга хонадонда пайдо бўлармиш.

Ўша кун зуд етиб келди қишлоққа Ҳаким,
Бунча бўлмас жаҳаннамнинг даҳшати ҳатто.
Қирган эди аҳли юртни офат бераҳм,
Бир кас йўқки, мурдаларни кўмиб келса то.

Таҳликага тушган эди Ҳаким бағоят,
Ўлат эди бу даҳшатли, бу қора ажал.
Даф этмаса агар уни на бир вилоят,
Қирилмоғи мумкин эди Ҳамадон тугал.

Фармон қилди Ҳаким шунда: борки тирик зот
Ташлаб чиқсин уй-уйини белибос, шу он.
Олмагайлар ўзи билан на мулк, на бисот,
Йироқ кетиб, ертўлада тутгайлар макон.

Ўт қўйингиз, деди сўнгра бадбаҳт қишлоққа,
Жону жондор, ҳатто тоши чўф бўлиб ёнсин.
Кўмиб ташланг кулини ҳам теран тупроққа,
Кетган кетди, қолган одам энди қувонсин.

Ўйлади сўнг ҳодисотни Ҳаким ўлтириб,
Ҳа, дард асли кўз илғамас заррадан ўтар.
Қай бир элда эгасидан офат юқтириб,
Паноҳ излаб учиб келган дайди кабутар.

Бормикан ё тирикликда ўзга тартибот,
Чеклимикан мавжудотнинг ҳадди, саноғи?
Лекин бунда мантиқ қани? Асли не мурод?
Баробарми яхши билан ёмоннинг доғи?

Қайтар экан Ҳамадонга Ҳаким бенаво
Хаёлига Афшонаси келди негадир.
Остонада волидаси тургандай гўё,
Дилгир Ҳаким қамчи босди отга бесабр.

Ногаҳонда вужудини қоплади титроқ,
Ўт ёққандай кўкрагига кириб аллаким.
От қўйди у, саройгача етмасдан бироқ,
Мирзо! — дея қулаб тушди эгардан Ҳаким.

XIV

Салтанатда олағовур бўлди чинакам,
Ётқиздилар уни хилват ўз хонасига.
Шогирдлари тепасида туриб, дам-бадам
Муз босарди ёнаётган пешонасига.

Амр этди у: бирор кимса келмасин ёвуқ,
Унинг ўзи қўллаяжак буткул давони.
Ярим кеча тан увушиб, тер босди совуқ,
Чақиртирди ҳузурига шунда Мирзони.

— Тингла, Мирзо, — деди Ҳаким, — умр кетмоқда,
Ажал билан келмоқдаман юзма-юз ўзим.
Умидворман, қудратим бор уни енгмоққа,
Бухорони эслашайлик, ўтиргил бир зум.

Агар умр вафо қилса, изн этса замон,
Афшонага кетажакман қаландар бўлиб.
Баҳор чоғи Ўрта чўлни кезиб беармон,
Яна байтлар битажакман завқларга тўлиб.

Агар умр вафо қилса, қолган ҳаётим
Ўтказарман мунис, мушфиқ волидам билан.
Китобимда қолди, шукр, илмим, саботим,
Оргиқ ишим бўлмас эди кори фам билан.

Умидворман, бу кулфатни енгажакман мен,
Айтганимдек доруларни томизгин, Мирзо.
Шундоф дея руҳсиз Ҳаким кўз юмди секин,
Чўмган эди тубсиз ўлим қаърига даҳо.

Мирзо тенгсиз томошани пойлаган мисол
Доруларни олиб келди, бир-бир авайлаб.
Жонбахш сувни лабларига томизди дарҳол,
Ўзи айтган қоидага риоя айлаб.

Жонлангандай бўлди шунда вужуд, ажабо,
Лабларига бир-бир дору тома бошлади.
Юзларига қирмизи ранг ютурди гўё,
Во дариғо, Ҳаким нафас ола бошлади.

Бундай ҳолни кўрмаганди Мирзо тушда ҳам,
Ҳайрат ичра йўқотганди тамом ўзини.
Сўнгги шиша қолганида, ё қодир эгам,
Ҳаким бирдан тириклардай очди кўзини.

Ҳуши учиб тисарилди ортига Мирзо,
Бамисоли зўр гирдибод қаърига олди.
Унут бир ҳол хотирига келгандай гўё,
Қўлидаги сўнгти шиша муаллақ қолди.

XV

Яқин келди Ҳакимга у секин гувраниб,
Кўзларида ёнар эди олов бешафқат.
— Тингла, — деди, — кимлигимни энди ол таниб,
Кушандангман, етди менга охирги навбат.

Тарғиб этдинг дунёда сен ҳур муҳаббатни,
Тахт юлдузи — Маликадан мени айирдинг.
Осий банда, мурда ёриб топдинг шавкатни,
Шуҳрат билан қўлларимни менинг қайирдинг.

Менман ўша, Бухорода саройни ёқиб,
Сени юрту Ватанингдан жудо қилган зот.
Менман ўша, томирингда қон бўлиб оқиб,
Соя каби таъқиб этган сени умрбод.

Айт-чи энди, қайбиришимиз йиқилган, йиққан?
Қани, мени енгиб кўр-чи, ажал мен ўзим.
Мен — иблисман, одамларнинг ўзидан чиққан,
Сен — закосан, йўқдир сени кўтарга кўзим.

Мен бермайман бул доруни, — шундоқ деб Мирзо,
Остонага урди чил-чил, битди матлаби.
Сўнгра хилват бу маскандан бесас, бесадо
Чиқиб кетди, бурилганча улкан курт каби.

Тонгда Ҳаким ётоғига кирдилар аста,
Гўё ҳеч сир ўтмагандай кун эди ёввош.
Ётар эди тўшагида безабон хаста,
Фақат ҳорғин кўзларида ялтиради ёш.

Кунлар ўтди, ойлар ўтди судралиб секин,
Сўнг йиллар ҳам ўтиб борди сингиб йўқликка.
Холатида бир ўзгариш бўлмади лекин,
Ётар эди ҳануз Ҳаким боққанча кўкка.

Шогирдларнинг умри кечди унга термулиб,
Ҳаким кўзин тарк этмади нурли нишона.
Охир бир кун ундан рози инсонлар келиб,
Тепасида кўтардилар улкан кошона.

Кўниқдилар асрлар ҳам тақдир ишига,
Салтанатлар келиб кетди такрор ва такрор.
Фақат Ҳаким буюк чархнинг айланишига
Сукут ичра кулоқ тутиб ётади бедор.

Бу сукутнинг тугайдиган замони йўқдир,
Бу умрнинг поёни йўқ, у вақтдан холи.
Кўради-ю, сўзлай деса забони йўқдир,
Эшитади, турай деса йўқдир мажоли.

1980 иил май — июнь.

ШЕЪРИЯТИМИЗ ЮЛДУЗИ

Болалик, ўспириинлик чоғларида дунё, теварак ат-роф, табиат киши кўзига янам сирли-синоатли туюлади, ям-яшил майсалару лолазор қирлар завқингни тоширади, узоқдаги викорли тоғлар тинмай ўзига чорлайди, ойдин ёз осмонида милт-милт этган юлдузлар сирли жилмайиб, хаёлингни олиб қочади. Шундай лаҳзаларда “завқини қитиқлаган ширин туйфуларини” кўксига сиғдиролмаган ўн ети ёшли ўсмир ҳайрату ҳаяжонини шеърий мисраларда изҳор қилишга жазм этади, тезроқ вояга етиб, юртга муносиб фарзанд бўлишини, юлдузлардек порлашни орзу қилади:

Ипак из қолдириб учар қувноқлар.
Бир-бирин қувлашиб, чақишар чақин.
Осмон гўзалларин кумуш ётоқлар
Кўйнига чорлайди, субҳидам яқин.
Дейман: осмонларнинг ҳилоли бўлсам,
Хулкар ва Зухроси бўлгим келади.
Шу гўзал ўлкамда камолга тўлсам,
Порлоқ юлдузлардай кулгим келади.

Гарчи ёш шоирнинг кейинроқ ёзилган “Милтирайди митти юлдуз” деб номланган шеърида ўз тўдасидан ажралиб қолган, шамдек титраб, кўк гумбазининг бир четида “танҳоликдан ёш тўкаётган” осмон жисми ҳақида сўз борса ҳам олтмишинчи йиллар ўрталаридан бошлаб шеър оламида чақнаган “митги юлдуз” тўғрисида гапира бошладилар. Йиллар ўтди, у ўзбек шеъриятини янги босқичга олиб чиққан ёрқин юлдузга айланди, шуъласи йироқ-йироқларга таралиб, бутун туркий адабиётнинг, Шарқнинг йирик сиймолари қаторидан жой олди, шеърлари кўйлаб

Фарб тилларига таржима қилинди. Нафосат оламида “Абдулла Орипов шеърияти” деган тушунча мустаҳкам қарор топди.

1

Инсоният бадиий тафаккури мўъжизаларидан бири бўлган шеърият инсоннинг олам ва борлиқда ҳиссий-эмоционал муносабати ҳосиласидир. Жаҳоннинг тилга тушган шоирлари яратган шеърий дурдоналар барча халқларнинг, барча авлодларнинг маънавий мулки бўлиб қолади. Вақт ўтади, даврлар янгиланади, адабиётта янги авлодлар кириб келади ва бу маънавий бойликка ўз ҳиссасини қўшишга чоғланадилар.

Абдулла Орипов адабиётда бирёқламалик, риторика, декларативлик, баёнчилик, “баҳтли замонага” ҳамду сано ўқиши авж олган, адабиётнинг ижтимоий-эстетик қимматидан путур кета бошлаган бир даврда шеърият остонасига қадам қўйди.

Ҳар бир шоир сингари у ҳам ҳаваскорлик, изланиш босқичини босиб ўтди. Юлдузлар, тоғлар, капалак ҳақида ёзди. Улардан шеър излади. Бироқ у ўқиши-ўрганиш босқичини тез босиб ўтди, шеъриятнинг миссиясини, инсон ва жамият ҳаётидаги ўрни ва аҳамиятини жуда эрта англади. 1962 йилда матбуот юзини кўрган “Куз хаёллари”, 1964 йилда “Шарқ юлдузи” журнали саҳифаларида эълон қилинган “Мен нечун севаман Ўзбекистонни”, “Милтирайди митти юлдуз”, “Бургут” каби шеърлар ўз овози ва услубига эга бўлган шоир шаклланаётганлигидан дарак берди. Шоирнинг собиқ иттифоқда сталинча зўравонлик шарпалари ҳали буткул даф бўлмаган, мустабид тузум ҳукмронлик қилишда давом этаётган, адабиёт эса “соц. реализм” исканжаси остида эзилиш ҳолатида бўлган бир шароитда исёнкор руҳ билан сугорилган түғёнили, лирик-фалсафий, теран мушоҳадали, ҳаётни ўзича кўрган чинакам миллий ва халқчил шеърлари оғир сукунатни титратиб юборган момақалдироқ янглиф янгради.

“Альбомга”, “Юзма-юз”, “Темир одам”, “Аёл”, “Муножотни тинглаб”, “Ўзбекистонда куз”, “Тилла балиқча”, “Дорбоз”, “Отелло”, “Уйку” каби шеърлардаги ўзига хос мушоҳада, дадиллик, ҳақиқатни англашга интилиш, ҳалқнинг дардини айтиш, энг муҳими, эркни улуғлаш, истикололга талпиниш — туғма истеъдод соҳибининг барчани маҳлиё қилиб қўйган, қизғин баҳс-мунозараларга мавзу бўлган муҳим фазилатлари эди. Унинг шеърларидан баҳраманд бўлиш “шеърият байрами”га (Қайсин Қулиев ибораси) айланиб кетарди.

Ҳаётнинг ичига чуқур кириб бориш, ҳаёт ҳақиқатини тасвирлашдаги қатъият ва изчиллик, чуқур образлилик, фикр ва туйғунинг ажойиб бир тарзда омухталиги, шиддаткор рух, ички драматизм, поэтик тафаккурнинг тेरанлиги, Шарқ ва Farb шеъриятининг энг яхши анъаналари уйғунлашганлиги ёш шоир ижодий эволюциясини таъминлаган омиллар бўлди. Бироқ юлдуздай чақнаган бу истеъдод учқунлари вақтинча эмасмикан деган ҳадиклар ҳам йўқ эмас эди:

Олти ойким, шеър ёзмайман, юрагим зада,
Олти ойким, ўзгаларга тилайман омад.
Олти ойким, дўстларим ҳам пана-панада
Истеъдодим сўнганидан қиласар каромат.

Шукрлар бўлсинким, умумхалқ эҳтироми, адабий давраларнинг эътирофи ёш шоирни ҳаволантириб юбормади. “Митти юлдуз”нинг нурлари тобора авжланиб, ажиб шуълалар тарата бошлади. Тез орада “Сароб”, “Баҳор”, “Авлодларга мактуб”, “Совға”, “Минораи калон тепасидаги лайлак”, “Бизникилар”, “Жаннат” сингари ҳар бири адабиётимизда воқеа бўлган шеърлар яратилди.

Бу жиҳатдан кўп тархли “Авлодларга мактуб”, “Сароб” шеърлари эътиборлидир. “Авлодларга мактуб” шеърининг ёзилишига 1966 йилги Тошкент зилзиласи турткни бўлган. Шоир вақтлар ўтиб маъшум зилзила ҳақида ёзилган газеталарга кўзи тушган авлодларни тасаввур қиласди. Улар қарашса-ки, саҳифаларда азоб-укубат, вахима жабрини тортган одамларнинг эмас, балки хушнуд

одамларнинг суратлари илжайиб турибди. Бу не ҳол? Ер ости қаттиқ силкиниб, уй-жойлар бузилса-ю, одамларнинг чеҳрасида шодмонлик? Шоир бу ҳолнинг сиридан авлодларни воқиф қиласиди:

Дўстларим, ҳайратда қолмангиз фақат,
Сирлилик бизларнинг услугга мосдир.

Тинчи йўқолган одамларни жилмайишга мажбур этган бу куч — “Советлар” услуби эди. Шоир таг маъноли мисралар, сўзлар воситасида ёлғон жамиятнинг, эркинликка ёт тузумнинг моҳиятини очиб беради. Бу тузум ҳатто “инсоннинг азалий касби бўлган, дунёдай қадим” дўстликни ҳам сал бўлмаса биз кашф этдик, фақат бизга хос деб бонг уради:

Сизга фалокатдан берганда хабар
Дўстлик борасида ёзурлар албат.
Ёзурлар: “...биз бўлдик тенгсиз биродар,
Бу хислат бизларга хос эрур фақат”.

“Сароб” шеърида олтмишинчи йиллар ўртасида со-биқ иттифоқда ҳукм сурган муҳит, сохта ғоялардан тикланган жамиятнинг, разолат ва ёзувликнинг моҳияти, муаллимнинг “олдинда кутаётган баҳтли ҳаёт” тўғрисидаги сабоги билан реал ҳаёт ўртасидаги номутаносибликтининг лирик қаҳрамон қалбida қолдирган жароҳатлари ўтли, шиддатли, даъваткор мисраларда очиб берилди:

Мен умримнинг бу суронли кечаларида
На бир таскин топа олдим, на шеър тополдим.
Юрагимга бир маҳаллар кирган туйғулар
Энди сендан кеттаемиз деб сўрайди жавоб.
Мени бир зум ҳол-жонимга кўймайди улар,
Кўймайдилар ваъдаларинг чиқди деб сароб.

Бироқ лирик қаҳрамон бир вақтлар ўзи сажда қилган ҳазрати инсон эндилиқда унинг кўзига телба мисоли кўринса ҳам, оламда разолат, қабоҳат уруғлари урчиб кетган бўлса ҳам, дунёнинг поклиги ҳақидаги “гўдак ишон-

чи қорга ёзилган” хатдек эриб кетган бўлса ҳам заминдан, ўзи яшаётган муҳитдан узилиб кета олмайди, чунки у шу муҳитнинг меваси:

Не тонг, ахир фарзандмиз-ку шу замонага,
Ахир она сийнасидан фарзанд тоналмас.
Кўл кўтариб бўлармиди ахир онага,
Зотан, унга қўл кўтарган — фарзанд саналмас.

Шоир етмишинчи йилларда ҳам ҳаёт қатламларига чукур кириб бориб, инсон қалби кечинмаларининг нозик тебранишларини чизишда давом этди. “Она сайёра”, “Генетика”, “Бир танишим ҳақида баллада”, “Қўриқҳона”, “Маломат тошлари”, “Учинчи одам” каби шеъларида бутун бир романга, қиссага арзирли муаммоларни ўргага ташлади ва уларни лирик қаҳрамоннинг асаб толаларидек таранг тортилган кечинмалари орқали ифодалашга муваффақ бўлди. Шоирнинг кейинги давр ижодида ҳам маънавиятни юксалтиришга, руҳиятни поклашга хизмат қилувчи сарбон туйфулар янада тиниклашди, фалсафий руҳи кучайди, кўлами кенгайди.

Ҳар қандай зиддиятли даврларда бўлганидек, қарама-қаршиликлар кучайган, муҳолифлик сўнгти нуқтасига етган, қадриятлар қайта баҳолана бошланган, йўл танлаш муаммоси кўндаланг қўйилган саксонинчи йиллар охирида ёзилган “Узлат”, “Ишонч кўприкли”, “Саволлар”, “Тараққиёт”, “Бегоналик” “Эътиқод” каби шеърларда кўпчиликни қийнаган саволлар ўткир қилиб қўйилди, ўзини ҳақиқатман деб даъво қилувчи соҳтакорликлар фош этилди.

2

Давр ижодкорга мавзулар, туйфулар бериши мумкин. лекин ҳамма гап бу ниятни қай тахлитда ифодалай билишда, рўёбга чиқаришда. Абдулла Ориповнинг санъаткор ижодкор сифатидаги маҳорати шундаки, лирик бир шеър доирасида умум аҳамиятли муаммони ўқ марказга олиб чиқиб, ўз поэтик ниятини реал борлиқнинг инъекси бўлган фикрлар ва ҳис-туйфулар орқали жамият ва

алоҳида олинган бир шахс оламининг ҳаққоний манзараси ва сийратини, шарҳи ва таҳлилини сатрларга сингдира олади. Шу ўринда сўз ўз-ўзидан шеъриятда, шу жумладан Абдулла Орипов шеърларида лирик қаҳрамон масаласига бориб тақалади.

Шеъриятда лирик қаҳрамон доимо асар марказида бўлади. Шеърият ихлосмандлари муаллифнинг лирик “мени” орқали шоирнинг поэтик оламидан воқиф бўлиш, унинг кечинмалари гирдобига кириш ва туйғуларини ҳис қилиш имкониятига эга бўладилар. Лирик қаҳрамон дейилганда кимни — шоирнинг ўзиними ёки бирор бошқа шахсни назарда тутамизми деган савол туғилиши табиий.

Абдулла Ориповнинг лирик қаҳрамони аксарият ҳолларда шоирнинг ўзи, унинг “мени” сифатида намоён бўлади. Бироқ бундан шоир билан лирик қаҳрамон бир шахс, улар ўртасига тенглик аломати қўйилади деган холоса келиб чиқмаслиги лозим. Шоирнинг лирик қаҳрамони ўз даврининг илғор foяларини илгари сурувчи маънавий бой, эстетик фаол, юксак ватанпарвар, курашчан, дўстлик ва севгида садоқатли типиклашган образдир. Шеъриятнинг табиати, ўзига хос қонун-қоидалари, хусусиятидан келиб чиққан ҳолда лирик қаҳрамон фақат шоир шахси билан чегараланиб қолмайди.

Бу жиҳатдан Е. Евтушенконинг фикрлари эътиборлидир: “Шоирнинг таржима ҳоли — бу унинг шеърларидир... Шоир бошқалар тўғрисида шафқатсизлик билан ҳақиқатни ёзиш ҳуқуқига эга бўлиш учун ўзи ҳақида ҳам шафқатсиз ҳақиқатни ёзиши керак. Шоир шахсини реал шахсга ва поэтик шахсга ажратиш сўzsиз ижодий ўз жонига қасд қилишга олиб келади... Шеъриятда ўзи ҳақида сукут сақлаш шак-шубҳасиз бошқа барча одамлар ҳақида сукут сақлашга, уларнинг изтироблари, ғам-қайғулари ҳақида миқ этмасликка олиб келади”. (Е. Евтушенко. Политика — привилегия всех. Издательство Агентство Печати Новости, Москва, 1990, 589-бет). Абдулла Ориповнинг лирик қаҳрамони айнан мана шундай ўзи ҳақида ҳам, ўзгалар ҳақида ҳам аёвсиз шафқатсиз ҳақиқатни арзи ҳол этувчи лирик қаҳрамондир.

Лирик қаҳрамон тушунчасини аниқлашда ҳар бир шоирга хос бўлган ижодий индивидуалликдан, ҳаётни тасвирлашнинг фақат ҳар бир шоирга хос бўлган тамойилларидан келиб чиққан маъқул. Абдулла Орипов шеърда кўпинча “мен” номидан гапиради. Бироқ шоирнинг шундай шеърлари ҳам борки уларда шоир “мени” доираси торлик қилиб қолади, шоир маълум бир гурухнинг, халқнинг номидан сўзлайди, фақат ўз изтиробларини шеърга солиб қолмайди. Бироқ масаланинг яна бир жиҳати шундаки, шоир бевосита ўз бошидан ўтмаган “бетараф” кечинмаларни ҳам айнан ўз кечинмалари сифатида беришга интилади ва бунга кўп ҳолда муваффақ бўлади. Демак, шоирнинг лирик “мени”, биринчи навбатда, шоирнинг ўзи, айни замонда умумлашма образ ҳамdir.

Абдулла Орипов ўзбек шеъриятига ўз оҳантлари, ўз ифода усули, борлиққа — табиат ва жамиятга, одамларнинг руҳий оламига ўз қарашларига эга бўлган лирик қаҳрамони билан кириб келди. Шоир шеърларида лирик қаҳрамон кўп қиррали ва шу билан бирга уйғун образ сифатида намоён бўлади. Унинг лирик қаҳрамони эволюциясини шеърда ўртага қўйилган муаммолар, уларнинг мазмунини очиб бериш, шоир шеъриятидаги асосий мотивлар ва кайфиятларни, шеър манбаларини аниқлаш орқали тушуниш мумкин.

Лирик қаҳрамон билан лирик характер бир-биридан тамомила бошқа-бошқа тушунчалардир. “Темир одам” шеърини яратишида шоир инсон кашф этган “темир одам” — робот деталидан моҳирона фойдаланиб, ҳиссиз, туйфузиз, манқурт кимсалар ҳақида сўз юритади. Шеърдаги:

Темир одам ясад юргунча, кўпроқ
“Жонли темир”ларни ўйлангиз, устоз, —

деган хитоб лирик қаҳрамоннинг даъватидир. Нафратни, ишқни, меҳрни билмайдиган кимса эса — шоир яратган, тип даражасига кўтарилилган лирик характердир.

Абдулла Орипов шеъриятида ранг-баранг турфа олам лирик характерлар яратиш орқали поэтиклиштириллади. Шу маънода лирик характер шоирнинг ҳаётни ўзига хос

идрок этишини, ҳаёт ҳодисаларининг янгича талқинини, ўз ёқтириши ва ёқтирмаслигини, ижодкор сифатида ўз қиёфасини, қалб розини изҳор этиш воситаси ҳисобланади. Шеърий асарнинг табиатидан келиб чиқувчи лирик характер ижодкорнинг борлиқни субъектив тушуниши, акс эттириши билан чамбарчас боғлиқдир.

Шоир шеърларида туйғу ва фикр қоришиқ ҳолда нағоён бўлади. Лирик характер фикр ва ҳиснинг диалектик бирлигига асосланади. Лирик характер — образ ижодкорнинг воқеаликка муносабати, нимадандир қониқиши ёки қониқмаслиги, қандайдир воқеа-ҳодисага ўз хайрихоҳлиги ёки норозилигини билдириши, руҳиятига таъсир қилган кечинмаларни ифодалаши орқали яратилади.

Хур фикрлилик, истиқлол умиди, Ватанни хур, озод, инсонни эркин кўриш орзуси, жамиятдаги салбий кўришишларга аёвсиз муносабат, адолатта, ҳақиқатга етишиш истаги Абдулла Орипов ижодида марказий ўринда туради ва лирик қаҳрамон образи кўп жиҳатдан шоирнинг мана шу ҳаётий ва эстетик тамойиллари, идеалларидан келиб чиқиб шаклланади.

Қандайдир умумий, “байналмилал” тил ҳақида гапсўзлар авжига чиққан 60-йиллар ўртасида шоир аждодларимиздан ўтиб келаётган она тилимиз — ўзбек тилининг ҳимоясига даъват этилган ўтли мисралар яратди:

Минг йиларким, булбул қаломи
Ўзгармайди, яхлит ҳамиша.
Аммо ўйрлик тўтининг ҳоли
Ўзгаларга тақлид ҳамиша.
Она тилим, сен борсан, шаксиз
Булбул кўйин шеърга соламан.
Сен йўқолган кунини, шубҳасиз,
Мен ҳам тўти бўлиб қоламан.

Олтмишинчи йиларнинг ўрталарида ёзилган “Мен нечун севаман Ўзбекистонни”, “Сароб”, “Юзма-юз”, “Ўзбекистонда куз”, “Бизникилар”, “Баҳор”, Минораи қалон тепасидаги лайлак”, “Совфа” каби шеърларда ва “Ўзбекистон” қасидасида миллий ўзликни англаш, Ўзбекистон ис-

тиқоли, халқ ва Ватан тақдиди, “миллион эгатларга сочилган ўзбек”нинг дарду ҳасратлари, муаммолари илк бора ўткир қилиб қўйилади. Бу шеърлар учун умумий бир оҳанг, умумий фоя — бу ҳурлик, миллий уйғониш фоясидир.

Умуман, халқ, унинг дарду ташвиши, Ўзбекистон мавзуси шоир ижодида айрича бир муҳаббат билан қаламга олинади. Она-юрт — жонажон Ўзбекистон — Абдулла Орипов энг баланд мақомларда қаламга олган мавзудир. Шоир бевосита Ўзбекистонга шеър бағишлайдими, пахтани мадҳ этадими, ҳамма вақт кўз ўнгида жафокаш халқимиз, унинг муаммолари, ташвишлари туради. Миллатнинг уйғонишида, миллий фуур туйғуларининг чуқур томир ёйишида, Ватанни танишнинг теранлашишида шоир сўзининг салмоғи бекиёс бўлди. Унинг лирик қаҳрамони Ўзбекистонни оташин бир севги билан севади. Шуниси характерлики, Ўзбекистонга бўлган муҳаббат баландпарвоз мисралар, яланғоч мадҳиялар билан эмас, балки лирик қаҳрамон қалбининг туб-тубидан отилиб чиққан кечинмалар, безовта ўйлар тарзида инкишоф тонади:

Халқим, тарих ҳукми сени агарда
Мангу музликларга элтган бўлсайди,
Қорликларни макон этган бўлсайдинг,
Мехрим бермасмидим ўша музларга?

“Мен нечун севаман Ўзбекистонни” шеърини ўқиб чиқасиз, аммо қўйилган саволларга жавоб аниқмасдек туялади. Тўғри:

Юртим, сени фақат бойликларинг-чун
Севган фарзанд бўлса кечирма асло! —

мисраларига асосланиб, киши ўз ватанини бойликлари, гўзаллиги учунгина севмаслиги лозим деган фикр келиб чиқиши мумкин. Лекин бу фикр ҳам тугал, аниқ фикр эмас. Бу шеър тўғрисида жуда кўплаб турли-туман фикрлар билдирилган, ҳар бир мунаққид ўзигча ҳар хил шарҳлаған. Бироқ шоир “Мен нечун севаман Ўзбекистонни”

сўзларини нима учун айнан сарлавҳага олиб чиққанлиги-ни, коса тагидаги нимкосани, шоир назарда тутган, сатрлар орасидаги “яширин мухолиф”ни ҳеч ким айтмаган. Фурсат етиб буни шоирнинг ўзи ошкор қилишига тўғри келди. “Ўша даврда Ўзбекистонни пахтаси учун, олтини учунгина ҳурмат қилган, ҳурмат қилмаган бўлса-да, шундан фойдаланган қудратли мустамлакачи синфлар бўлган. Уларнинг руҳияти муқаррар кишининг ғашини қўзғар эди, шунда мен, хўп, сен уни бойлиги учун севар экансан, сен фақат шунинг учун севар экансан, севмасанг-да фойдаланасан, ҳолбуки, ўша пахта ҳам меники, олтин ҳам, аммо мен нима учун севаман Ўзбекистонни?! Агар мангу музликларда яшаган бўлсанг ҳам, халқим, мен бир чукча ё ёкутга ўхшаган бўлганимда ҳам сен учун жонимни берар эдим-ку! — деган мухолиф кайфият ва фикр билан ўз вақтида ёзилган”, — деб қайд этади муаллиф. Лирик қаҳрамоннинг Ўзбекистонга бўлган муҳаббати ич-ичидан отилиб чиққанлигининг сабаби мана нимада экан. Ўша пайтлар ошкор айтилиши ҳеч мумкин бўлмаган “яширин мухолиф” билан бўлган мунозара кескин лирик конфликт яратганлиги туфайли ҳам шеър мана шундай таъсирили оҳанг касб этган.

Ўзбекистон, она халқ, Ватан ҳурлиги ва озодлиги мавзуси даъваткор руҳ билан қўшилиб Абдулла Орипов “феномени”ни вужудга келтирган компонентлардан бири бўлди.

Шоир халқимиз тарихи, олис мозийда ва яқин ўтмишда яшаб ўтган буюқ сиймоларимиз, қатағон қурбонлари бўлган улуғ адibu шоирларимиз ҳақида миллатимизнинг қадрини баланд кўтаришга, ўзликни англаб олишга даъват қилувчи шеърлар битди.

3

Шоир лирикасидаги яна бир катта мавзу — бу инсон мавзуси, инсон ҳақидаги янги ҳақиқатларни очиб бериш, инсонни бутун мураккаблиги билан тасвирлаш муаммосидир:

Коинот гултожи инсондир азал,
Ундаридир энт олий, тафаккур, амал.
Ҳатто у тубанлик ичра ҳам танҳо,
Ё фалак, ижодинг бунча мукаммал.

Шоирнинг бутун ижоди мана шу инсон закоси, унинг сир-синоати, англаб бўлмас сехру жодуси, юксаклиги ва тубанлиги қаршисида лол бўлган қалбнинг ҳайратидек таассурот қолдиради. У бир шеърида:

Қанча-қанча сир яшар ҳар кимнинг бисотида.
Шул сабаб ул ИНСОНДИР, шул сабаб у ЗОТ эрур,

деб ёзади. Дарҳақиқат, инсонни, унинг мураккаб кечин-маларини, руҳий оламини тадқиқ этиш, “буюк мавжудот”-нинг англаб олиш ҳамиша ҳам осон бўлавермайдиган феъл-авторини, “сийрати”ни англаш истаги шоирга сира тинчлик бермайди.

Бироқ шоир инсон тасвирида абстракт муаллақликдан жуда йироқ. “Мен нимани кўриб, ҳис этган бўлсам, шуни қаламга олишга ҳаракат қилганман”, дейди шоирнинг ўзи. Унинг ўлмас мавзудаги шеърлари инсон руҳијати ва маънавияти ҳақидағи тизгинсиз, зиддиятли фалсафий мушоҳадалардир. “Генетика”, “Маломат тошлири”, “Қўриқхона”, “Учинчи одам”, “Тафаккур монологи”, “Виждон”, “Денгизга”, “Бир танишим ҳақида баллада”, “Диалектика” каби шеърлар, “Жаннатга йўл”, “Ҳаким ва ажал”, “Ранжком”, “Соҳибқирон” каби катта жанрдаги шеърий асарларни олайликми, уларнинг барчасида инсон маънавияти, эътиқоди, яхшилик ва ёмонлик, гўзалик ва қабоҳат, виждон ва имонсизлик ўртасидаги кураш, дунёни софлаш, комил инсон foяси жозибали, эҳтиросли, фалсафий теран ифодаланади. Бу шеърларнинг ҳар бири узоқ изланишлар, “ижод “тўлғоги”, олижаноблик ва разиллик қаршисида ҳайратга тушиш, инсондаги турфа, бутунлай қарама-қарши ҳолатлар олдида тант қолиш маҳсули сифатида юзага келган. (“Мен ҳар гал каттароқ бир шеър ёзишга киришганимда баҳайбат ҳайвон билан жангта киришаётгандек бўламан”, дейди шоир.) Ўзи яшаб

турган даврнинг, инсоннинг сир-синоатини билишга, бадий мушоҳада этишга, унинг мураккаб руҳий олами манзараларини чизишга ошиқиши, ҳар бири ўзига хос “сайёра” бўлган, юрагида, ўю фикрида сўз билан ифодалаш мушкул тилсимотлар яширинган инсон қалбини тадқиқ этиш мудом шоир дилини безовта қилиб келади. Шоир бир шеърида бежиз:

Инсон қалби билан ҳазиллашманг Сиз,
Унда она яшар, яшайди Ватан.
Уни жўн нарса деб ўйламанг ҳаргиз,
Ҳайҳот! Кўзғалмасин бу Қалб дафъатан!..

дея хитоб қилмайди. Бир томондан, ўзида Ватан, тил, миллат, башар каби умуминсоний тушунчаларни ифодалаган инсонни мукаммал қўриш, унда инсоф, меҳр, диёнат, адолат ва одиллик, виждон каби матлаблар тобора ноёблашиб бораёттганлигидан ташвишга тушиш, уларни асраршга чақириш, “асримиз одам”ининг гоҳо идрок қилиш мушкул бўлган саъй-ҳаракатларидан ёқа ушлаш, иккинчи томондан, умумий, бироз мавхумроқ инсонни куйлашдан аниқ бир инсоннинг ички оламига нигоҳ ташлашга ўтиш, яъни инсонни бадиий-фалсафий талқин қилиш баробарида конкрет-ҳиссий идрок этиш шоир ижодида инсон талқинининг ўзига хос хусусиятларидир.

Шоир шеъриятида инсон концепцияси жонли мавжудотнинг гултожи — инсондаги ёзувлик ва эзгулик ўртасидаги зиддият тарзида комил инсон тоғасидан келиб чиқиб аниқ ижтимоий-ахлоқий нуқтаи назардан ёритилади. “Инсон манзараси”, “Илтимос”, “Ишонч кўприклари”, “Яланғоч сатрлар”, “Тириклиқ”, “Фалати зот”, “Савоб”, “Тафаккур монологи” каби шеърларда инсонни янада баркамол қўриш, маънавий поклик масалаларининг турли жиҳатлари ўткир қилиб қўйилади, “дунё ҳам, инсонлар қалби ҳам бугун ёвузликдан зада қўриқхона” бўлган бир даврда меҳр-муҳаббат, савоб, пок ниятлар инсонни тарк этмаслиги учун бонг уради:

Оламда кўп нарса камёб бир қадар,
Не-не туйгулар ҳам камёбдир, алҳол,
Мен дердим: соф қалбни учратган сафар,
Дарҳол ўраб олинг атрофин, дарҳол.

4

Ҳар қандай бадиий асарда ҳаёт ҳодисалари, замондошларнинг ўй-фикрлари ижодкорнинг шахсий кечинмалари орқали бадиий образлар воситасида умумлаштирилади. Бироқ ҳар бир ижодкор объектив воқеликни субъектив тасвирлайди, яъни кўплаб ҳаёт ҳодисалари ичидан ўз ижодий идеалига, ёзиш усулига мос келадиганларини саралаб олади. Бундан лирик қаҳрамоннинг бошқа компонентлар билан биргаликда ҳар бир ижодкорга хос бўлган ўз услуги билан чамбарчас алоқадорлиги масаласи келиб чиқади.

Ижодда у ёки бу даражада бадиий юксакликка кўтарилиган шоирларнинг ўзига хос шеърий услуги ярқ этиб кўриниб туради. Ўзбек шеъриятида Чўлпон,Faфур Фулом, Ойбек, Шайхзода, Миртемир, Зулфия, Усмон Носир ва бошқаларнинг ўзига хос бетакрор поэтик услуги шакланган. Замонавий ўзбек шеърияти ҳам поэтик индивидуалликка бой. Э. Воҳидов, О. Матжон, У. Азим, Ш. Раҳмон, Ҳ. Худойбердиева ва бошқалар ўзига хос услугига эга.

Услуб бадиий ижоднинг, ҳар қандай бадиий асарнинг муҳим жиҳатларидан бири, бадиий асардаги ғоявий-эстетик моҳият унсурларидан бири сифатида ҳар бир ижодкорнинг ҳаётни ўзига хос, такрорланмас усуллар билан ўз мушоҳадасидан ўтказишидир.

Услуб масаласи ижтимоий воқеаликка шеърий муносабат билдиришнинг ўзига хослиги, дунёқарашиб, мавзу танлаш, образ яратиш, маҳорат масалалари билан бевосита боғланиб кетади.

Абдулла Ориповнинг шеърий услубида фалсафий-лирик йўналиш устунлик қиласиди. Олам бадиий-фалсафий идрок этилади. Бироқ фалсафий унсурлар аралашиши шеърни фалсафий тизимнинг шеърий баёнидан иборат

қилиб қўймайди. Фалсафий руҳ устунлик қилган, вақт ва замон, инсон ва табиат муносабатлари замирига қурилган, чатнаб турган тафаккур ёғдуларидан бино бўлган бу шеър иморатида энг аввало лирик субъектнинг ички туйгулари изҳори, уни тўлқинлантирган, ҳаяжонлар гирдо-бига отган ҳис-туйфуларнинг зиддиятли кечинмалари олдинги ўринда туради. Шоирни чексиз ўйларга толдирган азалий ва абадий муаммолар бадиий образ либосига бурканади ва бадиий-фалсафий умумлашма даражасига кўта-рилади. Шоир лирик субъектнинг ўй ва кечинмаларини инсон онги ва дунёқарашининг энг умумий қирралари билан мутаносиб олиб қарайди ва тасвирлайди. Мангу муаммолар ҳақида сўз боргандга ҳам ҳамиша замон, давр, вақт шоирнинг кўз ўнгига туради, инсониятни минг йиллардан бери ўйлантириб келаётган муаммолар, масала-лар, долзарб замонавий ҳодисалар, муаммолар билан уй-фунашиб кетади. Шоирнинг умуминсоний манфаатлар ва қадриятлар мавзусида юксак мақомли тафаккур шеъриятида инсон ва борлиқ масалалари аниқ мақсад билан ўртага қўйилади ва талқин қилинади.

Аниқ бир образдан фалсафий мушоҳада томон бориш, одатий бир ҳолнинг ички маъносини кўра билиш Абдулла Ориповнинг шеърий услуби учун хосдир. Маромига етган поэтик услуг бетук ижодкорларгагина хос бўлиб, улар ижодининг аввал-бошиданоқ шакланади, бу ўзига хос шеърий услуг кейинчалик фақат такомиллашиб, мукаммаллашиб боради, холос.

Шоирнинг энг сара шеърларида оддий гапдек туюлган ҳар бир сўз, ҳатто тиниш белгиси шеър олдига қўйилган ижодий ниятни рўёбга чиқаришга хизмат қилади. Унинг кўпчилик шеърлари монолог шаклида, лирик қаҳрамоннинг эҳтиросли, зиддиятли ўй-фикрлари асосига қурилади. Худди шундай услуг товланишларини “Уйқу”, “Кўриқхона”, “Маломат тошлари”, “Учинчи одам” каби шеърларда кўриш мумкин. Шоир “Уйқу” шеърини ўн, ўн беш йиллаб муттасил давом этадиган летаргия уйкуси деталидан фойдаланиб ёзган. Лирик қаҳрамон кўнгли ўртанган пайтлар узоқ йиллар ухлаш хоҳишини баён қила-

ди. Нима учун? Бунинг сабаби эҳтиросли мисраларда аён бўла боради:

Майлига, олис йил ухлайн, лекин
Энг кутлуғ саҳарда кўз очсан қайта.
Балки ер юзида қолмас эди ғам,
Бундан ҳам ёруғроқ бўларди дунё.

Шу тариқа сатрма-сатр “нотинч аср”нинг жароҳатлари, дардлари, зиддиятлари қофозга тўкила бошлайди. Лирик қаҳрамоннинг яккаю ёлғиз нияти шу асрнинг, даврнинг фарзанди сифатида уни соғ, бокира ҳолда кўриш. Шоир ўз поэтик мақсадини рёёбга чиқариш учун хилмажил бадиий воситалардан, чунончи қаршилантириш, зидлаш, кескин коллизиялар яратиш йўлидан боради. Мана бу сатрларга эътибор берайлик:

Асрим, самоларда ёқолдинг чироқ,
Юлдуз қилиб отдинг фазога ўзни.
Қўзгата олмадинг ўрнидан бироқ
Аскар елкасида турган юлдузни.

Шу биргина тўрт сатрда йигирманчи асрга хос зиддиятлар лўнда, образли ифодалаб берилган. Инсоният фантехника тараққиёти соҳасида мислсиз ютуқларга эришиб, ҳатто тубсиз осмон қаърига саёҳат қилишга, космик кемаларни учирешга, не-не ихтиrolар, кашфиётлар қилишга, дарёларнинг ўзанини саҳроларга буришга муваффақ бўлди. Бироқ инсонлар бир-бирларини тушуниб етишга, дўстликда, биродарликда яшашга ўргана олмадилар, ҳаётда разил кимсалар бўлмаслигининг уддасидан чиқа олмадилар. Инсониятнинг энг зўр ақл эгаларининг фикри-зикри оммавий қирғин қуроллари яратишга қаратилди, дунёning қудратли давлатларида лак-лак кўшин душман ҳамласини бартараф этишга шай ҳолда тутиб турилди. Мана шундай комилликка даъват этувчи, маънавиятни улуғлашга йўналтирилган, даврнинг ўткир муаммоларини кўтариб чиққан шеърлар шоир бутун ижодининг марказий мавзуларидан бирини ташкил этади.

“Маломат тошлари” ана шундай шеърлардан бири-дир. Бу кўп тарҳли интеллектуал шеърнинг фалсафий қир-раларини, маъно-мазмунини, гоясини дафъатан илғаб олиш осон эмас. Шоир давр ва одамлар ҳақидаги ўйла-рини ифодалашда бирмунча мураккаброқ йўлдан боради. Ҳаётда ҳар хил тошлар бўлади. Уларнинг баъзилари тош-дек юрагингта қадалади, дилингни вайрон қиласди. Улар ҳасад, фараз, туҳмат тошлари бўлиши мумкин дейди шоир. Лекин дунёда шундай тошлар ҳам борки, у ҳар кимнинг дилида бўлади. Булар отилмаган тошлар. Лекин унинг қалбда қолдирган жароҳати отилган тошдан минг чандон оғирроқ бўлади. Бу қандай тош бўлди экан:

У балки аликсиз қолган бир салом,
У балки авжида бўлинган калом,
У балки дўстингга очиб дил-юрак,
Тўйида айтилмай қолган бир тилак...
Инсоннинг то фазлу фалокати бор,
Унинг бир-бирига маломати бор.
Ташрифдан кўз тиккан bemорлардан то
Шоҳлар дилигача маломатdir жо.

Бу “нечоғ шафқатсиз тош” қадим дунё яралибдики, одамзодга илашиб олган, ундей айрилмайди:

Ҳануз сарҳадлардан ғамгин сас келур,
Маломат тошлари басма-бас келур.
Одамни маҳв этар фарзанди одам,
Одам эрур аммо томошабин ҳам.

Бу фафлат босган инсон қўйнидаги бошқа инсонга қаратилган меҳрсизлик, диёнат тошимикан, давроннинг (ахир у ҳам аслида одамлар изми билан юради-ку) инсонлар бошига солган ададсиз кулфатларимикин? Нима бўлганда ҳам бу тош бор экан, инсон мукаррам бўла олмайди.

Абдулла Орипов шеърияти учун ўткир сатирик рух, инсон камолоти ва маънавиятга қарши бўлган барча салбий кўринишларга аёвсиз муносабат хосдир.

Сафар Барноевнинг хотирлашича, ёш шоирнинг илк ижод намуналари ҳақида Абдулла Қаҳҳордан фикр сўрашганда, устоз ёзувчи бундай деган экан: “Шеъриятда кутимаган янги нафас пайдо бўлди. Томчини кузатган бўлсангиз, тўлишгандан кейин томади. Абдуллажоннинг шеърлари ҳам ана шундай. Олдин сўзма-сўз, сатрма-сатр юраги қонида қайнаб пишади”. Ушбу мулоҳазаларда Абдулла Ориповнинг ижодий услубига хос мұҳим белгилар, унинг шеър яратиш санъати “сири” очиб берилгандек. Шоир кўтпинча ўзини безовта қилган, оромини ўғирланган мавзу устида кунлаб, ойлаб мулоҳаза юритади, фикрлар обдан пишгач, қўлига қалам тутади.

Албатта, шоир шеъриятининг довруғи, таровати мавзу доирасининг кенглиги, қўлами билангина белгиланиб қолмайди. Ушбу мукаммаллик шеърий санъатнинг юксаклиги, ўзига хос услуг товланишлари билан оҳанрабодек ўзига тортади.

Шоир бадиий тасвирни кучайтириш, фикрни яққол ифодалаш учун ўз поэтик ниятидан келиб чиқиб зарур ўринларда шеърни мурожаат, мулоқот шаклида қуради, ўхшатиш, сифатлаш, қаршилантириш каби бадиий воситалардан моҳирлик билан фойдаланади:

Кимлардир умрида бир шам ёқмасдан
Машъал бўлмоқликни қилгайлар даъво..,

ёки бўлмасам:

Тақдир қўлида ёйдек,
Эгилиб борар қаддим.

Шеърларнинг композицион қурилишида ҳам шоир ижодига хос шакл умумийлигини кузатиш мумкин. Кўпчилик кичик шеърлар ҳикматли сўзлар билан бошлиданади: “Токи тирик экан дунёда одам, унга ҳамроҳ эрур гоҳ шодлик, гоҳ фам” (“Байрам”). Бундай шеърларни хотималашда ҳам ўзига хослик бўргиб туради: “Бежиз айтмаганлар, асл ҳукмдор, Худонинг ердаги сояси бўлур” (“Шарқ ҳикматлари”). “Жангларда қай

ўзбек берган бўлса жон, унинг қаторида мен ҳам ўлганман” (“Мужоҳид”).

Бундай қараганда, шоир сатрларга тизган сўзлар ҳар кун ишлатиб юриладиган жайдари сўзлардан иборатдек туюлади. Бу аслида ҳам шундайдир. Бироқ шоир ҳар бир сўзга, товушга образ яратиш учун ранг танлаган мусаввир кўзи билан қарайди, ички мусиқийликка, интонацияга катта эътибор беради.

5

Башарги шоир шеъриятини мавжланиб оқаётган улкан дарёга, унинг асосий йўналишларини бу сўз уммонига куйилаётган ирмоқларга қиёслайдиган бўлсак, бу ирмоқлардан бирининг номи Ўзбекистон, Ватан, мишлий уйгонишга давват, истиқдол ўйлари, иккинчисининг номи ҳаёт, инсон ҳақидаги образли фалсафий мулоҳазалар ва ниҳоят учинчisinинг номи севги ҳақидаги оташин сўздир. Шуниси эътиборлики, бу уч йўналиш шоирнинг илк ижодидаёқ баравар намоён бўла бошлади. Шу ўринда 1962 йилда битилган “Куз хаёллари”, 1963 йилда ёзилган “Сен баҳорни соғинмадингми”, 1964 йилда эълон қилинган “Мен нечун севаман Ўзбекистонни?” шеърларини эслаш мумкин.

Шоирнинг бутун шеърияти сингари муҳабbat лирикаси ҳам ўзига хослиги, теранлиги, туйфуларнинг табиийлиги, ҳаётийлиги, реал воқеликка монандлиги билан ажралиб туради. Севги ҳақидаги ҳазин, мунгли оҳанглар ҳар қандай оҳ-воҳлар, ўлдим-куйдимлардан тамомила йироқ. Жавобсиз муҳабат изтироби, алами, чуқур инсоний кечинмалар, чинакам севги орзуманди бўлган катта қалб эгасининг дарду дунёси, ҳасратлари, ёниш-ўртанишлари, изтироблари шоир муҳабbat лирикасининг мазмунини ташкил этади.

Илк ижод намуналаридан бўлмиш “Сен баҳорни соғинмадингми” шеърида ҳали муҳабbat гавғоларига, қизларнинг “қўлидаги қонли ханжарларга”, “ўзини минг битта бозордан олиб, минг битта бозорга солган, тирноқлар беzagи саҳардан шомгача” эрмаги бўлган таннозларнинг макру ҳийлаларига рўбарў бўлмаган, севгида хиёнат қилиш-

нинг азобини тортмаган, ишқ қасридан “ҳоли забун”, “толеи тола-тола” бўлмаган, пок севги соғинчи, интизорлиги билан тўлиқ тоза қалбнинг баҳор насимидек ҳаётбахш, тоғ булоқларидек мусаффо туйфулари иншо этилади.

“Эслаш”, “Деразангни қоплар оқшом зулмати...”, “Чувалади ўйларим сенсиз”, “Хайр энди...”, “Йўлим бошлар...”, “Ёндиму ва лекин ҳижрон тунида...”, “Ёмғирли кун эди...”, “Кўйигил, у кунларни эслатма менга”, “Севги ўлими” каби ўнлаб шеърларни кўнгилхушлиқдан бутунлай бегона чинакам ишқнинг дардчил талқини, ошиқ қалб ўттанишларининг кўтаринки, юксак пардаларда ифодаланган оҳи, нидоси дейиш мумкин.

“Йўлим бошлар, кетарман бир кун...” деб бошланадиган шеърда муҳаббат изтироби, қийноқли севги “ёрилмаган ярадай севги” деган ўхшатиш воситасида таърифланади. Кечагина бир тан, бир вужуд бўлган икки инсоннинг ҳаёт йўллари қарама-қарши қутблар томон ажralиб кетмоқда. Улар энди бехосдан учрашиб қолсалар ҳам ўзларини мутлақо бегона одамлардек тутишга маҳкум. Ёрилмаган яра қанчалик азоб бергани сингари, бир қарорга келинмаган севги ҳам шунча азобли, қийноқли. Бироқ бир томон бир қарорга келганда ҳам иккинчи қалбда қолган жароҳат изи, изтироби ёрилмаган ярадан ҳам баттар оғриқли. Ўтмишга айланаётган масъуд дамларни унутиш эса мушкул. Шеърда ана шу инсоний дард, фожей лирик хусусият табиий ёритилади:

Кўчаларда ёр эмас энди
Тўқнашамиз бегона бўлиб.
Наҳот биздан қолмас ҳатто мунг
Наҳот бўлмас бирор хотирот?
Ишонмайман, муҳаббатдан сўнг
Бегоналиқ бошланса наҳот?!

Шоирнинг муҳаббат мавзусидаги бир қанча шеърларида азалий туйғунинг мана шундай зиддиятли, мураккаб жиҳатлари поэтиклаштирилади.

“Отелло”, “Гўзаллик”, “Мен сени куйламоқ истайман” каби бир қанча шеърларда шоирнинг муҳаббат

ҳақидаги идеаллари мужассам топган. Лирик қаҳрамон бутун қалб бағишиланган, бор вужуд фидо қилинганиң мұхаббатнигина тан олади. Шу билан бирга “чирой оламининг тенгсиз сайқали” бўлган гўзаллик, малак сиймолар дафъатан юракдан ғам-аламни кетказиб, самовий ҳисларга чўмдирса ҳам эстетик категория сифатида гўзалликнинг ички моҳияти, пари рухсорнинг маънавий олами бирламчи ўринда туради.

Шоир наздидаги севги талқини, вафо ва садоқат тушунчалари маънавий қадриятларимиз, миллий урф-одатларимиз чашмасидан сув ичади. “Аёл” шеъридаги “үн тўққиз ёшида бева қолган келинчак”нинг жангчи ёрига садоқати кимларгадир эриш туюлиши, фарбча яшаш тарзига унчалик ҳам мос келавермаслиги мумкин. Бироқ шарқона мезонлардан келиб чиқиб вафо, садоқат тимсоли, ёрнинг хотираси олдида ўз хузур-ҳаловатидан кечишнинг юксак намунаси сифатида талқин қилинади. Худди шундай талқин “Жўнар бўлдим мен бундан дилтанг” деб бошланадиган шеърнинг ҳам руҳига сингдириб юборилган. Маъшуқа ҳаётда ўзи танлаган йигитни юракдан севади. Унинг учун ҳар нарсага тайёр. Ҳатто осмондаги юлдузга айланса ҳам ёрининг ёнига тушишнинг иложини топишга ўзида куч топа олишига ишонади. Бироқ биргина монелик (“Отам оқ йўл берсайди бизга”) унинг ўз орзусига етишиши йўлида ўтиб бўлмас тўсиққа айланган. Халқимизда “ота рози — худо рози” деган нақл бор. Шарқона одоб-ахлоқ қанчалик оғир бўлмасин ота ризолигини олмасдан қалтис қадам ташлашдан, ўзини юлдуздек ёрнинг бағрига отишдан тияди.

Шоирнинг “Мұхаббат” шеъри бундай бошланади:

Ҳаёт мендан аямади неъматларини,
Не истасам берди доим, ҳеч бир тонмайман.
Фақатгина бир ғам ўртар юракларимни,
Мен мұхаббат тақдиримдан мақтанолмайман.

Лирик қаҳрамон ўзининг инкор этилган, жавобсиз қолган севгиси тарихини ҳеч нимани яширмасдан тўкиб солади. У ёниб, оташин эҳтирос билан севгану, бироқ кўнгил

шишаси “йўқ”, деган биргина сўздан чил-чил синган. Мана шундан унинг дунёси қоронғу. Вужудини ғам, андуҳ ўраб олган, кайфияти тушкун. Бироқ:

Ўтар экан ҳамма нарса, йўқ экан турғун,
Ҳатто севги неларгадир бўларкан таслим.
Бугун ҳаёт нималиги, севги йўриғи —
Бари маълум, ҳаммасига етади ақлим.

Шеърда Одам Ато ва Момо Ҳаводан мерос мўъжизавий туйғунинг одам баъзан ҳатто ўз-ўзига очиқ икрор бўлишга ботинавермайдиган пинҳоний жиҳатлари қаламга олинади.

Абдулла Ориповнинг муҳаббат лирикасида севгининг фожейи ҳолатлари ёрқин очиб берилган. Бунинг мисоли ўша “Муҳаббат” ёки бўлмасам “Биринчи муҳаббатим” шеърлари. Шоир бу фожейи севги талқини орқали муҳаббатнинг энг эҳтиросли, теран ва характерли қирраларини очиб беришга муваффақ бўлган. Бир жиҳатдан олганда, севги йўлидаги тўсиқлар қанчалар қаттиқ, оғир бўлса, унинг ички қуввати шунчалар кўп намоён бўла боради. Осон эришилган ва баҳтли-саодатли севги ўз кескинлигига кўра фожиали севги билан тенглаша олмайди. “Муҳаббат” шеърида муҳаббатнинг ана шу қирраси мөҳирона очиб берилган. Лирик қаҳрамон бутун дарду ҳасратларии очиқ-ошкора изҳор қиласи; севгисининг самимийлигига, туйғуларининг табиийлигига инонтиради.

Шеърда шоирнинг замонавий воқелик материали асосида севги мавзусига ўзига хос ёндашиши, ўз тафаккури ёғдуси билан қарashi мужассам топган. Лирик қаҳрамон муҳаббатни ҳаётнинг буюк неъмати, табиат инъоми деб билади, “гоҳо пинҳон, гоҳо асов дарёдай тошиб”, чин юракдан, самимий севганинги ошкора изҳор қиласи. Шеърда дунёдай қадими бу туйғуга банди бўлган қалбнинг ўртанишлари, зиддиятли ўй-фикрлари, ички қарама-қаршиликлари эҳтиросли ифодаланган. Оҳиста, бир маромда бошланган оҳанг мисрама-мисра таранглашиб, кескинлашиб боради. Бора-бора юрак ҳайқириғига, ўтли нидога айланади. Лирик қаҳрамон гоҳо “севги йўриғи”-

ни англаб етгандек бўлади. Яъни муҳаббат — бу ҳар бир ёшнинг қалбига меҳмон бўладиган ўткинчи бир ҳавас, лов этиб ёнади-ю, ташвишли ҳаётнинг бошқа синовлари олдида таслим бўлади, деган ўйларга ботиб, ўзини юпантиromoқчи бўлади.

Шеърда “баҳтли муҳаббат”га мұяссар бўлмаган қалбнинг дарду ҳасратлари, умид-ишончи, илтижоси, ҳеч қандай куч, панду насиҳат, зўрлаш билан воз кечтириб бўлмайдиган илоҳий туйғунинг сехру жозибаси чуқур, мураккаб кечинмалар тарзида берилади. Бирорни мажбуран жиноятга ундаш, бирор ўзига ёқмаган юмушни баҳаришга кўндириш мумкин, бироқ ҳеч қачон зўрлаб севдираш мумкин эмас, мажбуран айрилиққа гирифтор қилинган севги ҳам барибир бир умр қалбда қолади. Уни ҳеч қандай куч юрак жавҳаридан айира олмайди. Мана шу ҳолат шеърда ўзининг жозибали ифодасини топган.

Абдулла Ориповнинг муҳаббат лирикасига севги драмасини, қалб кечинмасининг ўзини бера билиш, севгувчи юрак ҳужайраларининг тебранишларини, титроғини ифодалай билиш хосдир. Бу жиҳатдан “Биринчи муҳаббатим” шеърини юракда армон бўлиб қолган муҳаббат ҳақидаги мунгли, ҳазин кўйта қиёслаш мумкин. Ҳар бир мисра, ҳар бир сатр, ҳар бир ўхшатиш армонли муҳаббатнинг лирик қаҳрамон қалбida, ўгу фикрида қолдирган асоратини чукурроқ очиб беришга қаратилган. Лирик қаҳрамон назарида чексиз фалакда кезиб юрган ой ҳам порламайди, бўзариб ботади, Зухра юлдузи ҳам мильтираб зўрға нур таратади. Унинг маъюс, ғамгин руҳи бутун борлиқни шу тарзда идрок қиласди. “Муҳаббат” шеъридаги сингари бу шеърда ҳам лирик қаҳрамон ўз ўтмиш ҳаётини бўяб-бежаб, “сайқаллаштириб” ўтиромайди, борини тўкиб солади. Чархи кажрафтторнинг гарди билан юракка, имонга зид йўл тутганлигини яшириб ўтиромайди:

Ўтди ёшлиқ завқ билан, гоҳи тўполон билан,
Гоҳида яҳши билан, гоҳида ёмон билан.

Айри ҳам тушдим баъзан қалб билан, имон билан,
Лекин сени йўқотдим, биринчи маҳаббатим,
Мангутафлатда қотдим, биринчи муҳаббатим.

Шеърда муҳаббат туйғуси минглаб кўз илғамас иплар воситасида муҳит, жамият билан чамбарчас чатишиб кетганлиги, тириклиқ, борлиқ дунё гоҳида англаш ғоятда мушқул сир-синоатларга тўлалиги, қувонч ва фам инсон ҳаётида ҳамиша эгизак юриши теран маъноли фалсафий қўйма сатрларда санъаткорона муҳрланади.

6

Шоирнинг достонлари ҳам адабиётимизда воқеа бўлган асарлар сирасига киради. Бу жиҳатдан айниқса “Жаннатга йўл” драматик достони ҳамда “Ҳаким ва ажал” достони характерлидир. “Жаннатга йўл” (1978 й.) турғунлик даври энг авж олган паллаларда жуда катта қийинчиликлар билан дунё юзини кўрди. Асар босилиб чиққандан кейин ҳам унга отилган маломат тошлари тўхтамади. Шоир “совет воқелигини” бузиб тасвирлашда айбланди. Марказқўмнинг, шахсан унинг биринчи котибининг топшириғига мувофиқ тузилган нуфузли комиссиянинг ижобий хулосасигина асарга қарши қаратилган ҳужумлар пайини бир даражада қирққандек бўлди. Аслида, бугунги кун нуқтаи назаридан қарайдиган бўлсак, диний-мифологик, хаёлий-фантастик шакллардан фойдаланиб битилган ушбу достонда чиндан ҳам “совет воқелиги бузиб кўрсатилганлиги” аён бўлади. Бу “бузиб кўрсатиш” энг адолатли, энг батартиб тузум деб айюҳаннос солинган жамиятнинг бутун норасоликлари, инсониятнинг энг илфор, энг тараққий топган қисми деб жар солинган совет ҳалқи яшаган муҳитнинг иллатлари рўйирост очиб ташланишида на-моён бўлади. Воқеалар тошқин пайти дарёга чўккан қизалоқни қутқармоқчи бўлиб ўзи ҳалок бўлган Йигит нариги дунёда Тарозибонга рўпара бўлишидан бошлилади. Ҳисоб-китобдан кейин Йигитнинг жаннатга кириши учун икки пайса савоб етишмаслиги аён бўлади. Тарозибон бунинг сабабини Йигитга қуидагича изоҳлайди:

Сен шоирсан, сенга Оллоҳ ёруғ нур берди,
Оташ берди, забон берди, ҳам улуг юрак.
Тимсолингда бечоралар ўз дардин кўрди,
Бахтин кўрди, шодликларни кўрганлар бешак...
Илоҳий дил берган эди сенга худойим,
Кулоқ сол деб шўрликларнинг оҳи-воҳига.
Сен-чи, само шуъласини куйладинг доим,
Шеърлар битдинг юлдузларга, гулга, охуга.

Йигитнинг аросатта ноил бўлишига унинг “бу дунёда” шоир бўлганлиги, фақат гуллар ва булбулларни куйлаб, ёвузликни кўрганда ўзини четта тортганлиги, уларга қарши курашмаганлиги сабаб бўлган экан. Тарозибоннинг “сийлови” билан Йигит аросат ялангликлари, жаннат ва дўзах остоналарида Онаси, Отаси, Дўсти ва бошқалар билан учрашади, Ифвогар ва Ҳасадгўйга дуч келади, кекса ва ёшнинг жанжали устидан чиқади ва “номукаммал заминда”ги ўз гуноҳдарини — ўғри, кассоб, пораҳўр, ифвогар, ҳасадгўй, нокас, тилёғлама, шайтон йўлдан урган, руҳи мажруҳ кимсаларга қарши курашмай, бундай иллатларнинг урчишига, одамзоднинг йўлдан озишига улуш қўшганлигини тўлароқ англай бошлайди. Эзгуликнинг йўли тўсиб қўйилганлигидан:

Ер юзида жанглар кечди қаттиқ, қатағон,
Оналарнинг дийдасидан оқди қонли ёш.

Воқеаларни ёритишнинг гўё “нариги дунё”да кечаёт-тандек усули танланиши ўзи яшаб турган ҳаётнинг реал манзаларини чизиш, барча қабоҳатлар илдизини кўрсатиб бериш, давр ва тузум ҳақидаги ўзини чуқур ўйлантирган, ташвишлантирган фикрларни образли тарзда ифодалаб бериш имонини берган. Қуйидаги мисралар бир заминда, бир осмон остида умргузаронлик қилиб муроса йўлини тополмаётган, бир-бирини еб ташлаш қасдида яшаётган инсоният қавмига қаратилган маломат тошидек янграйди, уни огоҳликка, вақт борида эсини йиғишириб олишга, маънавиятни асрашга чақиради:

Инсон зоти, сенинг недан каминг бор эди?
Сенга тангри берганди-ку тафаккур, имон.
Замин, ҳаво — бари сенда барқарор эди,
Нечун дилдан инсоғ ҳиссин айладинг гумдон?
Ахир сен ит эмасдинг-ку, беланиб лойга
Бир-билингни ғажисанг то суюк талашиб.
Самимият қайда эди, тафаккур қайдада.
Лугатингда гар бу сўзлар ётди қалашиб.
Ҳасад, иғво қайдан кирди шўрлик каллангта,
Қайдан сени чулғаб олди худбинлик, куфр.

“Жаннатта йўл” драматик достони даврнинг бадиий-эстетик моҳияти таг заминли ижтимоий-ғоявий йўналишдан туриб пухта таҳдил этилганлиги, юксак бадиий патфоси билан ўзбек достончилигига муҳим ютуқ бўлди.

“Ҳаким ва ажал” достони (1980 й.) Абу Али ибн Сино таваллудининг минг йилиларига бағишлаб ёзилган. Унинг мазмунини икки оғиз гапда айтиб бериш мумкин. Бухоронинг Афшонасидан чиққан ёш ҳакимнинг довруғи амирнинг ҳам қулоғига етиб боради ва хаста қизи шифо топиши илинжида уни Бухорога чорлайди. Ҳаким қизнинг ишқ дардига мубтало бўлганлигини аниқлайди. Руҳи тетиклашган Малика унга саройда табиб бўлиб қолишни таклиф этади. Бироқ ёш ҳакам кутубхонадан фойдаланиш унга кифоя қилишини илтимос қиласиди. Саройдаги ёш Мирзо бойлик илинжида Маликага уйланиш ниятида эди. Бироқ Ҳаким унга фақат севиб турмуш қуриши кераклигини уқтиргандан кейин Мирзонинг таъмали мақсади чил-чил синади. Ўч олиш ниятида тунда кутубхонага ўт қўяди. Буни Ҳакимдан кўрган амир уни Бухородан бадарға қиласиди. Карвон йўллари олимни Ҳамадонга элтади. Бу ерда ўз илму амали билан вазир лавозимиға тайинланади. Бироқ бойлик ва таҳт юлдузидан айрилганлигини Ҳакимдан кўрган, Маликанинг амри билан Бухородан чиқариб юборилган Мирзо бу ерга ҳам етиб келади. Ҳеч нарсадан гумонсирамаган очиқ қалб Ҳаким уни кеширади ва ўзига шогирд қилиб олади. Айёрлик билан Ҳакимга сирдош бўлиб олган Мирзо тиб илмида буюк инқилоб юз бераётганлигидан — Ҳаким ажалга даво

топганлигидан воқиғ бўлади. Ҳасад унинг ичини қуртдек кемиради. Вақти келиб Ҳаким ажал билан юзма-юз келади ва ҳаёт дорисини ўзида синашга қарор қиласди — доруларни бир-бир томизишни Мирзодан илтимос қиласди. Ногоҳ унинг вужудида тириклик аломатлари кўрина бошлайди, нафас ола бошлайди. Бироқ Мирзо охирги шишадаги дороуни Ҳакимнинг лабларига қўймайди. Шу тариқа ажалнинг давоси топилмай қолади. Достоннинг насрый баёнини шундай ифодалаш мумкин. Бироқ унинг шеърий баёни китобхонни оҳанрабодек ўзига тортади. Одатда эпик жанрдаги шеърий асарлар доимо ҳам шиддатли, таранг оҳангда давом этавермайди. Бу достонда эса шоир ҳар бир мисра устида қаттиқ тер тўқади. Халқ ривоятлари ва тарихий воқеалар асосида буюк ҳаким ва қомусий аллома образини яратиш мақсад қилиб қўйилган достон санъат асарларининг марказида турадиган азалий мавзулар — мангулик ва ўлимнинг моҳияти, эзгулик ва ҳасаднинг азалий кураши муаммоси бадиий юксак, қўйма сатрларда талқин этилиши билан адабиётимизда катта жанрдаги шеърий асарларнинг энг яхши намуналаридан бири бўлиб қолди.

Ёмонликка қарши ўт очиш қайта қуриш йилларида ёзилган “Ранжком” достонининг ҳам бош гоясини ташкил этади. Юмуши ифво, туҳмат қилишдан иборат уч ноқаснинг “фисқу фасод қўмитаси” тузиб олганлигини тасвирлаш воситасида уларнинг асл афт-башаралари очиб ташланади.

Юртимиз мустақилликка эришгандан кейин, 1995 йилда битилган “Соҳибқирон” шеърий драмаси шоир ижодида ҳам, адабиётимиз ривожида ҳам ўзига хос ўринда туради.

Бу даврга келиб ниҳоят ижодкор аҳли учун ҳам ҳар қандай “изм”ларда холи чинакам эркин ижод даври бошланди. Мустақиллик, истиқлол берган неъмат тарихда ўтган буюк сиймоларимиз, чунончи соҳибқирон Амир Темур тўғрисидаги бор ҳақиқатни айтиш имкониятини берди.

Гарчанд шоир тарихий воқеаларга асосланиб, “адолат ва дини ислом ҳимояси деб ер юзини фатҳ айлаган, тар-

тиб ўрнатган” буюк аждодимизнинг реалистик, ҳаққоний образини яратиш ниятида ўтмиш тарихимизга мурожаат қилган бўлса ҳам, асар теран замонавий аҳамият касб этган. Шоирнинг “Соҳибқирон” асаримни ўтмишга боқиб, бугун учун ёзганман”, деган сўзларида катта маъно бор. Буюк жаҳонгирнинг қўйидаги сўзлари ҳуқуқий, инсонпарвар демократик жамият қуришга, Ўзбекистонни дунёning ривожланган мамлакатлари қаторига олиб чиқишига аҳд қилган биз замондошларга қаратилгандек:

Буюк давлат барпо этдим,
Тангрига шукр,
Золимларнинг тааррузли қўлларини мен
Мазлумларнинг этагидан юлқиб ташладим.
Маслак ила тариқатни ҳимоя айлаб,
Монеъ бўлдим имонсизлик, зўравонликка.
Сиз миллатнинг дардларига дармон бўлингиз,
Йўқсулларни асло бойлар зулмига берманг.
Орангизга сира-сира тушмасин нифоқ,
Умр бўйи ҳазар қилинг мунофиқлардан,
Болаларим, хоинлардан бўлинг эҳтиёт,
Инсон зоти кўп нарсага чидайди, аммо
Гар адолат поймол бўлса — тоқат қилолмас.
Адолат ва озодликни муқаддас билинг.
Йўлдошингиз бўлсин доим ақлу тажриба,
Ҳар кимларнинг қутқусига дафъатан учманг...
Тожу тахтни мендек узоқ сақлай десангиз,
Қиличингиз ўйлаб чекинг, бўлинг ҳамжиҳат.
Шунқорларим, адолатни дастур қилингиз,
Энг аввало, Ватан ила Миллатни асранг.

Драма Амир Темур ҳаётининг сўнгги йиллари тасвири орқали “куч— адолатдадир” деган ақидани ўзига шиор қилиб олиб, тарқоқ улусларни бирлаштириб буюк давлат тузган, қадами етган ерда бунёдкорлик ишлари билан банд бўлган, ҳарбий саркардалик бобида бебаҳо мерос қолдирган, элсевар, юртнинг ҳаловати, шони, шавкати йўлида оромидан кечган буюк инсоннинг теран образи яратиб берилганлиги билан қимматлидир.

Чинакам халқ шоири, замонавий ўзбек адабиётининг улкан намояндаси Абдулла Ориповнинг ижодий қиёфаси фақат шеъру достонлари билангина чекланиб қолмайди. Унинг шеърият мавзусига, адабиётимизнинг атоқли вакиллариFaфур Фулом, Ойбек, Абдулла Қаҳдор, Усмон Носир ижодига доир мақола ва сұхбатлари, даврнинг ўткир масалаларига бағишиланган публицистик ижоди ҳам фикрлашдаги ўзига хослик, топқырлик, масаланинг моҳиятини тушунтиришдаги зүкколиги билан ажralиб туради. У дунё адабиётининг мумтоз намунаси, улуғ итальян шоири Данте Алигьериининг “Илоҳий комедия”сини маҳорат билан ўзбекча сўзлатди, украин мумтоз шоираси Леся Українканинг “Мағораларда” драматик достонини, венгр драматурги Еньё Хельтаннинг “Соқов Рицарь” шеърий драмасини ҳамда Низомий Ганжавий, Пушкин, Т. Шевченко, К. Кулиев ва бошқа шоирларнинг талай шеърларини таржима қилди. Унинг бу соҳадаги фаолиятини кўздан кечириш асосан ўз руҳига яқин асарларни таржима қилишга интилганлигини кўрсатади. Шу боисдан ҳам улар маҳорат билан ўтирилган, асл нусханинг ифори тўкилмасдан худди аслан она тилимизда яратилгандек туялади:

Дарёлар гувиллаб чопар денгизга,
Кушлар хаёлингни завққа ўрайди.
Замин мўъжизалар берару бизга,
Эвазига фақат ҳайрат сўрайди.

Мустақиллик, истиқдол йилларида шоир ижоди янги поғонага кўтарилиди, халқ ва юрт ташвиши ҳақидаги ўйлар янада теранлашди. “Шоир қалби” (1998 йил) шеърида шоир ўзи бир умр севиб куйлаган юртга бўлган теран туйфуларини куйидагича изҳор этди:

Юртда не муборак ишлар бўлғувси,
Ундан шоир қалби шавққа тўлғувси...

Унинг ҳар гўшаси жаҳондир менга,
Тошлиқ йўллари ҳам равондир менга...
Мавжига ногаён кимдир тош отгай,
Зарби юрагимнинг тубига ботгай...
Гар сен дарё бўлсанг — ирмоғингдирман,
Лат есанг, оғриқли бармоғингдирман.

“Ҳикмат садолари”, “Ҳаж дафтари”, “Женева дафтари”га кирган туркум шеърлар ёзди. “Халқ”, “Ватан”, “Туркистон болаларига”, “Ўзбек қомуси”, “Фидойи” каби шеърларда Ватан мавзусининг янги қирралари очиб берилди, юртнинг корига яраган эзгу фазилатли инсонлар образи яратилди. Бу шеърларнинг мазмун-мундарижасини Ватан ва халқ шаънига мадҳия айтиш, мавжуд реаликни шунчаки таъкидлаш ташкил этмайди. Уларда жаҳон цивилизациясига салмоқли ҳисса қўшган қадим юртнинг, “жонида бир гавҳар бор”, қонида “иймон нури доимо оқиб турган”, “каттакон йўлга чиққан” халқ кечмиши ва истиқболи манзаралари чизилади, масъулиятли, бутунга хос хусусиятлар бадиий гавдалантирилади, инсон ва жамият, инсон ва табиат мавзусидаги азалий ўйлар давом эттирилади. Истиқдолнинг қадрига етиш, Ватанин кўз қорачигидек асрараш, ўтмиш сабоқларидан қатъий холоса чиқариб, ниҳоят “оломонлик” психологиясини улоқтириб ташлаб, ҳақ-хукуқини, жаҳонаро қадрини таниган халқ бўлишга даъват, келажаги буюк Ўзбекистоннинг саодати унинг фарзандларининг яққаламлигида эканлиги ҳиссий-образли йўсинда ифодалаб берилади.

Виждондан айрилиб қолган фурсатда
Бошланар тож-тахтга ружу дафъатан.

Не-не зукко халқлар қолиб гафлатда
Тўзғиб кетажакдир бутун бир Ватан...

ёки

Чинор бўлиб илдиз отинг, қоя бўлиб тиклангиз қад,
Улуғ-улуг аждодларнинг хавотири Сиздан беҳад...
Ўтинг ила ҳасратимни насиҳат деб юзга солманг,
Худо инсоғ берган куни бармоғингиз тишлаб қолманг, —

каби мисрларда орзиқиб кутилган истиқолни мустаҳкамлашга, яқдилликка, огоҳликка, ўзликни танишга, “урфони зўр миллат бўлиш”га, ўткинчи зеб-зийнатларга муккасидан кетишдан баланд туриб, “юрак жавҳари”ни асраршга, юксак маънавият эгаси бўлишга даъват янграйди, она-юртнинг камоли учун юракдан куйинган бедор қалб ўртанишлари кечинмалар тарзида берилади.

Чуқур фалсафийлик, бутун бир шеърнинг вақт ва замон, инсон ва табиат муносабатлари замирига қурилиши, ҳар бир сатрда чатнаб турган тафаккур ёғдулари сингари шоирнинг бутун ижодига хос хусусиятлар тўқсонинчи йилларда ёзилган “Майна”, “Буюклиқ”, “Армон эмасми?”, “Адолат”, “Дунё”, “Бир қарасам...” каби шеърларда изчил давом эттирилди.

Энг сўнгги вақтларда ёзилган “Ўзбекистон асри”, “Олий неъмат”, “Бедорлик”, “Йўлтўсар” каби шеърларда ҳам Ўзбекистоннинг буюк келажагига ишонч туйгулари тараннум этилди, буюк давлат қурилиши йўлида тўғаноқ бўлмоқчи бўлган дайди тўдалар, қаланғи-қасанғиларнинг шум нияти, разил қиёфаси фош этилди.

Яқингинада ёзилган “Шоир юраги” шеърида ижодкор қалби оламда юз бераётган барча ҳодисалар бир-бир ўтадиган кўприкка қиёсланади. Бу кўприкдан соғлар ҳам, беморлар ҳам, сultonлар ҳам, қуллар ҳам, суйишганлар ҳам, бир-бирига ғанимлар ҳам, нур билан зулмат, ўлим ва ҳаёт бир-бир ўтади. Шеърда ҳар бир чинакам шоир “инсоният кўприги”дан галма-гал ўтаётган одамлар дилидан кечётган ҳис-туйгуларни, даврнинг “юрак уриши”-ни бадиий муҳрлашга масъулдир, деган ғоя сингдирилган.

Бу масъуллик ҳалқимизнинг севимли шоири тарихга “Ўзбекистон асри” бўлиб киражак йигирма биринчи асрда ҳам “инсоният ҳис-туйгулари кўприги”да собит туражагига қатъий ишонч уйғотади.

Дониёр БЕГИМҚУЛОВ

МУНДАРИЖА

Кўрган-билганиларим 5

Шеърлар

Учқун	14
Кушча	14
Юлдузлар	15
Тоғлар	16
Чўпон	17
Капалак ва мен	17
Қўшиғим каби	18
Келингиз, дўстларим	18
Баҳор	19
“Тонгни ҳам осмонга тик боқиб кутдим...”	20
“Умр дуч қиласкан...”	20
Софдил	21
“Ҳали олдиндадир...”	21
Севгисиз одам	22
Сув париси	23
“Кулма-кулма...”	25
“Тонгни ҳам...”	25
Сендан йироқда	25
“Шовуллади...”	26
“Номаълум қиз” суратига...”	26
Куз хаёллари	27
Дарбанд дарёси	29
Қўл	30
Одамлар	30
Эслаш	31
“Деразангни...”	32

“Ўйлардимки...”	33
Қалам	33
“Жажжи гўдак, сен туғилдинг...”	34
“Баҳт кутмасман...”	35
Пушкин	34
Онамга хат	37
Сен баҳорни соғинмадингми	38
“Мен қувонар бўлсам...”	39
Булоқ	39
Гиёҳ	39
“Жўнар бўлдим...”	40
Курсдошларимга	41
Шундай яшар одатда одам	42
Милтирайди митти юлдуз	42
Бургут	43
Мен нечун севаман Ўзбекистонни	44
Альбомга	45
“Муножот”ни тинглаб	47
“Бола эдим...”	48
Асримиз одами	49
Булут	50
Ўзбекистонда куз	51
“Йўлим бошлар...”	53
“Сен Пушкиннинг севган малаги...”	54
“Юлдузлар ўтига...”	54
“У кўшиқ куйлади...”	55
“Уни кўрсам...”	56
Куз манзараси	57
“Гоҳо ер меҳрини ўйларкан...”	57
“Қўй, дўстим, тилларанг шаробдан менга...”	58
“Булут тошди...”	58
“Нега мени севмадинг...”	59
Юзма-юз	60
“Кел, ёруғ эт...”	67
Айрилиқ кўшиғи	68
Қасам дара	69

“Қани, най бер менга, дўстгинам...”	71
“Учқур хаёл соҳиби йигит...”	72
Геолог Ҳабиб Абдуллаев қабри ёнида	73
Истакларим	73
“Уйғон, қүёш ўйнар...”	74
Она тилимга	74
Дорбоз	75
Тилла балиқча	75
Ҳайвонот боғида	76
Булбул	76
Темир одам	77
Уйқу	79
Отелло	81
Аёл	83
Этгали	84
Тун	85
Ҳаёт ишқи	86
“Үтинаман...”	86
Армон	87
“Оилада туғилса гўдак...”	88
Улғайиш	90
Муҳаббат	91
“Кўпдан кутган эдим...”	93
Чол ва “коммунизм” қиссаси	94
“Хайр энди...”	96
Қонли кўйлак	97
Хўроҳанд	98
Газета сотувчи	99
Хуш келибсан, янги йил	100
Авлодларга мактуб	101
“Хат ёзмадим...”	104
Онам вафотига	104
Кетгандар ёди бу	105
Онажон	106
Най	110
Шоирлар ҳаёти	111

Жаннат	111
“Чувалади ўйларим сенсиз...”	112
“Ёмғирли кун эди...”	113
“Осмон уфқларга...”	113
Сароб	114
Табиат	117
Алвидо, устоз	119
Баҳор шамоли	120
Юрак ва ақл	121
Баҳор	122
Сенга	126
Созим	127
Она	128
“Ўзимни...”	128
Мен сени куйламоқ истайман	129
Арманистон	130
Нечун тим қорадур арман кўзлари	133
“Алвидо, деб...”	133
Севан кўли	133
Ереван кўчасида	134
Нутқ	135
Кушчага	136
“Кўйгил, у кунларни эслатма менга...”	137
Гўзаллик	138
“Оҳ уриб ҳар ёнда изфийди шамол...”	139
“Баҳор кунларида...”	139
Куз манзаралари	140
Севги ўлими	140
Оҳу	141
Паҳлавон Маҳмуд қабри қошида	142
Абдулла Қаҳҳор	143
“Оталар...”	143
“Умр ўтиб борар...”	144
“Дунё бир гулзордир...”	144
Шоир	145
Совфа	146

Ёзажакман	148
Минораи калон тепасидаги лайлак	149
Алишер	150
Алишернинг онаси	152
Горький	153
Жумбоқ	154
Хатолар	154
Биринчи мұхаббатим	155
“Бул ажаб...”	156
“Севгидан...”	157
Самолётда ёзилған шеър	157
Бу кун	158
Баҳор кунларида	159
Кетмоқдаман	160
Илғор ишчи ва чаққон мұхбир қиссаси	151
Ҳақиқат йўллари	165
Юртим шамоли	167
Саратон	169
Хотирот	171
Она сайёра	172
“Бу жойларга нега келдим мен...”	174
“Оташга сиринди бир замон халқим...”	174
Қанот	174
“Ёндиму ва лекин ҳижрон тунида...”	175
Илк севги	175
“Оҳ, ўтган у кунлар қайтмагай зинҳор...”	176
Бизникилар	176
Рұҳим	177
Чексизлик	178
Ўзбекистон	182
Қарши қўшиғи	187
Кенглиқ нуқтаси	189
“Дўрмон боғларига...”	189
Илтижо	190
Ҳамид Олимжон хотирасига	192
Кирғиз диёри	193

“Кузак шамоллари...”	194
Кутлов	196
Ўрмон	197
Дорилфунунга	197
Шоир	198
Сергей Есенинга	199
Мўмин Мирзо	200
Номаълум одам	201
Некрасов ҳасрати	202
“Келдим...”	203
Мактуб	204
Чорлаш	204
“Булбул ўтгай эрур зоғлар орасида...”	204
Ёлғизлик	205
Сув	206
“Ногоҳ энтиқди-ю, эгилди камон...”	206
Ҳангома	207
Муаллим	211
“Болалик йилларим...”	212
Саодат	213
Қўшиқ	214
Қозоғистон	215
Қозоғистон оҳуси	216
Софинч	217
Яхмалак	218
“Нимаики ёзма...”	219
Насиҳат	219
Генетика	220
Денгизга	223
Аллома	225
Қасоскор ҳақида баллада	227
Турмуш ташвишлари	228
Музаффар ўлка	229
Танишлар	229
Ният	230
Умр	231

Мен англаб етган фалсафа	231
Онамни эслаб	232
Ойбек номли хўжалиқда	232
Баҳор нашидаси	233
Глобус	234
Ёшлик	236
Ҳамза монологи	238
Ирода	239
Муаллимларга	240
Чўли бобонинг набираларига дегани	241
Саломнома	242
Ҳавас	243
“Фаним бўйлмасмиз...”	244
Райхон	245
“Хаддим борми сизга...”	247
“Сен борсан...”	247
“Саҳро сўқмоғида бошин эгиб жим...”	247
Генерал	248
Авлодлар ҳикояси	250
Шукронा	250
Каклигим	251
“Инонгил сен...”	251
Икки сония	252
“Тингли, бу абадий садо бўлади...”	252
Тарбия	253
“Ошиқни тасвирлай дегандим бирров...”	259
“Дунёда...”	259
“Сен менинг...”	259
Қиши кечаси	260
Сенинг овозинг	260
Тафаккур монологи	261
Бир танишим ҳақида баллада	263
Маломат тошлари	266
Хотира	269
Омад ҳақида	270
Сурат ва сийрат	271

Тақлидчи шоирга	271
Баҳор сеникидир	272
Сурур	272
Момо офтоб	273
Нисбийлик	275
Миш-миш	275
Фазал	276
Қор	277
Таржимаи ҳол	278
“Туман тушаётир...”	278
Йиллар армони	279
“Коинот гултожи инсондир азал...”	279
Январь	280
Икар	281
Изҳор	283
Талаба журналистга	283
Умр ўртаси	284
Хайрихоҳ	285
Ҳолат	286
Висол	287
Диёр	288
“Оқ қофоз...”	289
Кавказ	290
Онажоним, шеърият	292
Карвон	295
Ёш рассомларга	296
Баҳор хосияти	298
Инсон қалби	298
Шоир ва илҳом	299
Оила	301
Самовий меҳмон, беш донишманд ва фаррош кампир қиссаси	302
“Ҳикматли гапларга...”	307
“Ҳўқизнинг бўйнига тақсанг тақинчоқ...”	307
“Донишманд дедики...”	307
Аён бўлғай	308

Бахмаллик гилам тўқувчи қизларга	309
Пахтакор Абдурайим ака билан баҳт ҳақида сұхбат.....	310
Бобо ва набира	311
“Бунчалар камолот, айт-чи кимда бор...”	311
Бир устоз ўғити	312
“Оқар дарёга ҳам...”	312
“Ҳар қалай...”	312
Истак	312
Зиё	313
Озарбайжон	314
Инсон манзараси	316
Кўриқҳона.....	318
Учинчи одам	319
Илтимос	321
Тулки фалсафаси	322
Дўстларимга айтганим	323
Дунёни қизғанма	323
Шарқ ҳикояси	324
Ишонч	327
Сен қайдан биласан	328
“Умр қисқа эди...”	328
“Дейдилар...”	329
Оломонга	329
Давра қўшиғи	330

Достонлар

Жаннатта йўл. Драматик достон	332
Ҳаким ва ажал. Достон.	371
Д.Бегимқулов. Шеъриятимиз юлдузи	390

Адабий-бадиий нашр

АБДУЛЛА ОРИПОВ

ТАНЛАНГАН АСАРЛАР

Тўрт жилдлик

Биринчи жилд

Шеърлар ва достонлар

Муҳаррир Жонибек Субҳон

Мусаввир Виталий Куликов

Бадиий муҳаррир Анатолий Бобров

Техник муҳаррир Татьяна Смирнова

Кичик муҳаррир Назми Фозилова

Мусаҳдиқ Мавжуда Насриддинова

Компьютерда тайёрловчи Эля Ким

ИБ № 3896

Босишга 18.10.2000 й.да рухсат этилди. Бичими $84 \times 108^1 / _{32}$. Офсет босма. $22,68+0,21$ вкл. шартли босма тобоқ. $17,0+0,25$ нашр босма тобоғи. К-1527 рақамли буюртма. 104-2000 рақамли шартнома. Жами 10000 нусха. Баҳоси шартнома асосида.

Ўзбекистон Республикаси Давлат матбуот қўмитасининг Гафур Гулом номидаги Адабиёт ва санъат нашриёти, 700129 Тошкент, Навоий кўчаси, 30.

Ўзбекистон Республикаси Давлат матбуот қўмитасининг Ижарадаги Тошкент матбаа комбинати. Тошкент. 700129. Навоий кўчаси, 30.

Орипов, Абдулла.

Танланган асарлар: 4 жилдлик /Сўнг сўз муаллифи: Д. Бегимқулов; Таҳрир ҳайъати: О. Шарафиддинов, М. Кўшжонов, Э. Воҳидов ва бошқ. — Т.: F. Фулом номидағи Адабиёт ва санъат нашр., 2000.— 1-жилд: Шеърлар ва достонлар. — 432 б.

Ўзининг оташин шеърияти билан ўзбек адабиётига янгича нафас, янгича рух олиб кирган Абдулла Орипов бугунги кунда ижоднинг камолот чўққисида. Унинг шеърларидағи теран фалсафийлик, шарқона донишмандлик, Ватаннинг шонли ўтмиши ва бугунги тақдирни, халқ қисмати ва келажаги учун бир комил фуқароларча куюнчаклиги, ҳаётдаги салбий кўринишларга муросасиз истеҳзоси кўп йиллардан бўён шеърият мухлислари диққатини ўзига оҳанрабодек тортиб келади.

Тўрт жилддаги “Танланган асарлар” — китобхонларга шоир ижоди билан яна бир марта тўлароқ танишиш имконини беради, деб ишонамиз.

Ўз2

Абдулла Орипов 1960 йиллар бошида.

Шоирнинг онаси Турди она Эрдона Карвон қизи.

Абдулла Орипов талабалар ҳузурида шеър ўқимоқда.
1971 йил.

Шоирнинг отаси Ориф бобо Убайдулла ўғли.

МУҲТАРАМ КИТОБХОНЛАР!

Faфур Fулом номидаги Адабиёт ва санъат нашриёти шоир Абдулла Ориповнинг тўрт жилдлик “Танланган асарлари”ни нашр этмоқда. Тўрт жилддаги китоблар 2000—2001 йилларда босмадан чиқарилади.